

中國第一歷史檔案館
遼寧省檔案館

編

中國明朝檔案總匯

(八二)

廣西師範大學出版社

中國第一歷史檔案館
遼寧省檔案館

編

中國明朝檔案總匯

(八二)

廣西師範大學出版社



目錄

崇禎存實疏鈔

五卷

戶部尚書畢自嚴等為遵旨詳察貴州裁解銀兩確數事題本	崇禎六年正月十一日	四
戶部尚書畢自嚴等為遵旨會察山西撫賞錢糧事題本	崇禎六年正月十一日	二〇
吏部尚書李長庚等為惡生史孔吉倚勢生事合照原官降級事題本	崇禎六年正月初九日	二四
署吏部尚書曾楚鄉等為遵例歲終考核等事題本	崇禎五年十二月十一日	五九
湖廣道試御史林銘幾為陳國家賞罰大機事題本	崇禎六年正月十二日	六三
監視大同糧餉太監劉文忠為緝獲劫鞘響馬強賊事題本	崇禎六年正月初六日	六六
工部尚書周士樸等為操練伊始軍馬宜調等事題本	崇禎六年正月初八日	七一
后府帶俸右都督李國柱為蒙給造墳銀兩勅部給發事奏本	崇禎五年十二月十三日	七五
兵部尚書張鳳翼等為晉寇流近井陘等事題本	崇禎六年正月十六日	七八
戶部尚書畢自嚴等為截曠椿朋銀兩請勅補抵正項事題本	崇禎六年正月十四日	八三
吏部尚書李長庚等為奉旨察勘前后賊情事題本	崇禎六年正月初九日	八八
工部尚書周士樸等為山西長治開局打造軍需等事題本	崇禎六年正月十二日	一二八
工部尚書周士樸等為唐兒菴水門添修營房事題本	崇禎六年正月十四日	一三四
兵部尚書張鳳翼等為皇祖昭妃親弟劉岱援例請授伊男職級事題本	崇禎六年正月初八日	一三七
吏部尚書李長庚等為直糾通賄舊罪樞臣驟躡京堂事題本	崇禎六年正月初九日	一四六
工部尚書周士樸等為回覆順濟新河舊工錢糧事題本	崇禎五年十二月二十八日	一五二
兵部尚書張鳳翼等為陳地方募兵七說事題本	崇禎五年十二月二十八日	一七五

六卷

兵部尚書張鳳翼等為陳九連山設兵屯守之計事題本	崇禎六年正月十五日	一八四
吏部尚書李長庚等為鹽池大浸鹽官久缺等事題本	崇禎六年正月十六日	一九二
戶部尚書畢自嚴等為年終奏報鹽課關稅原額完欠等事題本	崇禎六年正月十一日	一九五
監視山西糧餉太監劉允中為州城戒備不嚴被賊卒攻而破等事題本	崇禎六年正月初八日	二〇〇
工部尚書周士樸等為報歲修新河工程事題本	崇禎五年十二月二十七日	二〇二
兵部尚書張鳳翼等為報陝西誅剿渠魁等事題本	崇禎六年正月十五日	二〇九
總理戶工兩部事務太監張彝憲等為參究欠解潮銀嚴察法處事題本	崇禎六年正月十七日	二三五
兵部尚書張鳳翼等為酌議益餉練兵等事題本	崇禎六年正月十六日	二四二
禮部祠祭司主事車夢瑤為布政莊廷臣或如吏部議罰或令儀制詳察事奏本	崇禎六年正月十七日	二五八
日講官禮部左侍郎王應熊為被指參請賜斥放事奏本	崇禎六年正月十七日	二六八
大學士吳宗達為因病請休事奏本	崇禎六年正月二十日	二七一
大學士周延儒為因言求去事奏本	崇禎六年正月二十日	二七四
監視薊鎮中協太監王之心為哨探夷情事題本	崇禎六年正月十八日	二七六
監視宣鎮太監王坤為科臣陳于泰力排內員乞免謝奸事題本	崇禎六年正月十六日	二七九
錦衣衛掌衛事左都督王世盛為訪獲違制鑽營事題本	崇禎五年十二月十一日	二八五
戶科給事中馮元颺為特參禮部侍郎王應熊貪狡確據事題本	崇禎六年正月十七日	二九四
吏部尚書李長庚等為推補浙江布政使司右參政事題本	崇禎六年正月十八日	二九七
吏部尚書李長庚等為推補江西布政使司右參政事題本	崇禎六年正月十八日	二九八
吏部尚書李長庚等為人才疏塞任使宜周等事題本	崇禎六年正月十六日	三〇〇
監視薊鎮東協太監張國元為接獲東來回鄉事題本	崇禎六年正月十九日	三〇九
監視薊鎮東協太監張國元為呈解回鄉事題本	崇禎六年正月十九日	三一〇
兵部尚書張鳳翼等為邊工緊要尚多等事題本	崇禎六年正月二十日	三一四

兵部尚書張鳳翼等為旅順之兵扼險等事題本	崇禎六年正月二十日	三一九
兵部尚書張鳳翼等為零夷竊犯事題本	崇禎六年正月二十日	三二六
錦衣衛掌衛事左都督王世盛為廟享禮成陪官數少等事題本	崇禎六年正月十八日	三三〇
工部都水司主事葉重華為覆解發上供錢糧事奏本	崇禎六年正月十四日	三三二
甲字庫掌庫事太監李陞等為查明布疋織造事題本	崇禎六年正月十九日	三三七
監視登島等處太監呂直為營弁冒領官糧等事題本	崇禎六年正月十四日	三三九
司禮監秉筆太監王文政等為容妃墳地券久稽嚴勅部庫給辦事題本	崇禎六年正月二十日	三四二
工科給事中孫晉為內外六曹府縣宜責所司察弊厘革事題本	崇禎六年正月十八日	三四六
督發關寧援兵太監高起潛為報攻城日期事題本	崇禎六年正月十四日	三五一
戶部尚書畢自嚴等為盤驗新舊廩糧事題本	崇禎六年正月十八日	三五四
戶部廣司署司事郎中李公門為省直拖欠新舊光祿等項錢糧寬宥催發事奏本	崇禎六年正月十七日	三六五
禮部右侍郎林釭為辭掌院印務事奏本	崇禎六年正月十八日	三七〇
山西道試御史王一鶚為春陽已布解澤宜敷等事題本	崇禎六年正月十八日	三七三
戶部尚書畢自嚴等為刑臺沙河兩邑召買錢糧事題本	崇禎六年正月十九日	三七九
戶部尚書畢自嚴等為酌議挖運腳價事題本	崇禎六年正月十九日	三八二
戶部福建司署司事孫陞為遵查發放存恤遲緩情由事奏本	崇禎六年正月初九日	三八六
監視宣鎮太監王坤為清察班價壓欠數多等事題本	崇禎六年正月十六日	三八九
監視宣鎮太監王坤為報修過牆臺造發火器等事題本	崇禎六年正月十六日	三九三
總督東廠司禮監太監王文政為緝獲甲頭孔義等冒領布疋乞勅部究擬事題本	崇禎六年正月初九日	四〇六
順天府府尹莊欽鄰等為回覆孤貧關支冬布遲緩事奏本	崇禎六年正月初九日	四一〇
吏科給事中曹履泰為參南贛巡撫陸問禮失事該部看議事題本	崇禎六年正月二十日	四一四
禮部尚書黃汝良等為謹循職掌等事題本	崇禎六年正月二十日	四一八
福建道試御史黃金貴為言路似通而實塞等事題本	崇禎六年正月十九日	四二八

中府帶俸陽武侯薛濂為回覆被誣差人拿搶事奏本	崇禎六年正月十八日	四三三
監視薊鎮東協太監張國元為派修羅城事題本	崇禎六年正月十七日	四三六
監視薊鎮東協太監張國元為援例請發班軍等事題本	崇禎六年正月十七日	四四三
吏部尚書李長庚等為回覆蒲州知州畢達推升同知緣由事題本	崇禎六年正月二十日	四四八
工部尚書周士樸等為訪獲埋藏軍器事題本	崇禎六年正月十九日	四五一
工部尚書周士樸等為請勅存搭造材木成料事題本	崇禎六年正月二十日	四五四
福建道試御史米助國為陳安民實政事題本	崇禎六年正月十九日	四五七

崇禎存實疏鈔目錄

崇禎六年正月

十六日

戶部一本

又一本

吏部一本

吏部署部事存貯懸懸等一本

湖廣道試御史林銘凡一本

監視大同糧餉太監劉文忠一本

工部一本

後府帶俸右都督李國柱一本

兵部一本

十七日

戶部一本

欽奉明旨事

題貴州督按詳察無微請歸銀兩疏致
訓諭即與該免

遵旨會察撫賞事

題察明撫賞冊表給付各鎮
領回覆算

惡生借題誣陷等事

題試吏孔吉何勢生事合昭
原官降級

遵例歲終考覈等事

覆河南撫按各題袁光第
候選離寺遵後罰俸

賞罰國家大柄等事

題解菜園當欽依應昌等
逗遛當懲

緝獲劫竊鄉馬等事

題典史李榮春捉獲劫竊具
犯吳三漢等監追正法

操練伊始等事

題併發鉛鐵子暫為兼用鐵子解
到停給鉛子

皇恩直轄覆載等事

奏蒙給造墳銀兩勅部
給發

緊急賊情事

覆保定巡撫丁魁楚題晉冠流近井陘
險要益火器可無虞

截贖椿朋等事

覆山西監視撫按會題格贖銀額
茂盛等借名該撫足貯

吏部一本

奉旨察勘等事

題江西失事各官議將陸問禮等罰治

工部一本

謹陳職掌等事

題山西長治開局打造匠頭程石節省扣抵

又一本

遵旨具奏事

題唐兒庵水門添修營房主房請勅諸臣董率

兵部一本

聖恩共戴等事

題皇祖昭妃親弟劉岱援例請授伊男職級

十八日

吏部一本

直糾通賄等事

覆河南巡撫吳光義題曹復吉交多弊廣調南京衙門

工部一本

遵旨奏順濟等事

題河臣朱光祚歲修省存餘銀吏胥那借行撫提追

兵部一本

地事殊時異等事

題齊晉卓冠陸梁增兵取給贍行難候撫再奏從違

又一本

九連之賊巢等事

題勦湯九連賊窟清取即展而兵北守繪圖建覽

十九日

吏部一本

鹽池大浸等事

覆山西巡按羅元賓題鹽官久缺推擇才品有司陞補

戶部一本

年終奏報等事

覆察餉科臣朱國棟題准揚水災舊欠停免

監視西糧餉太監劉允中一本

州城戒備不嚴等事

題西賊夜陷遼州乞勅按臣嚴察失事官員究處

工部一本

恭報歲修新河等事

題知縣楊獻吉浮估河工降級管事

兵部一本

總理左兩部太監張昇憲等一本

恭報誅剿渠魁等事

參究解交潮銀等事

覆陝西總督洪承疇題合
勅按臣勘敘剿賊功案
題四川布政司解交潮銀合
當究明處分

戶部尚書臣畢自嚴等謹

題爲欽奉

明旨事貴州清吏司案呈崇禎伍年拾月拾壹日奉本部送戶科鈔出貴州巡按御史梁炳會同貴州總督朱燮元題前事內稱崇禎伍年正月初肆日准戶部咨題覆貴州布政司裁減賦役無徵銀兩緣繇奉

聖旨這貴州裁解銀兩據稱無徵請豁者幾半前時報部數多是何緣故事關錢糧豈容先後懸殊若此還著該督按詳察明白具奏欽此欽遵備行到臣就經備行布政司即將通省裁解銀兩作速察明確數詳報以憑會奏據該布政司回稱行據貴陽安順等府黃平青平等州縣回報前來并造有徵無徵各冊呈報到司該本司看得纂修全書原汰資餉一以杜墨吏之橫徵一以蘇小民之重困革無藝之徵以恤閭閻減不經之費少佐軍國

聖明在上節愛竝行黔額丁力差銀數僅米萬餘金雖不足中
州一邑然仰遵

明旨凡以綏黎裕

國者未嘗不奉行爲凜凜也但黔版圖原屬夷部所輸賦役
聊示羈縻使知漢法且田土盡屬土司自餘民產而隸州
縣者僅什一耳丁賦差徭隨其地產徵納或卽夷民應充
原未盡徵銀兩在官兼自叛後兵連拾載召復無人田土
拋荒未墾資濟全仰鄰封前之開載玖千肆拾壹兩零止
遵戶部原頒會計所載原額之數而報者蓋亦不敢失其
舊籍以先自遺漏在昔無事固皆有徵實數乃自遭變以
來委多荒失虛懸據原額而報之於前以勉應賦役全書
之檄繼據虛數而請蠲免於後實以求蘇軍民殘破之命
原不敢以有爲無且年來黔亂干戈擾攘曾費

國家金錢數百萬僅成撫局矧茲善後之始諸費殊艱若非

本院運籌節禦則不免於內請又何以區區無徵之數重
擾初復驚魂今既徵之苦於無應莫若豁之以布

聖恩察據各府呈報先奉兩院題裁官銀叁千伍百伍拾貳兩
貳錢玖分玖釐內除裁土司吏目朝

覲盤纏銀肆百貳拾伍兩舊係帶徵俟見年炤例徵解并倉斗
俸米柒百陸拾肆石貳斗初議折價每石捌錢續炤時價
改炤每石伍錢應除每石叁錢共除銀貳百貳拾玖兩貳
錢陸分外尚該銀貳千捌百玖拾捌兩叁分玖釐內有徵
銀壹千柒百壹拾肆兩叁錢捌分肆釐無徵銀壹千壹百
捌拾叁兩陸錢伍分伍釐又遵續奉部發本司裁減見任
各官費廩穴役工食等銀除誤開及總撤中有不合多數
剛除外共該銀玖千伍百叁拾壹兩壹錢壹分陸釐捌絲
隨督所屬府州縣官將與原報底冊逐一磨勘內除歸還
題復施秉縣免裁銀壹百柒拾玖兩貳錢捌分陸釐又互

同兩院裁官銀壹千肆百貳拾壹兩伍錢捌分伍釐陸毫
應入裁冗項款本司裁減銀共柒千玖百叁拾兩貳錢肆
分肆釐肆毫捌絲內有徵者肆千伍百伍拾玖兩玖錢陸
釐貳毫肆絲無徵者叁千叁百柒拾兩叁錢叁分捌釐壹
毫柒絲肆忽汰冗與裁減貳項通共銀壹萬捌百貳拾捌
兩貳錢捌分叁釐肆毫貳絲肆忽內有徵銀共陸千貳百
柒拾肆兩貳錢玖分貳毫肆絲卽以爲例每年起解以崇
禎叁年拾貳月初壹日方奉部覆

俞旨追徵卽應以崇禎肆年爲始起解除前肆起差官馬承祿
等共解過銀柒千叁拾肆兩叁分柒釐壹毫內已完足肆
年分銀陸千貳百柒拾肆兩貳錢玖分貳毫肆絲外解過
伍年分銀柒百伍拾玖兩柒錢肆分陸釐捌毫捌絲補解
銀兩見在追徵陸續起解無徵銀共肆千伍百伍拾叁兩
玖錢玖分叁釐壹毫柒絲肆忽應請轉達蠲豁小民除去

額載虛數庶有者不致拖逋而無者免其挂籍矣等因呈
詳總督部院朱熨元批前本部院同按院題裁冗官冗役
銀叁千伍百伍拾貳兩貳錢疏內明開有徵起解無徵蠲
免今察冊載止有貳千捌百玖拾捌兩叁分玖釐與原疏
互異該司徑裁撥入汰冗共銀玖千肆拾壹兩零而總數
又開壹萬捌百貳拾捌兩貳錢捌分零何盈縮之不一也
至於差官多解銀柒百伍拾玖兩柒錢肆分陸釐捌毫捌
絲預作伍年作何分解仰再細察報奉此又奉部院憲牌
前事仰司官吏即將前後汰冗裁減銀數及前詳有應刪
改處所逐一覈底順序清算明白俟說盈縮緣故再具一
詳并將前冊改正依部將汰冗與裁減各立一款款下方
註有無徵解冊尾分別明白備解一總炤規備造部科清
冊各壹本一併詳報以憑

奏報等因奉此又據經歷司呈鈔蒙察院梁炳批據詳冊開

列有徵無徵已有確數第事屬欽奉

明旨尤宜詳慎仍將請豁幾半報部數多先後懸殊緣故再加
詳察明白以便具

奏速蒙此該本司覆察得裁官銀叁千伍百伍拾貳兩零
內除土司吏目朝

覲盤纏俟見年徵解并俸米改折價銀外實止有貳千捌百玖
拾捌兩零是以原數有異至本司徑裁銀原有與兩院互
題裁同今兜底清算遵炤部頒同款內多減銀壹千柒百
捌拾陸兩肆錢壹分陸釐零行據各府申稱既奉部頒不
敢再瀆請免遵從徵解則貳疏所裁總該壹萬捌百貳拾
捌兩零先後盈縮不一之緣故此其差官多解銀兩奈黔
以叛後凋殘遵奉兩院行准部限嚴催猶恐有違且各府
追解未到勉於別項貸解俟有解至填補以致多解前銀
應作伍年之數俟後補解其前時報部數多者係炤從來

會計始額數目并無徵荒失之數通報在內不敢遺漏且係初報勿敢遽將無徵之數突鳴於

奏內所以先報數多之故也繼奉催造磨勘底冊及節奉部文有事涉懸揣滯礙不妨明白聲說改正之檄行據各府冊報無徵者強半又不得不從其另冊報部請蠲以致覆題無徵之數幾半先後懸殊以此原無別項情弊今遵憲行再加詳察剛改兌底順序清算改正前冊仍炤部文將汰冗款列於前減裁序接於後冊尾明白結總仍將有徵無徵數目各再具清冊呈請批示等因覆詳部院朱燮元批覆察既明仰炤部頒清冊將先後盈縮之故敘明冊報以便彙題繳又蒙察院梁炳批據察至再至三先後懸殊緣故已明白矣原奉有該撫按責成司府每歲同京邊彙

解太倉之

旨今該司清察既有定數即將銀嚴限起解速報解官姓名并

銀數起程定期仍刪詳文繁亂務彙簡明具呈以便入
告繳蒙此除差官起解銀兩併徑咨呈部院科道外等因呈詳
到臣該臣會同總督朱燮元看得貴州之有賊役也裁汰
之實較之他省甚難裁汰之數較之他省甚多因貴州地
瘠賦微總通省而計之丁田編派不過米萬餘金較他省
或以數拾萬或以數百萬相懸奚啻霄壤此自

國制貳百年來貴州賦役之額入不能供賦役之額出半仰
藉於川湖之協濟已久矣迨於今而有額無徵則自安苗
相繼叛亂未易復額而全徵也臣仰遵

明旨會同督臣重復詳察據冊報則有總數而無撤數以撤數
之難定也據詳文則有流官而無土官以土官之不測也
據田地則山箐谿澗倏耕倏廢一望岬嵯沙磧而糧稅不
能盡問也據民人則苗夷蠻仲倏叛倏服日費安插而糧
馬不能全問也卽據司臣屢報不過約略大數往返支撐

臣已幾經脣敝頽禿責司臣以清丁田而編派足徵比稅糧而總徹足徵司臣亦窮於心力而勢不能也乃臣與督臣之心則未已也漸漸清文漸漸墾耕務求足額有徵然而遽責成於一旦則勢亦不能也合就今日詳察有徵者督催速解無徵者

恩賜豁免庶稅糧得以實完夷土得以安堵

國計民生永有攸賴矣等因崇禎伍年拾月初拾日奉

聖旨該部察覈議覆欽此欽遵又於崇禎伍年拾月貳拾玖日奉本部送戶科鈔出貴州總督朱燮元會同巡按御史梁

炳題同前事等因崇禎伍年拾月貳拾捌日奉

聖旨該部知道欽此欽遵各鈔出到部通送到司案察崇禎叁年玖月內該貴州布政司左布政使朱芹具題內稱裁汰貴陽等拾府冗官俸糧柴馬衙役工食及各見任大小官門阜壯兵濫溢工食等費備用等銀共玖千肆拾壹兩捌

錢陸分米釐貳毫米絲肆忽又於崇禎肆年拾貳月內題
稱前項銀兩內裁官銀叁千伍百伍拾貳兩貳錢玖分玖
釐內有徵者壹千肆百貳拾伍兩伍錢伍分貳釐無徵者
貳千壹百貳拾陸兩米錢肆分米釐裁見任冗役工食等
銀共伍千肆百捌拾玖兩伍錢陸分捌釐貳毫米絲肆忽
內有徵者叁千陸拾貳兩貳錢米分米釐壹毫無徵者貳
千肆百貳拾米兩貳錢玖分壹釐壹毫米絲肆忽於內題
復施東縣治歸還俸費等銀壹百米拾玖兩貳錢捌分陸
釐其餘驛站鋪陳等銀捌百壹拾兩遠年久革虛數除貳
項實無徵銀壹千肆百叁拾捌兩伍釐壹毫米絲肆忽以
上共有徵銀肆千肆百捌拾米兩捌錢貳分玖釐壹毫共
無徵并復還施東縣俸費及鋪陳等銀肆千伍百伍拾肆
兩叁分捌釐壹毫米絲肆忽稱係地方殘破尚未全復開
墾失額無徵銀項遵奉

明旨改正造冊報部題豁等因崇禎肆年拾貳月初壹日奉

聖旨該部知道欽此欽遵鈔出到部曾經本部看得黔省版圖

窮荒深箐賦役輸納半屬夷部故徵解之法亦難與他省

槩論惟是該省於賦役全書額內業裁銀玖千肆拾壹兩

零具題報部矣何至解到銀數及續冊開報額外無徵者

多至肆千伍百伍拾肆兩零其有徵者不及原題之半雖

謂地方殘破開墾無人瘡痍荒域勢難取盈但前既報裁

數多續又請蠲幾半先後多寡懸殊事干錢糧臣部安敢

輕爲議豁也除將見解到銀兩劄庫察收外其無徵項款

仍應再行黔省撫按督令該布政司細加察核不得以有

徵爲無徵務酌議妥確具奏庶錢糧裁解畫一而法可永

遵矣等因題奉

欽依備行貴州督按詳察明白去後今據具覆前來該本司察

得貴州省左布政使朱芹原題裁減冗官冗役柴馬俸銀

公費等項共銀玖千肆拾壹兩捌錢陸分柒釐貳毫柒絲肆忽并本部於崇禎肆年柒月內就賦役全書內復裁銀壹千柒百捌拾陸兩肆錢壹分陸釐通共壹萬捌百貳拾捌兩貳錢捌分叁釐肆毫貳絲肆忽今據該省督按遵

旨重復詳察會疏內開有徵銀共陸千貳百柒拾肆兩貳錢玖分貳毫肆絲無徵銀肆千伍百伍拾叁兩玖錢玖分貳釐壹毫柒絲其有徵銀兩據稱崇禎叁年拾貳月初壹日方奉部覆

俞旨追徵卽應以崇禎肆年爲始起解今察肆年分差官馬承祿等肆起共解過銀柒千叁拾肆兩叁分柒釐壹毫除完過肆年分有徵銀陸千貳百柒拾肆兩貳錢玖分貳毫肆絲又透解過伍年分銀柒百伍拾玖兩柒錢肆分陸釐捌毫捌絲又本年拾壹月內差官陳俞忠等解到銀貳千陸百壹拾肆兩柒錢捌釐叁毫共完過伍年分銀叁千叁百

米拾肆兩肆錢伍分伍釐壹毫捌絲尚少銀貳千捌百玖拾玖兩捌錢叁分伍釐陸絲見在追徵起解其無徵銀兩據冊分款開報應裁冗官俸銀柴馬公費心紅油燭等項及冗役工食數目各係分派土司地方承納如係布按都參司首領者原派出於安宋貳宣慰司承納今叛失無徵如係貴陽府定番廣順貳州龍里衛者原派於廬山等土司水內叛土猛猖董紀六苗魁山甘河等夷承納今叛失無徵如係安順府鎮寧永寧普安等州普定安莊安南威清平壩普安等衛者原派於水內狗場等寨水內宣慰司火烘阿卜里歇水內叛夷今失額無徵如係平越府黃平州平越新添等衛者原派於各處附近叛賊王倫水外夷寨辦納今被殘久失無徵如係都勻府麻哈州清平衛鎮遠府思州府石阡府者原派於都勻衛沙壓田畝及清平兩江夷寨并接連叛地三宅溪棗兒園打鐵杉木峯岩等

處承納今荒叛失額又被王倫石勝鳳殘破無徵如係思南銅仁思州參府屬者原派出於紅苗鎮悍魔濟水東地方紅苗村寨三山悍苗地方承納今久叛占據被殘無徵以上無徵銀兩業經該省督按再四詳察逐款開報或荒或叛以致失額實無可徵案呈到部該臣等看得黔省原係土司歸附後始設流卽在清平之日官儒吏胥廩餼代耕等費多仰給於川湖協濟今殘破後則本省之徵額不充可知也賦役裁汰一項欲求其無虧原額似亦難矣惟是該布政司初報裁汰銀玖千肆拾餘兩繼報失額無徵銀肆千伍百伍拾餘兩此臣部所以不敢輕爲議豁而請旨勅該督按詳察具奏者也今據來疏內稱初報裁銀玖千肆拾壹兩者炤部頒會計始額并無徵荒失之數通報在內且係初報不敢遽然遺漏原額耳繼奉磨勘底冊檄行各府開報其無徵者強半始另冊報部請蠲此先報數多後

察實徵數少之故業經督按司道再三逐款察奏有徵者實止肆千伍百伍拾餘兩合之臣部徑裁銀壹千柒百捌拾陸兩零共計有徵應解銀陸千貳百柒拾餘兩其失額無徵者共計肆千伍百伍拾餘兩據冊剖晰似無他弊則有徵者自應解不後時而無徵者亦應卽與豁免以昭

聖明休養遐方至意仍令該省通行榜示勿使姦貪借名裁解混行科剝并

勅督按諸臣俟善後已定仍多方率勵設法招墾務求漸次復額以資贍衛以裕

國儲慎無泥今日之無徵爲後日之成例可也既經該省督按具題前來相應覆

請恭候

命下臣部咨行該省督按及炤會布政司一體遵奉施行

崇禎陸年正月拾壹日

拾陸日奉

聖旨這黔省無徵銀兩依議豁免仍著該督按大書榜示不許
婪猾隱濶科擾其善後設法招墾復額事宜併與飭行

戶部尚書臣畢自嚴等謹

題爲遵

旨會察撫賞事山西清吏司案呈崇禎伍年拾貳月拾柒日奉
本部送准大同巡撫張廷拱咨稱崇禎伍年拾壹月初玖
日准戶部咨該總理戶工兩部司禮監太監張昇憲奏前
事等因崇禎伍年拾月貳拾陸日奉

聖旨據察奏雲鎮撫賞錢糧各項侵那數至陸拾玖萬又東西
貳市實在項下該撫原疏尚少玖萬餘兩至卜賞拾伍年不
領竟未開報數目或冊與紅單不符或併紅單不解及校布
收發不對等款種種情弊殊可痛恨且本內管收除在俱起
自萬曆肆拾壹年乃宗祿撫賞不敷那借市本又自萬曆拾
陸等年算起是何緣故其中明係牽濶通著監視同該撫按
逐款清察覆覈併冊內經管督撫按道餉司各官挨年磨勘
侵染實情作何追抵分別明白確實奏奪如再有隱徇含糊

重治不貸該部知道欽此欽遵備咨前來又准監視大同太監劉文忠手本同前事准此除移會監視并巡按御史候期會察外所據原送卷宗擬合咨領爲此合咨貴部煩將察過本鎮原送撫賞卷宗給付差去員役齎押回鎮以憑會察具奏等因到部奉批此項卷宗欲行給發必須題

請山西司察行送司奉此崇禎陸年正月初五日又奉本部送准宣府巡撫焦源清咨同前事內稱謹會同監視宣鎮太監王坤巡按御史胡志藩看得撫賞錢糧先經本鎮監視會察冊報天啓末年拾貳月終止實在銀貨共肆拾貳萬陸千兩續蒙總理及兩部科司會察共該銀貨伍拾萬伍千有餘數相懸絕事關錢糧必得底冊卷案一一磨算方可明晰察歷年單卷等項於本年肆月內曾封送部科無憑察對似宜請發前來以便稽核再炤撫賞一案旣經改限次年正月自當恪遵但欲確察那抵侵缺情弊經手各

官尚多未到今轉盼正月恐未得就緒勢必至於愆期若待彼時方爲陳請固已晚矣懇祈部科原情寬限以待完結卽行具奏煩將前撫原送撫賞一切底冊單卷等項察照目錄發付差官賞給夫脚星夜齎領回鎮察算竝望賜示寬限日期庶錢糧可得清楚矣等因到部奉批據請撫賞卷冊山西司作速具題以便察發毋遲送司奉此察得參鎮撫賞卷冊先奉

明旨送部會察俱已察完封固候領今據各鎮咨領相應具題給發以便覆察具奏案呈到部該臣等看得宣大山山西參鎮撫賞錢糧底冊卷宗已經臣部會同總理科臣逐項察明具奏訖今各鎮奉有著監視會同撫按逐款清覈之

旨隨據宣大貳撫臣咨請前來山西雖未有咨似亦勢在必發合將原送文卷給付各鎮委官杜懷恩趙孟夏等領回覆算以便奏覆可也伏候

命下臣部遵奉施行

崇禎陸年正月拾壹日

拾陸日奉

聖旨是

吏部尚書臣李長庚等謹

題爲惡生借題誣陷孤臣據實鳴冤仰祈

聖鑒以正法紀以明公道事該本部題考功清吏司案呈崇禎
伍年拾壹月拾捌日奉本部送吏科鈔出刑部尚書胡應
台等題廣東清吏司案呈奉本部送刑科鈔出

欽差總理糧儲提督軍務兼巡撫應天等府地方都察院右僉
都御史莊祖誨題前事內稱崇禎伍年叁月拾叁日准刑
部咨該臣與按臣龔一程會題前事該本部於本年貳月
初貳日覆題拾柒日奉

聖旨據招鍾鼎以瑣事瀆奏蔑憲妄計明係刁橫史孔吉等特
勢凌迫生事啓釁亦屬可惡還著再行覈議奏奪欽此欽遵
備咨到臣准經會同按臣龔一程檄行徽寧道卽提鍾鼎
史孔吉等到道該道細加覆鞫擬議具招去後節經行催
間續於本年柒月初伍日據徽寧兵備道右叅政盧洪珪

呈問得壹名鍾鼎年參拾肆歲應天府府學生員溧陽縣人狀招鼎叨列青衿賦性狂悖自負機鋒與本縣在官鄉官史孔吉并伊已到官弟史兆吉同里居住鼎有未到官父鍾嶽秀先年曾買今在官史致鳳房業史兆吉不合見是同族之產爲鍾嶽秀所買妒其肘腋却又不合生事倚兄官勢冒稱祖業勒迫鍾嶽秀贖回一畧越占盡爲己有因此兩家遂成讎隙適有不在官蔣宗周屋業亦賣鍾嶽秀時有脫逃未到官蔣啓綬亦告取贖不得呈獻應天府爲魏璫祠基鼎意蔣啓綬係史孔吉門生疑其唆使乃作元日詩以譏刺之比有俱已到官鍾大樂鍾思信各不合從中構煽彼此偏袒於是兩家讎恨愈深互訐通衢蔓及父子兄弟親戚俱爲禍黨崇禎元年拾月內史孔吉遂以毒謀壘陷事詞控巡按田御史案下蒙批溧陽縣審擬將鍾嶽秀杖懲庾鯉庭姚鳳時大創鍾鼎等炤提具招申詳

本院蒙批鍾嶽秀當逆璫煽禍之時父子造倪刻錄陷害先達曲迎權姦真人世窮兇斯文敗類可一杖了事乎仰縣卽追出原刻炤律誣坐并嚴提鍾鼎重究一面先申學院再究招竝詳姚鳳時庚鯉庭各先加責伍拾板枷號壹箇月另詳報駁批本縣未結鼎懼再審必致罪重愈加忿激就不合潛逃至京時有已到官彭泰彥亦不合貪買鼎屋壹所鼎又不合輒以滅

旨蠹

國抗憲坑儒等事詞於崇禎貳年伍月拾伍日赴

闕妄奏史孔吉亦旋以惡生借題誣陷等事詞於崇禎貳年伍

月拾捌日赴

闕奏辯本年柒月貳拾貳日史孔吉奏內奉

聖旨史孔吉奏辯事情著該撫按從公察審具奏該部院知道

柒月貳拾叁日鼎奏內奉

聖旨著該部院叅看具奏俱奉

旨下部欽此欽遵通蒙刑部咨送都察院并南京刑部咨送南京都察院轉行巡撫曹都御史及巡按溫御史案下蒙兩院案驗通行帶管寧太道事徽安兵備左布政使王公弼處隨蒙道鈔案牌委寧國府去任知府黃夢松及太平府知府孫如蘭會審鼎宜靜聽公審爲是又不合具呈撫按兩院乞改行應寧太參府刑廳蒙陞任巡撫曹都御史前任巡按溫御史俱批到道改行應天府陞任推官饒可久會同寧國府去任推官蔡宸恩太平府丁憂推官梁應龍分行溧陽宜興貳縣提解去後續據宜興縣拘到犯人湯仲嘉李憲等溧陽縣拘到庾鯉庭鍾大樂史念惺趙子環吳泰張文江子秀潘于庭曹百備史其藻彭泰彥黃宿潘于陸等各解應天府刑廳及鼎與史孔吉史兆吉史儒縉史儒綱王蘊甫壽三史致鳳等各自赴廳投到取領候審

外鍾嶽秀將啓綖姚鳳時張邦義等仍未提到屢蒙兩院
憲牌行道嚴行參廳催結恐稽

欽案續該應天府推官饒可久定期於崇禎叁年拾月初拾日
會齊寧太兩刑廳察款喚質鼎又不合竟自臨審不出致
蒙推官饒可久參看得鍾鼎投到之初史鄉官欲收囹圄
本犯謂寧太貳府尚欲投到職思原奏

欽犯亦不敢擅禁豈料其審時不出也鍾鼎父鍾嶽秀亦關提
未到其史儒縉史儒綱臨審據稱母變回家雖見到者有
史孔吉史其藻曹百備史兆吉等而原奏人犯不到無憑
對質事干回

奏未敢草草結案當嚴比領保虞臣俟鍾鼎到日再行會審
等因具詳申報到道隨蒙本道副使盧洪珪看得鍾鼎史
孔吉一案屬帶道奉撫按兩院案驗轉行寧國太平兩知
府會審而鍾鼎不肯赴審因奉兩院改批應天寧國太平

參府刑廳會審院檄屢催不啻星火今參廳會審之日正
鍾鼎自白之時果有急情豈能緩愬乃犯官吏孔吉早已
投到獨鍾鼎久提方到而臨審復爾逃躲殊可駭異該廳
以伏

闕原奏不便收監遂致稽遲難以審結奉兩院屢催除批發參
廳嚴提會勘外但鼎住宜興非本道轄屬事關回

奏不敢頃刻遲緩合先具繇呈詳等因通詳撫按兩院俱蒙
批行本道轉行參廳催提并嚴比領人虞臣時鼎又不合
潛逃至京復懷本章赴

闕聲擾致蒙巡視兵科緝獲於崇禎叁年拾貳月拾壹日題奉
聖旨官儒人等果有屈情鼓下自可申奏何得闕前聲擾瀆涓
朝儀刁惡可知貳本不許封進鍾鼎著該城御史押解原籍
聽該撫按質審速奏沈繼芳著兵部看議來說朝官跟隨人
役有旨給牌出入會否遵行卽著巡視察明奏來該衙門知

道欽此崇禎肆年正月拾貳日又該本科覆題奉

聖旨聲冤人犯非有故縱情弊姑不窮究王孝禮等且饒他以
後著益加嚴密沈繼芳鍾鼎各遵前旨速行審奏該衙門知
道欽此欽遵隨蒙兩院憲牌通行本道及應天府刑廳迎提
問鼎又先是以歲考父子點冊各有名臨場點名俱不到
被黜亦不合朋肆猖狂具揭督學蔡御史案下內有爲史
孔吉修怨之語致蒙本院叅題爲梟生狂噬壞法亂紀懇
乞

聖明立賜處分以明心迹以維學政事等因於崇禎肆年貳月

拾壹日奉

聖旨鍾鼎已有旨押解該撫按質審這本內事情著一併究問
速奏蔡國用心迹自明不必控請該部知道欽此欽遵俱經
備行寧太道并應天府理刑官速審去後續據應天府推
官吳起龍呈稱鍾鼎於崇禎肆年貳月貳拾陸日據北京

中兵馬司差人孫奎等押解赴江寧縣時本廳署印當將
鼎收禁府所隨經移會寧太貳府推官約於崇禎肆年叁
月初伍日俱集溧水縣公署弔取一千人犯逐一研審乃
蔣啓綬姚鳳時鍾嶽秀等終避不出而鍾鼎史孔吉等互
相訐辯各執不一該臣會審得鍾鼎狂生也頗負才華與
史孔吉比廬託處家世相當雖復迥隔雲泥其意氣不屑
下也揆厥釁端先緣鍾鼎屋後穴窻史惡其對伊族人之
園也統僕塞之鼎父嶽秀買史致鳳之房屋且叁年官弟
兆吉妒其肘套封占逼勒終贖之爲已物而後快又蔣宗
周之產屋賣作嶽秀宗祠蔣啓綬告贖不遂呈獻爲逆豎
祠基啓綬史官門生也鼎疑其指喉而兩家之嫌隙愈深
矣屬有鼎讎鍾大樂者挑釁其間撫鼎元旦所吟之詩讚
爲譏刺更捫走候魏璫授揭中傷人之語以聳激史官致
榜揭通衢疊告作難嶽秀青衿被禁於黃知縣生祠鼎親

友庚鯉庭王蘊甫等亦株連繫獄鼎徙家宜興以避之而身至

雷都鳴訴復遭斥辱於承恩寺前則史官之疾惡不無已甚而鼎情終難忍欲鬪莫敵遂悻悻然將圖赴

闕而孔吉從弟史念惺託名解和先索其使費銀貳拾兩維時獄秀亦已悔禍乘史官父故借弔喪之名修行成之實史又執而撻之和議遂息而鼎愈苦無所容此瀆奏之舉誠有激而然耳鼎赴都後值學院試期點名不到按例而黜之鼎不思孽繇已作誣揭紛紛而且原奏未結再瀆

天庭視

聖明之階爲嘗試之地鼎之猖獗極矣今據兩疏所列皆持爭房爲禍源訊史致鳳之交易獄秀實未勒價倚勢撓贖者兆吉也致鳳嘵嘵且恨鍾而恨史矣及究獻屋媚逆之啓綆當學臣提革之日便已漏網深匿受嗾與否莫可相

質也其餘稱儒縉戮師則姚瑋已死姚鳳時杳杳無蹤冤
無對證難憑一面之詞也稱拷死鍾大鳴則大鳴之子思
信供伊父病故縱鼎執有思信親筆而無奈信之不認也
稱納命銀伍百兩則潘于陸等嚴刑不吐稱彭泰彥勒寫
房契則泰彥固代鼎稱貸之人鼎手書可據也稱灑賦千
餘石索例叁千兩則縣額與商人叩之莫得其實也諸如
此類多屬捕風藝語胡爲乎來哉惟史念惺講和未遂而
誘得使費之金無以自解鍾大樂構怨挑釁而故設莫須
有之案誠爲罪魁至於獄秀父子脫考受禡而誣爲修怨
儒縉兄弟據文優擢而誣爲曲庇逞口舌之利蟻風紀之
司鼎之無忌憚也一至此乎此卑職等從公從虛就事論
事如此若夫孔吉之官評各犯之罪擬

朝廷有

宸斷兩院有憲裁非卑職所敢擅議也等因於崇禎肆年叁月

內具繇通詳兩院蒙陞任巡撫曹都御史批開鍾鼎史孔
吉一案奉

旨從公察審具

奏則是非不兩在曲直宜詳剖難以含糊兩可草草塞責鍾
嶽秀蔣啓綖姚鳳時豈容抗

旨不出仰寧太道嚴提對質事干回

奏限叁日內確審招報等因又蒙巡按龔御史批開據參廳
會審兩造之因似矣但鍾鼎奏察伊父嶽秀生死何音今
未見說明科疏屢次

明旨亦未敘入學臣叅疏奉

旨一併究問當有定擬何以草草繇報寧太道備行各廳虛公
細酌覆確通詳兩院限叁日內事干回

奏速速報等因俱批到道時本道副使盧洪珪奉例押運天
津未回該暫攝寧太道事徽安兵備左布政使王公弼覆

行該廳提解鼎等一千人犯於崇禎肆年陸月拾叁日從
公研審察得鍾嶽秀蔣啓綖姚鳳時姚鳳培李憲伍犯均
屬喫緊對簿槩未提到若不提質何以別真偽而定爰書
第察伍犯據名口稱在宜興而鍾嶽秀姚鳳時匿於芳莊
李姓之家本道隔屬不便行提若終負嵎不出罪擬難定
有違

欽限合無呈請移會蘇松按院牌行宜興著令拘拏鍾嶽秀等
伍犯一併解發過道庶便覆訊明確招詳等因具繇通詳
蒙撫按貳院移會蘇松按院并憲牌嚴行推官吳起龍差
役分投宜興溧陽貳縣嚴提鍾嶽秀蔣啓綖姚鳳時叁犯
該溧陽縣申稱姚鳳時卽姚貞甫與鍾嶽秀上年差役內
卿押解本府馬政廳候審中途脫逃卽固匿宜興伊親李
竦家內至蔣啓綖壹犯未蒙之先於天啓柒年緣事脫逃
無憑申解等情又據宜興縣申稱鍾嶽秀脫逃見獲家人

陳福壽并李憲子李六頂解其姚鳳時將啓經姚鳳培實
係溧陽人氏無從俟拘等情具繇連人申解到道發保候
審又蒙巡撫莊都御史會同巡按龔御史憲牌爲

欽案勢難久稽據實預剖等事內開卷察鍾鼎史孔吉一案先
據應寧太參府刑廳會審繇報到院又據吳推官詳稱兩
造囑叟不服請改行寧太道親提從公確審去後未據詳
報近閱邸報該巡按龔御史題奉

聖旨地方獄情自以撫按爲主這鍾鼎史孔吉一案奉旨已久
如何尚爾延諉承問官好生玩徇龔一程卽會同新撫嚴行
提訊從公究擬具奏如該犯挾抗加等治罪問官瞻畏叅來
重處該部院知道欽此欽遵察得前經節行徽安帶管寧太
道提審未結今寧太道督運回任合應兩道公同會審以
便速結等因通行徽安寧太兩道隨該徽安道左布政使
王公弼寧太道副使盧洪珪約於崇禎肆年捌月初捌日

齊集太平府公署復經拘齊鼎與史孔吉史兆吉史念惺
陳福壽姚鳳培鍾思信彭泰彥鍾大樂等一千犯證到官
通蒙兩道逐款從公會審明白看得鍾鼎以狂悖潑生挾
機鋒而肆驕蹇其與史孔吉之弟史兆吉同里而居乃兆
吉亦求田問舍鄙生也鍾鼎已買房產兆吉必欲從原主
贖之兩家水火因此不可解矣爭房細事夫豈不共戴天
之讎乃鍾鼎讎其弟并讎其兄僭端以傾孔吉蔑有不至
夫魏璫在事之時史孔吉方遭摧抑夫豈媚璫者流及魏
璫誅而史孔吉及奉

旨起用本末甚明也鍾鼎乃借他人之獻祠爲孔吉之授意而
且有元日之詩譏誚孔吉屬有讒人鍾大樂交構其間於
是孔吉忿懣不平而有田院之告批駁未定而鍾鼎懼負
遂乃妄奏

闕廷史孔吉旋具疏奏辯職等矢公矢慎一一據疏逐審據鼎

所稱灑賦千餘石鹽例參千兩錢糧各有戶額安能灑派
衆人鹽商自有額課何爲而予孔吉且闔縣竟無一戶一
商以爲指證廳繇以鍾鼎爲囂語真囂語矣兆吉取贖史
致鳳之房雖非鍾嶽秀本心然旣已得價退業自當隨其
召貨史衙召貨肆小字此豈黃封而可以加人者哉再訊
史念惺受解和銀貳拾兩之說鼎執有講事人一帖所載
銀數不符有先書空契示信之語自難定念惺之得此項
也而所云納命金伍百兩抑又茫然無確證也疏謂其父
生死何音今鼎認父實不死止云披緇遠去復據宜興縣
止解嶽秀家人陳福壽至供嶽秀與妻李氏并參孫見在
芳莊李守組貳層房內居住負隅不出然鍾鼎旣云生死
何音則嶽秀自然難出耳疏謂致死姚璋參命則姚璋弟
參子姚鳳培自稱父向老死於家非毆也而鳳時無子豈
有幼男驚亡之事且鳳時亦爲鍾鼎拉去竄身不出姚鳳

培見在之口可質鼎亦大不情矣又稱拷死鍾大鳴其子
鍾思信供稱病死然鼎執有一紙則思信親筆也想思信
初意欲藉事本族以死行詐今當庭訊是假難真不敢自
昧其良心耳至鼎往京將房壹所自賣與彭泰彥契券甚
明地隔數千何關於孔吉而亦假棍粧點歸咎於孔吉耶
承恩寺前之毆辱證者已無其人彼此反脣事極瑣屑而
亦欲以煩

天聽耶鍾嶽秀鍾鼎院考點用有名父子臨期不到因而例黜
史儒縉史儒綱文理可觀憑卷取錄學臣秉公秉明何慙
於鍾何私於史而鍾鼎囂然肆謗且欲拖拉衆生不許入
場狂逞之狀真無可容於

天地間矣至若水牢木櫃之說俱毫無影響其指孔吉者愈苛而
誣更甚也叅看得鍾鼎似病似狂如鬼如蜮所爭之事無
一不是細微所奏之詞無一不是虛妄謹按其大者如初

時越奏承問官政在審理鍾鼎何敢強項不赴再冒

闕廷非

2045

聖明洞矚不許封進彼將自謂得計矣

宸嚴何地而可容其屑越至此乎疏語之內輒以伊父生死暗藏游移不定之詞子而不知其父之存亡何以爲子且父安然無恙也而欺慢之語乃敢妄陳

2046

至尊之前乎學臣奉有

勅書諸生敢不一聽鈴束不到除名于孔吉有何干涉而鍾鼎肆有投揭學使可侮

簡書不可畏乎

祖宗臥碑

聖明法令夫且漠然不知遵守若鍾鼎者真衣巾之敗羣人世之尤類也鍾鼎合依上書詐不以實之律擬徒以懲至如史兆吉以贖房構釁鍾大樂以及覆煽爭鍾思信先黨鍾

而後直史彭泰彥不擇人而貪房俱各論杖以懲此番庭
質兩道於公所焚香誓衆虛心逐剖先據鍾鼎奏疏後據
孔吉辯奏歷歷窮究爲鍾爲史似無不剖之衷亦無不盡
之詞矣其他枝連蔓引之語俱不敢混入案中卽有未到
各犯恐稽遲

欽件且各情已盡似不必再候也等因具招連人解詳兩院蒙
巡撫莊都御史批開據招鍾鼎以爭產細事赴

闕瀆擾且疏列各款審俱無據已犯擅入

午門內叫訴涉虛之條矣及炤學臣題叅內奉有生員罵詈
官長炤例問遣之

勅本犯宜何居焉事十回

奏城旦似不蔽辜仰兩道確覈律例覆究速報又蒙巡按龔
御史批開鍾鼎以爭產構釁上瀆

宸嚴據兩道會鞫疏列各款多虛自有應得之罪城旦果否當

奉本院閱招面審情節相符者無論如冬廳前繇行弔之說原疏未開鼎乃藉口是否有無史衙召賃肆字道詳所載鼎稱此房出召竝無頂首何以互異史念惺先受貳拾兩堅執不認廳繇從何得來灑賦索例屢審既無證據鼎仍撫恰何難行縣再一覈確疏云硃示幾迫縣官解綬丁令見在可不一問鍾嶽秀既住李守組家何以固匿不出事十回

奏須直窮到底勿得含糊兩道一併詳勘覆覈律例妥確

欽限甚嚴限參日內詳奪等因俱執行兩道蒙兩道牌行溧陽縣察炤兩院批駁情節逐項覆覈該知縣丁聖時遵炤逐款察明開一行弔之說察得行弔一節係民間家庭內事卑職向不與聞但察史孔吉父死在前鍾鼎奏疏在後揣彼此業已構讎又復溫溫修禮恐事在有無之間卑職固未敢妄報也一史衙召賃肆字察得史兆吉備原價贖

祖業鍾嶽秀親筆退契足證產業既贖則出帖召賃亦人情之常也鍾鼎始而云黃封踞鼎門屋又云贖產之說不知從何來今又稱此房出賃並無頂首是真互異之說遁詞知其所窮矣一史念惺先受銀貳拾兩察得史念惺受銀貳拾兩果否有無念惺之活口見在有何憑據有何見證難逃憲臺之質審也一灑賦索例察得史孔吉平米肆百壹拾柒石捌斗叁升貳合每歲完銀則有官帖納糧則有通關槩縣貳百捌拾里錢糧縣有縣總區有區總里有里總甲有甲總炤田辦糧農家習見習聞誰肯任其加派分銀升米而俛首輸納不置一喙者至於商鹽到縣絲職縣按引驗鹽印給收管收管既不絲孔吉商人亦何故以金錢饋鄉紳也况夫灑賦從無被害爲證索例又無商人爲證風影之說何憑以爲質對乎若夫以硃示迫縣官計卑職在任已及叁年設鄉紳可以硃示當不能壹日安於

地方矣此誠

天地間所必不可信之理不問而知其爲誣者也等因申報到道蒙道與寧國府帶管理刑知府周光夏商確審語已定比因本府推官紀五倫到任遂以紀推官列名已經另疏糾舉外當蒙叅看得鍾鼎性兇而詭言堅且橫其兩覩誣辭以瀆

聖聽也若似有大冤不伸急於控訴者之隱情迫面質時旣無一款是確再叅之該縣申文又語語涉虛鼎之罪始無以自逭而史兆吉之以贖房開釁者情似稍輕於鼎何者行弔修禮雖鄉黨往來之嘗在和睦時宜有之豈構讎詆訟日猶弔慰相卹有無難憑該縣旣不以爲然矣產已贖價已交契已退今後房爲史有非鍾有明矣召賃豈屬異事黃封踞門之說旣作昧心語欺人又曰無頂首胡爲乎設有頂首則是召賃宜矣又何矛盾其辭也史念惺非愚癡

之極貳拾兩斷無敢受於鼎手作此說者茫無一據迨審
講事人一帖空填則銀仍莫須有也灑賦關壹邑之利害
孰肯俛首代人陪糧里甲總長從不聞一語告苦而鼎語
之讎口遁窮於此益見且并鹽引亦牽以湊誣商人豈盡
愚蒙者哉卽自縣出而饋入於無相干涉之宦鼎試舉證
佐何人無可質也嶽秀藏匿不出反曰生死何音披緇遠
去之供不覺自招其誣殊示迫而解綬若使果實該縣豈
不急於自白今詢之該縣極以鼎爲妄則鼎真妄矣將何
以自實其說乎肆口無忌任意橫行方謂無賴劣生惟學
臣可以制其狂鋒乃憲擬考試公然不赴及循例除名而
謬揭具投是視

簡書爲不可畏矣更可異者擅入

禁門兩達封章種種虛謬之辭不根之談湊集以恣其傾陷
之謀而不顧欺罔有律無禮罪大若鼎者引例遣戍以明

紀法亦何說之辭但念其狂愚無知草野妄誕姑依上書
不以實律定擬城旦亦足以懲其迷謬而蔽厥辜矣史兆
吉深求之總無大過止以首釁擬杖竝鍾大樂鍾思信彭
泰彥各炤原擬非縱也等因呈詳到道蒙徽安兵備道左
布政使王公弼寧太兵備道副使盧洪珪會同覆看得鍾
鼎無賴狂生也其與史孔吉之弟史兆吉以贖房構釁非
壹日矣史致鳳之房爲鍾鼎所買而兆吉執爲祖業必欲
贖還不解之讎遂無休歇然鼎父已收贖價有退契自可
相安於無言乃挑激不已因而訐訟訐訟不已鍾鼎因而

冒奏

闕廷臣等據鼎奏疏逐款細審則無款非烏有之事而無語非
虛捏之詞其他謬戾不敢贅陳今再奉駁察則行弔之事
兩家之隙已深誰肯溫溫修禮該縣以事屬家庭茫無實
考誠正論也史致鳳之房旣已復還史兆吉則史衙召賃

肆小字此是民間嘗事而今之面審則日出賃無項首疏語則曰黃封踞門豈不自相悖謬耶史念惺受講和貳拾兩之說廳辭蓋止憑空契未有確證自難以懸坐也至若灑賦索例之說則該縣申文史孔吉每歲完納錢糧自有官帖有通關而該縣貳百捌拾里亦各有縣總區總里總甲總炤田辦糧誰肯聽人加派也商鹽繇縣按引驗鹽印給收管皆出自縣何爲以金錢賂孔吉也至若硃示以迫縣官之說則該縣申稱在任以及參年若可以硃示行逼當不能壹日安乎其位矣疏中若有一款近真卽可以按孔吉之罪而解鼎之誣乃從來歷審俱無一實不知鼎何肺腸而誕罔若此也覆叅看得鍾鼎放浪不根驕恣無禮於

至尊之座而敢妄達封章以虛誕之辭而敢兩入禁地有玷宮牆之教罔知法度之嚴况學政乃

朝廷奉

勅之臣生員屬其統轄鼎乃強項而不赴考又肆然而漫投揭
真法紀之所不容黷宮之所共棄也按法引例亦不爲過
但念頑鈍青衿以上書不實之律仍照原擬徒史兆吉贖
房起釁鍾大樂鍾思信反覆助爭彭泰彥貪房俱各論杖
以儆覆招於崇禎肆年拾壹月拾壹日通詳撫按兩院會
題去後至崇禎伍年叁月叁拾日蒙撫院案驗准刑部咨
該本部題覆巡撫莊都御史巡按龔御史會題前事開擬
鍾鼎依上書詐不以實律減杖玖拾徒貳年半史兆吉鍾
大樂鍾思信彭泰彥各依不應事理律俱減杖柒拾緣繇
前來該本部覆議看得鍾鼎與史孔吉計奏事情其初起
於史兆吉以贖房開釁隨又有蔣啓綖投獻逆祠之舉鍾
鼎以爲皆孔吉之謀也而怨之獨深彼此交訟禍所從來
矣挺而走險輒敢妄瀆

天閣及奉

旨著撫按從公察審則鼎之本情不過如是原無買首之讎而所臚列史孔吉諸不法狀又種種涉虛卽如誤考被黜於人何尤而噬及學臣鼎之狂潑益無逃於三尺矣士習瀾倒之日據法本當重懲但念草野無知事亦有激擬以徒褫亦足蔽辜史兆吉強贖族人已賣之產致兄蒙詬實爲厲階與鍾大樂鍾思信彭泰彥均從杖儆於法允宜史孔吉居鄉雖滋多口被訐皆無確據無容吹求臣等未敢擅便統候

聖裁等因覆奉

聖旨據招鍾鼎以瑣事瀆奏蔑憲妄訐明係刁橫史孔吉等恃勢凌迫生事啓釁亦屬可惡還著再行覈議奏奪欽此欽遵鈔部送司呈堂奉批咨行相應咨行覆議等因案呈到部令咨前去煩爲察炤卽會同巡按御史遵炤

欽依內事理卽將鍾鼎等覆覈具

奏等因備案仰道隨蒙徽寧兵備右叅政盧洪珪察得鍾史一案奉

旨覈議復蒙憲案行道覆覈事干

欽件非奉憲批似難擅擬相應呈請合無俯賜批示轉委何衙門提勘具招轉詳等因具繇通詳兩院蒙巡撫莊都御史會同巡按龔御史憲牌仰道察照原行卽提鍾鼎史孔吉等到官該道細加覆鞫擬議具文到伍日內星速具招詳院以憑覆覈具

奏等因牌行徽寧安池兩道時安池兵備左布政使王公弼督運往北未回徽寧兵備右叅政盧洪珪兼攝兩道遵依差役前去溧陽縣守提鍾鼎及史孔吉等一千人犯去後又蒙巡按龔御史憲牌照得鍾鼎等一案奉

旨覈議先准撫院會案已經牌行該道限伍日內具招詳院去

後迄今日久未據招詳合行嚴催行道卽將鍾鼎史孔吉細加覆鞫擬議具招詳院以憑覆覈具

奏勿得再遲等因牌行徽寧道又經催提鍾鼎史孔吉史兆吉鍾大樂鍾思信彭泰彥等一千人犯於本年陸月初叁日到道細加覆鞫前情明白蒙兵備盧洪珪看得鍾鼎妄奏

闕廷已經逐款確察茫無實據誣棍之罪荷蒙

聖明洞鑒無容覆議矣獨是釁起有端直須從頭根究當時以罪重誣奏鍾鼎擬徒以懲而倚勢起事之史兆吉姑從擬杖今奉

明旨駁察蓋已

洞矚根源纖悉畢炤矣職矢慎矢公遂爲細覈衆款皆無指實其可議者史孔吉之弟史兆吉以史致鳳之房因鍾鼎所買而兆吉以祖業借端贖還致鍾鼎不甘忿激冒

奏恃勢強贖此非用強霸占之顯跡乎蓋因贖房以構端還按初情以定罪合比依強占官民山場等項律與冒

奏之鍾鼎并各徒懲庶足儆兆吉之藉勢生事矣史孔吉不能訓飭其弟致生事端

朝廷職官當有吏部考功之法非職等所能擅議也鍾大樂鍾思信彭泰彥各炤原擬杖等因具招通詳兩院蒙巡撫莊都御史批開史兆吉以贖房構釁其恃勢凌迫之情

聖明已洞鑒矣徒懲何喙但贖價鍾鼎之父已收見有退契可據似非強占且所贖係房亦與山場之律未協事關具題仰道再確察擬報又蒙巡按龔御史批開史兆吉恃勢贖房凌迫生事

聖明已悉其罪狀矣與鍾鼎竝從城旦情法稱平第一贖一退似非強占原係房宅引山場之律果否允協事干回

奏該道覆確速奪蒙此俱批到道又該本道覆察看得鍾鼎

史孔吉一案當此止據鼎疏逐察問擬乃鼎疏一無指實而且兩瀆

闕廷故鼎以奏事不實擬徒而史兆吉得以論杖業蒙

聖明已鑒鍾鼎之刁橫矣惟是起釁根絲全在贖房一節此鍾鼎中心之恨也黃封踞門固鍾鼎駕害之詞而厲階禍始實兆吉自貽之戚史致鳳之房既賣於鼎父則鼎父物故耳史孔吉之弟史兆吉雖是用價何爲而強贖之挺人走險兆吉亦復何辭特勢凌迫誠有如

聖明之洞鑒矣史兆吉贖房起釁合依侵占田宅之律與鍾鼎竝擬徒懲庶於情法爲兩愜矣史孔吉以職官非下職所能擅擬有吏部考功法在恭請

聖明裁奪其鍾大樂鍾思信彭泰彥俱炤原擬杖取問罪犯議得鍾鼎等所犯鍾鼎史兆吉各除不應輕罪不坐外鍾鼎仍依上書詐不以實律杖壹百徒叁年史兆吉改依冒認

及侵占他人田宅者罪止律杖捌拾徒貳年鍾大樂鍾思
信彭泰彥俱仍依不應事理重者律各杖捌拾與鍾鼎史
兆吉俱有

大誥減等鍾鼎杖玖拾徒貳年半史兆吉杖柒拾徒壹年半鍾
大樂鍾思信彭泰彥各杖柒拾審鍾鼎係已黜生員史兆
吉彭泰彥係監生俱炤例納米鍾大樂鍾思信係民俱稍
有力折納工價史孔吉聽吏部處分史兆吉贖完仍行褫
革通候會題請

旨發落炤出鍾鼎史孔吉史兆吉彭泰彥各官紙銀貳錢伍分
鍾大樂鍾思信各民紙銀壹錢貳分伍釐并鍾鼎贖徒米
銀壹拾伍兩史兆吉贖徒米銀壹拾兩彭泰彥贖杖米銀
叁兩伍錢鍾大樂鍾思信各折納工價銀壹兩叁錢伍分
通共紙罪銀叁拾貳兩肆錢伍分俱追貯庫聽候支解取
庫收咨劄附繳餘無炤等因到臣該臣謹會同巡按直隸

監察御史龔一程看得鍾鼎以瑣事屢瀆

宸嚴恣行誣讒其刁橫之狀臣等前疏已悉業蒙

聖明之洞鑒矣乃揆厥所繇則緣史孔吉之弟史兆吉贖房一節實生厲階蓋史致鳳之房又賣於鼎父彼此已相安無言何兆吉從中生端藉口祖業而逼贖之雖價值償明不無凌迫況產非已物卽係冒侵原擬薄杖猶爲寬政今奉明旨覈議應與冒

奏之鍾鼎竝以徒懲庶情法兩平而藉勢逞刁者各知儆戒矣至於史孔吉有弟不能約束致起釁端自有考功之法在恭候

聖裁定奪其鍾大樂鍾思信彭泰彥仍炤原擬各犯名下紙罪共銀叁拾貳兩肆錢伍分應追解助充餉伏乞

勅下該部覆議上

請行臣等遵奉發落施行等因於崇禎伍年捌月初叁日題以

月初叁日奉

聖旨該部覆議具奏欽此又該巡按直隸監察御史龔一程題同前事於崇禎伍年捌月初叁日題玖月初肆日奉

聖旨已有旨了該部知道欽此欽遵通鈔到部送司相應議覆等因案呈到部該臣等看得黜生鍾鼎妄訐瀆奏其咆哮無狀真刁橫也孽已自作徒擬何詞第當日厲階寔啓於史兆吉贖房一事雖云原係祖業然業已賣矣又強取之豈非藉鼎以口實乎初擬薄杖委未盡辜今據該撫按改與鍾鼎竝從徒褫情法允平似已無剩罪矣史孔吉因弟被訐聽吏部議覆伏候

聖裁既經該司案呈前來相應議確覆題恭候

命下臣部移咨彼處撫按將鍾鼎史兆吉鍾大樂鍾思信彭泰彥察炤原擬發落其追完鍾鼎等各犯紙罪銀兩合應解部轉解充餉等因崇禎伍年拾壹月拾伍日奉

聖旨俱依擬史孔吉著吏部覈議奏奪欽此欽遵鈔出到部送司案呈到部爲炤史孔吉啟歷著聲兼以忤璫得雪奉有挨次授補之

旨品行可知祇因伊弟贖產啓釁致狂生誣嚙屢瀆

宸聰然單款皆屬虛無疵癥從何吹索且伊弟既經擬配已足

謝悮

聞之狂心儻本官復加深文恐益長豪衿之囂習未甞庇弟骫法以申在原之私應免爲弟受愆以解株連之網於以閑士習而全縉紳想亦

聖明恩威互濟之盛心也恭候

聖裁臣等遵奉施行等因崇禎伍年拾貳月拾陸日奉

聖旨史孔吉前旨甚明該部何得曲爲寬解還著另議奏來欽此欽遵鈔出到部送司案呈到部爲炤史孔吉以伊弟倚勢贖產致狂生覘款叩

聞雖招詞俱爲雪寃而家政未免欠肅生事啓釁

明旨之切責何詞持已居鄉平日之表率安在合就原官降壹

級謹遵

旨另議覆

請恭候

命下臣部遵奉施行

崇禎陸年正月初玖日

拾陸日奉

聖旨史孔吉原任何官何因在籍奏內通未開載安得濶稱降

級還著察明履歷確議來說

吏部署部事左侍郎臣曾楚卿等謹

題爲遵例歲終考覈兼報白糧蚤完以飭庖政以慰

聖懷事考功清吏司案呈崇禎伍年柒月初陸等日奉本部送
吏科鈔出巡撫河南等處地方提督軍務都察院右僉都
御史樊尚燝題崇禎伍年伍月貳拾玖日據河南布政使
司呈蒙臣等案驗准吏部咨該本部覆巡視光祿寺戶科
等衙門給事中等官吳南灝等題前事等因崇禎伍年正
月拾玖日奉

聖旨黃榜著革了職爲民袁光第行該撫按察明議處欽此欽
遵備咨前來煩察袁光第借差違限在籍有無事故察明
具

奏炤例議處等因到院備案行司依蒙行據懷慶府申據孟
縣申稱據原任光祿寺署丞今加納鹽運司運副袁光第
呈稱第繇儒學廩生於萬曆肆拾伍年加職崇禎元年貳

月內任光祿寺珍羞署署丞崇禎貳年捌月內奉

欽差押解陝西寧夏京運銀壹萬兩交明取有實收崇禎叁年肆月赴京報

命實收已繳戶部時遇工部新開軍興卽選事例第遵奉於伍月內以光祿寺見任署丞加納鹽運司運副兌銀玖百兩完狀可察移咨吏部聽選遂離光祿寺衙門載在冊庫其俸卽已開除繼因取選不及在籍守候茲奉行察乞准轉達等情到縣該知縣余宗察得原任署丞今加運副袁光第委於崇禎貳年捌月奉差押解錢糧次年肆月報

命繳部實收可據遵例援納運副前任職俸已開見載卯冊完狀年月足憑因選未及期回籍守候等因具申到府該知府別如綸覆察相同等因到司該本司左布政使降貳級炤舊管事實鴻洙看得原任光祿寺署丞袁光第奉差部解寧夏錢糧係崇禎貳年捌月內出差叁年肆月內赴京

報

命歷有年月實收繳部可察至於事竣報

命之後卽於本年伍月內又援例加納運副完狀亦鑒鑒可憑
止因選未及期回籍守候竝無別情等因具呈到臣案炤
先於崇禎伍年貳月初貳日准吏部咨前事已經備行察
覈去後今據前因該臣會同巡按河南監察御史李日宣
覆察得原任光祿寺署丞袁光第奉差事竣以新例再加
運副銓除未及轉旋家園竝無別項事故今據司府該縣
察報前來相應回

奏伏乞

勅下吏部察議施行等因崇禎伍年柒月初伍日奉

聖旨吏部知道欽此欽遵又該巡按河南監察御史李日宣題
同前事等因崇禎伍年柒月初捌日奉

聖旨該部知道欽此欽遵鈔出到部送司案呈到部看得袁光

第奉差既已報

命而旋以加納候選回籍經年該寺已經除俸援納又有實收撫按合詞似應免議第其候選離寺率意徑行致巡視不聞有違限之糾應俟選後罰俸示懲庶庖政飭而官方凜矣既經撫按察奏前來相應覆

請恭候

命下將袁光第補官之日罰俸陸箇月

崇禎伍年拾貳月拾壹日

陸年正月拾陸日奉

聖旨是運司官近有旨選用科甲袁光第加納事情還著察議奏奪

湖廣道試御史臣林銘凡謹

題爲賞罰

國家之大柄敬陳激勸大機以佐

治平事竊惟

朝廷之爵祿刑威一準

上天之風雷雨露儻雨露愆期風雷錯節

天亦違其令矣若爵祿未章刑威不斷世亦失其平矣方今

聖主當陽太阿獨持賞不僭矣罰不濫矣自可比隆堯舜致治

唐虞而東省鯨鯢尚稽

天誅山右僥槍未聞掃蕩臣竊以爲病在賞罰之未盡明而功

罪之未盡核也奚以言之李愬之平元濟也以雪夜成擒

岳飛之破楊么也以伍日報捷今師老登城之下幾閱冬

春兵連太行之間動騷參省此豈拔幟超距之無能或者

專閫有人登壇失職而師武臣之不力耶臣謂欲鼓士心

宜先懸信賞之格欲創衆志宜早明必罰之機賞則若解
萊園之功若破鐵角城之功皆當詳察速敘勳在偏裨而
大將不得專奇出卒伍而偏裨不得溷庶幾功實明而人
爭用命矣罰則若張應昌入晉逗遛之罪若黃龍海島觀
望之罪皆當定議顯懲儻藉口於師歷遠途而今可勵以
桑榆之收或借端於舟壞颶風而今可嚴以犄角之勢庶
幾罪狀明而士盡懾心矣然而將士之勇怯皆繇督撫之
賢否又未可專責之弁流也三秦曹文詔等得收廓清延
廊之功者則督臣洪承疇威惠兼施者倡之也可不亟爲
褒旌以鼓英豪任事之氣乎三晉諸將帥未奏蕩平澤潞之效
者則舊撫宋統殷一籌莫展者釀之也可不早爲結案以
震懦柔怯敵之思乎又如粵寇犯郴楚中撫按諸臣或以
誤

奏免官或以

詰問鐫級而南安失事陸問禮匿不上

聞及奉

旨候勘猶擁建牙開府之尊此亦賞罰弗明之尤而功罪未核之甚者也臣蒙

皇上隆恩新膺言責竊見近冬狂飈屢煽雪澤不時邊烽靡寧海氛告警敬陳激勸大機上佐

治平之理伏祈

聖明採擇施行

崇禎陸年正月拾貳日

拾陸日奉

聖旨敕功覈罪屢旨甚晰所司奉行延緩含徇林銘几何不指據糾催乃云朝廷賞罰不明殊屬不諳該部知道

監視大同糧餉兵馬邊牆撫賞等事太監臣劉文忠謹

題爲緝獲刼鞘響馬強賊事崇禎伍年拾月拾玖日准巡撫
張廷拱揭帖內開據聚落守備陳貴稟稱山西解官典史
錢應登解銀貳鞘行至陽和貳拾里敦遇響馬伍騎將銀
鞘在路刼奪等情又據典史錢應登稟稱押解官銀貳萬
陸千兩前至太原府代州大同交納外仍剩貳千陸拾兩
應解宣府交抵軍餉於本月初柒日行到聚落城東陡遭
響馬伍騎刀劈鞘破亂射官役打刼前銀又將包內盤費
銀陸拾伍兩一併刼去等情據此移揭到臣除撫臣張廷
拱已經奏

報外竊炤刼鞘強賊奉有

嚴旨緝捕是以臣與中軍王鎮密商差臣衙門中軍守備李有
謀旗鼓守備張聖德巡捕百戶李懷仁加銜守備李永成
等密行訪緝去後拾貳月拾叁日據李有謀等訪得有陽

和住人吳之漢素行不端今在娼婦家嫖使銀盂浪形跡可疑密稟到臣臣隨令中軍王鎮手書各犯姓名密喚大同縣典史李榮春陽和守備蔣可聖率領兵快將吳之漢卽行捉獲去後本月貳拾日據典史李榮春呈報蒙監視衙門中軍王鎮手諭今將吳之漢捉獲到官用刑研審據招與夥賊孫英梅勛張雄義張世業等原在鎮城上寺作寓有山西解官錢應登亦在上寺作寓聞知伊銀鞘於初柒日解起宣府道繇聚落陽和之漢等因嫖賭缺用輒起盜心糾合劫鞘於初柒日早解官未起身之前各騎馬匹各帶弓箭刀械從鎮城行至聚落東約拾伍里在地名吳家窰墩牆內藏歇至初捌日早解官押銀到彼之漢等齊撲邀截孫英開弓將錢應登射貳箭解官畏懼棄走張世業隨用刀將皮包砍破包內無銀吳之漢將銀壹鞘用刀砍毀失落銀貳錠在地壹鞘之漢挾挈往西行走至貳叁拾

步仍用刀砍開將銀裝毛口袋內各賊稍馱跑走間當有陽和中軍高文魁因接新兵道上任往西行走聞知前途失事之漢等各帶弓箭必是響馬向前追趕彼此用箭相射且行且戰貳拾餘里之漢等行至張家莊山坡據山射箭向高中軍家丁言說你們是有命人我們是無命人何必窮追內有高中軍家丁壹人向前言說既如此你把原贓盡數丟下我們饒你之漢等遂將前銀丟下貳錠高中軍官軍下馬拾銀之漢等乘間脫走本日藏於許家莊山內至初玖日五更時分復回鎮城在於真武廟後將銀伍分均分每人各分銀叁百柒拾餘兩各因嫖賭花費不等等情供報到職隨將本犯贓銀伍大錠拏獲到官其餘招係花費又將夥賊孫英梅勛各拏到官審供同前亦各搜獲原贓孫英叁大錠零壹塊重壹拾壹兩陸錢梅勛貳大錠叁小錠零壹塊重貳拾貳兩伍錢俱有原解地方官匠

姓名在上與錢應登認質無疑其張雄義張世業亦拘到
官追出大銀陸錠等情到臣臣察得錢應登原失官銀貳
千陸拾兩及盤費銀陸拾伍兩共銀貳千壹百貳拾伍兩
今追出吳之漢等原贓銀捌百叁拾肆兩壹錢及中軍高
文魁首出拾銀貳大錠解官錢應登在打劫處拾銀貳大
錠以上共獲原贓壹千叁拾肆兩壹錢外尚少贓銀壹千
零捌拾柒兩玖錢批令大同縣嚴追完日正法外其典史
李榮春緝捕有功乞

勅該部紀錄以示激勸再炤雲中荒邊僻野歲歉人窮民不安
生易於爲盜地方各官不行緝捕任其充斥道途爲害非
小况今流寇披猖戒嚴宜密防微杜漸則亂萌可消不然
因而嘯聚蔓恐難圖仍乞

皇上勅下宣大兩鎮撫按嚴行各該地方沿途添設防兵或遇
鞘銀過往用兵護送交界嚴立叅罰以獲盜爲功能有無

失事爲殿最庶人心知惕萑苻可靖實有大造於行李之往來也

崇禎陸年正月初陸日

拾陸日奉

聖旨該部知道邊鎮地方正欲飭備禦虜豈得內地反縱盜劫著該撫按嚴責將吏刻期擒緝以圖綏靖其解餉經過撥防護送通嚴飭行如有疎悞究論不貸

工部尚書臣周士樸等謹

題爲操練伊始軍馬宜調謹列條款以期

聖明採擇事虞衡清吏司案呈崇禎伍年拾壹月貳拾捌日奉
本部送工科鈔出該京營總督襄城伯李守錡等題前事
內開改增器械以足演習切惟軍中器械貴足尤貴精今
營中長枝火器居多而參眼鎗尤多但察各槍年久多敝
且鎗身原短而火力散漫不直火門漸大而火力後洩難
前此應速爲改造無疑者但此槍每日每軍須多演習數
次方能習熟今若每日每軍止給鉛子叁箇則止彀演習
壹槍須臾卽畢安望其精熟乎但合六營計之每日壹軍
壹槍已費鉛子貳萬有餘箇矣議加恐錢糧不敷不加則
演習何賴卽有拾回之法亦不可多得或加用鉛子或佐
以鐵子至於大砲亦宜多用彈子以便熟習所當併議者
也伏候

聖裁等因本年拾壹月貳拾柒日奉

聖旨京營選銳訓練期精強壯威必立法詳妥方能釐弊振新

本內裁役占估變價恤買補及責成將領察籍賞罰各款有
裨戎務著總提協實心力行併給糧宜覈差徭宜豁器械改
增通著詳議具覆該部知道其酌費票錢貳事還著另行察
議具奏欽此欽遵鈔出到部送司奉此察得京營敝壞各槍
合發回兩廠改造送用至於加用鉛子佐用鐵子壹項本
部議止演習合無代以泥彈石子庶可節省等因移會京
營去後今准回稱看得各將議呈試演火器加增彈子蓋
於平時演準苗頭臨事方期命中今冀節省更易泥石貳

子輕飄破碎委非演用之物茲欲節省則莫若純用鐵子

然令工匠必求精圓庶可爲用其實較鉛子猶輕而於錢
糧則有所省矣等因移會到部送司奉此相應題覆案呈
到部該臣等看得京營重地訓練宜嚴所需器械演習宜

精今京營備有各項多槍年久多敝兼之體制未善不便
操演合宜發回兩廠熔依

御覽新式改造送用又稱此槍須多演習因缺鉛子未能嘗習
督臣議加鉛子恐錢糧不敷不加則演習無賴卽議佐以
鐵子此乃斟酌盈虛權宜緩急之至計察得鐵子原因庫
貯不敷兼之小彈缺乏見在題

准派辦一時不能遽給似難接濟合無將庫貯鐵子之中揀擇
小者併兩廠辦有鉛子暫爲兼用俟鐵子辦到之日停給
鉛子第鉛鐵貳子辦甚艱難須節制以法不致用之難繼
今議於立把之外添築圍牆將射打鐵子責令本軍尋覓
雖不能全收亦可拾得伍陸庶節省有賴而各軍訓練有
濟矣旣經該司案呈前來相應具題恭候

命下臣部通行遵奉施行

崇禎陸年正月初捌日

聖旨依議

拾陸日奉

後府帶俸右都督臣李國柱謹

奏爲

皇恩直窮履載孤臣痛切烏私謹據寔披陳泣謝

天仁事竊臣壹世祖李銘叨係

穆廟孝懿莊太后之父先年蒙

神宗皇帝晉封伯秩出入榮施及逝世復

賜造墳安葬極盡

寵渥繼臣再世祖李鶴

恩典遞及卒附

欽榮比時生有榮光死無凌替惟至臣父李應龍一生株守蒙
恩賜秩迺至閱牆構釁族黨謀弇奄奄氣死遺臣孀母幼子煢

煢四壁伶仃無依族惡愈熾甚至將臣祖

欽賜墳塋結黨典賣毀屋伐樹掘地跑岸臣自天啓伍年泣疏

籲奏蒙

熹宗皇帝將首惡李應蛟等逮獄正法一派墳塋毀賣無餘僅存骸骨貳塚此一時也正祖宗之陰魂飲恨孤嫠之窮魄幾銷生者披離死無葬本已至父骨停匱中堂不能與前人同遊於地下臣母子朝夕拊心泣血何望有生也臣思世沐

皇恩寔愧捐糜之報臣父既叨戚秩豈等無依游魂戚卹尚懸聖衷憫惻臣謹遵

典制壹疏冒昧乞葬卹蒙

皇上推念

聖祖太后懿親

俯炤近來后侄郭從龍爲母請卹之例

准勅戶工貳部給地價造墳銀伍千兩起死灰於復燃使白骨

有生氣

皇上高厚之洪慈臣母子惟焚頂祝誦於無疆矣今戶部應發

貳千陸百餘兩該部仰體

聖衷劄順天府業已帑數給領見在擇地造穴惟工部應發銀兩水衡造匱措給維艱臣何敢妄先希冀伏乞

皇上勅下該部陸續給發以勦葬事臣父子眞生死銜恩無地卽

先太后之靈有慰於中天矣臣泣感罔極謹據寔披瀝仰賚

宸聽伏祈

鑒宥施行

崇禎伍年拾貳月拾叁日

陸年正月拾陸日奉

聖旨工部知道

兵部尚書臣張鳳翼等謹

題爲緊急賊情事職方清吏司案呈崇禎陸年正月拾伍日

奉本部送兵科鈔出保定巡撫丁魁楚題前事內稱崇禎

陸年正月初伍日據真定標中營遊擊熊通報稱蒙本院

差委卑職順德等處防禦探得流賊大衆俱在遼州地方

今乘新年節令前哨已到西山漿水川除職卽日發兵堵

截外理合塘報等情又據大名道兵備按察使盧象昇報

稱武涉等縣流賊土賊大亂逼近邯鄲沙河臨洺等處萬

分緊急等情本日又據固關把總薛邦禎報稱流賊布滿

山西已搶和順與樂平縣止壹松子嶺之隔至平定州止

百里漸逼關門等情又據井陘道兵備右叅議寇從化報

稱本月初伍日寅時據夜役李國材探知流賊自新村陽

勝上下馬房張莊李家莊立北村石門至栢井驛等處直

抵故衣鋪與固關相隔拾柒里等情初陸日又據該道報

稱賊勢雖重因關城嚴謹火砲森列且本院標兵續至馬賊探知有備擁衆仍回百里餘遠等情各具報到臣據此看得流寇猖獗

畿輔震鄰西山米百餘里處處宜防而順屬爲甚臣於歲前拾壹月內遣發中營遊擊熊通領兵貳千名協同大名道臣盧象昇在於順德等處預行備禦前疏已入

告矣至井屬至固關雖險巖可憑而額軍甚少井陘道臣寇從化業已分布快壯併力防守不意賊夥四奔兩道信地一時竝急也臣聞報之日復以守備李山原帶領漢夷家丁伍百名馳防順德都司李定帶領左營標兵貳千名馳防固關近報流賊以該關有備離境漸遙臣仍移會保定總兵梁甫竝檄行附近倒馬關及定車等營整棚待援而眞定按臣衛景瑗駐劄獲鹿相機調度固關似可無恐唯邢耶一帶邊長賊衆衝突可虞且距鎮甚遠呼吸靡及臣隨

於本月初捌日趨赴順德親行防勦矣再炤臣標兵止柒千伍百名除援萊之壹千伍百防固之貳千所餘僅肆千名耳衆寡不敵何以制勝不得不以民營之壹千捌百名隨臣遄往此壹千捌百之健卒卽臣屢疏題畱前奉

俞允而近准部覆仍令修工者當此賊勢迫切之時豈能遽撤援萊之兵自救燃眉亦豈能遽援各省之例借力鄰境乎則民兵應畱不待再計而決矣卽有分派之工自不妨事寧補修耳除各兵行糧臣一面措處接濟及堵勦情形統容續奏外臣謹會同眞定巡按衛景瑗具題崇禎陸年正月拾肆日奉

聖旨流賊窺近畿輔著該撫按嚴飭道將及有司官據險扼要奮銳堵勦毋得少懈致令突逞其畱用民兵事情該部看議速奏欽此欽遵鈔出到部送司案呈到部看得晉寇蔓延東犯自樂平和順流近固關察該關斗礮懸崖壁立萬仞古

人所謂塞井陘之道者卽此以百夫守之數萬人莫能度也據該道寇從化報稱賊知有備卽退回百里餘若益火器以扼其衝萬萬無虞已惟大名道盧象昇所報武涉等縣流賊土賊大亂逼近邯鄲沙河臨洺等處此不可不急爲勦捕者撫臣業移駐順德若畫疆而守恐無救於中州則李定所領援固之貳千相應移緩就急調發磁州蓋禦敵者當禦之門庭之外計撫臣纓寇誼切似不得謂舍己芸人也至於請畱民營班兵壹千捌百名合無暫隨防禦俟賊氛稍靖再赴邊補工可也旣經奉

旨看議相應覆

請伏候

命下遵奉施行

崇禎陸年正月拾陸日

本日奉

聖旨寇警震鄰撫臣職專保禦一應文武兵將駐防扼堵事宜
悉聽該撫審酌調度相機勦援不必踰度預定民兵暫畱依
議行

戶部尚書臣畢自嚴等謹

題爲截贖椿朋雖扣庫貯支借無存謹據參路報數上

聞乞

勅補抵正項以免溷淆事邊餉司案呈崇禎伍年拾貳月拾玖日奉本部送戶科鈔出監視山西御馬監太監劉允中題前事內開崇禎肆年拾貳月貳拾柒日准戶部客戶科鈔出巡按山西監察御史羅世錦題前事奉

聖旨邊鎮亟需馬匹截贖椿朋銀兩自當仍供買補何得盡行支借顯屬溷冒侵欺著監視同該撫按詳察買過馬匹若干放過軍餉若干併各色支用有何實據係何情弊一一稽核明確具奏李元禎等著革了任嚴行勘追奏奪本內說中西貳路倉廩俱空該撫道餉司所職何事著自行回奏該部知道欽此欽遵鈔出到部送司案呈到部備咨到臣該臣隨行鴈平寧武岢嵐等參道各行察追去後拾壹月貳拾日續

准整飭苛嵐兵備右叅政兼僉事周鴻圖手本據西路管糧同知蘇爲梯呈解犯官竹茂盛等招繇到道該本道看得竹茂盛何躍鯉貪鄙存心欺隱成性以椿朋爲可公可私之物欲借則借欲侵則侵其借之軍也實以掩其侵剋之名耳在軍者自應扣還在己者難辭追補坐贓科罪貳弁同一轍也內竹茂盛侵欺伍拾兩以上法應擬戍念別案已戍矣姑與何躍鯉竝徒者也李元禎旣已物故免議於家屬名下代追議得竹茂盛何躍鯉所犯俱合依私物當供官用已送在官而未入庫但有人守掌若有侵欺者竝計贓以監守自盜論俱肆拾貫律各斬係雜犯各准徒伍年俱係指揮審俱有力各炤例折納米價贖罪完日免立功發回原衛閒住待年限滿日方許帶俸差操供用武登科等各察發著伍一炤出竹茂盛何躍鯉俱官紙穀銀各貳錢伍分各又該贖罪米價銀各貳拾伍兩追完收貯

內盈庫作正支銷竹茂盛名下追侵欺銀捌拾捌兩伍錢
朱分捌釐軍丁俞羊兒大王汗等壹百叁名各名下追還
原借馬曠銀貳百陸拾壹兩叁錢肆釐奇兵營已故中軍
李元楨家屬李真名下代追銀柒拾貳兩肆分玖釐何躍
鯉名下追侵欺馬曠銀叁拾肆兩伍錢壹分叁釐軍丁王
登科楊成等伍拾壹名各名下追拖欠銀壹百叁拾叁兩
壹錢壹分又王登科錢銳等闔營軍士追借支銀柒拾伍
兩貳錢叁分伍釐又闔營軍士追借還號衣銀叁拾兩俱
炤數交庫買馬應用取實收繳報餘無再炤等因移送到
臣該臣會同巡撫山西都察院右僉都御史許鼎臣巡按
山西監察御史李嵩覆看得

朝廷之設椿曠之法也以營伍所出仍充營伍果能按數按期
一一追扣用之尚或有餘馬匹何至缺額蓋惟半爲積軍
之拖欠半屬貪弁之私侵若竹茂盛何躍鯉等居心不淨

染指偏多擅將本營椿曠銀兩或任意以那移或入己以自潤計贓各至數拾餘金按罪應從准贖之律內李元楨已經物故姑免究擬侵欠銀兩應

勅撫道各照所列數目嚴追補庫者也等因拾貳月拾捌日奉聖旨該部覈擬具奏欽此欽遵鈔出到部送司相應議覆案呈到部該臣等看得營路椿曠原出自馬匹草料正項而卽以備買馬正項之不足法至善也若使經手員弁潔已清扣當存積之有餘何缺額之難補乃竹茂盛何躍鯉等明以借支塞詭牀之口而實以侵漁飽谿壑之欲蠹邊儲而損軍實罪不勝誅矣除物故李元楨姑免究擬其餘按數追贓按律擬徒情法允當所開侵欠銀兩并各犯問擬罪贖伏候

命下遵行移文該撫按照數嚴追貯庫作正支銷既經該鎮監臣題議前來相應具覆伏乞

勅下臣部移咨該鎮各衙門一體遵奉施行

崇禎陸年正月拾肆日

拾柒日奉

聖旨錢糧雖屬該部擬罪職在法司還著會同刑部確覈具奏
以後事關各部的科鈔須行遍發不得偏遺著申飭永遵

吏部尚書臣李長庚等謹

題爲奉

旨察勘前後賊情據實回

奏事考功清吏司案呈崇禎伍年拾壹月初捌日奉本部送
吏科鈔出兵部署部事左侍郎楊一鵬題前事職方清吏
司案呈崇禎伍年玖月拾伍日奉本部送兵科鈔出江西
巡按倪元珙題稱臣於崇禎伍年柒月貳拾壹日接閱邸
報見工科等衙門都給事中等官張承詔等具題粵寇勢
愈披猖江西省再罹塗炭乞

勅當事諸臣蚤圖撲滅以保子遺以安重地事奉

聖旨據奏流寇攻陷縣治劫掠鄉村如此失事且時日已久何
未見該撫按馳奏著卽察明并將速勦協援事宜嚴行通飭
如縱賊流毒叅來重處該部知道又該兵部尚書熊明遇等

覆題前事奉

聖旨江省寇劫陷城至今不報撫按官好生朦玩據稱南安水城屠戮甚慘桀匿不聞陸問禮欺誤殊甚併閩粵流賊從前殺掠事情通著巡按御史勘明據實速奏敢有一字徇飾立罪不宥還立限與他其肆省督撫會鞠著嚴飭奮銳剋期蕩平國法嚴明毋得泄視該部速行馳諭欽此欽遵案察臣於伍月拾玖日據前任撫臣魏炤來會彙將賊殘擾吉永豐情形令疏奏

聞臣復於朱月初陸日將流寇突入撫州樂安并攻陷崇仁民城及復走吉永豐被官兵殺敗各情形特疏奏

聞今跪誦

明旨嚴切臣不勝悚惶竊惟臣以周巡一身當流寇入擾之時正供役於廣饒南康諸郡去吉贛千百餘里臣檄疊下道府縣之警報亦疊至而終無焚殺實數未敢遽以入

告今凜奉

嚴旨卽於是日分差承役嚴檄湖西湖東嶺北各道卽將流寇殘擾所屬一切情形及經過各縣邑村落每處殺傷并虜去男婦各若干燒燬民房若干并各文武官員將士某奮勇前驅致身戰死某指畫調度保境安民某聞賊墮膽畏縮不前某縱兵搶攘驕悍僨事俱一一星速核察明確徑給文付來役領齎回銷以憑回

奏本月貳拾玖日僅據分巡湖東道副使王維燮回文壹紙亦無確數分巡湖西道左布政使兼副使蕭應坤僅以壹空揭著差役持回云容另察核分巡嶺北道右叅議兼僉事祁逢吉更以途遙至今尚未回覆江右積玩大槩若此臣旦夕惶惶恐久違

明旨惟是簡按各道府縣日夕所報驗文備爲

皇上陳之雖情形不一皆據其各文所述也察得於肆月拾玖等日分巡嶺北道并贛州府及各縣報稱賊寇陳萬鍾凌

秀等餘孽復叛於冬月貳拾肆日繇福建武平入江西會
昌境貳拾伍日至瑞金江家報讎將房屋山寮燒燬老幼
男婦俱逃肆月初壹日賊偵知贛兵廣兵俱到卽遯入大
庾地方初叁日大兵尾追至本地賊復奔入黃石觀初伍
日燒山覓路遯入寧都沿鄉劫虜初柒初捌日見追兵緊
急於拾壹日復遯興國縣樟木坑除臣屢檄行巡西道吉
安府并萬安營守備陶廷瓚移撥官兵預赴白羊坳防守
外隨據該道府并各縣報稱拾陸日賊有千餘札營長鏡
口叁日本坳防守官泰和縣主簿朱晉明同督兵百戶梁
學統兵連對叁陣拾柒日鎮撫陳一勇報稱賊衆數千本
日復入坳與官兵對陣殺死百戶梁學并伊男姪及營兵
又放火將營房盡燬因陶守備兵至遂繇大小莊往冠朝
去訖貳拾日閩將鄭芝龍兵到泰和追至冠朝與賊對壘
殺賊貳百餘人奪回被虜男婦叁百餘貳拾叁日有賊肆

百餘人突出馮嶺放火虜劫鄉兵千衆奮勇堵截殺傷壹
百餘賊敗陣奔逃又有賊叁百餘人至南溪放火虜掠鄉
兵亦沿途趕殺叁拾餘賊餘黨竄伏仙槎洞貳拾肆日陶廷
瓚帶兵星馳赴東沔追剿賊聞廣兵虔兵將至從澗田逃
往興國貳拾陸日復有賊肆百人至泰和縣上漠地方虜
掠當時鄉兵擁集用白棒打死強賊陸拾餘人叁拾日賊
到吉永豐縣明德鄉表湖司主簿周文煥督同巡簡江世
芳統鄉兵在水坑坳把守伍月初壹日賊過肆拾貳都界
被地方毒弩射死貳賊初叁日舊撫臣委用名色守備田
化龍同主簿周文煥巡簡江世芳渡河剿賊田守備手刃
數賊奪回被虜男婦拾餘人奮勇追剿不意伏賊四起我
師受困田化龍徐飛騰皆遇害官兵貳百名止奔回來拾
伍人餘皆戰死初捌日賊到廬陵縣富田地地方縣丞湯執
中督兵迎敵殺賊壹人銃傷賊壹人因賊衆兵寡鄉兵各

逃湯執中與巡簡龍德新俱被殺死武生劉斌亦陣亡把
守白羊坳指揮王璧隨統兵往援與賊迎敵殺賊旗手壹
人被賊殺壁親弟壹人家兵貳名官兵俱各逃散拾肆日
賊至參拾壹都與古縣虜劫此自贛州入犯吉屬之情形
如此於伍月初柒等日又據分巡湖東道并撫州府樂安
崇仁宜黃各縣報稱伍月拾伍日賊入樂安縣錢團地方
鄉兵與戰初合殺賊首壹人旗手壹人貳合殺賊參拾捌
人傷者百餘人參合賊衆參千一湧而圍錢團兵死者陳
球六等伍人傷者數拾人拾陸日進屯劉坑居人先移徙
入城矣當賊方擾吉時臣卽計及樂安係永豐聯界爲撫
省門戶隨委在籍遊擊謝太平督同名色把總陳胤震千
戶司聯奎等固守城池分部防衛外拾柒日賊衆數百於
城外高阜處探見城中准備戒嚴退避山坳拾玖日覆到
錢團報讎約午未時交鋒卽於寅卯時突至錢兵猝應被

殺并受傷者百人亦殺賊旗手參人貳拾日舍樂安奔崇仁經過大華山等處叱劄兩日貳拾參日過朱陂等處貳拾肆日叱河亭離崇仁縣城肆拾里本道卽於是日督建昌營把總錢象環誓師啓行貳拾伍日兵至崇仁仙遊山見賊泊城攻打西門本官卽分撥前後隊與賊戰賊從稻田中分伍路迎敵官兵奮勇殺騎馬穿甲賊參人步賊伍拾參人官兵被殺者徐玉等貳拾陸人員傷病故者參拾人賊遂奔入隔河民城是人煙稠密處也因婦女財物俱先期搬入官城搜掠無獲遂縱火焚燒房屋參百餘間官城係知縣王宗震力疾堅守燒斷長橋賊不能逼城於貳拾柒日詭立空營離崇仁貳拾捌日在宜黃孤嶺與鄉兵一鬪卽抵神嶺地方有宜黃縣丞胡鴻賓同胞兄胡鴻德統領鄉黨各兵與賊交鋒斬死賊首參人胡鴻賓被賊槍傷左臂其兄鴻德櫻城陣亡殺傷甞兵拾伍名殺傷鄉兵

朱拾餘人本道王副使復調名色把總陳胤震赴該縣協
力固守有生員歐陽濬自領義兵出城迎敵賊敗於貳拾
玖日退札河口陸月初壹日從崇鄉小路遯寧都地方此
自吉屬入犯撫屬之情形如此於陸月拾壹等日又據守
巡湖西巡北參道吉安府吉永豐廬陵吉水寧都等縣各
報稱流賊於陸月初伍日到寧都南團札營初柒日劫本
處虜劫婦女數拾過永豐縣石庾嶺虜叁拾伍都男婦柒
口拾肆日在大根竹銀口虜男婦數拾人拾伍日拾陸日
劫吉水南塘地方焚猪坑與車上丘姓一村又往滕田虜
去數拾人拾柒拾捌日屯劄大湖坪羅陂水心等處劫掠
拾玖日到古縣地方扎營往醴坑虜去男婦數拾餘人又
到吉水隴頭虜男子拾餘人貳拾壹日辰時賊泊城扎營
恩江橋居民逃竄多被擒殺本夜放火燒屋城外城隍廟
亦被延焚又次早賊衆臨城嘯探知縣劉綿祚與守備陶

廷贊督同防守當令銃手劉啓三等用銃打死賊旗手參人槍手拾伍人賊慌奔過橋又復打死貳人申時賊乘馬從東北城下行過仍用鳥銃打死拾貳人貳拾貳日賊過恩江橋欲趨城下方觀望間而城上又以銃擊殞數賊餘皆驚奔赴水自是賊鋒稍挫不敢再逼貳拾叁日贛州衛指揮金之鼎統兵肆百伍拾名抵縣自時祀總董大勝統兵柒百到縣貳拾肆日方議合勅而賊遂潛從各路分遯到吉水沙井沙石埠水南烏江河源柘源等處放火焚燒賊必欲報讎貳拾陸日復從間道回永豐贛州撫臣調遣粵將張一傑吳國祚之兵相遇於黃牛峒大戰而董大勝陶廷贊之追兵繼至殺賊柒百餘級又總報殺賊千餘併斬賊首鍾晚舍等奪回被虜男婦肆百餘餘黨漫山逃竄貳拾玖日賊至廬陵縣富田地方又被鄉兵李高等殺傷貳百餘柒月初貳日轉至木湖地方初叁初肆日聞兩院

調發饒南撫建廣袁等陸府之兵與閩將高元極孫繼盛之兵委袁州知府田有年饒州府通判巢之梁親統追剿賊知主客兵合遂乘夜焚營往興國過雩都初伍日官兵追至竹管垌初捌日逃往安遠地方初玖日至會昌縣上壩宗田地方被巡簡張嘉謨帶同鄉兵殺死數賊捉獲槍手壹名張應啓初拾日往閩之武平縣復回銅鼓障訖卽粵地舊巢也當此賊衆奔駭之候諸將鼓其餘勇星馳電擊自可旦夕盡殲何至坐失機會耶續據袁州田知府報抵興等處搜捕伏戎靡有遺孽具有該縣耳結矣此自撫州復犯吉永豐繇贛回巢之情形如此以上殺傷數目及焚虜情繇俱確察各道府縣日逐報文據實入

告臣不敢一字掩飾也至賊之初叛時自武平入會昌止於瑞金焚殺江姓一族實未殘破瑞金城池也若縣治攻陷有萬耳萬目道邵縣卽欲匿報將安匿之則臣又不敢懸指

以對矣總之在贛州宜堵而不能堵使賊過度一步全省震驚遂遭狼奔豕突之患在吉撫欲守而不能守以徑路雜出之地而數百孱卒分防力單合呼應緩遂成野火燎原之勢今懦弁如張啓元悍弁如徐之龍等各已叅處不得獨寬於守封疆之吏也察賊之逼犯邑治者止崇仁與吉永豐耳崇仁知縣王宗震雖力疾守城而民城焚燒誰司保禦自當以不及降處吉永豐縣知縣劉綿祚賊逼城下而抗衆監守屢行擊退儻此地一失則賊勢熾張萬難救藥其保捍較爲殫力吉撫兩府府臣陳三重蔡邦俊各以防護郡城勢不能兼顧如崇仁之民城失事爲撫屬邑固巡東道王維燮之責也察其督兵退賊嘗以一身奔馳於建撫行陣之間如賊來於虔賊返於虔固嶺北道祁逢吉之責也察其躬馳興國又馳寧都督勵虔粵諸將始有斬馘之報之貳臣者較巡西道蕭應坤之悠忽貽害固自

有間蕭應坤臣等具疏合叅矣此諸臣禦寇之情形又如
此至舊撫臣魏炤乘杜門既久兵力又弱臨敵調遣猝不
應手贛州撫臣陸問禮賊旣入內地勢日披猖未能撲滅
迨嚴叅懦將之後援兵一集寇氛始退旣均奉

嚴旨

皇上自有裁奪如臣奔走拾叁郡雖苦腹長敢置局外凡一切
申警調發與指示機宜每日數拾檄其行之會彙行之司
道者一一可按亦不敢縷塵

御覽惟是撫鎮諸臣手提軍務每見上呼下不應而監軍各官
不據實叅呈申報臣卽目枯腕脫往返稽察已落於江右
諸臣合疏之後則不能依期奏報者職此故也

皇上責臣以朦玩臣雖萬萬不敢然負罪實無所逭矣如南安
水城失事當贛州撫臣陸問禮已報焚殺慮有隱匿見行
察確另

奏外謹將賊之始末去來實情據實奏

聞伏乞

勅下該部察覆施行等因崇禎伍年玖月拾肆日奉

聖旨奏內江省流寇奔突戕掠及地方將吏勦堵失事情形著
詳行察看其撫道各官不卽呈報奏聞是何情弊一併看議
具奏該部知道欽此欽遵又該江西巡按倪元珙題爲奉

旨勘明賊情并糾叅文武官員仰祈

聖裁以飭封疆事內稱案察粵寇之入擾江右也臣已疊疏馳
報亦屢奉

嚴旨責臣察勘臣敢不凜凜具陳除已彙集塘報詳悉具疏奏
聞外今駁行各道通察的確理合補牘再報并叅失事官員統
祈

聖裁崇禎伍年捌月初拾日據分巡湖東道副使王維燮覆詳
稱伍月拾伍日流寇突入樂安小嶺下虜掠時係錢團鄉

義兵把守隘口遂與交鋒戮力奮勇初合射賊旗手壹人
貳合殺賊拾餘人叁合殺賊拾餘人共殺叁拾遂盡驅賊
衆叁千而來賊多兵少被賊殺死義兵伍人則陳球六張
竣五陳香四羅興華唐大老被傷義兵數拾人遂收兵回
鄉而各鄉兵俱驚散防守千戶司聯奎亦以兵止壹百不
敢輕敵退城防守遂於拾陸日報賊屯住劉坑放火殺人
監軍同知黃夢瑞同知縣阮一道督率遊擊謝太平把總
陳胤震千戶司聯奎統集鄉兵官兵晝夜奮守砲弩矢石
俱已齊具賊衆叁百餘人高阜遠望見城有備不敢進攻
遂於拾捌日報賊退伍拾里於張坑地方扎營然終未忘
錢團之戰也故立戰書約拾玖日午時至錢團交戰徑於
寅時乘鄉兵官兵未集突奔錢團不及交戰用火焚劫計
獲得志遂拔寨過崇仁東塘坳坳左通崇仁右通宜黃沿
途計賊大約有叁千貳拾壹日隨據崇仁縣報稱賊往華

山打熊貳拾貳日越罕許咸口殺人放火貳拾叁日駐林頭時同知黃夢瑞委千戶司聯奎領前守樂安兵肆拾壹名回守崇仁蓋係崇仁額兵也本道遂移鎮撫州卽委建昌營把總錢象環兼署撫州營務隨調廣信兵貳百建昌兵叁百撫州兵叁百前往救援崇仁時各處兵未集而崇仁典史招相出城點集鄉兵時值天晚賊蜂擁集鄉兵不敢俱各逃竄殺其家兵貳人單騎逃遯本道遂責令速回本縣守城催錢把總暫領兵伍百餘名星夜前驅貳拾伍日隨據該縣報稱賊繇黃州橋攻打南關被烏銃打死數賊復攻西關又被烏銃矢石打死賊拾餘人而錢把總亦以是晚至兵尚在後未集其前隊卽與交鋒殺賊數拾我兵亦被傷貳拾捌名賊始離城半里許過河下寨河北舊有民堡昔人爲牆以捍衛之亦稱城焉年久傾圮自北一帶皆秦莽平地矣民知難守先搬入官城賊虜掠無所得

遂自殺嚮導貳拾伍人因而放火延燒堡內居民大屋壹百餘間小屋貳百餘間遂於貳拾捌日報賊五鼓潛離崇仁叁拾餘里駐聖陽寺與宜黃交界至霍源嶺焚掠本日報賊分隊入境委官防禦各處隘口以縣丞胡鴻賓同胞兄胡鴻德及巡簡蕭應斗統領官兵鄉兵陸百名前去堵截登殺賊首叁名賊隊駢至衆寡不敵丞被槍傷兄亦陣亡生員潘章縉教師劉德安等亦同赴闕死焉兵亦殺傷遂急時收兵進城又有生員歐陽深亦領鄉兵迎敵殺賊固多而兵之被殺亦不少把總陳胤震帶武生家兵貳拾名則黃同知委守宜黃者途猝遇賊亦與交鋒殺賊數人而武生超世傑亦被賊殺遂同進城防守賊攻城急知縣張濤併力固守堅壁難犯賊迫遯去遂於初壹日報賊往崇鄉離縣叁拾里遠矣是日又報稱劫虜崇叁都初貳日報劫崇拾壹都拾貳都拾叁都初叁日報劫崇貳拾都初

肆日報賊天明起營從黃壁嶺向寧都縣去訖此賊之犯
撫屬崇仁樂安宜黃參縣之情形據道覆察者也捌月拾
柒日又據分巡湖西道左布政使兼副使蕭應坤覆詳察
得肆月初捌日寇先至永豐境內逼近永明貳鄉越拾壹
日退駐興國衣錦營前拾肆日入泰和拾柒日犯白羊坳
殺百戶梁學及其姪梁國鼎并家丁梁富與隊兵汪子麟
等肆名焚屋貳百餘間殺死逃民彭升等拾餘人次早卽
犯冠朝適撫夷鄭芝龍統兵至殺傷賊黨貳百餘名救回
被虜男婦叁百名口巡兵鄢諒等與鄉兵鄭宇等生擒賊
黨曾一問等柒名隨卽解道府正法賊見勢急分遯上模
東沔等處焚屋百間殺死生員郭維新等男婦貳拾餘口
此拾捌日事也貳拾壹日鄉兵王景士等飛石打死賊伍
名貳拾貳日上模鄉兵曾光啓等用棒打死賊陸拾餘名
貳拾叁日犯馮嶺被鄉兵堵殺百餘名又犯老虎坳西陽

山黃龍坪等處被僧衆沿途用矢石打死拾餘人彼時賊
邀寶石有廣營周遊擊統兵至與鄉兵殺賊黨貳百餘名
賊以官兵追逐竄入萬安界內地名龍尾殺死僧人壽庵
虜去肆人內貳人卽時逃回又於貳拾肆日有數賊屯澗
田壹晚燒死婦人壹口鄉民壹人澗田萬安界也萬安巡
簡胡希孔等緝獲姦細吳正等貳拾名已經申詳訖斯時
本道親督官兵駐扎泰和約會勦滅賊聞官兵聲息奔入
永豐下固地方此伍月初壹日事也下固鄉兵奮勇射死
貳賊初叁日守備田化龍領官兵武生徐飛騰領鄉兵與
賊交鋒於會溪地方生擒貳賊壹曰郭會仔壹曰李層奪
回男婦拾餘口追逐叁拾里殺賊百餘名不期賊施詭計
誘入險要而守備武生俱遇害官兵被殺百餘鄉兵損失
亦多初肆日賊復屯廬陵東固焚屋叁間虜去鄉民拾餘
人後竟贖回初柒日主簿周文煥獲賊壹名陳皇一旦於

身上搜出禽書壹部初捌日賊犯廬陵縣富田地方富田有巡簡司在焉該縣縣丞湯執中領兵自竹管峒回適與賊遇奮勇殺賊壹名銃打傷藍旗手壹名民勇殺賊拾餘名值賊勢猖獗縣丞竟受傷殞命巡簡龍德新見地方已破令子負印先遯竟死信地貳官死於

王事又有指揮王璧亦自白羊坳歸其弟王璧與賊交戰亦以傷死損失官兵陸名民勇捌名鄉兵鄉民共死貳拾餘人虜去男婦貳拾餘名口房屋槩被殘壞若永豐當日則捉獲真賊壹名鄧楊三矢初玖日新安羅邦棟梁孔忠等統領鄉兵數千直衝富田焚其營殺賊肆拾餘人民勇王福割賊先鋒首級叁顆賊丟棄器械逃往文昌鄉此地乃廬陵吉水永豐叁縣交界初拾日被廬陵鄉兵追回被虜男婦伍拾餘人奪賊馬叁匹賊婦壹口金鼓壹副并衣服等物被永豐鄉兵獲賊張錦二等拾餘名衙役劉桂等獲

賊譚佳五等參名與前獲陳皇一梟示訖賊於富田受挫
夜襲吉水地方石窩水北珠簾等處劫富戶夏少志徐善
等家拾壹日入瀘江拾叁日渡鶯背嶺拾肆日立營中沙
地方白沙水南各村鄉民被傷叁拾壹人殺死壹拾伍人
虜去壹拾玖人燒燬房屋壹拾貳間殘壞甚多拾陸日往
樂安屯劉坑貳拾壹日繇劉坑往崇仁進宜黃貳拾陸日
本道復移駐永豐督兵約勦陸月初伍日犯寧都南團初
柒日仍回屯駐石庾嶺石庾嶺乃永豐叁拾伍都梨樹地
方散去虜掠居民逃竄初拾日守備陶廷瓚捉賊壹名杜
祥三已申報監候斃獄訖拾玖日扎營朱陂貳拾壹日賊
壓永豐縣治屯扎恩江橋散處焚掠殺傷生員鄧起鵬等
肆名殺死男婦曾廣三等伍拾名口虜去男婦羅振四等
叁拾名口是日午刻有賊臨城打聽被烏銃手劉啓三等
打死貳拾名稍晚又有賊數拾乘馬從東北城下行走亦

被銃手于榮七打死計有壹拾貳名并馬壹匹貳拾貳日
有賊過恩江橋聞銃聲一響驚怖仆地被鄉兵射死共肆
名從此而賊勢稍沮矣貳拾叁日指揮金之鼎董大勝俱
領兵到永豐金之鼎飛銃打死賊貳名塘兵擒賊黨王登
一等拾叁名貳拾肆日賊雖漸遜然猶聚百郊地方意謂
官兵去可相機而動也貳拾伍日分掠永吉貳縣在永則
緝獲賊細作胡繼陽等貳名在吉則射死叁賊而都司張
承祖吳國祚參將張一傑接踵至矣貳拾陸日大兵遇賊
於黃牛峒截殺大捷又獲被虜賊犯鄧志五等拾餘名察
黃牛峒之捷則以虔兵董大勝約與賊戰賊懼而遜董大
勝驅之於前而廣將遂得收功於後貳拾柒日吉水鄉兵
生擒賊壹名章清一解道梟示訖貳拾捌日賊逃富田木
湖等處是夜焚燒民房柒間幸鄉兵李高朱康等率勇士
柒百餘衝入賊營斬首壹拾伍顆被傷貳百餘賊朱康身

亦受傷參拾日泰和守白羊坳指揮張本端拏獲姦細李祥等玖名亦已具詳正法永豐被虜羅振四等參拾餘人俱已奪回自此已後賊走東固走興國而地方平此賊犯吉屬廬陵吉水永豐泰和肆縣之情形據道覆察者也捌月拾貳日又據分巡嶺北道叅議兼僉事祁逢吉覆詳稱賊於參月參拾日從福建走入江西瑞金縣古城地方離縣參拾里該縣調集僧田各兵把截要路賊因不敢近城初壹日贛廣各兵俱到瑞金賊卽遯走當日賊並未泊城並未攻城事也虔中無此報卽通省亦未有此報也至初參日各兵協力前追賊聞風遯入黃石觀係寧瑞界瑞金僧田兵共有肆千乘夜追躡與賊對陣互有殺傷據監軍同知鄧日崇親至其地察得初肆日夜僧兵前去偷營所斬賊級甚多後因彼處山峻樹多賊有埋伏殺傷僧兵拾名田兵捌名併鄉總江振曦之父江玉珦此賊入虔以

後鄉兵敢向前交鋒者惟瑞金壹邑耳初伍初陸俱遯入寧都界沿鄉虜掠民皆遠避未有殺人之報初柒初捌賊見追兵已近遯入興國界初拾拾壹等日仍在興國界拾肆日賊從縣北遯走溫溪鄉兵追殺叁名見賊身俱有銀兩遂貪利輕進被賊逐追渡河殺傷叁拾餘人此本道移駐興國時察之始確者也拾伍日賊劄泰和界上拾柒日入泰和之寇朝閩將鄭芝龍率兵壹千伍百忽焉馳至與賊交鋒斬級叁百餘顆貳拾貳日賊劄東沔廣將周一陽虔將金國柱奮勇擊賊共斬伍百餘級邵勛雖在行間而殺級實係國柱則芝龍一陽國柱爲功而徐之龍張一傑邵勛曾士英皆罪甚明也若陸月貳拾陸日黃牛峒之捷粵將張一傑吳國祚張承祖虔將董大勝金之鼎不可謂非功也貳拾柒日尚有殘賊千餘遯匿吉水山中貳拾捌日走瀘江水白地方貳拾玖日走新安富田被鄉兵殺賊

多人叁拾日逃東坑米月初壹日走迴龍係興國界初貳
走琵琶隴初叁走長沙澗雩都地方初肆夜自焚營潛過
雩都走江面瑞金界初伍初陸走小密莊埠初柒走曉村
係會昌界初捌走員當係安遠界初玖日走湘鄉仍會昌
界被巡簡張嘉謨帶鄉兵捉獲賊槍手壹名張應啓見審
明正法初拾日從背寨東流遯入武平去訖緣餘賊以黃
牛峒殺敗一路皆晝伏夜行故未敢有殺劫也此流寇繇
贛屬瑞金會昌入境出境之情形據道覆察者也據各申
詳到臣該臣看得前屢奉

嚴旨責臣察勘臣卽馳檄下司道覆確尚未以實情申報及屢
番駁察又恐大稽時日臣罪滋重不得不彙集塘報按察
明白已具疏奏

聞蚤紓

皇上南顧之憂今據各道覆確通詳到臣察對臣前疏或間有

壹貳焚殺數目稍不相合者蓋前之塘報皆各道府館縣與各統兵官值倥偬之際過事卽報得聞卽報故未暇詳核耳今之彙報在臣慮有隱匿之罪在各道府縣諸臣自有失事之罰而於各將領武臣又慮有冒功委罪之失故凜奉

功令覆察無纖漏矣蓋賊之始入內地也不過數十惟脅從之衆旣迫之爲嚮導不逞之徒又因之爲劫虜遂蟬結約有伍千而其流突之狀每於深菁峻嶺數百里斗絕之險能赤足而行於間道曲徑州邑遼絕之地倏飄風而來又布散訛言使內地處處隄防以分我兵力更巧爲設伏以陷我輕進而內地更何恃哉恃救於虔兵彼貳千弱卒不能堵敵又安能勦賊恃救於閩兵而鄭芝龍以犒餉偶遲而返恃救於粵兵而徐之龍等以不受節制而返僅僅恃徒之鄉兵止保守門戶市兒旣難使戰卽各郡邑額設之兵

各守其界屬又左右不能兼顧則惟恃省會之兵以供策應耳原額不滿千自田化龍一敗損其貳百都司張啓元所統伍百原不足當賊之拾壹且怯懦異嘗方避賊之不暇安望其衝鋒而前哉因而賊之聲勢愈張內地之風鶴愈甚其富家紳族多居村落者先爲奔徙而細戶盡爲驚竄則流離之禍半中於賊半中於避賊縱有貳叁偏裨提其一旅與鼓義紳衿督率壯丁以爲擊鬪而殺傷相當未能盡挫其鋒故城邑有犯有不犯鄉市有劫有不劫雖非沿村屠戮而盤旋數月亦殘破幾徧矣此賊之實情實形臣一字不謬然試問賊從何來哉南贛固扼要重鎮也撫臣陸問禮使鼓勵諸將奮力死戰以踞虎豹雄關何至寇之奔入堂奧今黃牛峒之捷雖自激發奧將始得之而內地受禍衆實歸恨於虔舊撫臣魏炤乘以年餘杜門將士未必用命且省兵數少授貳百於田化龍而一敗已塗地

授伍百於張啓元而分毫不效力則軍務之頽弱臨敵安能應手此兩臣者均有負於節鉞之任業奉

嚴旨矣道臣如巡西道蕭應坤戡亂無能養安自便早經會疏題叅外分巡湖東道副使王維燮奔救於健撫之間解崇仁之危雖間有擒馘而亦不能力遏寇氛分巡嶺北道叅議兼僉事祁逢吉調遣布置幸有粵兵之一捷而寇來於虔誰司堵截是兩臣禦寇之情勢不同而自當爲地方受責烏得無罪各縣諸臣如泰和縣知縣徐行忠亦矢志禦敵而疎慢犒餉致閩將執之有名業經題叅矣其餘如吉安之廬陵吉水永豐撫州之崇仁宜黃樂安贛州之興國瑞金寧都等縣俱經賊所衝突而逼攻宜黃縣城又前塘報所遺者如崇仁之民城爲民堡築垣以衛半多塌毀雖非官城百雉之峻而焚燒爲甚則知縣王宗震自當重加降處吉永豐縣知縣劉綿祚率衆櫻守賊屢犯而屢擊殺

之克挫其鋒且餽餉主客之兵接濟如期鼓勵衆力則此令功可准過如廬陵縣知縣雍鳴鸞吉水縣知縣王龍震宜黃縣知縣張濤樂安縣知縣阮一道興國縣知縣陳治安瑞金縣知縣王命行寧都縣知縣岑維嶽雖城池俱保無恙而廬陵有縣丞巡簡之死各縣村落有焚殺殘擾之害自當分別罰治均仰候

聖裁焉若吉安府知府陳三重撫州府知府蔡邦俊贛州府知府李思份雖屬邑被害而逃難士民實以郡城爲歸命則防奸撫離與監軍同知黃夢瑞鄧日崇往來奔馳身先士卒者或均當寬以使過者也若將領武臣除都司張啓元以懦弱不前題叅外如南贛坐營邵勛委用守備曾士英自領兵以來從未遇賊一戰其觀望爲最自當速行革任建昌營把總錢象環萬安營守備陶廷瓚均非驍將一則解救崇仁一則協守永豐似當免議若長寧營把總董大

勝贛州衛指揮金之鼎或曾有擒殺或曾經遇敵幸以黃牛峒一捷亦因粵將附爲桑榆之收而斬數未多臣不敢侈言其功袁州知府田有年饒州府通判巢之梁受新撫臣解學龍調遣陸府之兵合閩將高元極孫繼盛之兵星馳追勦雖寇已出境而朝氣亦銳迨抵虔而搜山報無遺賊矣粵將吳國祚始一揭馳報臣黃牛峒倅遇賊與之大戰斬賊米百人餘賊敗走又伍日得粵將張一傑一揭總報斬賊壹千叁百人皆經贛州撫臣嶺北道臣檄督而來者是粵將之功當俟賊寇盡勦聽本省另爲題敘臣又不得越俎而議也再炤此中民不識兵加以兵多擾掠有官兵與鄉兵相殺者除臣等已會牌察究容另具

奏外今將屢次駁勘的確情形據實補牘再奏并糾文武官員伏乞

皇上勅下該部察議處分施行等因崇禎伍年玖月貳拾陸日

奉

聖旨該部看議具奏欽此欽遵通鈔到部送司案呈到部看得
江西流賊一案閩粵虔搗巢之戈未洗而贛吉撫焚林之
禍已烈問賊從何起從粵起也固粵督所報勦局已竣執
訊獲醜之餘孽也賊從何人從贛人也則虔撫所受
命專制門庭肘腋之近寇也甫報盡殲旋即潰入在粵尚難卸
責况來不聞拒人不聞追在虔又安能追咎幸有黃牛峒
之一捷差強人意而內地之傷殘實多陸間禮殆不得以
功過準矣近奉有自贖之

旨應否議處合候

聖裁魏炤乘駐節會省去贛郡千餘里賊以數千深入而以貳
百弱卒格之衆寡固不相當然而平日既疎飭備奏報又
失之遲雖杜門謝病亦難免議今已

請告回籍或可仰邀

寬政若各道府縣及諸將領之功罪亦有可言者巡西道蕭應坤以玩寇降級泰和縣知縣徐行忠以慢犒罰俸既經處分無容再議嶺北道祁逢吉職專備兵而賊從虔人不能堵截幾與蕭應坤同迨後率勵將士頗多斬馘可稱桑榆之收然尚應議罰若撫之屬邑被寇崇之民城失事雖巡東道王維燮之責而賊不至深入則該道之策勵官兵團集鄉勇有以扼之功過相準似應免議吉安之廬陵吉水永豐撫州之崇仁樂安宜黃贛州之寧都興國瑞金等縣皆經賊掠鄉村原無城垣一任賊之出沒但路徑有便不便故賊跡有至不至似不當槩以賊之入境卽爲各縣之罪狀故就中分別永豐縣知縣劉綿祚櫻城擊賊接濟如期自應紀錄崇仁縣知縣王宗震塌茸不振致民城焚燬自應褫革其餘各縣城池各保無虞而村落槩多焚殺則當以焚掠之輕重議罰如廬陵富田之失縣丞巡簡俱被

戕殺知縣雍鳴鸞自應降調宜黃縣丞兄弟受傷樂安鄉
兵猝應被殺雖該縣協力固守城中准備戒嚴而知縣張
濤阮一道豈能無罰瑞金知縣王命行賊出入俱蹂其地
堵禦何居應重加罰治寧都知縣岑維嶽興國知縣陳治
安鄉民遠避未有殺掠之報而何不見以壹矢相加與吉
水知縣王龍震雖有射死生擒而地方未免旁掠竝應量
罰示儆其將領中之巧於規避如南贛坐營邵郎委用守
備曾士英皆畏賊如虎者革職何詞如建昌營把總錢象
環萬安營守備陶廷瓚雖無大功猶堪驅策若黃牛峒之
捷則粵將張一傑吳國祚張承祖扼之於前虔將董大勝
金之鼎尾之於後論功當以粵爲首而虔爲次時方會勦
先行紀錄候蕩平一併優敘可也他如袁州知府田有年
饒州通判巢之梁奉委追勦銳於搜捕撫州同知黃夢瑞
贛州同知鄧日崇奉委監軍身先士卒俱當候敘又如廬

陵縣丞湯執中巡簡龍德新宜黃縣丞之兄胡鴻德武生
超世傑徐飛騰守備田化龍百戶梁學及諸鄉勇擊賊陣
亡者俱宜察名贈卹是鼓舞忠義之要務也伏乞

勅下吏部將各道守令諸臣分別處分將領諸臣及死事諸臣
下臣部卹錄施行其撫道各官奏報稽遲事在地方難以遙度
令聽該撫按自行回

奏既經具題前來相應覆

請令候

命下遵奉施行等因崇禎伍年拾壹月初陸日奉

聖旨賊犯江省所過焚掠全無勦禦僅因粵將有黃牛峒一捷
地方官平時疎玩可知且奏報稽緩明係延飾陸問禮魏炤
乘及各道守令等官通著吏部分別覈議具奏內有已經處
分尚未蔽辜的還一併議奪倪元珙已有旨了邵貽曾士英
依議革職錢象環陶廷瓚免議張一傑等著卽與察敘以示

鼓勵田有年等併劉綿祚姑准紀錄其陣亡員役著察明炤
例優敘欽此又該本部題爲奉

旨勅明賊情并糾叅文武官員仰祈

聖裁以飭封疆事考功清吏司案呈崇禎伍年玖月貳拾玖日
奉本部送吏科鈔出巡按江西監察御史倪元珙題前事
等因崇禎伍年玖月貳拾陸日奉

聖旨該部看議具奏欽此欽遵鈔出到部送司案呈到部爲炤
江省流寇之禍從來未有而飄忽往來則尤猝難收拾雖
幸各縣治城池無恙然壹堡壹村皆吾地吾民而橫被焚
却何忍膜外置之此有地方之責者不容不任其罪者也
除該撫魏炤乘已經告病回籍贛撫陸問禮見奉

明旨姑著戴罪圖功自贖如再不效從重議處及分巡湖西道
臣蕭應坤已經覆降叅級調用崇仁縣知縣王宗震興國
縣知縣陳治安俱已經閑住泰和縣知縣徐行忠已經罰

俸伍月無庸再議外看得道府宜以屬縣焚劫之多寡爲
罰治之分數而縣官應以焚劫之甚不甚列罪狀之重輕
如廬陵縣知縣雍鳴鸞其縣丞巡簡死於賊則縣官無應
變之才可知所當降俸壹級者也吉水縣知縣王龍震有
襲劫之失未聞有堵截之功所當罰俸壹年者也樂安縣
知縣阮一道城守有備而錢團互有得失宜黃縣知縣張
濤堅壁難犯而傷劫處所亦多寧都縣知縣岑維嶽雖無
殺人之報而沿鄉亦被虜掠均之得不償失各應罰俸半
年者也永豐縣知縣劉綿祚屢挫賊鋒餽餉無乏瑞金縣
知縣王命行據稱賊入虔後鄉兵敢向前殺賊者唯瑞金
壹邑一則功過可以相準一則能用其民均應免議若撫
州府知府蔡邦俊崇仁宜黃樂安被賊者參大略崇仁之
害深吉安府知府陳三重廬陵泰和吉水永豐樂安被賊
者伍大略廬陵之禍烈贛州府知府李思份賊犯雩都興

國寧都瑞金會昌者陸雖剽劫之報未詳然難辭疎失之咎各應罰俸半年同知黃夢瑞鄧日崇俱能戮力行間然既以監軍爲職則官兵損折皆其責任各降俸壹級難從寬議分巡湖東道臣王維夔提兵赴救克解崇仁之危分巡嶺北道臣祁逢吉調度有方能收粵兵之捷第以藩垣門戶不能辭其責要皆功浮於罪者也各應罰俸叁月其袁州府知府田有年饒州府通判巢之梁受新撫調遣追勦仍俟該撫察議至如廬陵縣縣丞湯執中奮勇殺賊而死巡簡龍德新見危授命從容就義尤人所難及宜黃縣丞胡鴻賓兄弟同讎其兄亡而身未亡忠義之槩亦不可泯也按臣既爲拈出臣等并議敘卹以爲致身

王事者勸統候

聖裁既經該司察議前來相應覆

請恭候

命下臣部仍移文該撫按欽遵施行等因崇禎伍年拾壹月初

捌日奉

聖旨此案又奉有旨還著詳察確覈另本來行欽此欽遵通鈔到部送司案呈到部看得江省久習承平向無備禦以致流賊闖入任其蹂躪雖城守克完無救村莊之焚剝卽勦驅微效何如先事之綢繆况屢奉

嚴旨其敢以大吏寬以小吏漏乎陸問禮疎守平時賊繇虔入執以封疆之咎誰膺鎖鑰之司但干取復補於東隅則倉卒可原其前失姑降壹級管事去畱伏候

聖裁魏炤乘雖云杜門實坐軍府在地方壹日卽有壹日之任既已歸休難辭先責仍應議降壹級但以曾奉有已經告病姑不深究之

旨其寬否均聽

聖裁湖西道蕭應坤束手無以支賊列城皆莫當鋒腹地爲腥

守土誰諉應再降壹級調用嶺北道祁逢吉扼吭力單建
旣勢熾難借粵將之捷竟蓋虔備之虛應降貳級管事湖
東道王維夔嚴兵阻隘使賊不得長驅似應免議而屬境
罹氛民城受慘應降俸壹級撫州知府蔡邦俊屬邑被賊
者叁而崇仁最兇吉安知府陳三重屬邑被賊者伍而廬
陵尤酷贛州知府李思份屬邑被賊者陸而興國瑞金更
多各應降俸壹級廬陵知縣雍鳴鸞邑境半殘於賊而縣
丞巡簡之死損折堪驚應降壹級管事吉水知縣王龍震
襲劫靡禦殘壞難遮應降俸壹級樂安知縣阮一道邑壁
雖金錢團再刼宜黃知縣張濤雉堞克固殺剽屢聞寧都
知縣岑維嶽民雖族行賊實逼處瑞金知縣王命行民能
刃賊地每數逋應各罰俸壹年崇仁知縣王宗震興國知
縣陳治安已經閑住俱足蔽辜泰和知縣徐行忠罰俸伍
月似可無求事係軍興加罰叁月其他殺掠之報不詳叅

處之名不列俱不敢吹索袁州知府田有年饒州通判巢之梁撫州同知王夢瑞贛州同知鄧日崇永豐知縣劉綿祚已經奉

旨紀錄不敢再敘至湯執中殺賊身殉龍德新歸印守死胡鴻賓胡鴻德兄弟赴難潘章縉奮義結纓俱應敘恤以愧夫臨難退縮者若奏報稽緩不無延飾之罪但諸臣已經處分似當特開一面其各道守令降級降俸管事者俟其治行優異或綢繆自新許令撫按奏薦開復然

恩典出自

朝廷臣下未敢擅便恭候

命下臣部遵奉施行

崇禎陸年正月初玖日

拾柒日奉

聖旨陸問禮著降二級炤舊管事魏炤乘已經告病著於起用
日降一級餘俱依議

工部尚書臣周士樸等謹

題爲謹陳職掌所關竝竭一得欲盡事虞衡清吏司案呈崇
禎伍年拾月貳拾壹日奉本部送工料鈔出該本部題覆
盛甲安民兩廠監督條議廠務緣繇拾月拾捌日奉

聖旨本內撥銅鎔鉛收貯銅砲依議京營軍器俟奏請酌發何
處煤料人工價廉道近堪資製造著開寫地方來看扣糧事
情未明著再奏來欽此欽遵鈔出到部送司奉此隨即移會
兩廠備察去後於拾貳月貳拾日准監督盛甲廠原降俸
壹級今降叁級主事孫肇興回稱察得軍器所需一鐵料
京局打造必建鐵爲佳路遠難至數亦艱於應手察有山
西路安長治地方所產鐵料細膩堪用各邊成造軍需多
取於此以彼地之物而卽於彼處成造非惟鐵價貴賤相
爲倍蓰而運鐵與軍器輕重亦相霄壤矣一造甲布足京
局所用尤墩乃係南來價高難辦如肅寧等布出自保定

河南若就山西成造出產比鄰不特簡於價抑且便於措辦也一造器煤炭京局用者輸於百里之外至山西出鐵地方卽出炭與煤炸較京用價值何啻相懸一造器人工京匠工貴外匠價賤蓋因外省米糧出於土產京中飯食俱係四方販至食賤則工價自省一箭桿榫木出自山西五臺山京局所用皆需於彼就彼造箭鐵鑊與桿榫所省不貲一鋼鐵京局所用皆來自蕪湖河南路遠價貴若辦之山西相去亦近腳價既廉料價自省蓋京局工料等項色色俱貴今如外造已成軍器必令彼處用藥試驗如式精堅解京

覽試運價與工料之價相去實多矣如謂山西亂尚未平運價頗費其鋼鐵近便布料湊集船運省便南京亦甚爲相宜者至於月糧壹款舊例匠頭每名每月食糧壹石爲巡邏上宿防護等項工食後議令其每月造廬壹頂卽以糧米

作價伍錢抵爲工價各匠久告苦累竟今未有成說未行
打造況邇來米項軍需

欽限更急且厝制炤前樣單薄無用炤今式工倍難堪卽俟工
力稍裕悉行補造是目下月糧懸項愈積故酌議自本職
到任起至今玖月終計拾柒箇月該米銀柒百陸拾伍兩
卽入正項軍需將玖月以前領過者扣算拾月以後未領
者按月抵爲工價似爲兩便於貳拾陸日又准監督安民
廠原降肆級降俸壹級主事王之鼎回稱除外造係厝甲
廠察覆外該本職察得月糧壹款舊例匠頭每名每月食
糧壹石爲巡邏上宿防護等項工食後議令每名每月造
厝壹項卽以糧米作價伍錢抵爲工價各匠久告苦累竟
今未有成說未行打造況邇來米項軍需

欽限更急且厝制炤前樣單薄無用炤今式工倍難堪卽俟工
力稍裕悉行補造是目下月糧懸項愈積故酌議自本職

到任起至今玖月終計叁拾箇月該米價銀玖百兩卽入
正項軍需將玖月以前領過者扣算拾月以後未領者按
月抵爲工價似爲兩便各等因到司准此相應題覆案呈
到部該臣等看得成造軍器務期堅利以資捷伐今日廠
造雖精工料等項無不需之外運監督孫肇興躬親廠務
目擊艱難奏

請外造之便臣等熟議未必能如內造之精故先題

請成樣

進呈

御覽一一精堅方敢議造仰承

明綸何處煤料人工價廉道近堪資製造著開寫地方來看欽
此該監督備察鐵料煤炭產於山西廠匠亦用西匠布足
出於保定河南陸輓甚近銅料出於蕪湖水輸不遠卽將
各項器械造運進京道里亦近成造之便無逾於山西如

曰南京相宜恐未必然大抵造物之不同蓋因地土有燥濕人事有輕重南北既分質性自異故南造之器多柔薄北造之器多剛厚南北異宜不待智者而知之矣卽於山西打造合行兵部選熟諳打造軍器官壹員前往山西長治地方物料人工湊集便利之處動支地方官銀先造盔伍頂甲伍副參眼槍伍桿大砲叁位腰刀伍把樺木箭伍把各用料若干工若干工料價銀共若干此外再用般運盤費銀若干通共用銀若干揆之京造果否省費又必

進呈

御覽驗試無炸裂薄脆果濟實用卽可差官行令彼地開局成造少寬廠造之繁更見節省之實至於月糧一節據兩廠監督察議前來還按舊例每名匠頭每月食糧壹石止供廠中巡邏上宿防護之役雖議造廬壹頂抵作糧米價銀向未打造邇來月造米項軍需勢難他造兩廠監督志存

節省議將月糧米價抵扣月造軍需正費盈甲廠自本官到任日起至伍年玖月終止計拾柒箇月該米價銀柒百陸拾伍兩安民廠自本官到任日起至伍年玖月終止計叁拾箇月該米價銀玖百兩俱作月造工食自玖月以後按月扣銷節匠役之虛廩佐軍需之實用深爲有裨旣經該司察明前來相應具題伏乞

命下臣部遵奉施行

崇禎陸年正月拾貳日

拾柒日奉

聖旨軍器宜責成兩廠如式製辦不必差官外造委卸滋擾本內匠頭何故止供巡宿月糧旣扣應否仍令充役還著明白奏來

工部尚書臣周士樸等謹

題爲遵

旨具奏事營繕清吏司案呈崇禎陸年正月拾貳日奉本部送
工科鈔出

天壽山守備兼昌關等處察飭軍務內官監太監王希忠題稱准
工部手本內開該防守居庸關等處地方太監謝文舉題
議唐兒菴建築城堡該工部遵

旨議覆於崇禎伍年拾貳月拾貳日奉

聖旨這唐兒菴備禦事宜還著侯恂傳宗龍同王希忠確議具
奏欽此移會到臣該臣會同勘議唐兒菴地方原有邊牆外
平內窄設畱水門壹座參面是山兩夾流水至於夏秋山
水泛漲之日直衝無抵雖欲建築城垣實難峙立寧不徒
費金錢置之無益不若於水門兩傍平阜之處各設營房
拾間以爲各軍棲止之所又於水門券上原有望房壹間

年久傾頽相應建新再添貳間以便遠瞭卽前部臣侯恂所歷所議若相符合而督臣傅宗龍所見同臣此臣等酌議妥便合疏具題伏乞

勅下該部欽遵等因具題崇禎陸年正月拾壹日奉

聖旨該部看議速覆欽此又奉本部送工科鈔出薊遼總督傅宗龍題同前事同日奉

聖旨已有旨了該部知道欽此欽遵通鈔到部送司奉此相應議覆案呈到部該臣等看得唐兒庵建堡之議固監臣謝文舉防邊之策然旣無基可築則力不能輒施此向者督治侯恂之議止於水門兩傍各翔營房拾間以棲軍士仍於水券之上添修望房叁間以便遠瞭足矣今復經內臣王希忠會同督臣傅宗龍遵

旨酌覆前來適與前議相符謀旣僉同事難姑待令請嚴勅諸臣仍炤前議董率主兵加意料理趲此水解早竣此役

以資防禦以消窺伺至便計也既經該司案呈前來理合
具題恭候

命下臣部容臣等轉行該督撫諸臣遵奉施行

崇禎陸年正月拾肆日

拾柒日奉

聖旨依議著該督監嚴飭道將作速竣役以資防瞭不得泄延

兵部尚書臣張鳳翼等謹

題爲

聖恩共戴同

仁威裔未沾

一命謹比例具陳伏乞

皇上俯垂

恩錫事武選清吏司案呈奉本部送兵科鈔出左軍都督府帶

俸少保左都督劉岱奏稱岱叨係

皇祖宣懿昭妃同胞親弟臣姊侍奉

皇祖迄今伍拾伍年

三朝慶典頗盡微勞伏蒙

皇上恩禮有加切臣叨沐

恩波

天高地厚方愧無可報稱何敢復有覬覦冒昧陳

請惟是戚臣原是一體而

恩例尚有異同不敢不籲陳於

君父之前者切炤

孝靖皇后族姪都督同知王天名長子王肇桓得陞指揮僉事次

子王肇極得陞正千戶又

莊妃之弟都督同知李國棟伊子李恒煜得陞指揮僉事此貳

臣者皆叨係戚臣榮及胤子

朝廷展親之典曷其有極臣以

皇祖宣懿昭妃之弟見任左都督與天名國棟無異而臣長子劉永

恩次子劉永胤見爲布衣曾不得與天名之子肇桓肇極

國棟之子恒煜同沾

一命之榮諒亦

聖衷所矜憐而

聖恩之所不靳者也伏望

皇上俯念

皇祖宣懿昭妃先後微勲位雖於

正后不同勞實於諸

妃迥異特

勅該部將臣子永恩永胤炤王天名李國棟伊子之例量加職銜俾臣父子得效犬馬之勞永矢銜結之報不獨臣舉家

感沐卽臣姊亦永祝

聖恩萬壽於無疆矣等因崇禎伍年拾月初捌日奉

聖旨該部知道欽此欽遵於初拾日鈔出到部送司隨移文左軍都督府經歷司行察取結去後今准回稱行准本戚具後軍都督府管府事定國公徐允禎及本府帶俸太子太保嘉定伯周奎各結稱

皇祖宣懿昭妃同胞親弟劉岱嫡長子劉永恩次子劉永胤係

皇祖宣懿昭妃親姪

皇祖宣懿昭妃恭侍

皇祖伍拾伍年

三朝慶典俱盡微勞且爲

先帝主持大婚遴選

懿安皇后等妃著有偉功中外共知以故

先帝傳內閣

聖諭尊上徽號見居

慈寧宮

恩禮種種非別

妃嬪可以同日語者亦非別

妃嬪戚裔得以援例也比

孝靖皇后次枝族姪王天名

莊妃之弟李國棟往例相符合等因保結前來轉覆到司相應
具覆察得疏內所引貳例如王天名伊子王肇桓等係

母后之家事例不同母容擬議及察李國棟係

恭懿莊妃親弟於崇禎元年捌月內奏稱

莊妃保護

聖躬援炤劉岱例疏

請加級併伊男李恒煜授職奉有酌加職級之

明旨該本部覆奉

欽依將李國棟於原授都指揮同知上量加署都督同知伊男

李恒煜量授錦衣衛署指揮僉事在案今劉岱係

宣懿昭妃親弟伊男劉永恩劉永胤俱未授有職級援炤李恒

煜例奏

請行准勲戚徐允禎周全結保前來看得歷來加

恩於

妃族者雖皆援例陳

請而折衷

予賚總視其

妃之位分勞績以爲隆殺如

恭懿莊妃

皇上念係保護

聖躬

恩施不靳陞李國棟爲署都督同知授李恒煜爲署指揮僉事
是

皇上之推

恩於

莊妃懿戚者可謂優渥矣茲炤

宣懿昭妃爲

皇祖詔選

東宮侍奉

皇祖有年名分已甲於諸妃勞動懋著於

三朝業蒙

先帝諭尊徽號見居

慈寧宮儀範閫內其尊隆委非別

妃可同日語者矧劉永恩等爲

昭妃親姪與李恒煜爲

莊妃親姪其分又同則今之援例陳

請似難異視

皇上或念劉永恩等爲

皇祖見在妃戚不欲令其身列編氓量授職級其餘

妃族固不得援以爲例但

恩典出自

朝廷臣子未敢擅擬應聽

聖明的授采呈到部看得左府帶俸少保左都督劉岱奏援

莊妃親姪李恒煜例

請授伊男劉永恩等職級一節爲炤

國家從來誼篤懿親今劉永恩等爲

皇祖昭妃親姪察與李恒煜例旣相同矧

宣懿昭妃位勞竝懋見居

宮闈

恩典委應較渥非別

妃戚可得而援引也但

朝廷爵賞俱繇

宸斷非臣部所敢擅擬相應

請自

聖裁酌授

勅下臣部遵奉施行

崇禎陸年正月初捌日

拾柒日奉

聖旨劉岱向年陳乞已奉旨不准如何本內不行察載輒與徇
覆

吏部尚書臣李長庚等謹

題爲直糾通賄舊罪樞臣驟躋京堂以祈

聖鑒以祈

乾斷事考功清吏司案呈崇禎肆年捌月初壹日奉本部送吏科鈔出巡撫河南等處地方提督軍務都察院右副都御史吳光義題前事崇禎肆年陸月貳拾捌日據河南布政使司呈蒙巡撫河南郝右僉都御史案驗崇禎肆年正月拾陸日准吏部咨該本部題崇禎叁年拾貳月貳拾陸日奉

聖旨藩臬特轉京卿必有殊才異績方稱優遷曹履吉被叅事情未見覈實剖雪但以部咨科薦爲詞豈屬官方定論還著察禮部當日移咨有何確憑應從優異其曹履吉歷任年月及任內事蹟并著該撫按詳察明白具奏欽此欽遵備咨前來案行到司又蒙巡按河南監察李御史案驗同前事依

蒙行准按察司署印管河道右叅政應朝玉會同提學道
右叅議張定志察得原任提學道僉事曹履吉歷官叅載
歲科壹周其到任則自天啓伍年陸月陞任則自天啓柒
年拾月統計兩河考較郡邑不下百餘本官手眼拮据不
遺寸晷務完兩考亦可謂勤於任事矣當年榜發闈中得
雋者案首壹拾玖人遺才止居其壹兩河得士之慶於斯
爲盛至今傳爲美談若其密關防却請託絕換籤買號諸
弊釐剔殆盡觀其約言一書班班可攷其一時勞績中州
士人多有能言之者終不得而泯沒也等因到司該本司
右布政使賈鴻洙察得原任提學道僉事曹履吉夙負特
名雅稱學憲叁年歷任兩考旣週可謂無曠厥官矣卽卯
科之得雋者多其首卷而剔弊釐姦謝絕請託者復不遺
餘力其明而有報又如此故中州人士至今口碑如新誠
衡文忠之表表者也等因具呈到臣案炤先准吏部咨前

事已經前撫臣案行司道察報去後今據前因該臣會同巡按河南監察御史李日宣爲炤提學一官止爲

皇上衡文造士不關刑名不問錢穀不綰兵戎才無可見惟考試之公且明卽其才績無可紀得爾雅能文之士貢之

皇上卽其績今據司道所察原任提學道僉事曹履吉兩年肆箇月之內週迴捌府壹百捌州縣歲科兩考俱完闌中案首中拾玖人而遺才止居其壹似亦學道中之僅有者至其以嚴覈密關防以冷面謝請託以精心絕買號換籤等弊竇故一時得人之盛繇其衡文當而釐弊嚴故屬鼎絕而真才售亦可謂能其官矣

皇上命臣等將曹履吉歷任年月及任內事蹟詳察明白具奏臣等在外言外就學道言學道據司道所開年月事蹟壹字不敢增減一毫不敢緣飾謹具奏

聞伏乞

勅下吏部議復施行等因又該巡按河南監察御史李日宣題
同前事等因崇禎肆年采月貳拾捌等日俱奉

聖旨該部知道欽此欽遵通鈔到部送司案察崇禎叁年拾貳
月拾柒日本部題爲直糾通賄舊罪樞臣驟躡京堂以祈
聖鑒以祈

乾斷事覆南京江西道監察御史張善政題前事奉

聖旨曹履吉著吏部酌議李寓庸先行削籍著該撫按官勘明
具奏其李嗣勳李嗣燾俱著處分吏兵二部知道欽此又該
工科給事中王都題爲一時之是非不清則一時之英氣
不發千古之名實不定則千古之風教不伸敬瀝芻言仰
惟

睿斷以佐蕩平以昭

明盛事奉

聖旨這所奏還著該部品覈精當據實奏聞以憑激勸欽此欽

遵該本部爲炤曹履吉夙有才名尤砥清節其自河南學
道而轉光祿蓋禮部移咨優擢而非從崔魏也且咨移於
某年拾月正

龍飛御天之時而崔魏業已落膽矣今久而公論益定中州人
士交口爲履吉稱屈則履吉之生平亦可槩見惟是履吉
才多交廣以譽取忌招議亦自有因臣部奉有酌議之

旨合量用之南京衙門以老其才統惟

聖明裁奪等因本月貳拾陸日奉

聖旨藩臬特轉京卿必有殊才異績方稱優遷曹履吉被叅事
情未見覈實剖雪但以部咨科薦爲詞豈屬官方定論還著
察禮部當日移咨有何確憑應從優異其曹履吉歷任年月
及任內事蹟并著該撫按詳察明白具奏欽此欽遵在案通
察案呈到部爲炤曹履吉文行兼優士林雅重至督學中
州如撫按所覆文闡案首中者拾玖遺材中者止壹冷面

精心允稱學臣之任此卽部咨科薦之確據也借竇原無
風影京堂自非倖推徒以交多譽廣取忌招議合調南京
衙門以信覈實剖雪之

旨旣經撫按具題前來相應覆

請恭候

命下遵奉施行

崇禎陸年正月初玖日

拾捌日奉

聖旨學臣衡文得士止屬本職據奏曹履吉任僅二年考僅一
周非有深資殊績何遽破格優陞本內旣說招議有因又說
京卿非倖前旨著察禮部移咨確憑未見有何實據這覆議
尚屬含率著再行詳覈奏奪

工部尚書臣周士樸等謹

題爲遵

旨回奏順濟新河舊工錢糧事都水清吏司案呈本年拾貳月初陸日奉本部送工科鈔出總理河道尚書朱光祚題稱本年拾月貳拾柒日據管理中河工部員外郎屠存仁淮徐道右叅政劉泓會呈該臣批駁先詳察過順濟新河伍年工程錢糧文冊并造逐年經手職名見任去任履歷籍貫應銷應存錢糧冊揭到臣察得本年柒月爲遵

旨摘叅事准工部咨該工科摘叅未完內開壹件察新河伍年歲修費過肆萬叁千餘兩限本年柒月備報河臣察核具奏案炤先爲恭報歲修駱馬新河工程等事崇禎肆年伍月內臣題新河肆年分歲修估工叁千兩并天啓陸年起至崇禎叁年止計伍年費過肆萬叁千伍百兩前河臣駁察未報容臣核確另銷奉

旨下部本部覆奉

聖旨據奏駱馬湖堤始費止伍千餘金今幫築價乃過半有無
浮濫還著再加嚴稽務期實裨工作毋徒冒破塞責一應催
工竣役等事總屬河臣職掌自當便宜飭行不必遙請本內
陸年歲修費過肆萬叁千餘兩較初創用值反加顯屬虛糜
弊竇著詳行察核明白具奏不得以官更吏改爲辭欽此移
咨到臣備行該司道轉行辦築肆年新工并委同知胡賓
宿州知州原任邳宿同知宋士中邳州知州甘天植宿遷
縣知縣楊獻吉會察各年工費去後續據司道報銷肆年
歲修原估叁千兩止用過玖百玖拾貳兩貳錢省存貳千
柒兩捌錢已於伍年叁月

奏銷訖隨據司道呈據胡賓等會察該本道駁核覆察天啓
陸年加深陳溝并濬培馬口下湖堤河岸佑銀壹萬叁千
柒百玖拾伍兩貳錢貳分先因支領淮庫未到止詳動邳

庫存銀叁百貳拾兩淮庫行夫米千兩又借動宿遷餉銀壹千肆百伍拾伍兩壹錢玖分零共實用過捌千柒百柒拾伍兩壹錢玖分零該省存原掛號淮庫未發銀伍千貳拾兩貳分支故則宿遷縣知縣吳錫督察則原任同知宋士中也本年玖月因邳州匙頭灣河決黃水內灌兼值米年春

三王之國估工銀捌千捌百伍拾捌兩肆錢叁分止領到淮庫銀叁千兩辦修米年正月興工肆月告竣實用過貳千柒百玖拾肆兩叁錢柒分零尚省存宿庫貳百伍兩陸錢貳分零支放督察則宿遷縣知縣吳錫又兼署廳事也本年陸月

王舟既過伏秋水發有妨運道復估工銀伍千貳百貳拾伍兩陸錢陸分零因淮庫支領不到奉分司票先借動邳州決工銀壹千柒百捌拾伍兩柒錢柒分奉部院提到沛縣

湖租銀陸百兩宿遷縣自動庫銀壹百貳拾叁兩陸錢玖
分辦修正實用過壹千玖百叁拾貳兩柒分零開應找
銀柒百捌拾壹兩貳錢捌分零以本年未給不敢開除後
淮庫發號領銀肆千兩未動并前叁項省存宿庫肆千伍
百柒拾柒兩叁錢捌分零支放則知縣吳錫督察則通判
周霖雨也至崇禎元年正月據卷係監院會題大挑大築
估銀叁萬壹千捌百貳拾玖兩壹錢肆分零收到捌府州
縣并李紹蔭捐粟共貳萬壹千陸百貳拾玖兩伍錢肆分
零辦修各項止實用過壹萬捌千柒百肆拾壹兩伍錢叁
分零開應找銀肆百捌拾貳兩玖錢玖分零亦以本年
未給不敢開除拾月內續奉前河院李若星批駁各夫透
支不准據周霖雨詳稱各州縣窮夫遠調之苦詳准拾分
減肆該免追銀肆百柒拾壹兩伍錢叁分零存留宿庫并
各州縣透支坐追者尚該貳千肆百壹拾陸兩肆錢陸分

零外有未派銀壹萬壹百玖拾玖兩陸錢零支放始則署宿遷縣印邳州州同唐之隆繼則署宿遷縣印通判周霖雨督察亦周霖雨也崇禎貳年估工銀叁千陸百叁拾兩陸錢零節收察出草曠夫曠并元年庫存共肆千壹百玖拾肆兩玖錢捌分辦修實用過貳千肆百陸拾肆兩陸錢肆分零該存宿庫銀壹千柒百叁拾兩叁錢肆分零支放則宿遷縣知縣楊獻吉督察則通判周霖雨也崇禎叁年估工銀叁千貳百叁兩叁錢壹分止詳動淮庫買椿木銀壹千兩并元貳年支利銀共貳千柒百叁拾兩叁錢肆分零辦修實用過貳千肆百伍拾陸兩壹錢陸分省存宿庫貳百柒拾肆兩壹錢捌分因同知胡賓與孔從先張元弼俱委管歸仁堤工支放督工俱知縣楊獻吉也至於動銀多寡工程虛實誰功誰罪應聽院道分別職等不敢擅擬到道冊詳本部院蒙批據肆官會勘新河工程錢糧不言

某工實應銷銀若干某工虛冒若干省存實該若干見在某庫若干有透支借支者何官何吏何委何書作何擬追但云銀有多寡工有虛實誰功誰罪應聽分別直虛語爾仰司道駁行理刑官詳覈等因備行淮安府推官王用予嚴覈據本官回稱按冊細察得天啓陸年原估銀壹萬叁千柒百玖拾伍兩貳錢貳分辦料募夫實用過捌千柒百柒拾伍兩壹錢玖分零比原估節省銀伍千貳拾兩貳分零因動邳宿貳庫存剩銀抵用該存淮庫陸千柒百玖拾伍兩貳錢貳分內除應領補還宿庫餉銀壹千肆百伍拾伍兩壹錢玖分零用過邳庫存銀叁百貳拾兩外實存淮庫未領銀伍千貳拾兩貳分零天啓柒年初估銀捌千捌百伍拾捌兩肆錢叁分止用過貳千柒百玖拾肆兩叁錢柒分零外該找給銀壹千玖百貳拾玖兩捌錢伍分零因庫虛未找不敢開除此原估節省銀陸千陸拾肆兩伍分

零存宿庫貳百伍兩陸錢貳分零存淮庫伍千捌百伍拾捌兩肆錢叁分詳入本年陸月覆估工內支用後止領肆千兩尚餘在淮庫銀壹千捌百伍拾捌兩肆錢叁分又察覆估原詳伍千貳百貳拾伍兩陸錢陸分零時因淮庫銀領未到奉司文先借邳沛宿叁庫貳千伍百玖兩肆錢陸分續領到淮庫初估應發肆千兩共陸千伍百玖兩肆錢陸分止實用過壹千玖百叁拾貳兩柒分零外該找給銀柒百捌拾壹兩貳錢捌分零本年未找不敢開除仍該存宿庫肆千伍百柒拾柒兩叁錢捌分零崇禎元年原估銀叁萬壹千捌百貳拾玖兩壹錢肆分零內除未派發銀壹萬壹百玖拾玖兩陸錢零陸續收到省直捌府州縣并助粟銀共貳萬壹千陸百貳拾玖兩伍錢肆分零止實用壹萬玖千陸百玖拾陸兩陸分零內除先後領銀壹萬捌千柒百肆拾壹兩伍錢叁分零又續詳准各夫透支拾分減

肆免追銀肆百柒拾壹兩伍錢叁分零准作實支共銷壹萬玖千貳百壹拾叁兩柒分零外該找給銀肆百捌拾貳兩玖錢玖分零本年未找不敢開除該存宿庫貳千肆百壹拾陸兩肆錢陸分零詳入貳年支用原買銅鑼刀斧等件用銀貳拾玖兩叁錢初議變價今仍貯廠崇禎貳年原估詳銀叁千陸百叁拾兩陸錢零察初覆貳次冊內節收察出草曠夫曠并元年支存銀共肆千壹百玖拾肆兩玖錢捌分零辦募等項實用過貳千肆百陸拾肆兩陸錢肆分零外該給松板土方貳拾壹兩捌錢貳分零本年未找不敢開除仍存宿庫壹千柒百叁拾兩叁錢肆分零詳入叁年支用崇禎叁年原估詳銀叁千貳百叁兩叁錢壹分零冊開先領准庫壹千兩詳動貳年存剩銀壹千陸百伍拾叁兩叁錢貳分零元年邳州徭夫原借銀伍拾伍兩壹錢玖分零又松板銀貳拾壹兩捌錢貳分零共收貳千柒

百叁拾兩叁錢肆分零辦募等項實用過貳千肆百伍拾陸兩壹錢陸分零外該找土方料銀貳百捌拾柒兩伍錢伍分本年未給不敢開除割內仍存宿庫買樁木銀貳百柒拾肆兩壹錢捌分零總計伍年通共估詳陸萬陸千伍百肆拾貳兩肆錢壹分零止收領過肆萬叁千壹百玖拾兩貳錢貳分零辦修各項該銷肆萬壹千壹百叁拾玖兩肆分零內實支過叁萬柒千陸百叁拾伍兩伍錢貳分零尚有應找土方工食叁千伍百叁兩伍錢貳分零俱懸冊內待領今己年遠夫散難飽姦囊應議免找及察省存未領者非一庫一項冊註或淮安府或山東河南各府州縣或上年用餘或別工存剩或夫草追贖解發不齊至於覈貯宿遷縣庫者天啓柒年初估該存貳百伍兩陸錢貳分零覆估該存肆千伍百柒拾柒兩叁錢捌分零崇禎元年該存肆百肆拾貳兩叁錢叁分零貳年該存伍拾伍兩壹

錢玖分零叁年該存貳百柒拾肆兩壹錢捌分零通共伍千伍百伍拾肆兩柒錢零開庫吏焦守仁借壹千貳百兩解天啓柒年遼餉戶書安九韶借柒拾叁兩解天啓陸年遼餉兵書顧修德借壹百伍拾玖兩捌錢叁分應付牌夫戶書劉崇佶借壹千肆百捌拾壹兩玖錢肆分解漕折并河下應付戶書羅于鰲借玖百兩解京邊麥折庫吏張希賢借貳百柒拾貳兩柒錢玖分零應付折夫火頭胡從仁借支工食貳百陸拾貳兩把總沈傳捷買木透支壹百貳拾兩捌錢貳分以上那借共肆千肆百柒拾兩叁錢捌分零行縣提追未解銀無完報候嚴追另結其鄉民王應龍等透領買椿木銀伍拾貳兩捌錢叁分零經歷黃縉透領買椿木壹百貳拾叁兩壹錢柒分零已經追完解濟轉解通惠河協濟大工訖又見貯宿庫壹百貳拾伍兩叁錢捌分零尚有鄉民倪守德等并徐邳豐沛州縣透支辦料

欠壹百肆拾玖兩肆錢玖分零又徐蕭清桃豐滕各未解料銀肆百玖拾柒兩伍錢壹分零應併嚴追續又察出貯縣庫存銀壹百叁拾伍兩玖錢肆分肆詳到道該司道覆看得新河創開於天啓伍年一應工費用銀伍千玖百肆拾餘金及自陸年以至崇禎叁年各年估詳銀數多寡不同總計陸萬陸千餘兩實止解到肆萬叁千壹百玖拾兩零逐年覈算工程該用肆萬壹千壹百玖兩肆分零實止給領過銀叁萬柒千陸百叁拾伍兩伍錢貳分零業經推官王用予弔察用卷領狀磨算明白俱係實用應准開銷外尚該找銀叁千伍百叁兩伍錢今議年遠夫散免行找領仍存宿庫銀伍千伍百伍拾肆兩柒錢零被該縣吏書侵那及各州縣透支土方料價年久不還應行盡法追究歸還河帑再炤遞年修築工程較與創挑之數雖若過費殆有說焉天啓伍年初開事屬創始僅就湖心開挑一渠

適值雨水深通易於爲力然不過試行運艘而已彼時兩岸未築長堤是以工費見少及至陸年喜有成效足避河險遂佑議加挑深闊堅築牽堤遂費工力雖名爲修其實完創之局也朱年春

三王之國船多載重稍有淺滯取罪不小不得不復挑深通及

王舟過後伏水漲發致將河堤衝墊糧運有礙不得不又詳修濬是壹年而兩費也迨崇禎元年內外會

請大修佑用參萬餘金實解貳萬壹千餘兩用過壹萬玖千貳百餘兩彼時睢寧露鋪告決邳州匙灣淤平新河有伍要伍害之趨避是以修用更繁嗣後貳年叁年所費無幾亦繇元年先勞而後逸也具詳到臣該臣駁覈確議去後今據前詳該臣看得順濟新河開於天啓伍年長伍拾柒里費伍千玖百肆拾餘金係臣經手非翅人力也蓋有

天幸焉憶是春桃水早發回空挽拽不勞鄰近額夫皆可調用故事半而功倍然亦因水溢而有未竟之功臣肆月內報疏明言以待後人比及玖月重運亦已盡通無滯矣次年先河臣李從心議加濬築陳溝拾里以平地論工無夫可調多募則多費管工同知宋士中揭剖甚明所以用至捌千柒百柒拾伍兩較原估壹萬叁千柒百玖拾伍兩省未領伍千叁百肆拾兩在淮庫收支則宿遷縣知縣吳錫也柒年春初估工捌千捌百伍拾捌兩似乎泰矣但值

三王之國曠典疊逢計工完止用貳千柒百玖拾肆兩省貳百伍兩陸錢貯宿庫有未領伍千捌百伍拾捌兩在淮庫督工收支俱知縣吳錫也嗣因水汎衝淤重運艱險是以有伍千貳百貳拾伍兩之復估計詳領項數陸千伍百玖兩零雖用止壹千玖百叁拾貳兩未領淮庫壹千捌百伍拾捌兩問宿庫省存之肆千伍百柒拾柒兩俱被姦吏猾

書那借殆盡收支則吳錫而督工則錫與同知連躍周霖
雨又共爲政也若乃崇禎元年豫佑在米年拾貳月而會
題於正月以五患五要爲言佑參萬壹千捌百參拾兩奢
實太甚計派領過省直捌府州縣貳萬壹千陸百貳拾玖
兩零委官多至參拾陸員銷夫料土方官匠犒賞工食壹
萬玖千貳百拾參兩除未派解壹萬壹百玖拾玖兩零有
省存貳千肆百壹拾陸兩除壹千玖百拾捌兩零竟屬烏
有收支則署宿遷印邳州同知唐之隆督工則周霖雨等
多官也玖月以後前河臣李若星履任如意綜釐懲前毖
後於是貳年佑工參千陸百參拾兩零計詳領銀數實用
貳千肆百陸拾肆兩零省存壹千柒百參拾餘兩以待參
年收支則知縣楊獻吉督工則周霖雨也參年佑參千貳
百參兩零實用貳千肆百伍拾陸兩零省存貳百柒拾肆
兩零今解通惠河并貯宿庫收支則楊獻吉因同知胡賓

委造燬船兼護歸堤督工亦楊獻吉也通計伍年紙上虛
佑雖云陸萬陸千伍百肆拾貳兩察米同批收各府州縣
解支宿庫實數止肆萬陸千捌百叁拾玖兩伍錢存在元
貳兩年支用者叁千陸百肆拾玖兩叁錢應銷土方物料
犒賞工食叁萬柒千陸百叁拾伍兩伍錢外有懸罔待找
土方銀叁千伍百叁兩伍錢垂涎已久今議免支是奪於
將與者也見在還官貳百陸拾壹兩叁錢貳分與先追完
解通惠河之壹百貳拾叁兩又王應龍續完伍拾貳兩捌
錢叁分共肆百叁拾柒兩叁錢零是吐於旣吞者也惟省
貯宿庫被焦守仁等侵借之肆千肆百柒拾兩叁錢捌分
係前任宿遷今降陞四川墊江知縣吳錫經管一任左右
之混淆寧無扣例重禡非苛見任知縣楊獻吉委爲前人
之陳牒提不解追并懲亦當但念河漕要地辛苦叁年曾
追解過舊借支貳千壹百柒拾餘兩協濟通惠河大挑并

助餉之用著落清逋可責後效或難與吳錫同科其他天
啓末年鄉民倪守德等并徐邳貳州豐沛貳縣透支辦料
壹百肆拾玖兩肆錢玖分崇禎元年徐州清河源蕭豐
滕伍縣未解料銀肆百玖拾柒兩伍錢壹分前官離任已
久應責成見在印官究追解補不許再延者也至於元年
周霖雨雖支放獨多而同委省直管工之官冊載叁拾陸
員十羊九牧是不一人故道臣先疑其未明而理刑官細
覈而不問察已計處姑免深求此一案者察覈已經踰年
臣批駁不翅再四非奉行者敢於飾玩也昔特司帑督工
之人久去錢糧支領非壹府壹州壹縣文冊驗詳非壹司
壹道壹廳承委有遠近之官役夫有額募之異工料有豫
給找支之別銷算有裁虛准實之批往還帑察自不免於
荏苒居諸矣察舊工俱候年終彙

報自前河臣李若星壹工壹具題壹完壹

奏銷亟按元年支剩之金錢爲貳參年歲修之實用及覆嚴稽始取各案冊磨對未完而臣繼之故肆年會估疏中附致申儆欲與見在河臣共圖節愛爲新河一勞永逸計非苛求於既往也欽奉

明旨詳行察覈始知伍年內工銀實用准銷者止參萬柒千陸百參拾伍兩存在貳參年支用者參千陸百肆拾玖兩外有各年土方待找之參千伍百參兩不准再給有那借柒年初估省存之肆千肆百柒拾兩見行嚴追是年覆估又有應追壹百肆拾玖兩元年透辦亦有應還肆百玖拾柒兩合之已解續完及見存宿庫共肆百參拾柒兩通共覈省出玖千餘金除免找外應追伍千壹百壹拾柒兩是在接管各官原有正項者作速炤欠帶徵勒限完庫係干侵欺者作速勘產變補依律正法斯可借手以報詳覈之明命矣所有委察諸臣曠日持久司道貳臣揭稱各院巡歷公

占往來原非漫語而臣亦因四時進退之序以驗水勢盈
虛之變益見新河內多建瓴之湖泉遇澇則流沙內墊所
必至也不可不歲修外有黃河之洶溜倒灌則湖口外壅
尤可憂也不可不歲修故築濬之需勢難容已惟是此河
與泃河同功止取濟運但春冬月運行時河泓中深而重
艘無滯牽道平坦而行人可通已矣若有意多估而報興
作於桃伏水發之日四顧汪洋何處下手卽真心冥力而
覆沙於內外橫流之衝一線土堤何能捍禦金錢大可惜
也臣籌之熟矣若求永賴長策必帑有餘積時遇旱年採
石燒甑倣高寶一帶湖堤疊砌之法又得實心任事官參
肆員寬歲月以責成功方有濟爾臣自肆年夏秋三涉此
湖與司道府廳議及此役不日詘難舉羸則曰水災占地
不日

功令森嚴人爭縮首則曰非嘗之懼難保厥終臣亦孤拍而難

鳴矣敢因察覈而竝及之伏乞

勅下工部會同吏部議覆將墊江知縣吳錫從重議處宿遷知縣楊獻吉念舊借多追住俸戴罪責其後效歷年領過工銀應銷應追與姦吏焦守仁等應正法者行臣衙門轉行司道等官議究結案等因崇禎伍年拾貳月初叁日奉

聖旨工部覈議具覆吳錫楊獻吉著吏部議處奏奪欽此欽遵鈔出到部送司案呈到部該臣等看得順濟新河自天啓伍年創開伍拾柒里計費伍千玖百肆拾餘兩重運雖通而築濬尚未竟也顧修繕之功必儉於初始歲支之費當核其省存估用旣奢而猶蝕之侵之金錢亦大可惜矣河臣朱光祚據司道會察新河伍年修費天啓陸年加築陳溝并濬馬頰湖培築堤岸實費銀捌千柒百柒拾伍兩壹錢玖分零天啓柒年因匙頭灣河決費修築銀貳千柒百玖拾肆兩叁錢柒分零是年伏秋水汎妨運續費銀壹千

玖百叁拾貳兩柒分零壹歲兩修計共費肆千柒百貳拾陸兩肆錢肆分零而省存宿庫之肆千伍百餘金則於此時那借殆盡至今尚未追補至崇禎元年議用大挑估多而費奢除經詳准免追透支夫價肆百柒拾壹兩伍錢叁分零實銷銀壹萬玖千貳百壹拾叁兩柒分零崇禎貳年實用貳千肆百陸拾肆兩陸錢肆分零崇禎叁年實用貳千肆百伍拾陸兩壹錢陸分零此兩年經費則較往年大爲覈裁矣通計伍年歲修除冊報應找土方工食銀叁千伍百叁兩伍錢貳分零盡爲汰去應准實銷銀叁萬柒千陸百叁拾伍兩伍錢貳分零內天啓陸年則以修培完剝之局天啓柒年與崇禎貳叁年費亦不爲過浮唯是崇禎元年費實太甚但周霖雨等既經計處且經前河臣李若星駁察核減并應准銷者也及察伍載原詳估銀陸萬陸千伍百肆拾貳兩肆錢壹分零收領過銀肆萬叁千壹百

玖拾兩貳錢貳分零除銷過夫料銀叁萬柒千陸百叁拾伍兩伍錢貳分尚該省存銀伍千伍百伍拾肆兩柒錢貳分今問宿庫見貯共貳百陸拾壹兩叁錢貳分追完透支買木銀共壹百柒拾陸兩貳項共止肆百叁拾柒兩叁錢貳分其餘吏胥侵借如焦守仁借解遼餉銀壹千貳百兩安九韶借解遼餉柒拾叁兩顧修德借發牌夫壹百伍拾玖兩捌錢叁分劉崇信借解漕折并河下應付壹千肆百捌拾壹兩玖錢肆分羅于鰲借解麥折玖百兩張希賢借給折夫火頭貳百柒拾貳兩柒錢玖分零胡從仁借支工食貳百陸拾貳兩又把總沈傳捷透支買木壹百貳拾兩捌錢貳分共計借支銀肆千肆百柒拾兩叁錢捌分零當河銀省存之日大都垂涎扣例羣起那借舊任知縣吳錫旣縱左右之混蒙見任知縣楊獻吉又委舊牒而勿問年復壹年遂成逋案應將各役行該撫按嚴提勒限併追正

法者也此外尚有天啓柒年項下鄉民倪守德等并徐邳
貳州豐沛貳縣透支辦料銀壹百肆拾玖兩肆錢玖分崇
禎元年項下徐州并清河桃源蕭豐滕伍縣未解料銀肆
百玖拾柒兩伍錢壹分拖欠已久亟應償補合責成見任
印官嚴追完解至於此河地屬宿遷糧運經行原在春月
必先時勘估期於利運若挑水伏秋之時力旣難施費轉
大耗此又歲修之不可不蚤計者也除吳錫楊獻吉聽吏
部另行議

奏外其各年錢糧相應察覈具覆恭候

命下遵奉施行

崇禎伍年拾貳月貳拾捌日

陸年正月拾捌日奉

聖旨新河歲修銀兩虛冒已多及省存貯庫的又一任姦胥恣
意侵那殊可痛恨焦守仁等著該撫按嚴提究擬罔數勒追

仍察吳錫楊獻吉有無通同婪染情弊奏奪其倪守德等併
徐邳各州縣透支未解料銀通著責成見任印官督追完解
修河專在利運何故不先時繕築明係故意延緩臨期塗飾
以便冒破還著總河督臣嚴飭該管各官預行勘估興工刻
期竣役務令堅整如有仍前玩泄糜費的叅來重治

兵部尚書臣張鳳翼等謹

題爲地方事殊時異所當急用綢繆敬陳募兵朱說仰候

聖裁以保民生以固根本重地事職方清吏司案呈崇禎伍年
拾貳月初拾日奉本部送兵科鈔出鳳陽巡撫李待問題
稱崇禎伍年拾壹月初柒日准兵部咨該本部題職方清
吏司案呈奉本部送兵科鈔出直隸巡按饒京題前事等
因本年玖月拾玖日奉

聖旨奏內募兵事情著該部看議來說欽此欽遵鈔出到部看
得江北爲

陵寢重地漕運咽喉且當洪水爲災民居寥落東賊未平水陸之
流突宜防豫盜時警徐沛之錯壤可慮按臣饒京目擊時
艱爲桑土綢繆之計以募兵朱說請惟是議兵則議餉募
之壹事譚何容易向撫臣李待問曾有登變震切於鄰等

事一疏議

請召募而以鹽課內計充兵餉戶臣難之其說中止今按臣云
不煩司農自能設法料理而未聞其厝處之法何狀合應
勅下該撫按一面斟酌召募一面將籌處兵餉事宜具奏等因
具題拾月拾捌日奉

聖旨江淮重地方備飭宜嚴這募兵既稱該撫按自能設法措
處著審計酌行仍將籌畫兵餉事宜明白具奏欽此欽遵拾
壹月拾叁日又准本部咨內開該臣題前事拾月貳拾伍
日奉

聖旨奏內兵餉事情已有旨了徐淮水陸要害鄰警方殷著該
撫按速遵屢旨嚴督道府各官設法料理以資援扼不得少
有疎誤該部知道欽此欽遵節次移咨到臣除一面嚴檄道
府將領等官設法援扼外該臣看得今日江北綢繆戶牖
之計亦岌岌矣東防登賊西防晉賊旣防陸又防海而海
與陸瀰漫邈闊其易乘之處更無所不防也又當此降洞

之後饑殍之民哀苦顛連昂然喪其樂生之心彌慮有艱
疏之事古人謂兵可千日而不用不可壹日而不備況今
藉兵爲備之時乎卽如東省塘報謂賊開水門出入或船
肆拾隻或船伍拾隻尚未有制其死命者漸行漸熟漸掠
漸遠盈盈一水業與賊共之矣乃備之地多則防之力薄
仰乘之勢猝則應之事艱頃淮南諸營共以海上爲憂欲
索回調遣之兵令臣狼疾莫顧蒿目寒心故又出於添募
之一著荷蒙

聖明著臣等審計的行臣等章句豎儒見不踰域然責任在身
憂危在目及今預圖或可措手待其亟始言晚矣時道臣
劉泓柴紹勳申爲憲以審決咸集淮上臣因與同淮海道
臣周汝璣面加商確大抵今日之事東防爲先西防次之
東防之事防海爲先防陸次之防海之事淮安爲先揚州
次之故地必擇其最要害之處向無兵者量置之向兵少

者量增之而已海上之衝以鶯遊爲首察該營雖設把總而營兵止貳百餘名又分守高公島黑土關壩溝叁信地何以昭管今量增貳百名贛榆孤懸淮北水陸交衝而又分防玖口今量置叁百名黃河口灌口射陽口爲導海入淮之路風帆之便一日可至從來止於汛期撥廟灣兵防之頃廟灣自顧不暇矣今量置叁百名徐州重地以副將旗鼓而兵止陸百餘名實是不成營壘自調防宿遷而徐州虛矣今於宿遷置貳百名黃河界口置貳百名鳳陽一府兵士寥寥而宿州亳州當中州之門戶今於宿州營增壹百名亳州置貳百名計共增壹千伍百名也夫臣一疏而增兵千伍百名若以爲多而各處分防止於如此且塘報中各賊動言萬言千而地方以數百爲防實存乎見少宜各道臣鯁鯁然競以防禦不足爲言也察天啓貳年督臣李養正增兵一疏共增陸千捌百名其餉皆取之馬價

鹽課等項臣今既不敢望濟司農亦不敢輕言編派而又無分外設處之法遷思迴慮惟有量帶鹽斤一議臣本年參月間具時事多艱周防彌切一疏大抵炤前鹽臣鄧啓隆議修揚城之例各商每引量帶鹽肆斤徵銀貳分共銀壹萬玖千陸百伍拾肆兩陸錢例分若儘此銀募之可得兵壹千伍百名其餘爲新兵船隻火藥之用向疏業奉

旨下部酌議部議亦以爲可通融支用嗣臣奉

旨散遣召募隨奉有不必行之

旨今日事勢添募實不容已則量帶鹽斤亦不容已頃臣踵按臣饒京補牘亦謂添兵必先籌餉臣前疏鹽斤量帶之說可以不煩司農計畫而貽地方之安蓋已明言之矣臣再三與按臣審詳適詢之鹽道柴紹勳亦謂於正課無妨於兵事有濟倘亦爲

聖明所惠許也若舍之而欲索一切苟且之圖無論別無可索

卽聚紙上之數竟何當於緩急望梅畫餅臣且以募自困也部臣謂務期經久行之無弊誠有見乎此竊念自有東事以來臣調各兵遠防日費行糧不貲臣多方那處業已窘迫無惜豈尚復有遺力可爲召募地雖微臣之慮拙亦物力之維艱其地方捉襟露肘之情瓶罄罍恥之狀亮已久撤

聖衷無容臣之喋喋爲矣臣謹會同直隸巡按饒京合詞明白具奏伏乞

聖明惠顧根本重地脩容臣等炤行料理以資防守所以厚江淮牧寧之福將在茲矣等因崇禎伍年拾貳月初玖日奉聖旨重地扼防屢旨嚴飭這增兵措餉事宜該部酌議速覆前饒京說自能設法料理是否卽此量帶鹽斤也著他再奏欽此欽遵鈔出到部該臣部咨行戶部酌議去後隨准咨覆內稱山東清吏司案呈奉本部送准兵部咨前事等因到

部送司看得鹽法壅滯最苦私鹽而鹽商之夾帶亦私也
既有割沒以暗導之又有加斤以明導之則夾帶居然公
行莫禁矣故前次本部題覆攝鹽事竣壹疏奉

聖旨增兵加帶鹽斤徒滋冒蠹不必行欽此今總督會同按院
復申前請蓋東西震鄰水陸設防增兵必不容已而時詘
舉盈設處再無餘地似亦不便膠柱者有說於此各引雖
止肆百柒拾斤而寅緣割沒大包稱掣至有斤倍於引者
不於引外禁數千數百之暗加而反於引內禁肆斤之明
加商人且竊笑公家之失計也是鹽法疏通在稱掣之有
弊無弊耳如使引數之外再無私帶則此肆斤之加更減
於暗加之數多矣以此措餉本部何憚而不爲乎但量帶
鹽斤有還著再奏之

旨應否准行伏候堂裁等因呈奉堂批加帶鹽斤終不更於鹽
法恐借之爲名而弊且愈滋也況有著他再奏之

旨則可行與否當聽按鹽貳院從長商議務求有利無害可耳
等因到部送司案呈到部炤得撫臣李待問爲江淮重地
漕運襟喉慮齊晉草寇之陸梁而惓惓以增兵設防爲急
此亦未雨綢繆不可謂其無當但增兵勢必增餉此時斷
難剗肉是以有取給於鹽斤之議乃計臣則又鯁鯁爲鹽
法商利弊而憂其難行使此說中格則增兵亦竟屬空談
矣然該撫按皆明而熟於計者又豈不見及此而同聲以
請或亦有均見其無礙者乎已奉
明旨勅其再奏姑俟奏到之日權可否以決從違可耳既經奉
旨酌議相應覆

請令候

命下遵奉施行

崇禎伍年拾貳月貳拾捌日

聖旨是

陸年正月拾捌日奉

兵部尚書臣張鳳翼等謹

題爲九連之賊窠已空百年之長計宜周謹陳善後事宜懇
乞

勅下覆議及時舉行以圖永安以奠疆圉事職方清吏司案呈
崇禎陸年正月初陸日奉本部送兵科鈔出廣東巡按梁
天奇題前事內稱臣奉

命按粵壹年餘矣適值山寇猖獗參省會勦馳驅所至得與道
鎮諸臣察察形勢之險易講求制禦之方略旦夕實鯁鯁
焉茲當掃平九連員子等處窠穴一時賊黨斬獲者固甚
多其經安插與潛散者當亦不少粵東庶幾寧謐矣顧賊
亦何嘗之有散則爲民聚則爲盜粵東之所以多盜者第
因山嶺險阻有可結聚之處今九連山窠雖洗而不爲長
久之計恐大兵一撤而無良之人盜心復萌安能保安插
與潛散者不更結聚於窠穴乎是異日之大盜終未息也

頃臣與道將商度善後之策皆謂山中賊窠必盡令兵將據守使賊無嘯聚之處然後粵東日後永無大盜之患顧設兵必先設餉又察山窠中田地甚多良民不敢入種昔時有爲賊耕種者有爲賊拋荒者其實皆腴田也豈爲招墾儘可充養兵之餉而有餘是兵可增設而餉不必分外增議也此戴罪鎮臣鄧懋官親履其窠謂皆可守目擊其地謂皆可耕與臣計畫臣請一一爲

皇上陳之九連大山綿亘參省叢巒疊嶂萬壑千巖皆羊腸鳥道其環山而城者在廣東則惠州之長寧和平龍川河源韶州之翁源南雄之始興在江西則贛州之龍南定南信豐等縣西北一路可達楚境東南一帶竟趨閩界按其窟穴之有名者共茱窠曰野鴨潭曰上下田螺塘曰內管曰上下藍洲曰五虎營曰李叟洞曰樟坑皆沃壤腴土昔爲賊首陳萬所盤踞者察茱窠名內管者路通山外九城遠

近適均有田數拾里約肆伍拾頃可屯兵伍百名有謂當
於此設一縣治以招墾撫民者有謂當兼設一叅將以屯
兵弭盜者總之縣治當設未易驟舉而目下設將以控制
諸路則不可緩也至內管之南名爲上下田螺塘有田數
頃可屯兵壹百伍拾名內管之東北名上下藍洲有田數
頃亦可屯兵壹百伍拾名遞北名五虎營有田約叁頃可
屯兵壹百名其東名李叟洞有田數頃亦可屯兵壹百名
迤東名樟坑有田拾餘頃可屯兵叁百名又最南名野鴨
潭有田拾餘頃亦可屯兵叁百名俱可各設一把總聽叅
將調度星布防守則聲威振矣而此米窠之外高坪深谷
盡是田畝荒蕪汙萊不可勝數雖有肥磽不同但能窮地
力卽千數百頃亦可墾闢亟應責成嶺東道臣專董其事
又於惠廣韶南肆府佐貳中擇壹年力精壯才幹優長操
守清潔有志向上者假以事權親督和平河源等縣掌印

官裹糧徧立沿丘履畝逐一丈量明白計畝給兵設立將領把哨建棚營壘以次墾耕寓兵於農卽扼吭以守而該道又時時親歷閱視間行犒賞以揚我武務使姦宄潛消地方安堵是此一山也昔日爲賊嘯聚之窟今日爲民桑麻之區昔日以有用之田資盜而盜爲民害今日以有用之田餉兵而兵爲民利若夫一切把哨糧食建置工料開平道路士卒器械皆聽道府設處抽移期於必濟俟經畫妥當貳叁年後果有成效府佐縣官不妨優擢以酬其勞卽嶺東道臣亦必俟丈田設營募兵完成方可題報推陞庶不致傳舍其官苟且塞責而後可爲千百年之計其九連之迤東北下歷司南坑南郭汶龍一帶屬江西定南龍南貳縣地方應聽贛州道府議兵派守庶免疎虞是在彼中自爲計矣若員子山窠穴亦以界在虔贛粵閩之間賊可以倏忽來去而平遠縣治反在一偏不能彈壓臣巡歷

潮州據該縣紳衿里老聯詞籲控請移縣治於石窟地方以制賊衝且願損輸以助建勦情甚真切而道鎮將領凡至其地者皆言其田土滿望膏腴百姓生聚繁衆形勢環拱美利悉以遷城爲得策卽督臣熊文燦亦稔知之深以爲然臣先已批行潮州府酌議雖屢催尚未詳覆而平遠縣城之當遷改則固輿論僉同矣又南雄府爲全粵咽喉本省京邊錢糧無不經此輸解往來客商財貨無不經此積運久爲賊所垂涎乃其城卑僅壹丈薄僅叁尺何以爲守去年因叅將蔡時春援兵劄雄又因叅將張一傑領兵先到賊始不敢窺雄亦幸也今南雄士紳商民咸願捐貲修勦爲保身家計捐助不足而請暫那橋稅以成之該府知府金廷璧申文修築欲多方設處又欲不擾壹民今雖尚未興工而其苦心已不可沒矣此貳處城池一應遷改一應修建皆不可緩者今臣得代將行因并及之謹會同

兩廣總督熊文燦據實備陳伏祈

皇上俯賜垂鑒

勅下該部覆議移文督撫及時舉行庶九連後患可絕而參省疆圉永奠矣除九連山形鎮臣鄧懋官以身所親歷繪成一圖臣恐外圖不諳格式不敢驟

進見送兵部如蒙

皇上取

覽聽該部模繪

進呈

聖覽等因崇禎陸年正月初伍日奉

聖旨該部看議具覆地圖著進覽欽此欽遵鈔出到部送司案呈到部看得九連壹山橫亘三省雖羊腸鳥道而其中寬平之處大都腴田以故賊得且耕且掠永爲窟穴今仰藉天威幸已勦蕩然欲永遠清夷非屯兵置守不可該鎮臣鄧懋

官親履其地相度形勢野鴨潭等處凡七窠俱堪屯種據稱有田數頃即可屯兵壹百餘人有田拾餘頃即可屯兵叁百餘人是必土膏饒沃可以卽農爲兵不必加餉若以漸開闢將來建設縣治亦未爲不可也今應依議責成嶺東道臣專董其事督率各府佐與和平等縣掌印官逐一清丈計畝設兵某處可設小堡某處可建大壘務得星羅碁置之法其叅將未易輕設把哨等官以地方大小爲差而卽統於惠州之叅將至於一切糧食工料士卒器械應聽該府道設處抽移期有成效一體優擢此一勞永逸之計在該道自應以一身始終之也平遠縣治議移石窟旣稱形勢美利且地方捐輸建勦應如議獨南雄府城卑淺委應增修惟已有士紳商民之捐資似不得輕挪橋稅是在地方官加意行之九連東北一帶屬贛州龍定兩縣前賊流突實繇此而出今設兵派守自合茲防凡一切屯戍

地方該撫道宜速爲料理應

勅行虔鎮會同粵東各昭信地建堡設兵務期彼此通道哨望

相助永圖寧謐可也既經奉

旨看議相應具覆併所繪地圖進

覽伏候

命下遵奉施行

崇禎陸年正月拾伍日

拾捌日奉

聖旨九連山等處設兵屯守亦似永計奏內責成該道督率府
縣清丈建設及虔鎮會同處置事宜俱依議行巖險地方翔
立伊始本地武職近處守令俱須得人著督按等官加意料
理其道臣仍久任課成以圖永賴平遠遷治亦准輸翔該縣
有無兵屯也著督按官議處具奏南雄修城既有捐資著地
方官設法繕葺不得那用橋稅地圖畱覽

吏部尚書臣李長庚等謹

題爲鹽池大浸鹽官久缺懇乞具題請補以裨鹽政以分獨
瘁事文選清吏司案呈崇禎陸年正月初柒日奉本部送
吏科鈔出巡按山西監察御史羅元賓題前事內稱河東
運使運副缺官伏乞

勅下吏部速行銓補仍嚴限速來供職等因陸年正月初陸日
奉

聖旨運使已點用了著勒限到任這缺如何久懸又將遠方的
推補運副曾否有人俱著吏部察明來說欽此欽遵鈔出到
部送司察得運使總理鹽政關係

國課軍需舊例於甲榜鄉科知府中擇其資俸相應才品素
著者推用而官生知府不與焉去歲河東與長蘆運使一
時俱缺臣部簡察各省直知府非俸不及期卽被叅降罰
功令森嚴未敢陞轉惟廣西思恩知府董則喻貴州平越知府

陳達貳臣俸已及瓜才品堪任故於拾貳月內以董則喻
陞長蘆以陳達陞河東各運使業蒙

聖明簡用亦知道里稍遠而無奈附近地方相應之難其人也
府官資俸次序降罰緣繇俱在

御前難逃

睿鑒伏乞

聖明嚴勅貳臣勒限赴任庶不至於曠官廢事矣其運副一官
往例率選貲郎近議改用正途而正途應選者少容臣部
於是月推陞揀擇有司之考語素優才品俱卓者卽爲陞
補今奉有察明之

旨相應據實回奏案呈到部既經按臣具題該司察呈前來相
應覆

請恭候

命下臣部遵奉施行

崇禎陸年正月拾陸日

拾玖日奉

聖旨知道了卽著遵旨嚴催赴任今後推用各官還著酌量人地以便受事不得槩循資俸遠道遷移致滋曠悞

戶部尚書臣畢自嚴等謹

題爲年終

奏報鹽課關稅原額完欠併泉局銅本已未完數目事山東清吏司案呈崇禎陸年正月初貳日奉本部送戶科鈔出專管察覈餉務戶科給事中朱國棟題前事內稱臣察鹽課關稅供九邊軍儲之半臣自歲首領

命稽覈今壹歲已終例應

奏繳察得兩淮鹽課甲於天下春秋貳運爲數甚夥而其逋負亦自不少在天啓陸柒年間尚欠肆拾餘萬雖經戶部具題以肆年爲始限以伍年搭解計每歲應解捌萬餘矣今已兩載曾無分文解部尚有肆年以前新舊每年零欠共計陸拾萬有奇也其伍年分鹽課舊餉則欠肆拾壹萬陸百伍拾叁兩零新餉則欠陸拾壹萬捌千伍百玖拾叁兩零總計累年新舊兩餉積欠貳百陸萬玖千貳百肆拾

伍兩有零太倉歲入能有幾何而兩淮運司逋負居幾半似不得辭溺職之愆也等因具題崇禎伍年拾貳月貳拾玖日奉

聖旨兩淮額解銀兩舊逋帶徵違限新欠又復不貲似此積累將何底極今應作何追併以期足額該部速行看議來說銅本也著催完伍年分的候報到察明奏奪王廷賓買運銅斤併王文耀未完銅斤俱著該撫按嚴行追解如再玩延將經管官叅來處治欽此欽遵鈔出到部送司除各商委所欠銅本及王廷賓等未完銅斤已經總理題叅原限貳月內奏結俟察明另行議覆并伍年各關派發銅本俟報到察奏外其兩淮鹽課積欠一節相應議覆案呈到部該臣等看得兩淮鹽課初止陸拾柒萬餘兩節次增加至陸拾玖萬陸千餘兩止此行鹽地方而課額遂溢其半勢固不能無逋也况假引私鹽之行實繁有徒占窩賣窩之計巧又多

方司鹺者之催科亦真棘手矣科臣所開累年積欠貳百陸萬餘兩恐自今以往壓欠當不止此者

明旨所爲鰥鰥慮也今欲一槩併徵無論追呼有所不及物力亦自難贍不得已惟有搭解一法然而天啓陸采兩年欠課肆拾餘萬臣部亦經題議以肆年爲始每歲搭解捌萬餘矣閱兩載而無壹到部豈搭解之法不可行耶良因大工搜括之後鹺庫如洗

皇恩大赦之餘商望實殷故觀望不前耳原不當輕言蠲免卽前按臣史莖有疏請免臣部未敢曲從惟是近日淮揚水災竈戶飄零酌緩急之中以求可行不得不稍爲恤商計者令無將天啓陸年舊欠銀貳拾伍萬肆千玖百柒拾餘兩姑與停免以示

聖明寬大之仁其采年舊欠銀貳拾貳萬肆千餘兩前御史高欽舜疏稱已經委官分比隨徵隨解自不得希冀寬延自

陸年爲始每歲搭解伍萬陸千餘兩肆年勒完崇禎肆年以前欠課陸拾餘萬亦自陸年爲始每年搭解銀壹拾伍萬餘兩肆年勒完崇禎伍年欠銀壹百餘萬兩已續解到貳拾壹萬玖千玖百捌拾捌兩矣其餘務限陸年內同陸年額課分肆運全完不如限者駭臣自勢其咎夫鹽課搭解卽民糧帶徵也搭解特舉大數搭徵之法新舊相劑月日相程銖兩相配勿爲豪右梗撓勿爲胥役影射是在巡鹽御史之強力細心思威竝用期於額足而商安斯可經久無逋矣旣經科臣具題前來相應覆

請恭候

命下臣部行文都察院轉行兩淮巡鹽御史遵奉施行

崇禎陸年正月拾壹日

拾玖日奉

聖旨國儲甚重爾部每稱匱乏這六年鹽課正額應否停免卽

商困宜恤其積逋緣繇豈無姦豪侵梗利歸旁竇著再酌議
前時旣限年搭解何得併見徵一任虧延考成之法安在向
來巡鹽御史如何得以考覈回道著都察院察奏

監視山西糧餉兵馬邊牆撫賞等事太監臣劉允中謹

題爲州城戒備不嚴被賊卒攻而破乞

勅按臣嚴察失事官員亟

賜處分以肅法紀事正月初柒日據督陣把牌王承詔硬弓駱文昇等稟稱詔等於拾貳月貳拾柒日督兵行至武鄉縣紅水村地方據武鄉縣快手高思興因往遼州公幹從州逃出報稱貳拾肆日半夜賊攻北面因北門填塞守城人不防先燒城樓城中大亂徑開東門破城而進詔等隨會尤總鎮王忠等卽於貳鼓繇紅水村起兵至遼州當獲活賊壹名存孝口供破城之賊係闖將八金剛過天星等從河西過來非各將所追之紫金梁詔等見今圍定州城俟有恢復另行再報等情到臣該臣看得遼郡乃萬山中一孤城耳大兵悉追東賊在於陽沁高澤之間內賊闖將等遂奔而攻之臣知賊計最狡慣於傍掠凡於所屬有司申

令城守不啻再四不意該州尤然疎玩全無捍禦以致卒
被所陷所幸官兵疾至圍敵於城否則東走真順北趨省
會禍將有不可測識者矣除臣一面會同督臣發兵恢勦
外既經塘報前來相應題

請伏乞

勅下按臣備察失事情形并將州官重加究處以爲專城失守
者之戒庶法紀申而有司之城守固矣

崇禎陸年正月初捌日

拾玖日奉

聖旨守土官嚴禦恭防屢旨申飭遼州何故遽爲賊陷失事各
官併殺掠情形俱著巡按御史察明據實速奏該部知道

工部尚書臣周士樸等謹

題爲恭報歲修新河工程以固運道事都水清吏司案呈本年拾貳月拾叁日奉本部送工科鈔出漕運總督李待問題前事內稱准工部咨該本部覆總理河道尚書朱光祚題報崇禎伍年駱馬新河歲修工程估用錢糧緣繇本年肆月拾壹日奉

聖旨是楊獻吉初時浮估數倍顯屬有意冒破其治行可知著該撫按察明奏奪胡賓卽著督理築濬俟覈算果費省工堅還與敘錄示勸欽此欽遵備咨到臣該臣隨行淮徐道確察去後據該道右叅政劉泓會同中河郎中屠存仁察得駱馬新河伍年估計係閏拾壹月中旬也楊獻吉始估壹萬肆千餘兩復估捌千捌百餘兩皆大修工程本河所應作之事卑職以本年洪水之後荊山等口之水時尚汪洋殘冬已不可爲一入新春重運鱗集時迫又不及爲故姑就

運行時所最急之河道牽路酌量修築已濟新運無論壹萬與捌千之數原未詳支卽減議之叁千亦止用其半蓋運過則水發湖心隄岸兩面皆水興工必須秋末冬初霜降水落之候故也該縣身任地方欲圖一勞永逸之計故寧詳而無略卑職以時迫運臨權衡於先後緩急之間故摘其要於詳原非謂叁千金便可一了百了者至於本官治行莅任肆載在院道素所耳而目之一切官評自有本府及理刑官爲政等因具呈蒙批仰淮安府會同理刑廳虛公確察本官平日治行速詳報隨經移牒會同本府王推官會察得該縣初估壹萬肆千蓋就陳口至劉口長隄柒拾里大舉修築覆估捌千捌百有奇則就湖心隄岸劉口等處缺口酌緩急而衡量焉厥後河廳估止叁千餘兩因洪水之後懷襄未殺且正值隆寒時不可爲然勢又不
可須更緩故就運行最急河道牽路權宜修築以佐新運

卽參千之數亦僅用其半而止至運艘過後水漲隄沒修築之舉必待秋冬則斷非參千金之可了也若夫本官履任肆載錢糧頗無逋欠遇事亦能刃解治行久在院道鏡炤中緣繇申詳到道呈詳到臣駁察去後拾月初參日據該道呈行據淮安府推官王用予呈蒙本道劄付又蒙總河部院批楊知縣治河參年蚤肯爲永逸之圖夫誰惜一逸之費明知冬已不可爲春又不及爲故多估漫陳欲調省直夫役以難轉批答者莫諉卸爾異日有事便於藉口此本部院所以微置一語於疏中以儆之不意

聖明無微不燭遂詰及於治行也曾有委催夫催料催運於工書一詳發王推官想此濫估亦此書所爲耶本官才原可用須善用且爲

陵運民生用則河漕斯賴之矣本部院敢言虛節省乎仰候兩院回奏詳示行繳又蒙巡按饒御史批河工估多用少以致

聖明窺其治行果否一事之差卽闕全體事闕回奏該道再確
察報併批到道劄職會同本府覆察勘得楊知縣浮估一
案司道言之已確然因而掇及治行職何敢不以實對本
官居任肆載凡事能慷慨直前但其氣可嘉其心未細且
重災衝邑不與他令同其呼籲而各項錢糧亦能拮据微
解此則一善之未可沒者也節經獎薦則治行又昭昭在
人耳目矣呈詳到道覆詳到臣該臣會同巡按直隸監察
御史饒京看得宿遷縣知縣楊獻吉奉委估勘河工自宜
審時度勢酌緩急以施畚插豈可執言大修侈非常之原
以圖於不可必得之數頃奉

明旨以浮估一事覈及治行該臣等行道府再三察議蓋其初
估自劉口修起直至陳口朱拾里工程所費則不貲矣獨
不念時詘不便舉羸而殘冬更難集事大修隄梗挽運曷
施而有此詳也管河同知胡賓就所最急之河道牽路權

宜修築以佐新運所估之數豈不相去徑庭哉據司道所稱揆新河大勢欲圖一勞永逸誠不能不大費金錢則冒破之情似可爲本官原而疎略之罪不能爲本官釋也至考其治行本官以疲邑值災沴之頻而催科無誤以震鄰增防守之戍而里閭不驚其幹濟亦自可見憶臣向年入援之役需一有司爲軍前贊畫咸縮朒引避獨本官慨然請行解印募丁追臣於徐州此亦慷慨直前之一驗今登叛未殲宿防未撤該道每謂非異人任而饑民載道漕兌屆期亦有司拮据不遑之日相應降級以儆其迂疎仍炤舊管事以策其後效者也等因崇禎伍年拾貳月初拾日奉

聖旨該部覆議具奏欽此又該巡按直隸御史饒京題同前事拾貳月拾貳日奉

聖旨已有旨了該部知道欽此各鈔到部送司相應議覆案呈

到部爲炤工程錢糧覈費先須覈估宿遷縣知縣楊獻吉
估勘新河初議壹萬肆千餘兩覆估捌千捌百餘兩迨同
知胡賓度勢量工減估僅叁千叁拾餘兩較之初估相去
倍蓰今就司道核詳謂楊獻吉初時計圖大修爲永逸之
計然明知冬春之際難以集事何得藉口大舉爲此虛浮
之多估也雖錢糧未給冒破尚有可原但河臣朱光祚云
欲以難轉批答者冀圖諉卸不可謂非本官意中之隱也
頃河臣察新河舊工錢糧疏開宿遷吏胥舊借欠河銀肆
千肆百餘兩楊獻吉委爲陳牒提不解追併與議懲則本
官治行雖無他疵可摘而語恢慮疎要非實心爲地方圖
幹濟者漕臣李待問會同按臣饒京議將本官降級仍炤
舊管事合無准從其議以爲疎玩者之戒此後河工興作
務期確估覈實工堅而費省者錄以示勸如僭端冒估與
夫侈談節省而工作不堅者卽治以冒破之罪要使河上

諸臣共圖節愛以裨鳩偃庶河政有賴耳既經具題前來
相應覆

請恭候

命下遵奉施行

崇禎伍年拾貳月貳拾柒日

陸年正月拾玖日奉

聖旨楊獻吉浮估虛冒且猾胥侵耗全無察追治行必多玩飾
是否堪策後效還著吏部確議奏奪

兵部尚書臣張鳳翼等謹

題爲恭報誅勦渠魁清理環慶賊巢併獲原失道印謹悉心料理善後刀圖枚寧仰祈

聖鑒事職方清吏司案呈崇禎伍年拾貳月拾伍日奉本部送兵科鈔出陝西總督洪承疇題前事內稱炤得臣自延安南北親督將兵勦平不沾泥混天猴等於朶月貳拾肆日自鄜州啓行繇山路星馳至捌月初朶日到慶陽府目擊大盜可天飛劉五等糾聚邊賊盤據肆載自延綏西路寧塞安邊定邊以南慶陽合水環縣以北米倉溝鐵角城內陽三川以至金湯吳旗趙官兒掌白家城子一帶綿亘伍百餘里盡是賊巢犄角連衡聲勢相依年來謀勾虜謀不軌日肆搶於環慶平固之間掠壹村攻壹寨將老弱殺戮少壯男婦盡虜入巢翦去頭髮頭髮壹翦不論是頭目是脅從人人皆指爲賊卽戶里不敢認其親族父兄亦不敢

認其子弟以故黨與日衆聲勢日大遂爲肆年來壹大巢穴臣到慶陽時陝西撫臣練國事馳至邠乾就近會同料理因聞隴川賊警復星赴隴州調度諸道將將隴賊勦滅仍馳至邠乾多方調度扼堵同心戮力計算按臣金蘭初入關卽以擴清慶賊爲第壹義往來三原會省彈壓人心日手札移臣商度再四又督鎮道將領刻期速奏底定母致老師糜餉各道將凜奉新威無不兢兢奮厲臣與撫按貳臣悉心籌畫若驟用兵力頓入巢穴恐各枝邊賊糾結連合併其脅從黨衆知無生路無不樹爲勁敵北卽衝邊南近腹裏雖殺黨衆不得渠魁邊賊徒滋蔓延難以結局遂先行分布官兵各處堵絕糧路以窘其勢再下脅從翦髮免殺之令以散其黨一面差標下大旗官白文詔郭進孝借招撫爲名前赴各賊營授以密計與以重賞潛行反間令其以賊殺賊臣於捌月貳拾叁日移駐環縣離府

城貳百餘里離賊巢陸柒拾里賊中脅從難民一聞翦髮免殺之令歡若更生日夜拖男帶女乘間逃出投到環縣前後男女肆千餘人俱叩頭痛哭臣逐一填給免死票解散諭令永不得再聚爲非其未至環縣領票徑解散往安定邊寧夏後衛各處又約數千人真正頭目邊賊恐黨散勢孤各四面撒塘堵當暗逃者卽拏回殺死然地闊賊多人心已散或騰山或昏夜各自逃去賊頭亦堵當不住至玖月貳拾伍日臣知脅從解散將盡其大小賊頭與真正邊賊到底給聚不肯解散屈指反間密計機會日期已到遂卽日自環縣起行以安插難民爲名移駐曲子驛督令鎮臣楊嘉謨挑選臣標下實授守備袁廓宇鎮臣曹文詔下原畱領兵都司翟應祥鎮臣楊嘉謨下守備楊光國韓卨副將張全昌下加銜守備田應龍遊擊馬科下千總解盤共領精兵捌百名於貳拾柒日肆鼓自曲子槐安繇山

路僻處疾進行未拾里近午將至何家老寨卽大賊頭何崇謂混名可天飛住處有白文詔郭進孝鼓厲吳旗營所住各賊白廣恩等領劉金吳國明等黨衆叁百名從北奔何家老寨可天飛突知兵至卽率領伊夥內僞副將李二卽李都司併各邊賊迎敵官兵與白廣恩等兩下夾攻各賊拚命死戰就陣斬獲可天飛李都司首級貳顆可天飛弟男子姪小頭目首級伍顆邊賊首級貳百伍拾貳顆其餘各賊四散奔逃貳拾捌日申時有劉寵郭太平席應奇等飛報到臣臣給賞畢卽刻親督鎮臣楊嘉謨副將張全昌遊擊馬科等併標下各該官兵自曲子星夜飛馳進巢初壹日早行至槐安有鎮臣曹文詔自隴州殺賊回至慶陽聞大兵進巢未及休息於貳拾玖日連夜先領馬兵星馳於拾月初壹日巳時隨至槐安與臣合營臣與貳臣卽日分派各將兵領兵則副將張全昌遊擊馬科臣標下實

授守備袁廓宇戴罪叅將吳弘器候補遊擊王永祥旗鼓
守備袁建業功陞守備柳汝樞高英加銜守備柳應時牛
冲漢梁世勳李承胤李永茂杜可相劉繼春張國祐陳大
典梁承詔鎮臣曹文詔下實授遊擊曹變蛟馮舉劉成功
加銜都司守備刁明忠曹文耀龔建爵翟應祥紀國儒許
國忠實授守備李登榜武士選貢承芳張鳳王國忠鎮臣
楊嘉謨下都司李召楊光烈黃元吉加銜都司楊三才守
備高國恩楊光國王輔治葛勇王鳴鑾各營領兵守備中
千杞總張陞蘭光祚楊全劉釗解盤張德昌李自春朱世
江田應龍阿克代杜夢禎張立位曹昇蛟安文迪孫可信
曹化蛟葛如芝王學寧楊守壯卜從善鐵勇周得功林一
楨宋選楊嘉猷張所學馬君聘張繼文李可棟高光胤程
一龍李鳴胤陸四選戴君恩林聞禮全守亮王從仁王友
德趙廷連楊志耀張一貴馮涼李汝清段朝京牛英馮伏

王建都韓仕才李國政武承胤郝國禎張注張大秋趙君
命牛化龍長捷魏一珪王國禎督陣監營則標下功陞守
備催景昂王惟中張養直遣戍副將劉見聽勸副將李夢
賜聽用官米昌基馮自新白甚質分守河西道中軍守備
李希泌催運糧餉則聽用官牛朝聘郭起業尹端謨楊泰
徵柳誠楊枝盛田實王明臣強士琦羅洪進吳之敬邢可
仕李文明許誠識往來護糧則甘肅叅將方懋功徹塘爪
路則聽用官高錕薛玄祐劉永祿麻承智艾懷英馬重子
各處堵防則原任遊擊夏有啓環縣守備楊承芳實授守
備馬鳴廉加銜守備毛俊英千把總魏效徵李允昇鄔德
威標下聽用官張顯猷馬世勇王國柱高珩何有源丁嗣
立白廷荔袁秉忠劉承德倪弘基徐來振張大綱楊柱閻
應魁王稽古鄭廷柱方略顯屈能謹趙文舉陳永祿楊珮
隨營叅謀則開城監錄事金邦柱候選縣丞武世雄清澗

縣廩膳生員李攀桂一面嚴督固原鎮臣楊麒親統本鎮都司靳桂香實授守備張允昇劉志忠張漢傑高登科楊多周誥千把總路騰蛟楊鵬奮楊承職張允誥等官兵撤塘扼堵北自五箇掌南至西壕孟把寺鎮原縣以防各賊繇正西西南走平固地方一面嚴督寧夏鎮臣賀虎臣親統本鎮都司守備賀讚馮明聖屠師賢劉國臣曹世安李文廣陳登雲陳國相孫大賓加銜守備千把總張自明田應沾畢沾恩吳大雲杜中王進庫左良佑馮君瑞賀國柱白珍龔尚榮陳標宗阿失賴等官兵撤塘扼堵南自五箇掌北至饒陽三山板窯澗以防各賊繇西北走定邊及寧夏地方各處分布已定拾月初貳日早各官兵自槐安繇何家老寨直進趙官兒掌初柒日至白家城子等處離定邊石澇池陸柒拾里已過鐵角城捌玖拾里周圍清搜各賊因可天飛一殺大家勢散又見大兵突至遂各潛藏深

山大谷極險窳窳不敢前來迎敵臣與貳鎮臣計議若縱兵搜殺山險異嘗勢難徧到且真正邊賊潛形匿跡易至脫逃隨督令貳鎮臣多分將兵從遠四圍臣一面招撫脅從餘黨各給免死印票令其解散各回原籍地方隨於拾月拾伍日轉至鐵角城適中去處駐兵多方偵探設法簸弄有吳旗營住賊白廣恩等先能脅力殺可天飛以功贖罪又夥內大頭目張伏倉狡猾潛逃不肯投撫白廣恩與劉金吳國明等卽行追殺併搜殺劉五下貼身偽副將馬超親領叁拾人執首級赴營前叩頭乞降願得饒死隨征立功臣念其真心投順發回暫住另聽號令西陽三川住賊齊一勳等原係土民爲賊衆搶掠迫脅遂另立壹夥因大兵屯駐巢中畏威喪膽領數拾人徑投定邊副將今陞山西總兵張應昌願隨山西殺賊贖罪又據靖邊道臣戴君恩塘報該本道督令靖邊同知李文蛟會同保安縣知

縣侯三光遣生員許志高鼓弄保安縣地方棗林坡住賊郝惟端將上年甘泉戕殺鄜州道張允登知縣郭永固却去鄜州道印信併餉銀逆賊大頭目石耀宇用計殺死斬首再斬白柳溪親弟綽號一項匾首級壹顆白柳溪親叔綽號老元寶首級壹顆石耀宇下偽副將綽號火將首級壹顆併原先鄜州道印信俱齎解到臣營前驗實卽時給賞據驗功各丁皆稱上年冬月甘泉殺官劫銀逆賊大頭白柳溪已於今伍年采月拾陸日曹總兵于虎兒凹大戰斬首訖細審前後各處降丁語俱相合營前兵聲益振賊膽倍寒尚有可天飛下副將胡元帥頭目鐵雷等劉五下副將任喇嘛頭目譚先劉黃鶯等齊一勦同夥頭目許大狼齊飛豹張總官等併各真正邊賊先時糾結不肯解散及大兵久住四面圍堵不能脫逃復糾合聚衆於地名生高家畔離鐵角伍陸拾里峻山絕崖天險異嘗臣等一面

偵探不使驚疑各邊賊隨有陸續投營前貳參百人臣俱陽爲收雷後見各賊結聚不散已投之賊又多逃去入夥臣與貳鎮臣皆不追究至拾月貳拾柒日鎮臣楊麒發守備張允昇張漢傑等領馬兵伍百名鎮臣賀虎臣發都司守備馮明聖屠師賢賀讚李文廣曹世安等領馬步兵玖百名各至營前聽臣調度監紀同知劉三顧親領杆子手貳百名亦自廊延馳至營前分守河西道臣朱純自慶陽移駐業樂地方半月有餘張勢扼堵催運糧餉往來不窮韓郃副將張全昌統兵環慶兩月有餘在賊巢營前貳拾餘日適寧州三水報有賊警臣不得已於營前督發全營南下飛馳堵剿至拾壹月初叁日密探各邊賊已聚有千餘自恃山險兵馬難進臣與貳鎮臣商議進剿鎮臣曹文詔楊嘉謨鼓勵將兵隨於初肆日五鼓貳鎮臣領兵當先臣親督隨營黎明至生高家畔各賊在半山迎敵官兵難

近相待至己時貳鎮臣身先士卒嚴督領兵遊都守備等
官馬科曹變蛟馮舉刁明忠劉成功龔建爵袁廓宇楊光
烈楊三才葛勇吳私器王永祥袁建業翟應祥柳汝樸柳
應時等併各中千把總四面奮力齊擁上山大加披殺共
斬賊首捌百伍拾玖顆臣俱當陣前督同文武各官及環
慶鄉導各軍民人等逐一察驗內標下各官兵斬首壹百
叁顆認出有名賊頭拾顆任守正混名任喇嘛劉彥舉混
名劉黃鶯張汝金混名燕青高應昌混名黃巢張文朝混
名張飛李文舉混名雕翎箭張成順混名張千總雷進槐
混名八豹許林回混名許大狼張寵混名黑煞神鎮臣曹
文詔下官兵斬首貳百玖拾貳顆認出有名賊頭拾伍顆
李榮混名紅狼王君亮混名王副將許得住混名雷橫張
汝宰混名滾山猴齊一正混名飛豹劉萬友混名黑虎張
萬寅混名巡山虎崔蘭混名四將許玉混名大將李文魁

混名睜眼賊張伏混名張中軍高兩河混名高叅將許陞
混名飛虎混江龍滿天跳察無正名鎮臣楊嘉謨下官兵
斬首玖拾叁顆認出有名賊頭拾壹顆自成宰混名胡元
帥馬文禮混名鐵雷馬國英混名上天龍高貴混名飛石
子王九教混名王副將劉守立混名焦贊趙有功混名頭
敵將胡興混名魁首黃九峩混名金翅鵬劉尚仁混名劉
毒虎王中孝混名宋江遊擊馬科下斬首壹百陸拾伍顆
認出有名賊頭柒顆譚弘謨混名譚先張一成混名張總
管崔福混名老將張順混名張寬靴萬全混名葛厨子曹
伏成高芝察無混名固原鎮官兵斬首貳拾貳顆認出有
名賊頭叁顆劉二混名渾天龍白成榜混名上山虎胡雲
混名大青棚子寧夏鎮官兵斬首壹百肆拾伍顆認出有
名賊頭玖顆趙四混名大天師張勇混名鑽天猴李世才
混名平地飛武國寧混名強龍張守倉混名存孝劉光輔

混名五虎尹世財混名滿天星許自成混名龍得水張一
選混名惡虎寧夏領兵守備馮明聖斬首叁拾肆顆認出
有名賊頭叁顆張一才混名奎木狼李邦寧混名翻山躍
張守都混名張總兵環縣守備楊承芳斬首伍顆惟劉五
領數人潛藏深山險窟徧搜尚未得獲見在設法擒捕臣
察驗畢仍督貳鎮臣披巢清穴竝未有賊聚情形將各首
級帶至環縣俱擺列教場督令監紀同知劉三顧同環縣
知縣李可觀併閭縣官生軍民各加辨認將散賊首級割
去耳鼻掩埋大小賊頭首級伍拾捌顆俱解赴慶陽府發
道臣朱純同該府廳擺於府城十字街傳示以洩士民之
恨仍察收寄庫臣差守備刁明忠龔建爵同標下大旗官
白文詔郭進孝將白廣恩夥內老弱解散白廣恩自選精
壯好漢貳百名馬貳百伍拾餘匹同各父母妻子俱親赴
曲子驛聽行安插願隨鎮臣曹文詔所在殺賊立功文詔

自認鼓舞聯屬保其真心投順必無他虞隨逐名點收令其給餉隨征拚死報效旣以贖從前之罪且以收後來之功該臣看得慶北大盜相延肆年大半皆係邊賊招下納叛兇悍異嘗肆虐流毒莫敢嚮邇誠爲三秦第一大巢穴巨自鄜延料理略有清頭卽馳赴環慶自捌月初采日到慶陽復赴環縣至玖月貳拾捌日繇環縣曲子進巢穴計伍拾日日務分兵堵絕糧道解散脅從難民併用密計反間使各賊勢渙黨離以賊殺賊自玖月貳拾捌日督兵進巢至拾壹月初肆日收兵環縣計叁拾伍日週迴山中各處賊巢復屯駐適中鐵角城多方偵探設法簸弄圍堵搜剿斬真正頭目邊賊前後共計壹千壹百貳拾顆肆年惡窟稍爲清理總之環慶大盜共有肆枝一係何崇謂混名可天飛私立僞副將拾餘名張其惡焰總領各枝一劉五一白廣恩一齊一勳俱聽可天飛主使號召茲可天飛已

殺其部下大小頭目惡黨兩番披殺殆盡劉五因可天飛
一殺又大兵久駐巢穴驚魂喪膽棄其貼身大頭目任喇
嘛馬超等棄其腹心掌房譚弘謨中軍鐵雷併棄其親族
劉彥舉張汝金等僅領數人匿影潛藏第惡黨已除窘迫
無歸臣已懸賞密購必期擒捕或可不至漏網自廣恩黨
衆原少不過數百人既能兩次勦殺賊頭又親率劉金吳
國明等詣營前叩頭請死今且聽臣委官解散老弱止選
精壯人馬貳百有餘同各父母妻小解甲投戈齊赴曲子
驛願隨征殺賊立功臣仰體屢次

明旨勦逆撫順念其真心投降不忍加誅鎮臣曹文詔保任收
畱加意聯屬鼓舞必得其衝鋒破敵之用齊一勲係安化
縣百姓祖居西陽三川因邊賊威逼人夥今畏懼大兵領
數拾人投降新陞山西總兵張應昌赴山西殺賊贖罪所
畱真賊許林回齊一正等百餘名俱殺在前首級之內其

餘被虜脅從老弱男婦臣逐一給宗解散回籍徧示安插
於是鐵角城米倉溝金湯吳旗內陽三川一帶肆伍百里
遂未有賊聚情形靖邊道臣戴君恩又能反間鼓弄保安
縣棗林坡住賊郝惟端殺首惡逆賊併獲原失道印罪魁
正法名器復還是役也勦殺者俱係真正首惡邊賊不敢
怯懦姑息致有養寇之虞解散者俱係脅從難民不敢縱
兵混控致滋濫殺之害總仰體

皇上屢次勦逆撫順殲渠宵宵

明旨惟是解散難民家緣旣被賊破赤身無所賴藉冬月春初
饑寒交迫盜心易生情欺凌嚇詐驚魂難定時下巢穴雖
稍清理必歷至明春叁月盜賊不起乃可恃爲久安臣百
方躊躇總在善後一著已選雷寧加銜都司守備賀讚屠
師賢等統領寧鎮官兵壹千名併調臣標下中軍副將左
光先兵丁捌百名委監紀同知劉三顧親身監營併委候

補遊擊王永祥戴罪叅將吳弘器日隨營中往來延西安
邊定邊三山饒陽與寧夏花馬池後衛及山萌城甜水堡
小鹽池各地方又往來鐵角城米倉溝金湯吳旗一帶多
方調停稽察各解散脅從民人若安分守法則善加撫恤
毋令奸民嚇詐激迫生事但有三五成羣夜聚曉散勾謀
作亂卽設法擒治毋令復起釁孽仍以將來地方妥與否
定爲各官功罪凡此皆文武諸臣應各自盡職分臣何敢
指以爲功然而參月來諸臣征行拮据之苦臣又何敢泯
而不言如陝西撫臣練國事馳赴邠乾逼近環慶凡計誅
渠魁清理巢穴與臣往來商確同心一體謀斷相資臣之
所行者皆撫臣之所密籌至於調度堵防內延各處力保
萬全臣又得無他顧之虞臨洮鎮臣曹文詔忠肝義膽英
風勇略自隴州勦滅各賊星夜馳赴大巢素日與士卒同
甘苦官軍雖餐風臥雪壹月有餘無不感服清按惡窟血

斬元兇收降用命臣獨倚其全刀原任甘肅鎮臣楊嘉謨
歷練沉雄征勦貳載危苦備嘗至鐵角城殺邊賊散脅從
謀算真無遺策固原鎮臣楊麒寧夏鎮臣賀虎臣聽臣號
令悉心扼堵擺兵列哨使各賊就誅穴中無能脫逃臨時
發兵協勦斬獲首功居多靖邊道臣戴君恩自任延西卽
值荒盜異常兩年堵虜勦盜刻苦難以悉數茲計斬逆賊
收獲道印且扼堵吳旗營等處使大巢各賊無能北遯功
績茂著戴罪亟宜開復慶陽道臣朱純從郡守歷監司收
拾人心嚴飭城守事事精詳大兵入巢卽親馳業樂槐安
張勢預防絕賊逃路計議軍機甚有裨益至催運糧餉士
馬賴以飽騰固原道臣王楫選兵措餉到處周防故大兵
入巢無一賊竄入平固地方藉以安堵將領如遊擊都司
馬科馮舉曹變蛟各領兵入巢眠霜月餘壯氣益奮臨陣
披殺提戈直衝賊鋒標下實授守備袁廓宇領兵暗襲賊

巢渠魁旋即就誅及在巢月餘布置反間圍堵逃路血戰
全勝得力獨最加授宜優加銜守備白文詔郭進孝實授
守備刁明忠龔建爵旗鼓守備袁建業委用計反間哨探
堵剿挺身勇往不避危險至臨陣當先部下斬級尤多實
授遊擊劉成功都司楊光烈加銜都司翟應祥楊三才賀
讚馮明聖屠師賢長捷候補遊擊王永祥功陞守備柳汝
樵柳應時牛冲漢李承胤梁世勳李永茂高英杜可相梁
承詔陳大典張國祐劉繼春張陞蘭光祚李希泌張允昇
張漢傑葛勇賈承芳王國忠在巢月餘隨驅輒效領兵殺
賊衝鋒陷陣所向無前遣戍副將劉見所在征賊寒暑無
不受盡今大巢中斬級催餉積勞既久遠戍堪憐戴罪叅
將吳弘器聽勘副將李夢賜已前多功節載塘報此番入
巢殺賊多斬頭目桑榆可收其餘各官督陣監營爪路撤
塘催運糧餉分防險要各盡心力共效勞苦韓邵副將張

全昌自捌月初某日隨臣到慶陽復至環縣及玖月貳拾
捌日入巢至拾月拾玖日聞三淳賊警方督發赴征在賊
巢中已駐貳拾餘日功苦大著雖殺賊未在前勞績原
屬一體慶陽府知府趙三極軍糧同知李含樸推官馬一
荀逼臨大盜嚴城守練保甲皆有成效至大兵征勦僨運
軍需源源繼至監紀同知劉三顧向在廊延料理防堵聞
慶賊勢大卽星馳管前戮力清勦委以善後事宜毅然自
任實心大才堪以付託靖邊同知李文蛟身任衝邊策馬
監營殲虜勦盜建有多功茲慶北大盜屢經計議秋毫無
爽足徵才識保安縣知縣侯三光處殘破之地守城得患
晝夜拮据至殺逆賊獲道卽多出其力安化縣知縣王雲
鵬合水縣知縣施喬枏環縣知縣李可觀固原州知州張
京或迫近賊穴多方哨探或催運糧餉轉輸不匱或扼要
堵截境內全安均著勞績開城監錄事金邦柱以異才卓

識隨營借箸指陳勦撫克中機宜裨益尤多候選縣丞武
世雄東西隨征貳年有餘委監營陣酌計糧餉積勞備苦
合應加級超選清澗縣生員李攀桂保安縣生員許志高
素諳韜鈴堪資決策到處隨征著績應候從優敘錄環縣
典史傅國相守城運糧力效馳驅勞俱難泯再炤臣陞任
總督駐劄固原本係腹裏各營兵馬止可隨時調度防守
若征勦精兵壯馬必需之各邊鎮如寧鎮撫臣耿好仁軫
念流寇誼切纓冠臣上冬在寧塞征賊撫臣卽督發花馬
池副將孟應熊都司趙從雲等共領兵壹千伍百名協勦
又自崇禎參年秋冬間督發鎮臣賀虎臣統官兵貳千餘
名赴延慶各處征防每壹年半年俱挑精壯更換兩次秋
防撫臣一力仔肩前督臣與臣兩秋未臨花馬池俱撫臣
伐行料理同心戮力功在三秦甘肅撫臣白貽清任極衝
之邊處極苦之時鎮臣楊嘉謨所領勤

王回鎮官兵畱赴環慶征勦換班官兵亦畱環慶征勦臣去歲陞任因征勦兵馬不足又移會挑發精兵壯馬貳千名撫臣逐一挑驗先期發到盔甲火砲無一不備簡按精選敵賦悉索卽今秋海虜謀犯邊事孔棘撫臣先事綢繆防堵謹嚴必不輕調一兵同心共濟功著安懷延綏撫臣陳奇瑜莅任雖新靖邊道臣計殲大盜能獲道印勒兵北堵一一皆屬指授又前藩司設法嘔心催運餉銀接踵繼至至使士飽馬勝所在成功新藩臣李喬履任之始正臣至環慶入巢之日臣檄催餉銀百方那指隨時應手臣督大兵得駐巢穴參拾伍日皆藩臣催餉接濟之力夫臣所用者參鎮之兵所需者藩司之餉諸臣赤心爲

國精忠幹濟臣不敢不明告之

皇上環慶大盜披猖肆年臣到環慶參月有餘畢集羣策羣力乃始稍有清頭何敢指以爲功何敢濫及多官第臣最庸

劣所仗者皆文武大小諸臣之力今環慶廊延最急善後
又料理督發大帥偏裨夾勦晉賊正鼓舞用人之際臣親
履戎行目擊功苦不敢掩蔽

聖明自有鑒裁非微臣所敢自必也至勦賊情形例應隨時恭
報緣臣自玖月貳拾捌日進巢穴與官兵野宿露居徧地
荒廢無一蔽風霜之處卓橙俱無勢不能繕寫稽遲報

聞臣罪無所辭伏乞

皇上俯垂鑒宥臣謹會同陝西巡撫降參級練國事陝西巡按
金蘭合詞題

請伏乞

皇上勅下兵部速賜覆議所有原獲分巡河西道印信壹顆臣
謹隨本繳

進乞

勅該部察收等因崇禎伍年拾貳月拾肆日奉

聖旨據奏該省勦獲賊寇清理巢穴殲渠撫順省脅散黨數年
積孽漸見蕩平在事文武諸臣懋著勞績又料理督發夾勦
晉賊具見勤公敵愾之誼所報功次既經巡按御史察明會
題著該部覈議具覆道印著察收其一切善後事宜該督撫
按熟籌詳奏欽此欽遵鈔出到部送司案呈到部看得延慶
劇賊糾聚有年一旦東西合逞犄角連衡挾邊賊之雄爲
勾虜之計肆虐流毒凡肆年於茲兼以凶年饑饉斗米伍
錢猾賊饑民互相煽動可謂天時人事兩難之秋也賴督
臣洪承疇鎮臣曹文詔等戮力同心激發忠義合伍鎮之
兵大小凡壹百餘戰以次芟除此清理環慶賊巢壹案則
後來勦蕩之收局也揆斬真正頭目邊賊前後共壹千壹
百餘顆得告成事厥功豈倖致哉

皇上嘉文武諸臣懋著勞績卽

命臣部覈議具覆仰見

聖謨弘大加意鼓舞欲令呼吸沾

恩而指顧生色也惟臣部清察前後功案凡壹百貳拾有奇其間復名城殲賊首如定邊之戰西壕之功神一魁不沾泥等賊之誅久奉

旨彙敘者皆屬奇績而此疏中或多未及并敘則約而周分敘則繁而瑣且按道諸臣已經互換行間將吏亦有先後功過不同應相提而論者未容草率令

勅下該按臣將前後諸案速行彙勘總敘庶在事文武有功諸臣在此案之中者不至重複而在此案之外者亦不至漏遺於敘功之典爲有光也但在該按臣虛公察覈刻期報命務於參月中類奏可也既經具題前來相應覆請合候

命下遵奉施行

崇禎陸年正月拾伍日

拾玖日奉

聖旨秦省數年討賊歷報捷功已悉奉彙敘明旨今該督撫按奏稱蕩平卽當通察行賞依議著巡按御史將歷來功案前後文武各官一一確勘總報以憑分別旌賚不得濫遺仍依限速奏以副朝廷賞不踰時之意

總理戶工兩部事務太監臣張彝憲等謹

題爲叅究解交潮銀嚴察法處以重軍儲事臣等於崇禎陸
年正月初拾日據管理太倉銀庫戶部主事余鵬翔知會
臣等於拾壹日到庫公同據四川布政司差官王大統管
解崇禎伍年秦餉改太倉銀叁萬兩到庫隨令銀匠看驗
秤兌內有潮銀少半卽於此銀內揀明兌發永平昌平貳
鎮伍年拾貳月分年例月餉銀各壹萬兩外臣等於拾陸
日到庫公同將王大統未經收完銀內又揀驗兌收銀陸
千玖百玖拾肆兩貯庫其錠銀每錠有輕叁錢陸錢每秤
共少拾壹貳兩不等外退出潮銀伍拾捌錠竝輕數共少
叁千零陸兩內畱原來潮銀貳錠恭進

聖覽其餘伍拾陸錠責令王大統傾換足色炤數完足臣等另
日收報外及至察驗原解潮銀錠上俱鑿有四川伍年秦
餉改解太倉銀每錠伍拾兩撫臣劉漢儒左司臣秦一鵬

右司臣董暹字樣等因及問解官口稱銀係該司給出據此該臣等看得各該省直司道起解錢糧俱收於州縣而徵於細民皆足色足數而無容於輕數低潮此係

祖宗之定制也近來人心奸險不肖有司非止足白足數且於額外加增火耗羨餘况於正賦乎今據王大統所解銀兩數至叁萬兩爲數不資其銀不知經手多少員役衆人衆目自有公評當此軍需告急

功令嚴明之時猶敢以此相嘗臣等誠不得其解且幸此銀看驗明白儻發各鎮散給諸軍噴有繁言當事者不以爲外解該省之弊而歸罪於臣等此豈小也官軍月餉封疆重任千係匪輕斯法紀之所不容輕賁者合當察究潮銀根因明白從重處分以警將來其畱下樣銀仍封發本省認識庶責有所歸法紀嚴肅而軍餉

國計有裨矣相應題

請伏乞

聖明勅下該部亟咨本省撫按星速察明勒令各官自行回奏
請

旨定奪遵行

崇禎陸年正月拾柒日

拾玖日奉

聖旨起解錢糧色數低少該管官好生玩肆著卽將進覽樣錠
封發該撫按嚴察是何情弊明白叅來仍著藩司官自行回
奏還立嚴限去王太統一面勒令傾補完納該部知道

崇禎存實疏鈔目錄

崇禎六年正月

二十日

兵部等部一本

禮部祠祭司主事車夢瑤一本

日講官禮部左侍郎聖應熊一本

大學士吳宗達一本

大學士周延儒一本

監視薊鎮中協太監王之心一本

監視宣鎮太監王坤一本

錦衣衛掌衛事左都督王世盛一本

戶科給事中馮元飈一本

二十一日

吏部一本

酌議益餉練兵等事

覆劉遵總督題議昌鎮選鋒加糧折銀

遵旨具奏事

奏布政使廷臣如吏部議罰或令儀制詳察

虛庸久圖引退等事

奏撥指參懇賜片放

庸愚無補清時等事

奏因言引病求罷

愚臣德薄貽詬等事

奏因言求去

塘報哨探事

題哨探夷情

微臣材質菲庸等事

題科臣陳于泰力排內員乞免謝殺

訪獲違制鑽營事

題獲楊應海等鑽營騙詐乞初法司究擬

邪臣怙惡等事

題參禮部侍郎王應熊貪狡確據

缺官事

題推浙江布政使司右叅政

又一本

缺官事

題推江西布政使司右叅政

又一本

人材疏塞等事

覆御史吳振纓條議四款

監視薊鎮東協太監張國元本

接獲東來回鄉事

題接獲回鄉王九凌等

又一本

呈解回鄉事

題覆審回鄉李友德夷情

兵部一本

邊工緊要等事

覆監視西協太監鄧希詔題兩班並發撫道撥發月餉

又一本

塘報事

題旅順之兵扼險黃龍寺聯絡東江截剿自贖

又一本

夷情事

題宣府巡撫焦原清塘報零夷竊犯

錦衣衛掌衛事左都督王世盛本

廟享禮成等事

題孟春陪祀西班宴宴參臣衛司官體陪祀

工部都水司主事葉重華本

遵旨回話事

奏小紅油銀例光祿寺出領庫發勅庫速給

甲字庫掌庫事太監李陞一本

遵旨奏明事

奏解布租稅部嚴行各撫按務要細閱

監視登島等處太監呂直本

營升昌領官糧等事

題聽用官攬米價立官具收勅該衙門提究

司禮監筆管官監監姜政等本

墳券久稽等事

題容妃墳工地券久稽嚴勅部庫速行給辦

工科給事中孫晉一本

致治先摺其要等事

題內外六曹府縣宜責所司察弊釐革

督發關寧援兵太監高起潛本

恭報攻城日期事

題會撫監今已備議定日力攻

戶部等衙門一本

遵旨回奏事

題盤驗新舊廠糧事宜

部廣司署司事舊司監李翁一本

遵旨回話等事

奏省直拖欠新舊光祿等項錢糧寬宥催發

禮部侍郎協理詹事府事林鈺一本

聖恩疊被等事

奏辭學院印務

山西道試御史王一鶚一本

春陽已布等事

題災異感召撫恤錢糧早決獄情

二十二日

戶部一本

兩邑之利病等事

覆南臺臣左佩琚條議那沙三縣召買官運

又一本

酌議它運腳價等事

題創密漕糧它運腳價昭中協例增

戶部福建司員外郎孫陞一本

遵旨回奏事

奏孤貧冬布甲頭領劄轉托延撥自後移文預發

監視宣鎮太監王坤一本

清察班價等事

題河南等衛所欠班價銀乞嚴勅無按催解

又一本

恭報修過牆臺等事

題修城垣造過砲藥効勞官員乞勒紀錄

總督東廠司禮監太監王文政一本

緝獲事

題訪獲甲頭孔義等冒領布疋乞勒刑部究擬

順天府府尹莊欽鄰等一本

遵旨回奏事

奏替目張春託人投領掛號遲延情跡

史料給事中曹履泰一本

罪臣貪位無恥等事

題奉南贛巡撫陸潤庠失事該部看議

禮部一本

謹循職掌等事

覆南禮部尚書李孫宸奏本部主事分命簡閱

福建道試御史黃金貴一本

言路似通等事

題察諸臣言責備輔臣乃楷國事

中府帶俸陽武侯薛濂一本

遵旨再奏事

奏深辯恐涉妄陳細鞠張登不愈臣詞

監視薊鎮東協太監張國元本

派修羅城事

題撫臣議異城工就採辦包修支給鹽菜手例非浮

又一本

援例請發班軍等事

題班軍不敷應用請勅撥發京班

吏部一本

遵旨回奏事

題知州畢達咨陞同知鹽運臣以榜鹽未完員缺另補

工部一本

訪獲埋藏軍器事

題德左等衛該省撫按察辦錢糧嚴催造解

又一本

庫貯適當置極等事

題進朝鼓搭造天橋工完拆回本植別用

福建道試御史米國助一本

敬陳安民實政等事

題請徵收練鄉兵嚴詞訟

兵部等部尚書等官臣張鳳翼等謹

題爲酌議益餉練兵以永奠

陵寢重地事職方清吏司案呈崇禎伍年拾貳月拾捌日奉本部
送兵科鈔出薊遼總督傅宗龍題前事內稱據昌平兵備
道副使降壹級寇慎呈蒙臣憲牌炤得各鎮俱拱衛

神京而昌平獨爲

列聖藏衣冠之地自宜厚集兵力以備不虞乃前此狃於承平以
致積貧積弱軍容彫敝殊不堪觀在平居嘆一飽之無時
遇有警必驅老弱以啗敵言之不寒而慄整頓不容再遲
第求增多餉於大農恐徒費爭執不如就經制之內通融
裒益俾餉不甚費而兵亦可強斯爲便計仰道卽會同昌
平鎮備察所轄軍丁除看守

陵園及城操不計外卽於見在營軍內挑選伍千叁路各挑伍百
炤京營選鋒例量加月餉大約半年支銀每月壹兩爲率

半年支米每米壹石外量加銀貳錢再將老弱曠役之軍盡行清汰除清汰減支之餉卽抵加增之數外每月尚該於內部求增米若干銀若干又居庸路軍居守山峽每年僅食米叁月視各營路倍爲苦辛今應一槩支給半年又該增米若干其布花銀除食嘗糧者不計外新加糧軍或可免給又可省銀若干通長打算每年但增米不過壹萬石銀不過壹萬兩則本部院可以力請之

主上矣旣增月餉則教練可施昌鎮之兵或從此有敵愾之氣乎此

宗社安危所係該道須畱心確議壹詳本部院壹詳督部以憑會同具題不得延遲疎錯牌內開載未盡事宜如營制官廩馬價軍需操賞等項曾經面議者仍要詳悉開列竝移會餉司共議之限叁日內回報等因蒙此該本道察得昌鎮軍士拱衛

陵京防守巖邊關係綦重然皆係各衛祖軍與選募之卒不同糧餉菲薄實難責以敵愾自蒙督部蒞昌行令前任尤總兵將各營軍簡選強壯伍千教練然尚未得加糧今蒙本部院按臨昌鎮軫念重地單虛目擊軍士饑寒議將營路軍士精銳者炤京營選鋒事例量增糧餉日加操練以備緩急應援之用有老弱不堪者酌量汰革卽以所汰之糧少抵選鋒所加之數不足者再行上

請此昌鎮轉弱爲強之日也本道謹會同總鎮察得昌平營原先揀有壯丁伍千名內除見在援萊貳千今復細加揀擇叁千名共仍得伍千之數其月餉遵議如本色月分支米壹石外仍加銀貳錢如遇折色月分加至壹兩或本或折總期壹兩爲率計該增銀壹萬陸千陸百柒兩柒錢陸分鎮邊路挑得軍丁可充選鋒者伍百名向係本折間支所加糧數仍如營議計該增銀壹千肆百玖拾壹兩黃花路

挑選軍丁可充選鋒者伍百名亦係本折間支計所加之數該增銀壹千壹拾捌兩伍錢惟居庸路每年止食本色叁箇月餘月俱支折色與黃鎮貳路間支本折有異第該路地居山峽粒食爲艱情屬偏枯制當畫一今挑選得軍丁可充選鋒者伍百名每年議炤兩路本折間支事例補支本色叁箇月計應加漕米壹千伍百石又應加議增銀壹千貳百兩然本色旣加則原支折色銀應減去壹千伍拾兩其該路驛軍孤貧等項無關營務原支本折不必更議惟其餘軍士叁千玖名原有城守操練之苦亦應炤各路本折間支事例每年應增補支米叁箇月各支不等共米玖千玖拾陸石陸斗應減去原支柒玖拾壹月折銀各支不等共銀肆千柒百柒拾捌兩陸錢捌分伍釐此各營路應增應減之數也但營路有老弱應汰曠軍應清所省錢糧可少抵應增之數者今察昌平營有老弱曠軍共叁

百壹拾名該省銀玖百陸拾柒兩壹分該省米貳千壹百
柒拾捌石鎮邊路有老弱曠軍壹百肆拾叁名該省銀伍
百陸拾陸兩玖錢伍釐該省米捌百伍拾捌石黃花路有
老弱軍叁拾名該省銀壹百柒兩貳錢伍分該省米壹百
捌拾石居庸路有老弱軍伍拾名該省銀貳百陸拾捌兩
柒錢伍分該省米壹百伍拾石合計營路共應加選鋒銀
貳萬叁百壹拾柒兩貳錢陸分除減去居庸路原支折色
銀共伍千捌百貳拾捌兩陸錢捌分伍釐并汰過營路老
弱缺軍折色銀壹千玖百玖兩玖錢壹分伍釐充抵外實
應增銀壹萬貳千伍百柒拾捌兩陸錢陸分又該應增漕
米壹萬伍百玖拾陸石陸斗除汰過老弱缺軍米共叁千
叁百陸拾陸石充抵外實應增米柒千貳百叁拾石陸斗
此通長裒益計算之數也其加糧選鋒初議免支布花第察
係

欽恤恩賚臨時給散各軍有無相形反招怨咨且爲數無幾合

准其一槩支給以昭

朝廷挾纘之恩然老弱旣汰曠軍旣清而統率仍舊多官何異
十羊九牧是營制又不可不議昌鎮原設有左右中騎車
伍營除右車營係修工班軍無容更議外今議將肆營併
爲中左右參營以挑選軍士伍千併舊嘗操軍約肆千餘
名分派各營輕重布之其統練多寡之數權衡出自憲裁
本道不敢擅定然選擇旣定所藉以統率操練者是在將
領而各官之廩餼又不可不議者昌鎮營路將備等官一
槩月支廩給銀叁兩以下如操守中千等官每月止支行
月糧共陸錢叁分養廉若此菲薄此在中才固難責以矚
然之操卽在廉將恐亦難免內顧之憂合無俯察別鎮將
備事例加給廩餼則待之旣優而約束操練可以責備矣
然操練之法非得操賞銀兩無以勸懲此又不可不議及

者也至如各營路器械今已粗備卽少缺或不難於設處
至於盛甲間有存者亦朽爛不堪呈請議置則錢糧浩大
實無所出再若買補馬匹全藉年例帑銀并湊處棚樁銀
兩今帑銀自崇禎貳年以後抵扣中東貳協馬匹至今毫
無發給止藉棚樁何能市駿以實廐所將昌鎮應得馬價
如數我補以應急需再炤軍士月糧向來給發愆期今旣
經簡選自後必得按月給發以資飽騰至以前壓欠原議
在節曠抵補今缺曠旣經清汰壓欠無可通融必祈本部
院力請補給此又本道之汲汲懇禱者也等因到臣該臣
看得昌鎮係

祖宗藏神奧宅自時時關

主上之心其積貧積弱之形情亦屢經在事諸臣圖寫入
告總無俟微臣之喋喋者臣自奉有傳宗龍受任日久亟宜設
法稽覈務清虛冒何但檄道料理致滋弛玩之

嚴旨卽一食一息之頃無不謹凜於震疊之

天威赴鎮後齋沐謁

陵卽就督治部臣侯恂面扣強兵固圉之策部臣所以語臣者與臣平昔之講究者大抵皆同而部臣曰凡此皆本部屢爭而不能得之於當事者今日非言之難行其所言難該部院勉之矣臣復進鎮道餉司參臣而細商之僉謂臣言有當臣乃下檄道臣寇慎議之道臣已一一報臣臣謹總括各款略約言之伏惟

聖明垂聽營軍挑練伍千者部臣之舊議而參路各挑練伍百則臣之新議也臣觀參路居庸首衝黃花鎮次之鎮邊路又次之每路有練軍伍百聊備偵防遇小警則以營中練軍貳千貼防居庸貳千貼防黃花壹千貼防鎮邊遇大警則於密鎮調發新兵伍千增防焉而昌鎮有金湯之固矣選鋒加糧壹石此京營之成例今保鎮之鋒軍亦一正而

一幫也密遵貳鎮之祖軍近定經制皆月食餉壹兩貳錢矣昌鎮選軍旣不能壹人而食貳人之糧又不能如密遵貳鎮壹兩貳錢之厚臣今定爲例單月支米壹石外加銀貳錢雙月支銀壹兩以米壹石近例折銀捌錢則拾貳月大都皆食壹兩而已臣恐增加太多計部難以應臣於是議清曠軍議汰召募老弱軍議減支年例布花節其銀米以充增加之數而該道謂布花難裁自應姑仍其舊計汰節銀共壹千玖百兩有奇米叁千叁百陸拾陸石又居庸路軍歲食米僅叁月其貧瘠之狀尤爲可憐今議一體均給陸箇月該增米壹萬伍百玖拾陸石陸斗該省銀伍千捌百貳拾捌兩有奇以合鎮增減之數裒益計算實該歲增漕米柒千貳百叁拾石陸斗歲增餉銀壹萬貳千伍百柒拾捌兩陸錢陸分臣之所仰望於計部者止此耳選營路之陸千伍百軍而練之不可謂創非嘗之原也歲增米

柒千餘石增銀壹萬貳千有奇以護億萬年

陵寢之祥不可謂崇無益之費也卽不如臣言使貧者自貧弱者自弱萬一奴窺宣大有匹馬軼入

紅門於

主上之孝思得毋有歉而持議者亦得毋有噬臍之悔乎且不見昔年之遵化耶人人言當備而竟不爲備及其破碎則竭天下之力以供之臣爲多方裁省今歲用新餉尚百餘萬也補牢於亡羊之後不已晚乎臣誠不忍以今日之昌平爲昔年之遵化知主計大臣亦必不忍格臣之議也至於營路各官月廩叁兩此壹健丁之食也而操守中千等官則月食僅陸錢叁分矣前此曾有薪水軍而今革矣於是乃私收納班錢以餬其口所謂納班者免壹月之差則納銀貳錢該并有貳金之入則賣閒者拾人矣有肆金之入則賣閒者貳拾人矣今若聽其收納班錢則行伍益虛

若痛革納班則須令各弁捐去妻子或授以辟穀之術乃可耳同是武弁也在腹裏者緩帶輕裘而飽欲死在衝邊者臥甲枕戈而餓欲死此人情之所最不平者臣謂

朝廷既責諸弁以忠亦宜待之以恕若飼之不如犬馬而望以殺身之報豈不難哉則昌鎮營路守提等官其月廩必當如密鎮之數雖視新營猶甚儉然亦稍稍可以自活矣此其所增不多卽在年例銀內通融酌給之可也既增其廩而後痛革納班則法行而各弁之心亦服矣練軍必需操賞容臣揆措給之器甲之需不能望之工部亦容臣與部臣多方設處俱不敢仰瀆

天聽以營制言之則營軍伍千以壹千爲鎮臣親丁以壹千爲道臣親丁俱責令躬自督練以叁千分爲中左右叁營各益以餘軍千叁百餘人責之分練則營將壹員定可省矣除請發馬價請補壓欠另疏具陳及官軍支餉則例造冊

移送戶兵部科察議外謹會同督治昌鎮侯恂合詞具題
伏乞

聖明俯賜採擇

勅下該部議覆行臣等遵奉施行等因崇禎伍年拾貳月拾柒

日奉

聖旨昌鎮重地拱衛倍宜嚴密豈得以弱卒充數這所請加餉
等事該部卽與酌覆欽此又該昌鎮督治侯恂題同前事同

日奉

聖旨已有旨了該部知道欽此欽遵各鈔出到部送司隨經移
會戶部酌議去後今准戶部咨稱看得昌平

陵
寢重地擁護宜周督臣傅宗龍

請炤京營例簡練士卒且慮錢糧設處不易議於經制之內通
融裒益俾餉不費而兵可強清曠汰弱移其糧以餉選軍
更欲向本部歲增漕米柒千貳百叁拾石給居庸路叁箇

月本色又歲增銀壹萬貳千伍百柒拾捌兩陸錢陸分以
增選軍之餉其計畫詳密思慮深長一片苦心本部自當
曲體但錢糧匱乏至今日而極本部業已屢勤呼籲內外
諸臣共見共聞當亦無俟更爲喋喋也今再四躊躇其議
增銀壹萬貳千餘兩不得不勉強應承炤數措給獨是昌
鎮漕米歲至貳拾叁萬有奇數已不貲若再加增愈損京
額且費轉輸不若給折爲便合於漕折銀兩內動支炤例
每石捌錢計銀伍錢柒百捌拾肆兩貳項每歲共增銀壹
萬捌千叁百陸拾貳兩本部之力固以竭盡而無餘矣但
察該鎮京民貳運錢糧歲該壹拾肆萬餘兩如清曠汰弱
督諸臣肯實實料理則各營路所省又奚止壹千玖百餘
金哉此外再有察出亦當扣作年例或抵補壓欠本部實
重有賴也再炤該鎮經制定於伍年之貳月曾幾何時似
此更張各鎮效尤必無已時且相繼增餉亦何止極督臣

之所急請與本部之所勉應總爲

陵寢重地與他鎮不同要不得援以爲例也旣經兵部咨會理合酌議回咨爲此合咨兵部煩爲察照

明旨內事理徑行具稟會覆施行等因到部送司案呈到部看得昌鎮爲

陵京屏扈防護自宜倍嚴而僅以弱卒充伍薄糈餌軍倘一旦有警戰守何恃督臣傳宗龍議炤京營保鎮近例選鋒每月加糧壹石單月支米壹石外加銀貳錢雙月支銀壹兩借厚糈以作其氣而猶恐計部難應又擬清曠軍汰老弱以抵增糧之數據歲增米不過柒千貳百餘石銀不過壹萬貳千餘兩宜亦計部所不靳矣計臣宛轉躊躇謂當此捉襟露肘之時議加極難應手勉應增銀壹萬貳千兩獨是漕米柒千貳百石若再議加恐於京額益損不若給折爲便議於漕折銀兩動支每石捌錢計銀伍千柒百捌拾肆

兩每歲該鎮已共增銀壹萬捌千叁百陸拾餘兩較督臣所

請以本折合算自可相當矣此外尚少壹千玖百餘金督治諸臣業已自認汰節補足使可通融如額用以加給居庸路軍貧瘠瑣尾之狀當煥然立起矣至營路各弁中千操守等官月餼不豐而私收納班以餬其口則婪橐潤而營伍虛大非政體督臣議炤密鎮之數卽於年例內通融酌給此亦量卹其私以責用命當非虛糜是在督臣酌量行之若夫昌鎮營軍伍千各以壹千爲鎮道親丁責令親行督練以叁千分中左右叁營并餘軍壹千叁百餘人令其分練而裁汰營將壹員以省廩費尤爲便計自當一一如議以鞏重地者也既經奉

旨酌覆臣等謹會同太子太保戶部尚書臣畢自嚴等合詞覆請伏乞

勅下遵奉施行

崇禎陸年正月拾陸日

貳拾日奉

聖旨昌鎮軍餉依議量加他處不得比例道臣練兵仍委各弁
徒擁虛名何裨實用俱行改正著責成鎮將用心訓練務成
勁旅以資戰守如有折班冒餉及怠玩廢弛緩急難恃者叅
來重治器甲操賞月餼等項督臣酌處製給營將應否議裁
還著確議具奏

禮部祠祭司署郎中事主事臣車夢瑤謹

奏爲遵

旨具奏事崇禎伍年拾貳月初拾日奉本部送准吏部咨爲父

忠已荷

國恩母苦例應合祔謹循

舊典仰控子情懇乞代題以光幽壤事內稱該本部題考功清
吏司案呈拾壹月初陸日奉本部送准禮部咨祠祭清吏
司案呈本年拾月貳拾陸日奉本部送禮科鈔出巡撫湖
廣等處地方兼提督軍務都察院右僉都御史唐暉題據
湖廣布政使司呈蒙巡按湖廣監察御史御史批據提學道
呈詳據德安府詳據應山縣申奉本府帖文蒙本道憲牌
前事蒙本院批據恩廕生楊之易呈稱易母

誥封壹品夫人詹氏自歸父連遭家不造儲無儋石備極苦辛
祖父母餽粥匱乏脫珥供置躬治絲枲佐父篝燈未幾王

父背世母勸父下帷篤志無爲貧阻丁未始成進士筮仕
嘗熟縣母時勉以大義不獨金帛不願數見卽薪米亦所
約取簠簋必飭克成廉仁之譽父連尋叨列諫垣母偕祖
母王氏隨居京邸勤劬儉約一如父在諸生時值祖母寧
家抱病且篤母朝夕顙

天願代密自刲股和湯藥以餉祖母病愈且壽蒙院道額門獎孝
母猶戒父退謝勿受迨父晉陟僉憲母復從祖母就養值
逆璫竊柄煽禍父抗疏請劒直數貳拾肆罪橐尚未脫母
抱筆跪泣父拒不聽遂毅然而起終不復泄恐爲祖母憂
父尋歸里禍且被逮母知父矢心忠義但愁親老願孝養
以俟昭雪尚期再見臨岐執手并無怨言易父拷斃獄底
復矯

旨追贓易等皆就犴狴薄產變盡親知助絕母之鏡櫛握髮咸
出鬻無以自存繞獄三匝哺子苟活復同祖母王氏棲止

邑西城樓淒風苦雨相依爲命紡聲哭聲折桶落瓦之聲
天地變色行路酸心如是肆年奄奄待死恭逢

聖明御宇又連首蒙昭雪且軫念忠義錄贈壹品官秩優給祭
葬竝母詹氏

誥封壹品夫人不幸於崇禎叁年柒月拾陸日身故更念易母
詹氏既逢茹荼不淑之艱又遭罪罟及孥之毒佐忠以明
婦順應歸九泉北獄之鬼篤孝而徇姑慈猶抱千古西樓
之恨前此未亡之歲月事事傷心迄今待露之枯倦睜睜
望眼況生既同沐乎

崇典死寧忍外於

殊榮懇乞俯賜代題片言華袞凡易母應得與祭合葬之

典炤品優給等情蒙批提學道察確速報蒙此備牌行府仰
縣官吏卽察詹氏應否合附取具師生人等不扶甘結速
詳報府以憑轉詳具題等因奉此遵依故牒本縣儒學察

結隨准該學牒呈本學教諭倪宗謙等參看得夫人詹氏
生能相夫弼成一代忠貞死宜合葬下隨九泉忠鬼稽察
故典夫既款款與之相符目其比例安忍泯泯不爲申請在

楊公功在

社稷全祭全葬久奉

俞旨在夫人生授壹品予祭合葬分應叨

恩所當炤參品以上文臣父母妻曾授本等封例祭葬炤授壹
品夫人例派給工價加祭者也等情具繇到縣准此該本
縣知縣張大經參看得夫人詹氏閩範清時班闌樞要弼
相忠貞萬載淑闈起色孤標節義

四 朝瓊閣生輝在楊公慷慨誓死以全忠在夫人激昂捐生而就
義存偕行乎一德歿同重乎五嘗稽察

故典款與相符合附

新恩尚無

俞旨所當炤授壹品夫人例合葬者也等情到府該本府署印
推官江孔燧叅看得憲臣淑配閫職貞儀楊公捐軀而爲
國真炳千秋夫人弼亮同心克稱一德存歿均關風化附葬
尚待

新恩慰英魂於冥冥禮重

典嘗揆款列於昭昭擬行申請所當炤壹品夫人祭葬用闡
婦道之幽光益旌臣工之忠蓋呈詳到道該本道看得夫
人詹氏忠良淑配閫閫儀刑生而相夫以正弼成忠烈之
操功垂

社稷已叨壹品之封死則合祔有例用昭闡幽之

典榮及泉壤尚俟

九重之予旣經府縣結勘相符所當仰祈炤例題
請以慰忠淑等因蒙批布政司覆確詳報蒙此該本司看得夫
人詹氏秉質坤貞配德乾健遇逆璫而櫻鱗一則洒養弘

之血抱鼠思而飲慟一則摧華氏之城擬下地以相從勉
呼天而一借當其輿觀以還里共悲白日與長虹迺至譙
角之寄居猶戴雷霆爲雨露忠臣可憑弔於九淵烈婦堪
遺芳於百代合祔原有

舊典請

卹應渙

新恩旣經道府覆勘相同所當呈請本院俯賜炤例會題合祔
合葬等因到臣該臣會同巡按湖廣監察御史宋賢看得
夫人詹氏揚休淑女配德孤臣黽勉襄忠聞雞允資乎珂
鑰齊莊著孝佐餒夙嫺於庭闈女史同諫譜齊光鳴巢與
豸垣不朽卓有關於風化生旣同沐

殊恩歿豈獨遺

特典今旣該司道確議前來又該臣等覆覈無異相應會題伏
祈

勅下該部議覆施行等因崇禎伍年拾月貳拾日奉

聖旨該部知道本內敘述呈批語多率妄殊非入告之體至坤

貞乾健是爲何語著察明議處欽此欽遵鈔出到部送司除

本官妻詹氏移文驗封司察覈授封外其察明議處一節

係隸銓政相應移會案呈到部擬合就行爲此合咨煩爲

察炤

明旨事理察明議處等因咨部送司案呈到部看得登對必謹

臣子所以凜奉

天威忠臣楊連妻詹氏存授壹品之封歿徼祔葬之典自屬

聖明曠恩何煩冗詞陳乞左布政使莊廷臣據呈敷衍漫不節

裁語多不倫何辭率妄之罪姑念該省錢糧文移盡其經

手職掌浩繁無心錯誤罰俸叁月足以示懲既經禮部移

咨前來相應覆

請合候

命下臣部遵奉施行等因具題本年拾貳月初貳日奉

聖旨章奏規則罰例向經禮部條飭奉旨甚明這察處事情是
否止屬銓政著該司官明白奏來欽此欽遵鈔出到部送司
案察湖廣布政莊廷臣察處緣繇先准禮部咨文議覆今
奉

明旨則禮部自有罰例不專屬銓政可知相應移咨禮部行令
司官遵

旨具奏等因咨部送司案察湖廣巡撫唐暉題原任都察院左
副都御史楊連妻詹氏

卹典疏內敘述呈批語多率妄不識忌諱奉

旨著察明議處然議

卹臣司事也已經移文驗封清吏司察覈授封日期議覆其察
明議處一節察秉質坤貞配德乾健係該布政司看語止
列官銜竝無姓氏察其姓氏必繇銓部是以呈堂咨會業

經吏部察明布政莊廷臣議其罰俸叁月具覆復奉

明旨章奏規則罰例又屬儀制司職掌先經題奉

欽依刊布中外若臣司則惟

卹典攸關其罰例未敢濫干今奉有明白奏來之

旨又經吏部咨會前來敢不據實

上陳其布政莊廷臣或如吏部所議罰俸叁月或再令儀制司

詳察酌議

上請伏候

聖明裁奪施行

崇禎陸年正月拾柒日

貳拾日奉

聖旨前祠祭司移咨吏部明稱議處一節係隸銓政是豈止察
姓氏今奉旨回奏乃借端飾詞且既知罰例職屬儀司何故
前不關會徑咨吏部車夢瑤先既疎率今又支飾姑著罰俸

三箇月莊廷臣著罰俸三箇月儀制司官如何不自具奏該
部知道

日講官禮部左侍郎臣王應熊謹

奏爲虛庸久圖引退病苦日益煎燔再被指叅義難覩忍懇
恩立賜斥放以廣生全事該臣於本月初陸日因被戶科給事
中馮元颺叅論具疏懇祈

聖斷

賜斥

賜勘隨於拾壹日奉

聖旨王應熊品行素著心跡自明著安心供職不必求去該部
知道欽此欽遵臣以量受逾涯禍來无妄復蒙

天光委炤

春日噓融矜以素著之行諒其自明之心敢不錫骨懷
仁捐軀稱塞但臣聞循名核實進賢退否者

人主御世之大權揣分量力難進易退者人臣奉身之明軌臣
才用凡近職處寅清始謂

朝廷設一官必課一官之業居一日當懷一日之憂乃力未効
於涓埃豐蚤崇於丘嶽囂凌之評不已貪狡之目隨加官
謗已滋初忱轉鬱臣仰悚於

聖主綜核之謨慮以素餐馴致大罪其當去一也臣本迂腐書
生不諳世間情僞長安宦套自有一種圓機仗公道者皆
爲認真求職掌者號爲多事臣不學無術寔背時宜內揣
於生平拙樸之性恐以違心失其故步其當去二也宋臣
謝莊云微命於天下至輕在己不能不重臣於先臣爲冢
嗣禮重胤子雖有弱息尚在襁提睽隔已經三春鬼夢相
牽萬里鄙私微賤不敢頻瀆

宸嚴賦歸未能壹鬱誰語懷鄉念子之愁旣積歎逝驚殤之事
相仍苦趣日來櫻懷深疴不覺被體疾痛顙

聲淚俱涌其亟當去三也況乎彈墨方濃甲顏可憎臣自謂鼯
飲盈腹宜尋止足之期人則云猴冠蒙面更有耽逐之計

寔緣處非其據木鴈之間既難兩全且也福過災生弓蛇之疾無方可療今日

堯舜在上皐夔在列充棟罔非杞梓遙庭盡屬璫璣與眎去臣壹人不啻九牛損一毛太倉捐一稊伏惟

聖恩矜憐放歸田里以從擊壤之後詠歌沕穆或允臣前請亟

賜褫斥以爲人臣不稱職者之戒無非磨厲羣工之術也

崇禎陸年正月拾柒日

貳拾日奉

聖旨王應熊佐禮直講已有旨諭畱著卽出供職不得頻請該部知道

大學士臣吳宗達謹

奏爲庸愚無補

清時衰病難勝重任懇乞

天恩俯容休致以明分誼事臣惟人生讀孔孟之書事
堯舜之

主此亦千載一時孰不願勉豎尺寸以圖表見然而才本

天賦不可強也故奇駿迅如歷塊而駕馬則疲神阿利可剗犀而

鉛刀則缺其幹局之不同蓋若斯矣臣性資中下學術空

疎本非濟世之材絕少希榮之念遭逢

聖主誤躡今官按期垂及叁年課績茫無寸効

皇上凝神上理

宵旰不遑卽海內想望太平翹跂以俟而臣曾無嘉謀嘉猷分
宸憂而酬衆志每一念及惶媿欲死蓋不待繩以考功之法迫
之攻過之章而已無可自寬矣乃臣之私心獨苦者又在

年至而衰病忍而劇如兩目昏翳非懸鏡不免辨形右臂
頑麻強握筆無能作字以至怔忡日甚食息靡寧寸竅弗
靈五官半憊年來盡謝友朋之酬應尚不能以樂石餘生
勉供職業其一切票擬間輕重緩急利害倚伏所關閭不
能通弱不能執者不知凡幾矣臣受任已久廷臣以大義
相規者亦復不少同官時或引咎杜門臣輒不敢竝時懇
請本以敬共之小心冒茲頑鈍之顯迹背芒顏甲實難忍受若
近時忠告之言無如庸臣有道一去以謝天下之語臣既
庸且病復冒昧不去是真捐廉嗜進誤

國妨賢端表澄源之謂何而甘毀生平以供指摘

皇上任人圖治亦安用此無行義之臣以爲政本辱也臣揣分
甚明披誠罔飾伏望

天恩俯

賜罷免不特愚分獲安而揆地一清

新政亦有光矣

崇禎陸年正月貳拾日

本日奉

聖旨卿忠勤端恪輔理著勞朕所素鑒機務殷繁方資幹濟何
乃有此引請著卽日入直以副倚注慎勿少稽該部知道

大學士臣周延儒謹

奏爲愚臣德薄貽詒萬難覩畱懇乞

聖斷速

賜罷斥以全大體事臣昨日看詳章奏見宣府監視王坤壹本
爲微臣材質菲庸等事內歷辯詞臣陳于泰前疏而指侵
及臣臣不勝惶愧夫于泰前日之疏與王坤今日之疏上
有

聖鑒下有公評臣無庸贅惟是臣雖不材忝列輔弼生殺予奪
操之於

皇上鍼砭責備聽之於外廷今以素不相涉之監視而忌憎見
及詬誶相加此亦揆地貳百數拾年來所不經見之事也
臣之辱政本而傷

國體其罪可勝誅哉伏乞

皇上詳察事理將臣

立賜褫逐以爲庸陋薄劣招尤取侮之罰庶不止存臣一身之
廉恥而政地之坊表與

國家之紀維所全亦已多矣臣義在必去不敢深言伏祈

聖明炤鑒

崇禎陸年正月貳拾日

本日奉

聖旨卿公忠端亮力拯時艱朕方切倚信何忍輕言求去還以
國事爲重卽日入直以慰眷倚慎勿少稽妄言的已有旨了
該部知道

監視薊鎮中協糧餉兵馬邊牆撫賞事務太監臣王之心謹
題爲塘報哨探事崇禎陸年正月拾叁日准三屯鎮總兵官

王維城塘報前事本月拾壹日據松棚路副總兵邢萬民
報稱本月初拾日據潘家口守備苗有才稟稱本月初玖
日戌時據管夜不收官張任道報稱據流河口火夜李小
四等陸名換班回至房兒川住宿哨見有過往達賊拾名
自東往西衆夷撞見撥夜互相對敵自平明時分戰至辰
時賊夷帶傷繇舊路往東過灤河去訖其李小四李仲夏貳
役帶傷跑回得獲夷箭拾叁枝呈報到職據此該卑職帶
領夜不收官張任道内外家丁兵士曹成功劉貴等陸拾
名火夜徐浩得等拾名共柒拾貳員名於本月初拾日卯
時一同出柞子菴境外復行遠哨去訖俟進口之日另文
再報等情具稟到路轉報到鎮等因又准薊州兵備道副
使王建侯手本同前事等因各會報到臣據此該臣因思

哨寡賊衆恐其中有掩飾情弊未敢率爾噴

奏復行該路察核的實去後隨於拾陸日據該路稟據守備
苗有才回稱親赴遇賊處所復尋獲折損夷箭玖枝又同
各官目撥夜丁兵遠去謝兒嶺瞭望車河川地方竝無前
夷蹤跡卑職同衆復往東哨繇慮馬汀找尋夷蹤過灤河
清河往東去訖卑職同各官目於拾叁日申時進口等情
回報到臣復喚原哨未傷夜役北劉二等當堂審質供吐
無異及問以何枝夷人則稱身穿皮襖俱係西夷內有壹
賊係遼東人說話等情據此該臣看得塞外西夷俱已遠
遁遽有此拾賊潛躡窺探且內有遼人叅之必爲逆奴所
使以爲間諜者其思以乘我無備掩我不虞情形孔昭矣
竊念邊疆之事慎守其一而慎防之道察於無影況已有
其形乎除該臣會同撫臣檄諭各路將領整擗兵馬將一
切大小隘口晝夜嚴加提備仍各差官丁遠行督哨以戒

不虞外係干哨探擬合據實塘報

崇禎陸年正月拾捌日

貳拾日奉

聖旨賊夷謀窺謀犯卽當擒殲乃犬丁僅止六名縱令遯逸向
來申飭哨法何在著撫監等官嚴警備禦遣哨遠偵遇賊立
擊不得少懈該部知道

監視宣鎮糧餉兵馬邊牆撫賞等事太監臣王坤謹
題爲微臣材質菲庸任事招怨重負

簡書有辱

君命乞

賜擯斥以息人言以抒黨忿事伏念臣生無媚骨秉有直腸受
事以來潔已奉公摘發吏弊不翅鷹鷂之擊於以任怨最
深而齟齬於臣亦最廣矣然臣孑然一身顧慮阽危肆懇
乞休未蒙

恩允方遵

旨扶掖料理間接邸報有冒進陳于泰盜竊科名業經鳴鼓而
攻情知戴履不容故意出位指斥

乘輿排擊內璫沽建言之名爲自固之術第屬鼎可以聞姦而
木天終難玷穢臣不屑掇餘唾與之反脣蓋齷齪肺肝自

有

廟堂清議自有

聖明犀炤臣謹按原疏效之夫

皇上乃

唐虞出世運際中興誠明攸當寬嚴合宜反謂

皇上嚴明無效其矯誣之罪可勝誅哉其謂蠹政未釐替紳久
錮蓋因文官愛錢是以政不得簡文官犯法所以刑不得
清即使四網盡除而不用命者勢然投入欲求刑措何可
得哉反矯誣

皇上勤政之不效其謂計出入算錙兩無粟紅貫朽之積蓋因
庫庾之物半歸中飽遂至惟正缺供難支旦夕反矯誣

皇上儉政之不效其謂加意摘姦委權緝事察淵索垢捕盜盜
多飭吏吏玩而謂

廟廊無人試問于泰誰居政本坐致釀亂也其謂

皇上用內員肆毒貪縱無忌謂周延儒不明目張膽以向

皇上夫

皇上能任受延儒明目張膽否緣內員力禁私取杜絕餽遺肆毒僅此而已臣請備言肆毒者無如楊鎬等毒三韓袁崇煥等毒

畿輔張翼明等毒雲中孫元化等毒齊魯熊明遇等毒秦晉流禍無極勢難救藥反矯誣

皇上嚴明之不效歟抑臣下奉職之不效歟其謂科道官容容多後福則方

皇上爲何如主也其無禮不敬投諸有北所不受者又謂科道若寒蟬嫌齒馬挑激興戎而又啓發

皇上廷杖之其機鋒之毒蔑以加矣其謂廠衛之爲鍛鍊法司無從駁正夫廠衛乃

皇上理刑之曹凡大慙巨惡職官汙吏皆奉旨逮問孰敢縱徇豈廠衛得私意於其間若悉歸有司則無脛

而走者家臻戶到干牘可通緩頰可及高下任心以掣法官之肘所以法之不平反矯誣

皇上國法日廢而勤儉嚴明之不效其謂人臣大罪有貳導主好利好殺而又隱其人嗟嗟夫

皇上菲薄衣食而謂好利刑罰得中而謂好殺其謂

皇上講筵虛應批駁過褻而奉行無所適從則

皇上萬機宸斷無一不加諸訾貶其謂內員監理錢糧未必爲夷外臣未必爲蹠顧臣在宣言宣業經釐出百萬侵欺尚不止也其爲外臣爲夷乎內臣爲蹠乎其謂三河莆田貳令因考成之勢拘於成額爲厲階也然有司不能撫字催科不肯潔已急公乃謂

皇上爲厲民也其謂

皇上嚴明之不徹底刑千百人徒損

威靈天下不懼矧今夷虜交訐盜賊充斥安內攘外是誰之責

豈皆

皇上嚴明召之也第于泰滅絕天理喪盡良心舉中外之決裂盡歸於

皇上之一身是可忍也孰不可忍也顧于泰席延儒比暱之勢借端責備欲徼進君自伐之義文飾醜狀愈蓋彌彰于泰謂內臣小忠小勤臣識于泰乃大姦大詐後必爲

國大患無疑矣臣若不發一言以救正之則臣之心更忍于泰果是內臣不識一字有類沈同和之曳白矣伏乞

皇上畱神乙夜細繹陳于泰之疏明譏暗刺謗訕欺妄日後宣付史館信爲實然則虧損

聖政匪渺小也伏乞

皇上將臣罷免以謝姦黨仍

勅下九卿科道從公評議具覆

上裁庶

朝政清明而邪鄙斂跡矣

崇禎陸年正月拾陸日

貳拾日奉

聖旨王坤受事嚴疆正宜用心釐飭以副委任何必激辯求罷
陳于泰疏與首輔何涉輒爾牽掎好生不諳姑不究該衙門
知道

錦衣衛掌衛事左府左都督臣王世盛謹

題爲訪獲違

制鑽營事該臣衛前任掌印官張元孫題前事奉

聖旨楊應海施光祖等堅執前詞情弊種種難信屢旨所駁甚
詳何未見反覆推詰韓騰芳攫金尚無確數何況得情俱著
詳鞫確供具奏欽此臣於此案刑鞫數四未易成招今復隔別
研審據楊應海供稱應海領班在京原與同鄉先存今故
守備侯尚德賃房同住有侯尚德素與今在官郭起柱相識
比起柱曾領川貴兵士調取入衛有功推陞宣府獨石叅
將赴任時將行李金銀弓箭等物寄在侯尚德寓處商議
謀陞總兵情節侯尚德挾有行李到京亦是謀陞遂與應
海備說前情隨有應海家代筆浙江人今在官施光祖共
爲商議光祖不合輒起姦心應承營幹倪稱近例推陞必
須先上

御覽然後講缺是應海同侯尚德將金伍拾兩付與光祖既騙金到手原因應海少欠光祖代筆銀兩遂將前金當與不在官蕭文定家得銀伍拾兩花費訖延捱日久竟無門路消息應海尚德明知詐騙急向光祖索取前金光祖當銀花費無存百計支調應海赴

陵修工又令今在官家人李二先存今故家人楊旺每日向光祖逼要前金以致擾攘敗露隨有應海同鄉人王紳聞知營幹等情正要出首因被該坊韓兵馬得知令今在官金書辦圖誘王紳到韓兵馬家將王紳手本改寫應海爲頭梟金貳百伍拾兩銀貳千兩希圖冒功攫利仍令今在官弓手包龍拘提應海比時荒懼卽投今在官兵馬司書辦金垣家央求買免比坊官書辦向應海講要銀壹千兩方免發覺應海無此多銀止湊出銀盃盤并銀貳百兩過付與韓坊官又湊銀伍拾兩與金書辦與原差弓手包龍銀壹

兩比韓坊官隨率今在官弓手姚登袁亮總甲呂麒家人周忠蔣奎及先在京今回南家人張俊張卿先將侯尚德房門用封條封閉後開房門遂將尚德皮箱衣物搶掠一空應海寒弁正在修工効勞委爲侯尚德所誤施光祖騙害苦情又審王紳既係原首定知備細實情據王紳供稱紳與應海同鄉隨住曾見施光祖侯尚德與應海嘗講營謀推陞紳實未見金銀後因逼要前物每日爭鬧紳恐連累故行出首被金書辦改寫首狀韓坊官拘禁在家後聞衆人封侯尚德房門並不詳知別項情節又審施光祖持金鑽營門路實情據光祖供稱向在楊應海家代筆每年講定代筆資叅拾兩欠有壹年末與光祖懷恨思欲設計取償因見應海同住人侯尚德行李甚厚偶值尚德講論推陞緣因是光祖應承包攬應海尚德聽信遂商謀同鄉人郭起柱見任獨石叅將曾恢復遵城有功可以推陞總

兵光祖謬應總兵也不難只是先要上過

御覽便得銀打點上過方好講缺推陞若推陞雖係在官主張

其上

御覽多係書辦呈舉書辦多是我浙江同鄉可以轉尋門路應
海尚德見光祖講說虛情遂認爲真因付金伍拾兩光祖
實無門路可尋騙金到手隨當與蕭文定家得銀伍拾兩

花費待應海等索取時抵做欠我筆資銀兩料他鑽刺事
體亦不敢聲揚光祖安心不復炤管後因日久竟無消息
應海尚德催逼甚急光祖初尤支吾後亦出言不遜你們
鑽刺陞官與我何干以致侯尚德情急幾要抹頸逼取你
敢不膽大詐財莫非指稱兵部騙人爭鬧招搖被王紳出
首該韓坊官差今在官弓手趙貴拘獲光祖同金書辦押
到蕭文定家立有欠約壹紙方將前金交出止重肆拾玖
兩等情又審郭起柱供稱遠疆未弁解成都圍復遵化城

蒙推獨石叅將過京時借宿同鄉侯尚德家寄貯衣裝行李等物詎意尚德與楊應海施光祖營謀事敗禍及起柱從來武職惟陞論俸起柱到任未久敢萌妄念禍因侯尚德楊應海行賄累害起柱罪無所辭等情又審韓騰芳供稱在坊巡緝聞有施光祖楊應海鑽營情弊隨接王紳首狀壹紙差今在官弓手包龍拘提應海因修工未回差今在官弓手趙貴拘提侯尚德到官比應海聞知事犯隨投今在官書辦金垣家行賄打點騰芳率同今在官弓手姚登袁亮書辦金垣總甲呂麒家人張俊張卿蔣魁周忠等到侯尚德家將房門封鎖後復乘機湏搶皮箱等物及申報城院鑽營情弊止交出金伍拾兩等情又審包龍原係拘提楊應海弓手趙貴原係拘提侯尚德弓手蔣魁周忠原係韓騰芳家人呂麒原係該地方總甲各同往封侯尚德房門搶出皮箱等物李二原係楊應海家人差往施光

祖家取金沈發原係郭起柱家人起柱原有行李金銀寄貯侯尚德寓處各等情臣復隔別遍刑研審各犯鑽營門路營幹實情務要備細確供不許支飾據楊應海再供委因與侯尚德營謀郭起柱推陞聽信施光祖誘吐原驗過銀貳百兩付與金伍拾兩希圖先上

御覽耽閣日久無信遂致索金債事臣復訊以營缺必有門路指據豈肯輕授光祖多金應海與侯原未講出門路實因光祖應承包攬應海與侯尚德俱係遠方人不知虛實遂信光祖是南人定有機會可圖後見無影追悔無及再審施光祖受金營幹定有門路屢刑未招定要實供據光祖再供只因窮窘窺見侯尚德行李又因應海欠少筆資初心騙金抵償料應海等不敢逼索光祖實無門路可尋先上

御覽不過支調延捱臣復刑訊指稱郎中施元徵爲同宗定有

情弊難容舍隱光祖再供光祖雖與郎中同姓光祖係浙江人郎中係南直隸人相隔甚遠兵部推陞總兵上

御覽不係武選司職掌應海豈不明知光祖若冒認同族誰肯聽信只因尚德索金未還口稱光祖指稱兵部騙人光祖實未有別項情弊詐金圖賴實是本情再提楊應海面質供稱光祖只說尋門路先上

御覽再講推陞原未指稱施郎中屢蒙刑鞫不敢妄招再審郭起柱供稱起柱供職邊疆同鄉人侯尚德行賄累及原未有起柱履歷合同再審王紳李二沈發各供如前又審韓騰芳攬金確數騰芳尚多展辯其受楊應海盃盤等銀共貳百兩金書辦受伍拾兩應海面質親與金垣過付有人真贓有據其搶侯尚德皮箱肆箇尚德雖死施光祖面質尚德曾供有銀貳千零叁拾兩衣服數件貂帽人參等物應海亦質原有不虛衆證昭然罪將誰諉又審包龍等各

供如前據此看得推擢必假鑽營鑽營每多誑騙有等得門路而居間過付有等撞太歲而虛假騙人走空姦棍出沒於銓樞之間實繁有徒數年前爲甚今凜

功令少覺清楚然亦不能盡除也若施光祖者真是罪魁容臣衛密切體訪諸如此類當亟擒正罪以清仕途楊應海居官不思守法行賄先觸刑章郭起柱借口微勞難贖重憲韓騰芳視鑽營爲奇貨藉按捕攫多金總屬非法金垣等各坐應得之條難寬罔利之律除韓騰芳金垣姚登袁亮仍聽北鎮撫司別案另疏歸結其楊應海等乞

勅法司究擬

崇禎伍年拾貳月拾壹日

陸年正月貳拾日奉

聖旨這事情屢旨甚明且前招推陞重謝及驗金營缺情形已經供吐如何延閣多時輒復改飾王世盛漫無窮詰顯屬庇

徇姑且不究著詳察屢旨祇遵研訊一二確供速奏如再含
糊緩泄嚴治不貸

戶科給事中臣馮元飈謹

題爲邪臣怙惡構機力箝人口大千

嚴禁陡作厲階謹據疏再糾立祈

聖斷事臣昨有疏特叅禮部侍郎王應熊貪狡無行字字確據
非祇風聞卽應熊於囑選典史囑考貢生貳事情窮語塞
不能復措一解而但云不必瑣辯此其真貪真狡固已無

逃

睿炤矣乃應熊自知大節已虧視人有醜志甘遺臭語不擇音
遂欲犯

聖治所必誅冒萬世所不敢藏機伏毒以示鋒距而惛人心則
臣不敢不就其疏一再糾之我

皇上蕩平之理遠邁漢唐嚴革偏私偕入大道應熊獨非臣子
乎而突敢於

大公之世言黨言局是獨何心夫始叅應熊者臣也繼叅應熊

者仍是一臣也。參大臣而謂之黨，則必附大臣而乃謂之不黨乎？以一言官參一大臣而猶謂之黨，則必盡諸言官決不參一大臣而乃謂之不黨乎？即據應熊自辯曰：非有私郤而參之，而猶謂之黨，則必因有私郤而參之，而乃謂之不黨乎？從古小人每每以黨之一字禍天下，應熊踵此伎倆，直以穢跡已著、童叟共嗤、慮再有盡發其姦者，故豫作此言以箝衆口，而不知流毒一世，將無底極也。乃猶敢於面欺曰：守

祖宗之法太拘夫，應熊亦知有

祖宗之法乎？銓佐一席，臣參應熊爲耽逐，而應熊自居爲力辭，夫予奪出自

朝廷，公推聽之，輿論何所容？私自辭受者，若可辭也，即可覲也。以進退人才之重地，爲取舍任意之私資，則壞

祖宗設銓之法者，應熊也。

祖制大臣被劾只著省己不許強辯

歷朝聖諭洋洋日星乃臣方循職直糾而應熊輒遁詞橫嗾借驅

除之隱語指爲

國曰爲人律以欺

君罪在不宥則壞

祖宗設諫之法者又應熊也總之應熊之壟利招權自汙其一身

者小應熊之藏機伏毒構禍於一世者大臣叅應熊之營私競勢所關於官嘗者猶小應熊自吐之設黨煽局所關於世道者更大故敢據疏再糾伏乞

皇上立彰

乾斷以爲大臣構機階厲者之戒

崇禎陸年正月拾柒日

貳拾日奉

聖旨言官論人宜靜聽鑒裁馮元颺何得屢疏求勝該部知道

吏部尚書臣李長庚等謹

題爲缺官事文選清吏司案呈炤得浙江布政使司右叅議
管糧帶催料價貢修齡陞任員缺合當推補察得前缺原
係布政司官管理案呈到部炤例推舉得浙江按察司副
使侯安國王際達俱堪陞任浙江布政使司右叅政管理
前項事務伏乞

聖明於內

簡用壹員

計開

侯安國

王際達

崇禎陸年正月拾捌日

貳拾壹日奉

聖旨是有點的依擬用 正有點

吏部尚書臣李長庚等謹

題爲缺官事文選清吏司案呈炤得江西按察司副使兼布政使司右叅議分守嶺北道駐劄南安府黃承昊調任員缺合當推補案呈到部炤例推舉得江西布政使司右叅議金肇元廣東布政使司右叅議徐應秋俱堪陞任江西按察司副使兼布政使司右叅議管理前項地方事務伏乞

聖明於內

簡用壹員

計開

金肇元

徐應秋

崇禎陸年正月拾捌日

貳拾壹日奉

聖旨有點的依擬用

正有點

吏部尚書臣李長庚等謹

題爲人才疏塞任使宜周謹陳通變之議以祈

聖裁事文選清吏司案呈崇禎伍年拾壹月貳拾肆日奉本部
送吏科鈔出廣東道試監察御史吳振纓題前事內稱竊
惟強主積兵富主積財明主積士所謂積者如良賈之精
於贏詘也新故可以相通良楮可以兼售長短可以並用
貴賤可以互徵未有棄多取少憎多愛少而善其爲賈者
也

皇上之需才甚殷求才甚渴而大小中外鮮供任使者蓋世之
騏驥凡馬更繫其足何以責重遠之程林無梗楠良工不
器其材何以收繩墨之用故古者有朝罷斥而夕賜環有
前沉淪而後顯擢有出之園扉而旋登之俎豆有宥其青
類而曲發其芳瑜無非重在急才不得不惜意在惜才不
得不寬臣敢略陳肆款祈

聖明俯賜採擇一銓部之疏通宜議也夫嘉木已收於匠石不
宜與樗散同閑璫與旣耀於明廷豈應隨沙礫竝置夫各
部序不畫官人不畫地獨吏部分域掄材因翹刈楚官評
鄉旦選衆乃公則當初署之時已樹異日之任而新舊相
間往例新者壹年必假今則貳叁年矣又或貳新而起壹
舊矣壹省之中多者積伍陸人卽以壹新壹舊約肆年論
之序在伍陸者貳拾餘年而後出則貳拾年之中以知推
京職起家者長藩臬專節鉞躋卿貳勳名爵位同膺者不
知凡幾而天曹之雋或英銳消磨白首興歎或林泉槁臥
紫霧徒深是始之以新劓爲閱練者徒飽於風霜以慎揀
貴銓衡者反見沉於歲月殊非爲官擇人之初意也臣謂
宜以人之賢否合資之淺深徹底打算從前推轉庶賢者
得乘時效用不以冷艷易素操卽不肖者亦面目各呈不
得借清華爲養重不然銓法當疏而壅滯乃在本部非所

以爲平也一錫秩之稽覈宜議也夫秋霜摧落春氣必還其榮造化所以成物嚴君高厲威如正用其孚臣子所以就閑今中外之臣罰俸降級者頗多一經摘處閑復無期竊謂罰與賞並行降與陞同勵諸臣或身在局中時勢不能自展或事生意外智慮未及周詳

皇上示以薄譴不過使怠者勤愚者憬冀其自新非跼其前步也而資俸已踰轉者不敢轉陞者不敢陞試以錢糧一節言之髓苟未竭不難敲骨以取膏苟尚在梁猶或爲瘡而別剗其災荒饒鹵以令殉縣而輸納無民有年遠人移以後代前而催補無術又有久陞別省而掛欠前任之風逋已不能分身以往人安肯舍已而芸如此之類將長爲見在之官乎此以錢糧言也有他事偶爲註誤不得卽以此事爲救過之門有閑曹絕無職掌不得別以微勞爲前拔之路有品秩有限而降級降俸浮於其官有輓解已清而

撫按部漕不能題復遂諉於無可奈何將別無開復之期乎臣以爲宜察其重輕察其勞惰原其情事或半年或壹年外則撫按內則堂官稽覈而上下之策勵者予之以新顏廢者加之以罰卽不然有炤舊管事之例或可以炤舊陞轉以地方繁簡險夷少分別以期後效則不使資俸深者坐淹而淺者反躡其上此今日之急務也一部差之勞逸宜議也夫臣子義無卽安卽鞅掌盡瘁非頂踵可惜但才力人各有限惟均平體恤斯職業無墮竊見戶工兩部內外之差最多大槩今之受事者仰惕

明威俯循法令其不自愛身名輕犯清議者拾無貳叁然有地遠艱危事非繁劇吹索未必遽加殫心卽可自辨與夫時勢險阻驚變故於須臾晝夜詰拮伏愆尤於不測者孰勞孰逸孰安孰危則何以優游者叁年而盤錯者亦叁年也何以炤嘗循資者得從容以養俸而例宜優敘者多顛隕

於危疑也凡人之精神初任則易賈其銳久頓則每挫其
成鼓之舞之惰者奮志於前途淹之抑之能者灰心於中
道此差之難易遲速不可不再爲酌定者也一起用之諸
臣宜酌也夫薑桂不易其性與甘腴之悅口不同松栢勿
隕其青豈開落之浮艷可竝凡經逆戩摧折當

聖政維新一時聯翩而出者固多尚有峻嶒傲骨白駒起場霍
之嗟隱躍賢聲蒼生繫碩果之望甚而孤忠苦節萬死一
生輿論咸推神人共惜而反以沉置多年使

明旨之日星同於廢錮非所以揚公道而快羣心也是宜將屢
奉

俞旨未經錄用諸臣或總列具疏以請
睿裁或陸續推補以信

詔令人惟求舊銓部不可不加之意也蓋人才與仕路相成一
無使不進不退久錮於家園一無使不陟不黜浮沉於仕

路一無使偏逸偏勞習成其趨避一無使已環復映永絕
夫旌輪伏乞

勅下部議叅覈妥確著爲規則於用人器使之道亦窮則必變
之要務也等因崇禎伍年拾壹月貳拾叁日奉

聖旨朝廷作人惜才一應黜陟勸懲鼓勵任使自有衡量降罰
開復該部向已條議款則豈容濶貸起用各官須確覈才品
慎加推擇不得朦朧濫及併餘款俱著酌議具覆該部知道欽
此欽遵鈔出到部送司案呈到部察得御史吳振纓條議
肆款內除部差勞逸壹款移咨戶工兩部議覆外其一謂
銓部之疏通宜議臣等看得本部司官皆繇選擇推用往
時新舊相間故鮮積薪之嗟近則起舊少而用新多壹省
之中甚有積至伍陸人者以致嚴壑之英每消沉於歲月
殊非爲官擇人之意自今宜酌爲定例每省新者不得過
肆人其在籍諸臣資序不同才品或異有宜於掌選掌察

亦有宜於藩臬監司臣部察覈分別以爲陞轉庶諸臣各得乘時效用而無壅滯之虞矣其一謂鐫秩之稽覈宜議臣等看得方今中外之臣罰俸降級者實夥罪皆自取夫復何辭臣部向已條議參則奉

旨遵行矣今宜以壹年爲期聽各衙門堂官及該衙門掌印將降罰諸臣細加察覈事情有輕重之別供職有勤惰之殊策勵補救者卽予之以自新悠忽如故者再加以重罰分別

上請取自

聖裁不得槩徼

寬政至於外之司道府縣多以錢糧叅罰第有縣已解府而府不爲轉解則罰宜在府府已解司而司不爲轉解則罰宜在司其災荒疲瘠之地前後代罰之辜亦宜稍爲差別令撫按察覈奏奪庶功罪不致混淆而勸懲妙鼓舞之用矣

其一謂起用之諸臣宜酌臣等看得逆醜摧折諸臣蒙恩賜環者固多亦有屢奉

俞旨未經錄用者然必其才品超卓果有益於

國家而後拔之沉淪庶足收得人之效若聲望平嘗原無裨於世道而槩登之

啓事未免開濫冒之端細察當日諸臣有原無自致之罪止因正直忤姦以致囹圄刑責受禍最慘及屢經追鞫遠戍遐方本欲寘之萬死幸而一生者如惠世揚毛士龍屈指亦不數人其年力才品俱堪爲

國家任事容臣部遇有相應員缺酌量起補決不敢朦朧濫及庶旌輪生色而白駒無場藿之嗟矣該臣長庚前後拾載草土餘生蒙

皇上拔起田間猥加

簡任感激

天恩正與諸臣共爲天心圖報於萬一而臺臣所疏俱關政體
先得同然既經條議前來相應炤款酌議具覆伏乞

聖明裁定臣部欽遵施行

崇禎陸年正月拾陸日

貳拾壹日奉

聖旨銓部司官最宜慎擇新舊間用原有成例近因營競日滋
以致壅滯愈甚本內新者不得過四人仍屬含涵著確議另
奏至降罰開復止宜覈實酌請不必限年起用各官還遵旨
慎加諮審併將先時被譴及奉旨緣繇明白開列毋得朦徇
餘俱依議

監視薊鎮東協署理關寧糧餉兵馬邊牆撫賞事務太監臣張國元謹
題爲接獲東來回鄉事本月拾玖日辰時准寧前道臣陳新
甲塘報前事會問本月拾捌日辰時分准前鋒祖總鎮塘
報於本月拾柒日據前鋒左營副將趙國志塘報據臺烽
千總周文啓報稱本月拾陸日據桑園子臺丁劉班貴送
叁更籌接獲東來回鄉王九凌等肆名原係右翼左營孫
副將下兵丁因失凌河虜去在瀋陽居住供稱本月初捌
日從瀋陽脫身拾壹日從柳河過河拾陸日據劉班貴接
獲又供達賊本月初肆日驗梯子於本月拾貳日起身不
知犯搶何處又說初捌日達賊壹千伍百名哨探旅順黃
總兵事情等情到職卽將供有口詞先到王九凌具文呈
解其郭清等叁名候解到營另文呈解等情到鎮會報到
道該本道看得前審回鄉李友德供稱奴酋限本月貳拾
日驗車此云拾貳日起身或傳言之訛也等因塘報到臣

理合具本題

知

崇禎陸年正月拾玖日

貳拾壹日奉

聖旨賊奴狡窺各鎮必備已有屢日報內哨探旅順事情併黃
龍通行馳飭兵部知道

監視薊鎮東協署理關寧糧餉兵馬邊牆撫賞事務太監臣張國元謹

題爲呈解回鄉事臣於本年正月拾伍日具

題前事本月拾柒日未時又准寧前道臣陳新甲塘報前事

會開本月拾伍日將李友德提到該本道覆審得李友德
委係騎兵右翼左營孫定遼下紅旗鐵嶺人於凌河虜去
分與佟駙馬下作部落於本年正月初柒日申時分從瀋
陽小西門起身親看見石三副將造的米輜車壹兩車上
前沿豎的梯子高貳丈伍尺闊貳尺車上後沿豎的梯子
高叁丈伍尺闊一同前後相離貳尺伍寸如臨時以後爲
前俱著披盔甲達子前後齊上前爲射打後爲傳遞火礮
火箭等物恐壹層梯子上下傳遞不及有四王子說的好
隨分付捌家王子孤山俱炤式樣快造限拾捌日造齊在
橫河沿親驗不知要造多少等語又看見造的戰車陸輜
下脚車上前沿用貳寸厚木板長伍尺架玖層約肆尺高

車後沿箭簾肆塊桿子貳根每桿掛簾貳塊造箭簾所用
綫麻繩子有繩頭粗橫纏成槍桿粗仍用壹寸寬皮條著
鐵釘子壹層錠壹層長有肆尺寬有貳尺此戰車造爲下
營等用又聞分付捌家牛鹿速造蟒甲限貳拾日要完的
等語理合塘報等因到臣該臣看得逆奴無時不造攻具
去歲報造牛皮木屋以火礮自試又報置造板車鐵鑊之
類今又報造米輞車高壯異常皆攻具也謹按奴衆長於
野戰短於攻守今百方修造攻具又爲下營計則賊於攻
守之際亦竭其狡詐矣在我備禦之法不可不萬分講求
也今燒山縱獵已日日見報又報虜已離巢西行其虛實
正未可測除臣申飭各邊萬分戒嚴外理合具

題

崇禎陸年正月拾玖日

貳拾壹日奉

聖旨歷報狡奴謀犯已真著該督撫鎮道恪遵屢旨熟籌制勝
全算遠偵鼓銳相機扼勦毋但以申飭了事兵部星速通行
馳諭

兵部尚書臣張鳳翼等謹

題爲邊工緊要尚多班軍修築宜蚤懇將春秋兩班一併催發以便及時料理事職方清吏司案呈崇禎陸年正月拾貳日奉本部送兵科鈔出監視薊鎮西協御馬監太監鄧希詔題前事內稱臣自奉

命薊西甫至而卽爲巡閱見邊牆倒塌四路皆然詢問緣繇竟謂地方官足跡不到有拾餘年而全不加修卽歲發班軍皆視虛文而任其倒塌不顧臣甚駭甚恨因於巡畢之日卽以邊牆已經視完等事直達

聖明旣而

請發班軍并叅班官積弊臣經營籌畫督率稽察親歷數番始得緊要工程一一告竣然而猶有時已至冬天寒冰凍不能修築而馬寧遠之軍盡數脫逃矣卽此觀之則班軍之修築可以仍襲故套而不蚤蚤料理乎回想上年軍到而

督道任其虛冒如王應乾據稱壹千壹百伍拾名而臣點止有肆拾柒名之數又軍到日久而督委之道道又遲延竟不卽爲派發以至後來日迫天冷難修興言及斯不容不齒之切而髮之指矣爲今之計惟有將額派西協班軍除春班者當卽催發而秋班者秋時甫到轉眼爲冬且邊地先寒至玖拾月而蚤已成凍時忙日促未免草草報完似此工程後終無益頃今明酋尚潛邊外奴虜又每欲窺邊修築堅完是防邊至計種種緊要處所作速宜修合無將秋班與春班者一時同發起此融和春日物料辦齊夏日天長工力加倍待各完其應修丈尺卽便發回庶各軍無寒冷之憂而修築有蚤完之局矣然而責任有不可不專而議處有不容不嚴者如臣屢奉

明旨有甚有恰餘年未修者殊可痛恨著卽會同該督撫察明近來經管道將職名奏奪又有衝塌已久如何至今未修

向來道將所司何事又有督臣嚴責道將撥派管理務令費省工堅蚤竣永賴該部還將向來條議稽核叅罰各款通行申飭不許弛玩塗飾致妨大計仍著監視不時察驗具奏又有城牆復多衝決邊計所關不小著督臣嚴飭道將速葺堅完仍察前時經管各官例罰是

皇上之專責道將不一而足而

皇上之著議罰道將又每每極嚴矣然上年督道推諉全付罔聞向非臣瑣瑣時巡寒暑無間則工豈能完卽完亦安能堅固也今乞

皇上將春秋兩班

勅著該部轉行該撫按司道火速解發前來并

勅西協道將凡一應點驗派發并經營督率等事俱必身親料理務以堅固蚤完聽臣察驗奏報完日以主客將領堅否

功罪據實奏

聞則各官知所驚心則邊牆可以得其永固矣等因崇禎陸年

正月拾壹日奉

聖旨邊工亟宜修築向經屢旨責成道將這班軍併發事情該部酌妥具覆欽此欽遵鈔出到部送司案呈到部看得邊班之分春秋也立法者原有深意一則以內地未嘗無事半以啓行半以居守一則以夏月雨滂已築之工或者衝圯惟時邊軍防秋而班軍赴工其慮甚遠今監視臣以邊工速葺

明旨責成甚嚴務爲一勞永逸之計欲得兩班並發工旣蚤竣且可以堅久意甚善也察密雲道下額派肆營計壹萬名一係河南東營一係河南西營一係德州營春班一係德州營秋班其河南東西貳營及德州春班俱應貳月初旬赴信惟德州秋班稍後今欲一併催督亦無不可但各營月餉給有後先支秋餉於春初恐不能一時備辦是在該

撫道蚤爲措處庶不愆期耳至於各軍赴邊點驗宜嚴而鼓舞宜至俾人人有踴躍赴公之義是又監視臣與道臣董率而非臣部之所能及也既經奉

旨酌覆相應覆

請伏候

命下遵奉施行

崇禎陸年正月貳拾日

貳拾壹日奉

聖旨這春秋兩班依議一併督發如期赴信月餉行該撫道措處蚤給不許延誤仍著該監道察覈鼓勵速就堅完

兵部尚書臣張鳳翼等謹

題爲塘報事職方清吏司案呈奉本部送據本部前差都司王平夷金萬鑑稟報前事內稱職等於崇禎伍年拾月初伍日卑職等奉本部署部事楊侍郎差赴東江傳奉

諭旨等事齎有公文柒角於初玖日到天津見鄭部院請討船隻出海蒙行餉道撥船巢總兵撥官陪去至拾伍日給船壹隻卑職等當日上船放行貳拾日到大沽海口候風間巢總兵撥哨官李科上船同去貳拾貳日風便開洋到小海子風息守至拾壹月初陸日風便至旅順外海羊頭凹不能收口遂拋口外是夜貳更陡起北風大颶兩纜俱斷錨棄海中船隨風浪衆命懸絲惟知有死無生颶至初柒日寅時漸近登州水城卑職等舉目相視其死必矣遂叩禱許愿漸轉東風方得到黃河營口豈被守汛官兵張大謨等疑爲賊船不繇分說將職等綁縛上岸當有海防左

營官兵陳顯祖等向與卑職面識大聲喊住此官原係海防右營王守備見在兵部候推今差來公幹爾等不得胡行衆云若是差官必要憑據卑職卽出公文與驗方息遂遍發報單訴遭颶等情劉澤清差官李春明王國祥率領家丁拾人紮職職云我等是兵部差官帶到澤清營門不容相見衆丁亂拋石塊僅幸不死見呂高貳太府驗過公文嘆云冬月航海其苦極矣初玖日見朱撫院蒙面諭來船旣遭風颶無錨着汛地官看守我另撥船送佗過海是時兩日無食囊無壹文承楊監軍道憐卑職等之苦送銀貳錢海防道送銀叁錢稍濟窮乏於拾肆日撫院行文與吳副將撥唬船壹隻差旗牌官章文陪去天津差官李科卽回津矣卑職等卽赴灣子口上吳副將所撥之船候風至拾貳月初貳日貳更風便開洋壹夜至初叁日午時到旅順見黃總兵遞公文訖總兵見文與卑職等云我旣爲

總兵豈不與

朝廷報效況我妻孥盡遭叛沒恨不食肉寢皮敢不奮勇堵截

報讎雪恥豈

天不佑颶我船壞我將兼之島餉壹年未解兵士枵腹露肘昨遭
颶到八角口船多打壞兵多渰死向撫院請餉止給銀叁
千兩官兵欲餉之多忽東南風颶至皇城島又把船打壞
柴隻只得仍回旅順料理船隻又聞達子聲息在此欲上
登州堵截兵無半分餉銀見在沙唬遼船不過拾陸柴隻
內有未修艖者尚不堪用遂退了手下人低聲向卑職云
你們看這反的俱是毛家人我手下所用之官尚有毛姓
復本姓未久者今我壹箇南人在此撐持也難爲我又無
半分餉銀我差都司沈璽內部請餉至今未見餉銀何如
船隻又無如何處置罷罷我今同你貳官擺了香案拜了
朝廷分付了衆將官我卽刎死罷卑職等見黃總兵如此說卽

勸云大丈夫死於疆場何可輕生死於不明不自之地知者謂無船無餉之艱不知者反加以畏避不前之論你今既要輕生何不盡其見在之船點領去之兵前去勦賊如殺了賊又報了

國恩又雪了家讎得勝固是職守不則死於疆場亦臣子之分宜也萬古畱壹箇忠義名節況今餉銀見在米山何不差人領來黃總兵卽云你說的是我今就與你回文差官同你就去領餉來安安兵心我將所有船隻載兵前去於初陸日發出回文及各將官回文壹併付職日期前後不等至拾貳月拾貳日黃總兵果差都司項祚臨等押唬船貳隻遼船壹隻是夜同昇職坐去唬船壹隻一齊開洋於拾叁日申時俱到灣子口原領齎去公文柒角除將黃總兵及王良臣等回文伍角呈繳外內有金聲桓因黃總兵調守皮島其公文交總兵處轉遞無回文其龔正祥原文

已繳司訖理合塘報等因又據本官接得東江恢勦鎮標
下右翼營叅將王良臣稟爲躬歷海外變態敬陳所見以
裨鑒察事崇禎肆年拾月貳拾柒日叛將耿仲裕因兵無
糧串黨作逆旋即擒戮黃鎮洛借麗糧貳萬石島賴以安
不意登州之變驟起而旅順之陳有時廣鹿之毛承祿翕
然嚮應且差叛官毛士雄等將陷長山黃鎮先行差官擒
獲於本年叁月初玖日帶領卑職等各將親督戰船肆拾
餘號揚帆西向沿島擒叛奪船復廣鹿收旅順始扼登賊
之後路而海外之官兵爲

朝廷用也當蒙本部俯覽島人忠義嘉與自新將加銜者各題
實授以勵後效卑職西將也原非島將惟是黃鎮以大義
血誠忠憤共事自是不敢愬然試觀今日各將亦惟有併
心禦賊扼截殲擊以靖

國難而已無他腸胃也猶有說者皮島以拾餘年盤結之局

黃鎮一旦挈其兵而移之於旅順者已過半矣其島之可有可無人之或徹或用惟本部主持之一轉移間兵歸有用之地糧不糜於無用之島至於島中之兵將習性驍勁隨宜用之儘足以供顧指之使無奈矯矯健兒困於舟楫馬步之長局於地形其中機宜非紙上敢贅各等因到部送司案呈到部看得島上情形非差官親歷其地不能一一明悉差官王平夷金萬鑑向已屢經危險去冬拾貳月奉有島兵須厚集銳圖著黃龍刻期督發之

旨臣部差平夷等宣諭各將實冒風濤而遣之今回稱跋涉艱難濱死數次打聽彼地情形言之甚悉據報黃龍妻孥陷沒實欲奮勇堵截因颶風飄覆糧糗不給收回旅順其情似真王良臣原係西將聞其老成忠敢黃龍得羈縻島兵良臣之力居多據良臣報各將俱併心待賊無他腴腸旅順之兵似可扼險以拒今業奉

旨傳飭各島與宣諭朝鮮已經飛檄黃龍及王良臣等正宜聯
絡東江及屬國之兵多方截擊賊若入島縛致不難
朝廷已有賞格若縱賊逸去黃龍恐無以自解矣據報島兵需
餉甚急計部見在督發續命之膏勿緩須臾是在該部之
急催之無爲坐失事機也既經塘報前來理合具本題
知

崇禎陸年正月貳拾日

貳拾壹日奉

聖旨島餉速發已有隻旨黃龍著鼓勵將士扼截殲賊以奏奇
功爾部再行馳飭

兵部尚書臣張鳳翼等謹

題爲夷情事職方清吏司案呈奉本部送准宣府巡撫焦源

清塘報內稱崇禎陸年正月拾壹日據分巡口北兵備道

右叅議今降叅級戴罪管事劉象瑤稟報准上北路叅將

劉永壽手本本年正月初捌日辰時分卑職統領官兵出

城揚兵間據獨石西哨夜不收袁可大報稱黎明時候瞭

見步夷達子伍名各隨帶弓箭腰刀從東安墩西空扒牆

進入往南嵯溝行走等情稟報到職隨即帶領守備陳上

表坐營郭邦輔千總劉承胤孫祿李大順等統領馬步官

兵肆百餘名飛馳前往南嵯溝跟尋蹤跡找至溝內前夷

撲出各官兵一齊擁撲斬獲夷級伍顆得獲腰刀弓箭擬

合具報等因到道轉報到職據此恐或妄殺無辜及有隱

飾情弊隨行該道覆察去後至今未據回報前來誠恐久

延未便俟察明另報外理合先行塘報等因又該本官塘

報前事內稱崇禎陸年正月拾肆日據分巡口北兵備道
右叅議今降參級戴罪管事劉象瑤稟報前事崇禎陸年
正月拾叁日准中路叅將周紹先手本會報本月拾貳日
寅時據本職下原差羊房堡監邊家丁李國民并操守胥
有詔下差家丁李鐸口稱拾貳日子時分賊夷拆牆等情
口報到職隨有操守胥有詔稟稱於本日夜子時據守大
邊何家堰臺軍人大李思讓口稱約有步夷米捌拾箇從
本臺東空拆牆進邊往南行走不知犯搶何處隨即一面
傳烽一面口報隨即帶領把總吳三奇馬步鄉兵把總胡
國棟等往南拒堵間又據殷家莊設伏軍張登武等亦報
前夷到於本莊搶掠頭畜操守驟馬馳至看見賊夷趕牛
驢羊隻從南一齊趕來卽與賊夷對面用弓刀火器射打
隨戰隨走至丑時到於地名烽背梁斬獲首級壹顆奪回
原掠牛玖隻驢玖頭羊陸拾叁隻射傷賊夷無數拖拉扒

山將操守右手指砍壹刀右腿射中壹箭又將操守任丁馬仲益右手重傷壹箭射死鄉導李仁馬壹匹其原搶牛驢羊隻盡數奪回間隨有本職星馳帶領親丁內十總并坐營千總旗鼓武魁等及嘗峪青邊貳堡操守封尚賢等至卯時馳至羊房堡賊見我兵勢衆俱各驚慌逃竄從原進口至辰時出口訖本職又看得邊外有接應夷人約有貳百餘恐有埋伏不敢深追隨即收兵回至殷家莊察看本莊營頭冀允升等供稱輕傷尤明順妻其原趕頭畜俱已奪回全有竝無輸失取有本役干結存卷竝無隱匿別情其斬獲首級奪獲夷器操守胥有詔另驗係干夷情擬合稟報緣繇到道轉報到職據此隨行該道覆核確報去後未據回復前來誠恐久延未便俟核確的數另報外理合先行塘報等因到部送司案呈到部看得零夷竊犯倏此倏彼或寡或多我兵每有斬獲人畜無損亦見有備但

知

小敵不足慮恐其以零竊爲嘗而別有大舉耳插漸臨邊
講賞此得非其嚆矢歟宜嚴加防忽以小勝自矜也操
守之被傷者該撫宜加獎賞既經塘報前來理合具本題

崇禎陸年正月貳拾日

貳拾壹日奉

聖旨賊夷屢次零竊宜防大舉著該撫監各官遠偵嚴備務保
無虞該部通行傳飭

錦衣衛掌衛事左府左都督臣王世盛謹

題爲

廟享禮成陪官數少乞

賜申飭以光

大典事本月初捌日孟春

皇上躬詣

太廟致祭

聖祖

列宗在天歆享舜文孝德千古比隆焉是日例用文武百官陪祀

東班濟濟成列西班自五府勲臣外京營值操期不與各

衛官多有貧乏衣冠未備者是以班行寥寥臣衛堂上官

備員隨從五所官各有察點執事惟南北司官叨列禁臣

品秩亦優偃居私室於臣子心有未安相應一體陪祀所

以盡臣職崇

祀典也再炤

聖駕臨御之處諸人不容擅入今後不係執事員役敢有假借
各衙門名色混入窺看容臣衛卽時緝拏審實糾叅統惟
聖明裁諭臣謹遵奉施行

崇禎陸年正月拾捌日

貳拾壹日奉

聖旨本內南北司官陪祀及緝拏溷雜人役依議今後各衙門
官員有職應陪祀託故不到的欺肆可惡也著該衛訪實奏
來該部知道

工部都水司署司事主事臣葉重華謹

奏爲遵

旨回話事崇禎陸年正月初米日奉本部送工科鈔出巡視光祿寺戶科等衙門給事中等官吳南灝等題爲察叅拖欠申飭考成懇祈

聖明

勅下部寺盡法嚴行以無匱

上供事內題叅各省直司府州縣拖欠光祿寺錢糧除雜糧廚料牲口等項聽戶部該司察奏外內稱工部欠天啓伍年分小油紅銀玖百兩天啓陸年分小油紅銀貳千兩天啓柒年分小油紅銀貳千兩崇禎元年分小油紅銀貳千兩崇禎貳年分小油紅銀貳千兩崇禎叁年分小油紅銀貳千兩等因崇禎陸年正月初陸日奉

聖旨據察叅該寺錢糧新欠至肆萬陸千有奇併積逋屢催不

應該管各官貌泄殊甚都著詳察職名炤例降罰住俸仍停其陞考勒限完解又湖廣通省全欠陝西不開府州縣細數是何情弊著該撫按自行回奏至戶工貳部應解錢糧亦歷年拖欠玩視上供自該部始何以考成外吏著該司官回將話來該衙門知道欽此欽遵鈔出到部送司該臣跪捧

嚴綸悚懼無措察光祿寺小油紅銀兩舊例每年光祿寺印信領狀投工部節慎庫關領給發今據該庫監督主事金嘉謨察稱天啓陸年陸月光祿寺差書辦潘丹桂投領狀叁百兩放過壹百兩未放貳百兩天啓柒年叁月該寺差官龔翼明投領狀叁千柒百兩放過壹千兩未放貳千柒百兩此後竝無領狀投到亦無光祿寺人役來領此銀臣念前項小油紅原係

上供歲額庫中應給者既不遵給乃該寺應領者復不具領臣備察節次案卷崇禎肆年正月內巡視科臣龔而安等題

叅省直拖欠內戶工貳部所欠各項奉

旨明奏該本部前任尚書曹珖等察奏小油紅銀兩光祿寺投
領壹次叁百兩壹次叁千米百兩除放過壹千壹百兩尚
欠貳千玖百兩應行察給其天啓柒年以後應俟該寺印
信文到行庫關領於崇禎肆年正月貳拾玖日奉

聖旨知道了光祿寺多係上供急需應發銀兩以後不得稽延
但該寺久沿積習冒破不貲屬員既多猥瑣堂上官亦宜設
法清釐併著嚴飭行該部知道欽此欽遵該本司陞任郎中

李思份備行知會催給又崇禎肆年伍月內該本司陞任
郎中王秉鑑案呈劄庫行催又崇禎伍年伍月內本司陞
任郎中舒顯胤復經案呈劄催仍移文光祿寺典簿聽備
察累年因何不赴部庫關領未經回覆逐年察催案卷歷
歷可覆臣司遵行嚴督初未嘗敢緩忽也但止能節催不
能代給竊謂歲額供輸原有款項按年支領事易清完乃

天啓伍陸年分領狀在庫者完庫尚稽完發而天啓柒年以後未經出領者該寺不赴關支以致完給之後時第錢糧給領職掌各有專屬察催不應遲緩非自臣司臣自去年拾貳月內始署司事夙夜飲冰凜奉

明旨嚴於鈇鉞謹據實回

奏不敢一字欺飾仰懇

聖明洞鑒臣司節次行催

俯原小臣攝事旬日大開

曠蕩之恩特

賜矜宥仍祈

天語申嚴將天啓伍陸年領狀內未給貳千玖百兩令節慎庫作速補給其天啓柒年至崇禎叁年未出領狀者令光祿寺察具印信領狀投部以便關領此後每歲清楚毋得仍前延緩庶事體俱有責成錢糧不致逋欠也恭候

命下遵奉施行

崇禎陸年正月拾肆日

貳拾壹日奉

聖旨上供錢糧自應按期解發據稱天啓六七兩年的尚玩延
不給何得以該寺未闕領爲辭顯屬支飾年來經管該司及
監督各官著堂上官察明奏奪葉重華旣受事未久姑且不
究該部知道

甲字庫掌庫事御馬監太監臣李陞等謹

題爲遵

旨奏明事崇禎陸年正月拾陸日該司禮監秉筆太監李承芳
傳奉

聖旨這布是怎麼收的如何不堪著他奏明欽此欽遵傳奉到
庫臣等跪捧

綸音不勝悚惕恭炤庫貯布疋俱係各該省直徵解到部該部
劉付驗糧廳驗送進庫臣等會同巡視庫藏科道炤數驗
收向因解到布疋率多麤鬆曾擬駁退又因庫貯無餘惟
恐年例供應壹時無措隨於崇禎肆年拾壹月內該臣庫
行文戶部轉行南直隸并山東河南各該府縣以後布疋
務要加工織造又於崇禎伍年柒月內復經移文巡視庫
藏科道轉行蘇松巡按御史行令各府州縣將額徵布疋
加工織造細密長濶逐疋驗印起解通行在卷及察前項

不堪布疋仍係臣等未經行文申飭以前所收之布今奉

聖旨奏明臣等謹爲據實控陳伏望

聖慈垂憐臣等向之節行申飭非敢故有所徇併祈

天語勅下戶部嚴行南直隸蘇松甯參府及山東河南各撫按

行令府州縣官以後輸納布疋務要長闊細密加工織造

掌印官驗明印記方行起解庶

國用無虧布疋有實用之益矣

崇禎陸年正月拾玖日

貳拾壹日奉

聖旨這不堪布疋如何溷收驗廳巡視及該庫各官顯屬朦朧
本當察處姑饒這遭還著該部行各省直該撫按嚴飭有司
今後加意織造仍將經管職名印記起解違者叅治不貸該
衙門知道

監視登島等處兵船糧餉海禁事務太監臣呂直謹

題爲營弁冒領官糧假出實收懇乞正罪以肅法紀事准昌
平總兵陳洪範手本前事內稱營兵糧料坐派各有地方
計日運交出納有數冊報稽核誰敢侵漁昌鎮兩營糧草
原係登屬州縣供億分撥已明不相紊亂法至嚴矣乃有
不肖營官假冒公行如標下聽用官張名甲者本鎮訪聞
得實卽拘一千人犯到官審據張名甲攬收壽光縣不在
官解戶任如崗所運米伍拾石折銀叁拾兩付車登科接
收令識字侯嘉士寫立千總孫鰲實收嘉士亦從中起念
希圖瓜分付解戶收執其張名甲得解戶銀兩不知數目
等情又審據田術供係壽光縣與任如崗同事解戶原解
來該縣粟米伍拾伍石柒斗又該料豆伍拾肆石肆斗因
途中馱運脚力不便將料豆運解本色其米帶銀在身欲
在營中尋便市買上納今被張名甲折米銀伍拾伍兩柒

錢止將叁拾兩給官識車登科等自吞貳拾柒兩柒錢又將料豆收在私寓尋人糶賣又將里長袁祥料豆肆拾貳石小米壹拾貳石陸斗其餘有銀有錢俱袁祥交付親收袁祥存有細帳可審尚在候給實收等情供吐到鎮據此看得張名甲冠裳猴沐行同鼠竊罔知法度惟利是嗜東省遭罹禍難徵調大兵雲集其供億糧芻有司催辦不知費多少精神民力轉輸不知受多少毒楚雖升合無非窮民之脂膏而若弁但有人心尚寧忍冒領而飽私慾乎此不重究長此安窮至如孫鰲車登科侯嘉士以官識而從中圖利田術袁祥係解戶亦因小利致付託匪人難免併究煩請察究等因到臣准此爲炤兵馬叢集供億繁難糧料交割易生姦宄若張名甲者冒收私折假捏公文誠姦人之雄也窮民既苦於轉輸又墮於詭計脫此黎庶耗損軍實名甲罪不容誅矣其車登科等任如崗等圖便一己之

私甘入朋謀之律尤不宜漏網者伏乞

勅下該衙門嚴提審究追贓正罪庶懲一可以警百而姦弊可
以釐剔矣

崇禎陸年正月拾肆日

貳拾壹日奉

聖旨張名甲併車登科等著該撫按嚴提追贓擬罪具奏該部
知道

司禮監秉筆兼掌內官監印務太監臣王文政等謹

題爲墳券久稽題催復閣懇乞再題速竣以襄

大典事據提督太監韋朝等呈前事內開恭炤修造

容妃墳工地券察自開工以來迄今貳年有半屢催先償地
券以備發引工在至急第料物不前耽延未結見今

容妃靈柩奉安

南城已隔兩歲卽

德妃薨逝奉

旨祔葬容妃之側見今亦在

南城供安亦及年餘墳工久爲稽悞曾於崇禎肆年柒月內

呈蒙具疏題催償造

熹廟純妃

穆廟容妃

懷隱王及

莊妃各墳工先償地券以備發引次及

殿宇等工隨奉

聖旨奏內參處墳工延閣已久甚非事體著該部卽將應用錢糧作速措辦先償地券限參月報完以便擇吉發引續將殿宇等工務於今冬明春通行報竣不許再有稽遲其莊妃墳園停工日久著壹併興作襄事該衙門知道欽此欽遵後止

克襄

純妃及

懷隱王兩墳地券告竣外惟

容妃墳券業已奉有

欽限參月報完殿宇等工限在肆年冬伍年春通行報竣卷察

自奉

旨以來今又陸年春矣天氣漸融

殿宇等工通未料理僅止壘砌羅圈牆荷葉溝其地券隧道

尚無頭緒及今若不呈明目前何以鳩作懇乞再爲催題責以辦料且今已入春轉盼是仲仍復因循開工無望必致延悞罪難推諉等因到監據此看得

容妃墳工興作已閱兩年未襄之延閣先償地券奉有叁月報完之

明旨則欽承宜先償興恐後何乃悠忽動輒經年其何以仰副明綸又何以免襄

鉅典也且

妃靈久停於

禁內恐亦非宜窀穸未卜於何期臣子何忍此臣等食息不安頃刻靡寧者也既經具呈前來相應具題伏乞

嚴勅該部催商辦料再責該庫給發錢糧務將

墳工物料預儲必於此時先償

地券以備筮吉發引其

殿宇等工程作速次第報完責令該部司將發引的期工完

定日及辦有錢糧明白入

告庶工程可望而

明旨可信矣

崇禎陸年正月貳拾日

貳拾壹日奉

聖旨妃墳地券奉旨踰年尚爾延閣殊屬泄玩著該部速催商
料併錢糧卽行措給以襄大典如再稽悞該司官叅處不貸

工科給事中臣孫晉謹

題爲致治先弇其要救弊務窮其源敬明責成之義仰佐

綜覈之實事臣竊觀

皇上勵精圖治日不暇給真無一念一事不欲立致太平而何以持之愈急應之愈緩母亦

皇上之法令止能嚴於其所已見而不能嚴於其所不見者止能詳於其所已及而不能詳於其所未及者抑責成之未得其要綜覈之未得其實歟臣

請言其槩今在內之有六部與在外之有羣吏天下之事盡是矣乃部司至繁盡繇得其人盡廉幹事無廢弛所以提挈一部而爲諸曹領袖者堂官也堂官介則司屬不敢貪堂官勤則司屬不敢怠堂官精明則司屬不敢以汶汶從事蓋各部中老吏猾胥因緣簿書嘗犯增減規避之條而司官不能問不敢問且以爲不必問乃各堂官亦率務優

容希旦夕之無事其意不過求無拂人情故置一切法令
不力持以博賢聲而六曹事日叢脞吁亦可嘆矣誠宜令
各司屬及時清察各項文簿嚴前後交代之禁清始終濶
冒之端其堂官卽以釐弊多寡殿最司官仍責其不時糾
劾俾庸庸者無所容而墨墨者無所遁則網舉而目自張
領挈而表自舉百度維貞端必繇此書曰六卿分職各率
其屬以倡九牧阜成兆民禮曰大臣不治而通臣比矣且
以爲民之表故臣非謂部卿一人遂當兼瑣細也亦以堂
屬之間言動相習宜視其人之材力與其事之局量兩足
相副然後舉以任之朝提命而夕考課務令中材盡心於
職守不興出位之思而於各差難易勞逸濃淡之關各循
資俸淺深勿容百足之虫巧爲趨避致起紛紜且勿以難
事貽累後人而以代庖有妨經久則皆部堂一力主張有
餘者豈有堂堂長吏反至仰鼻息於下僚也哉且夫各部

重任無如銓樞之選每見程材則嘆才少爭缺則見人多數十年來緊要之官非夤緣多助者不能必得其始也既以賄成其卒也必以賄敗教保升木誰實厲階今欲儲真正賢才必先扼鑽營蹊徑願諸大臣一秉虛公爲事擇人以入集事毋聽挾私旁撓則哲惠之要道也至若外吏如郡守如縣令爲親民之官非不并重乃所以提衡一方而爲守令觀摩者首撫按次監司也將欲安民必先察吏今懲貪之法非不嚴而所繇以行法則不外叅劾一途論列所及自不甚誣然而惴惴無華者多掛於白簡羽翼有力者盡逃於吏議舍狼問狸掛一漏萬所在不免人胡以觀臣嘗思御史曰監察司道曰按察其義並尚蓋郡縣與撫按相去稍遠而監司則權位相近開報之責實所專司雖今兩司之選頗號彬彬而潦倒者亦時錯處倘暮夜之金有靈香火之情未斷必且養姦以害地方誤報以塗撫按

甚而遞屬遞下衙蟲窩訪反得操縣官之短長而陰中其毒矣又無怪乎彈章所指動盈千百及行勘問十無二三也所當

嚴飭撫按以後詳察有司勿護方面慎行舉刺有才而無守者弗薦受財而枉法者嚴科核贓必求過付之人勘問必盡一成之法稍有不實定行追論如果無異嘗貪酷則勿取萊傭充責若部院別有訪聞卽撫按難辭其咎庶乎懲一墨吏而羣吏知警言所以救貪獎廉振吏治之弛者莫急於此願

皇上於在內則責成六部堂官在外則責成撫按監司要領既得其人諸司無不兢奮如心之使臂臂之使指而不法者隨以三尺繩其後此之謂真綜覈

皇上可不勞而治矣

崇禎陸年正月拾捌日

貳拾壹日奉

聖旨這本責成部堂及撫按監司亦得掣要澄源之法爾等科
道官必須自處公廉方可糾繩貪玩著一體飭行該衙門知
道

督發關寧援兵監護軍功糧餉等事忠勇營中軍太監臣高起潛謹
題爲恭報攻城日期事竊得我之主客大兵奮謀鼓銳合力
齊心一戰而解朶月之萊圍再戰而復久據之黃縣程在
事之將兵惟知除兇報

國罔敢惜死貪生直偪登城長圍困賊迄今已伍閱月叛賊
屢出衝突意圖出柙我兵迭奏捷功守志益堅陸路之嚴
必可恃海道之汪洋當慮臣等屢行間諜詎賊執迷不悟
反敢殺順櫻城向來緩圖攻取因賊砲火甚多恐徒傷士
卒無益且攻具難以卒備

地利未得要領臣用是終夜忘寢終日忘食馳驟於山巔海濱
紆迴瞻眺計伍月之久始得一定之局山名掛榜者去城
南面約遠一箭形勝義隴較之城頭高貳丈許我能據扼
此地城內人物靡不辯悉架砲衝打百發百中臣得其形
勝矣又見

天時融暢海凍泮消儻一漏脫貽未了之局爲

君父憂臣茲更懼遂會商撫監按鎮道將等官集奮人力運石
囊土接連周築高壹丈肆尺底闊捌尺夾牆約米百餘丈
牆橫捌丈有餘於正月初陸日夜臣等一呼兵卒子來不
兩晝夜而厥功告竣又於夾牆之東

天齊廟內築一大臺離城約遠半箭調集大小砲銃數百位安設
於臺牆之端炤城衝打但見城頭雉堞輒石紛飛而城之
南面垛口多不立矣賊復抵以門扇堵以木排我砲擊去
門片作蝶翅而高飛木段成齧粉而催墮城之上巔雖人
蹟罕能立脚而搬石培垛之賊往往中砲死者更多城內
人驚飛火賊駭轟雷房屋垣牆頓見傾倒賊無固志已見
於我目中繇是拽運制勝營總管局務副將丘磊造完踏
雲飛火搬繒連雲絞機排木轟城等梯車攻具布列於城
之東西南三面仍懸賞格用鼓將士派定官兵認定信地

大圖殲取業已涓吉於正月拾伍日吉時合力攻城矣佇
邀

皇上威靈立奏蕩平臣當急馳露布以慰
聖懷也

崇禎陸年正月拾肆日

貳拾壹日奉

聖旨據奏扼險設械刻日攻城具見籌略賊勢窘蹙著該撫監
鼓勵將士奮銳先登仍堵截遁逸務制勝萬全佇膺懋賞該
部馬上馳飭

戶部等衙門尚書等官臣畢自嚴等謹

題爲遵

旨回奏事雲南清吏司案呈崇禎伍年拾月初捌日奉本部送戶科鈔出該本部題前事開具舊太倉等倉節年扣過米數緣繇拾月初陸日奉

聖旨前楊一鵬奏稱缺額存糧每歲當有拾萬餘石如何本內數年以來止共扣貳萬陸千有奇著總理會同部科通將京通各倉實在米數盤察具奏欽此欽遵鈔出到部送司拾月拾陸日又奉本部送准總理戶工兩部錢糧太監張彝憲手本同前事內稱京通各倉實在數糧奉

旨會同盤察原爲缺額存糧似應將肆年收貯之米并以前存積之糧總計扣存及正尖耗米數目盤察或於伍年新收之整數糧無涉乎如新糧有收并於未放完舊糧數內亦應通行盤察新舊之米應否逐數盡盤而與所需糧斛抱

籌盤米過敷抗脚人夫等項并今冬今日短天寒均宜作何斟酌合當移會部倉科公同議妥題

請遵行等因奉批雲南司察確回咨拾月拾捌日又奉本部送准戶科右給事中傅朝佑手本同前事內稱即便移會倉場衙門作何斟酌等因奉批雲南司察議拾月拾玖日又奉本部送准總督倉場尚書錢春谷同前事內稱京通倉糧奉

旨會同盤察蓋緣戶部回

奏扣米數目而欽奉也就中之應否新舊盡盤及文內所謂檣斛抱籌盤米過敷抗脚人夫等項此外更有鋪席片等用所費不貲相應逐項斟酌固也抑兵部謂兵額不足宜米數有餘如此其多今扣米但實支中偶有事故零星扣存如此其少況倉米總收零放通算一實在未嘗分出各項名色卽所扣亦只虛數耳何從盤出又本部催償之

外一應支發俱無與焉此等處不會計停安申說分明後來何以仰答

明旨而各自盡其職掌乎等因奉批雲南司察行通送到司該本司前任郎中潘永圖隨即呈堂移咨督部及劄京通貳聽會同各倉確議速報去後拾壹月拾伍日奉本部送據管理京糧廳主事周天祚呈稱准舊太等陸倉員外郎石應崑等於本月拾壹日爲會議盤敷事體以候裁酌舉行事等因奉批先察見在倉敷米數若干造冊速報內將新糧除開另作一項再將應用腳價席片葦把一總銷算共用銀兩若干以便題

請動用奉此隨即呈堂劄行該廳察確冊報去後今於崇禎陸年正月初米日奉本部送據該廳主事周天祚呈稱前次所議但泛就一敷論而未槩全倉之數亦雜舉各項所需而計未合一倉之總費算也今分別新舊臚列衛分細開

糧數清算銀兩總數相符畫一可舉再陳數款以候題覆
等因奉批雲南司察冊磨算具疏題覆仍會同戶科奉此
察得舊太倉羽林前等拾壹衛倉見在新舊稷粟正耗大
遼平斛米共陸拾伍萬柒千叁百柒拾玖石叁斗陸升零
計用脚價并抱籌擡斛打捲買席通共該銀肆千柒拾壹
兩貳錢肆分陸釐零海運新太倉見在新舊稷粟正耗大
遼平斛米柒拾柒萬肆千玖百零玖石伍升計用脚價并
抱籌擡斛打捲買席通共該銀肆千柒百壹拾陸兩柒錢
壹分柒釐零南新濟陽倉見在新舊稷粟正耗大遼平斛
米共肆拾捌萬玖百肆石捌斗壹升貳合零計用脚價并
抱籌擡斛打捲買席通共該銀貳千捌百伍拾伍兩貳分
玖釐零北新大軍倉見在新舊稷粟正耗大遼平斛米肆
拾貳萬叁百柒石肆斗陸升零計用脚價并抱籌擡斛打
捲買席通共該銀貳千肆百陸拾肆兩玖錢壹分陸釐零

西新叁倉見在新舊稷粟正耗尖遼并掃積共米貳拾陸萬柒千貳百捌拾陸石陸斗捌升零計用腳價併抱籌擡斛打捲買席通共該銀壹千陸百玖兩陸錢貳分貳釐零祿米倉彭城府軍貳衛倉見在新舊稷粟正耗尖遼米捌萬叁千叁百柒拾叁石肆斗陸升零計用腳價并抱籌擡斛打捲買席通共該銀肆百陸拾伍兩柒錢玖分伍釐零通州中南倉見在新舊稷粟正耗尖遼平斛米肆拾叁萬壹千伍百玖拾叁石玖斗玖升零計用腳價貳千玖百肆拾壹兩柒錢叁釐零通州西倉見在稷粟正耗尖遼平斛米陸拾壹萬陸千捌百捌拾玖石柒斗肆升玖合零計用腳價席葦抱籌打捲共銀肆千貳百肆兩陸錢捌分陸釐零察算無異相應具覆案呈到部該臣等會同戶科都給事中許世蓋看得

皇上注念軍儲畱心節省將盡舉倉庾而清數之臣等敢不仰體

宸謨殫力畢智以襄茲役顧臣等再四思維百凡諮諏竊念以數百萬之倉糧徹底盤察計時量力事體何如重大若非澄源清委慎始圖終其何以仰副

皇上釐剔維新至意乃集各倉條議叅以臣等愚見大約盤廩之法從未試行臣等以事理揣之若盤出露地復盤歸他廩不惟轉折費時亦且風雨可慮不若出此廩卽入彼廩之爲直捷也大都一倉日覓抗夫陸百名可盤米陸千餘石其脚價一以糧數之多寡爲定蓋倉廩貯米之法用席打捲漸而充棟勢若登樓如全廩正尖耗米共壹萬叁千叁百柒拾玖石貳斗捌升每人抗伍斗壹袋上半日履平而易每袋用錢壹文下半日步高而難每袋用錢貳文通計壹石用錢叁文若原係肆伍千之零廩無復登高之苦又止每石貳文矣至廩中鋪圍打捲作囤必須席片京倉有楞木松板墊底每糧壹萬貳千石用席玖百領通倉惟

藉席葦以防氾濕每糧壹萬貳千石用席壹千壹百領葦
 把叁拾伍捆計時值席價每領銀貳分葦價每捆銀肆分
 其僱人抱籌抬斛打捲炤收糧議單例每石用銀米毫如
 京陸倉共糧貳百陸拾捌萬肆千壹百陸拾石捌斗叁升
 零合用腳價等銀壹萬陸千壹百捌拾叁兩叁錢貳分捌
 釐零通貳倉共糧壹百肆萬捌千肆百捌拾叁石柒斗肆
 升零合用腳價等銀柒千壹百肆拾陸兩叁錢玖分零以
 上京通捌倉共新舊糧叁百柒拾叁萬貳千陸百肆拾肆
 石伍斗捌升零通共腳價等銀貳萬叁千叁百貳拾玖兩
 柒錢壹分捌釐零方今

國用匱乏庚癸頻呼而新舊兩餉日苦不敷熟思審處計不
 得不取給於輕齎此其經費之大較也乃各倉糧數不下
 數百萬而總理督倉及戶科各官又必眼同公盤而後可
 以取信通計窮日之力所盤幾何儻待此倉終事纔及彼

倉動輒經年報竣何日若同時俱舉各倉分委又與會同盤驗之

旨有悖且臣自嚴計務紛紜昕夕竭蹶勢必不能分身以應卽在右侍郎各有專職似難兼管全賴總督倉臣及戶科題委風力科臣壹員俱令會同總理或分頭掣驗或共爲稽核總期於協力和衷無隱無漏以仰副

皇上任使可耳抑臣等猶有說焉

明旨所爲屢屢盤察者原以兵部侍郎楊一鵬所奏缺額存糧與臣部所報臨倉扣除糧石數目多寡懸殊也夫營衛缺額存糧與事故扣存月糧旣判然爲兩事乃缺額所存業已加之選壯而事故扣存卽爲各倉實在則與舊管新收同一支放原非有別立款項另儲倉廩者也就目前所盤者祇能於各倉現在之數按冊而稽之少則爲額中之虧縮多則爲額外之盈餘而必不能於此外別求所謂扣存

者此理勢之必然也再察各倉節年

奏繳祇開正米不入耗米蓋耗米以備鼠耗虧折其法以叁年遞減後方開入新收米米例有運官漂患免米抵算正數故耗米貳項臨收難作實在不敢遽入

奏繳必待臨放開出作正支銷今既奉

旨通盤則耗米均係在倉自應與正米合算無疑矣至於漕事殷繁中州東省新運轉盼可至卽以海運新太貳倉糧數計之業捌拾玖萬零度非費伍閱月工夫盤察不可將新舊同日而營既苦畫方畫圓之難若新舊相逢而待不勝曠日廢事之懼臣等竭力圖維智能俱索或持新舊之議奉

旨盤察原爲缺額存糧似應盤肆年收貯之米并以前存積之糧而伍年新收整廩之糧可以無盤則京倉舊糧共捌拾壹萬壹千壹百貳拾肆石陸斗零止用脚價等銀肆千捌

百貳拾貳兩貳錢柒分柒釐零通倉舊糧共肆拾陸萬壹千肆百貳石玖斗壹升零止用脚價等銀叁千壹百肆拾肆兩捌錢叁分叁釐零其於時力差爲簡易若以爲新舊合算始副通盤之

旨則或議於支放之中而寓盤察之法亦屬可行蓋京通各倉每月放糧大約貳拾陸萬有奇臣部調劑多寡分坐各倉例也今勢窮則變與其分盤放爲兩途而成礙何如并盤放爲一事以相通則卽以壹月應放之糧全坐壹倉屆期總理會同各官加意稽察出數旣多則表裏易見而壹倉之事可計日而竣矣每月放完之後卽具有無贏餘短少數目據實題報其餘各倉俱炤此例而行於支放之中修盤驗之事似亦可竝行而不悖者如是則前項抗脚席片等價稍省錙銖亦且不勞餘力次第報竣其於省時節費或未必無小補也敢因回

奏而併及之統候

聖明裁登施行

崇禎陸年正月拾捌日

貳拾壹日奉

聖旨盤驗倉糧正欲徹底詳明又須立法簡捷不可曠時多費
還著會同總理確議規則來說

戶部廣西司署司事江西司郎中臣李公門謹

奏爲遵

旨回話乞

恩認罪仰懇

鑒宥事崇禎陸年正月初陸日奉本部送戶科鈔出巡視光祿寺戶科等衙門給事中等官吳南顥等題爲察叅拖欠申飭考成懇祈

聖明勅下部寺盡法嚴行以無匱

上供事內題叅崇禎肆年分各省直司府州縣拖欠雜糧廚料牲口等銀肆萬陸千叁百壹拾捌兩零在京戶工貳部太倉年例免發昌平永平牲口果品錢鈔張家灣宣課司麴價小油紅銀兩緣繇本年正月初貳日奉

聖旨據察叅該寺錢糧新欠至肆萬陸千有奇併積逋屢催不應該管各官藐泄殊甚都著詳察職名炤例降罰住俸仍停

其陞考勒限完解又湖廣通省全欠陝西不開府州縣細數是何情弊著該撫按自行回奏至戶工貳部應解錢糧亦歷年拖欠玩視上供自該部始何以考成外吏著該司官回將話來該衙門知道欽此欽遵鈔出到部送司該臣跪誦

天語不勝戰慄切炤微臣原係本部江西司郎中因廣西司郎中林鐘於崇禎伍年拾壹月內陞任初委該司主事胡其偉接署繼因其偉奉有外差於拾貳月拾玖日

陞辭該司乏員蒙臣堂官畢自嚴委臣暫攝司事時當歲暮僅止旬日凡一應攢造

奏繳磨對

御覽百務倥偬諸事蜎集未能彙竣原擬歲首次第舉行適奉前旨除咨行各該省直詳察職名俟至日炤例察覆并湖廣全欠陝西不開府州縣細數未完錢糧勒限本年肆月內完解俱於科鈔到日呈堂咨行各該撫按一體欽遵并工部

所欠銀兩聽其自行回

奏外惟是臣司拖欠光祿寺果品錢鈔銀兩相應逐一察明從實回話察得張家灣宣課司麴價每年額徵銀肆千肆百兩該司解部剗發光祿寺交納除崇禎貳年以前逋欠銀兩因灣城被虜蹂躪居民慘戮該臣堂官畢自嚴於崇禎叁年伍月內題奉

欽依悉行蠲免訖其崇禎叁年分麴價銀兩除完過壹千柒百壹拾兩伍錢陸分外其未完銀貳千陸百捌拾玖兩肆錢肆分因該年逆虜於伍月內出口城門始開商賈輸納不前亦經題奉

欽依准從寬政在案實欠崇禎肆年分麴價銀貳千陸百柒拾伍兩肆錢肆分節經行文該司催解未完今奉

明旨凜切隨行文經管宣課司刻期另行完解外至於臣司所轄太倉所欠該寺年例果品及協濟錢鈔銀兩察得崇禎

肆年捌月內該先任郎中林鍾呈堂具題割發天啓米年併崇禎元貳兩年果品銀共貳千叁百柒拾叁兩伍錢叁分柒釐又先發崇禎貳年內錢鈔銀叁千兩通割太倉銀庫屢催給發去後祇因外解缺乏邊餉告急庫臣那湊不前迄今尚未給發實非臣司之緩視也今奉

明旨又復呈堂亟催前項已割未發銀伍千叁百柒拾叁兩伍錢零再發崇禎叁肆兩年果品銀壹千伍百捌拾貳兩叁錢伍分捌釐又發崇禎叁肆兩年內協濟錢鈔銀貳千兩連前通共銀捌千玖百伍拾伍兩捌錢玖分伍釐於本月拾陸日兌給該寺差官朱國棟張應宿領回取有實收存案訖餘欠銀兩值今庫藏如洗萬難一時湊足稍俟外解至日竭力補完無敢毫釐虧額良以臣司所欠光祿寺銀委係

王食急需自當按期完解第苦年來

國計空匱庚癸頻仍遂多那東補西捉襟露肘實非敢有玩視以取罪譴也茲奉

天語詰責除臣席榮待罪外相應據實回話伏乞

皇上軫念時艱計詘更憐微臣署事甫止旬日且奉

命之後已發過銀捌千玖百有零更祈弘沛

雨露之恩俯寬斧鉞之誅俾自今以往容臣與新任諸臣懲前

毖後按季催發不敢再有虧延也

崇禎陸年正月拾柒日

貳拾壹日奉

聖旨上供錢糧積年拖欠及奉察詰輒以邊餉那補爲辭顯屬
濶消支飾李公門旣受事未久姑且不究歷年該管司官著
該部察明具奏張灣三年分趨價原叅欠數這本說題奉從
寬何故異同協濟錢鈔銀歷來欠數甚多如何止以千數塞
責併舊欠牲口等銀今應作何完給通著該部奏明

禮部右侍郎協理詹事府事臣林鈺謹

奏爲

聖恩疊被如

天臣病仰承無地謹瀝血再申前

請懇祈

矜憐允放以無誤官守事臣於去年拾壹月拾捌日因病具疏
乞身奉

聖旨林鈺學行素優館士方資模範著卽出供職不必陳請該
部知道欽此隨具香案扶掖叩頭謝

恩外臣病中感激思欲速痊以遵

明旨時藥攻火炙治之太急不覺元氣損傷矣拾貳月貳拾日

奉有掌院之

命臣益勉勵以圖報稱卽欲見

朝謝

恩而試之跪拜兩脚筋痛起止拘攣是以未敢遽覲
天顏恐其隕越獲戾也恭遇

聖節

元旦謹於私寓安排香案望

闕扶掖叩頭然竟跼蹐不能自安欲具疏再懇時值

禁封不敢以病之一字瑣瀆

天聽今臣病在筋骨日夜痛楚求愈難期而掌院印務又久虛
不得伏思自有官守以來豈有經月不能見

朝謝

恩而可受篆理事者乎又豈有不堪理事而尤冒昧竊祿者乎
此臣萬不獲已而再哀求於

君父之前者也伏乞

皇上鑒臣真病苦情

賜臣回籍調理庶公務無曠而臣厚徼

覆載生成之德於無涯矣

崇禎陸年正月拾捌日

貳拾壹日奉

聖旨掌院教習正資端品林鈞著遵旨卽出供職不得頻請該
部知道

山西道試御史臣王一鶚謹

題爲春陽已布解澤宜敷敬陳安民體臣之要以順

天道以廣

皇仁事臣陸年外吏質迂效渺蒙

恩拔置臺班清夜思竭涓埃仰酬

高厚數月以來伏見

皇上敬

天愛民出於誠至蠲復優免停止事例老穉扶杖加額願觀

德化然而熙寧未臻乖沴未弭近讀禮部災異彙報壹疏風霾

地震赤旱洪流層見疊出而且三冬無雪春深乃現寒燠

易形陰陽凌節此其徵矣臣竊謂

天心仁愛

帝德欽崇當此陽和布令必有一番

大政事

大德澤足以調燮元氣搏挽災祥鼓盪天下於春臺之域新進小臣不敢侈談泛引請就安民體臣貳事爲

皇上切陳之臣謹按月令曰孟冬行春令則凍閉不密地氣發洩民多流亡夫民之流亡繇於貧困貧困之故在重斂而無與恤也今水旱所在寇盜接踵閭里耕作不暇有司迫於

功令新徵舊逋追呼趾錯致令小民喪其樂生之心僣者填壑悍者揭竿近如閩之莆田以嚴賦逐其令此等景象恐所憂不獨東西貳寇也古者國當陽月有蠲租之令有賑窮之令其在今日卽無望議蠲議賑而民爲邦本本固邦寧臣謂宜

明詔戶部約天下省直處所酌其錢糧多寡若何款項緩急若何催徵難易若何歲穀豐荒若何次第叁等分別考成略畱餘步爲守令撫循之藉其有災盜重被額賦難供則當

體

皇上所軫恤淮揚賑救山陝者推廣行之與其屢呼不應官府受催科之名曷若酌量蠲免

朝廷存懷保之實庶幾獲薪可載哀鴻可集釜魚可生乎又臣考諸洪範五行傳曰刑罰妄加如羣不附則陽氣勝其罰恒暘夫所謂妄加者非必盡無罪之人也或疑輕而反以重或因過而誤爲故失人所傷倍於失出先王明慎用刑而不畱獄誠重之也

皇上仁明欽恤千古無兩然比年

詔繫者數見矣諸臣情罪本末自有司刑迺讞議再上而未蒙俞旨此在

皇上慎於用法初無苛求但恐

聖怒所加法司執持不力奉行或過輕重出入之間所損

皇仁不小亢暢過中象必爲鬱此臺臣郭必昌梁士濟所爲累

牘踵

請也目今履端叶吉草木禽鳥竝若咸熙而簪笏侍從之臣猶
囚首圜牆不獲偕飛走庶類共適

光天妻子環泣道路酸心或亦動

皇上深憫乎願

明詔問刑衙門及時平讞輕重如情應矜豁者卽與矜豁應歸
結者卽與歸結其有事雖重大情實可原通國共惜者尤
望

皇上平心博觀

特恩矜赦

養惇大之休

釋株連之累蓋所以導陽和疏陰滯順

天心善人事義備諸此夫是貳者安民也體臣也固

皇上素所加意亦閣部諸大臣所當匡順恐後者也古人恥其

君不及堯舜今諸大臣躬逢

堯舜

皇上有仁民之仁大臣當輔以仁民之術

皇上有好生之德大臣當廣以好生之量司讞者以平反爲守
法操計者以根本爲厚圖贊襄

密勿者以積誠爲格心之本正誼爲淑世之方以開心布公集

思廣益爲尊

主庇民之要夫然

明良泰而

天地叶政事和而瘡札消清明吉祥之報自茲歲正月始詩曰宜

民宜人受祿于

天又曰俾爾戩穀罄無不宜臣且爲

皇上歌

天保誦嘉樂矣

崇禎陸年正月拾捌日

貳拾壹日奉

聖旨恤民體臣素切朕念其守令撫循全在潔已清耗何得但恃蠲賑至繫臣情罪及明允速獻已有屢旨了該部知道

戶部尚書臣畢自嚴等謹

題爲兩邑之利病關切參輔之安危目覩最真敬伸末議以
廣

皇仁以蘇衝疲以固

畿甸事專理新餉山東清吏司案呈崇禎伍年拾貳月貳拾
捌日奉本部送戶科鈔出南京浙江道試監察御史左佩
玪題前事條議邢臺沙河貳縣召買驛站事宜并察蠲沙
地錢糧等緣繇本年拾貳月貳拾伍日奉

聖旨該部看議具奏欽此欽遵鈔出到部送司除邢臺縣龍岡
驛裁減工食應否量添西山裁汰巡司應否復設貳款事
隸兵部聽該部議覆外所議召買量改折色俾納本色并
察蠲沙河一帶錢糧相應議覆案呈到部該臣等看得北
直之苦於召買極矣先是臣部於肆年肆月終因旱陳言
條上拾事內壹款議將新餉錢糧量收本色以抵召買奉

有召買量收本色卽如議飭行之

旨通行在案旣而督餉御史吳煥題爲召買米豆責成官買官解一疏臣部於肆年拾月內覆奉

欽依亦通行在案臣等方謂繼此

畿南召買庶幾有瘳乎今南臺臣左佩琰曾經身歷邢沙貳縣目擊召買之艱議將每年應解米豆計畝均徵改納本色官爲雇運夫改納本色卽量收本色之意也官爲雇運卽官買官解之意也臺臣興議及此或亦斟酌成例爲兼舉便民之說耶今當再一申明除各處奉行有緒者不必紛更外其邢沙貳縣召買俱如議察炤時價量徵本色卽以抵坐定太倉舊餉并雜項新餉之數仍以時估有餘價值官爲雇運事完冊報銷算察考不許私派里甲苦累小民庶民無輸領轉折之苦官無徵買耽延之虞至於較定斗斛嚴禁加耗尤在該縣官加意奉行該撫按不時廉訪

耳其沙河縣沙河壹道兩岸沙磧沒胛數拾里不毛之地
輜軒經過者極目蕭條何以虛納錢糧相延未豁實不可
解然事關田賦遽難輕議應令該撫按勘明具奏以爲蠲
恤差等其所蠲之數仍宜設法抵補無失原額可也既經
具題前來相應覆

請恭候

命下臣部移咨該撫按轉行該縣一體遵奉施行

崇禎陸年正月拾玖日

貳拾貳日奉

聖旨這米豆改折本色依議行仍嚴禁私派私加重徵等弊如
違官役一體拏問其沙河虛糧著該撫按勘明奏奪

戶部尚書臣畢自嚴等謹

題爲酌議兌運腳價以裕邊儲事邊餉司案呈崇禎伍年拾月初壹日奉本部送戶科鈔出原任薊遼總督曹文衡題前事內稱看得糧糗爲三軍續命之膏須以時給發貔貅宿飽乃戰守可資若各邊口逼鄰虜窟一望黃沙商旅難通米珠堪軫西協肆路有離鎮城壹百肆拾里者必兌運索饒斯有備無患亦必腳價不虧斯輓輸無滯察中協路稱坦平兌運米豆計程拾里每石給腳價銀壹分伍釐西協石古曹牆半屬崎嶇山道往例計程拾里每石止給腳價銀壹分路之難易價之低昂已大懸殊矣今應炤中協兌運之例計程拾里每石腳價銀壹分伍釐足數給發如是而猶曰兌運難前斷難姑息各商腳價旣增復濟之以車兩竝運庶飛芻不疾而速官兵免庚癸之呼也等因拾

月初壹日奉

聖旨該部酌議具覆其未完漕米著該餉司速行驗曬勒限完納不得延玩致悞急需欽此又該順天撫按傳宗龍等會題前事拾月初捌日俱奉

聖旨知道了該部知道欽此又該本部題爲灼見弊源敬陳末議懇乞

聖明採擇以益安懷事內題覆西協監視鄧希詔條議驗樣米增腳價均糧餉緣繇拾月初捌日奉

聖旨奏內樣米著有司運官公同固封呈部司官驗米完運依議行密鎮腳價著併督撫會本速察議奏仍嚴釐扣減延緩諸弊兵分精嘗餉有差等經制已定何得額外增添這議均糧餉一節還著督撫監視會同按關貳臣詳議妥確奏奪欽此欽遵鈔出到部通送到司隨卽移文該鎮督撫再一酌議去後今奉本部送准薊遼總督傳宗龍咨前事內稱看

得西協腳價一事備察中協每拾里原給壹分伍釐西協路徑難行倍於中協而乞運腳價拾里止給壹分本部院撫薊時業已悉其應增之槩矣今應炤中協例每拾里給價壹分伍釐於以恤商困而裕邊儲似不待再計者等因到部奉批該司確察速覆送司奉此察得密鎮乞運各倉邊糧腳價前督撫監視題

請每石拾里加銀伍釐本部議覆每石仍以壹分拾里爲則復奉

明旨再著督撫會本察議今經咨覆前來在撫監或有見而請然每歲應乞邊糧爲數儘多則所加腳價應亦不貲應否依從其請或從中酌量稍增使奢儉適中等因呈奉堂批准炤原疏議增不必再減送司奉此相應察炤議覆案呈到部該臣等看得薊密漕糧派運各鎮邊倉乞運腳價每石拾里給銀壹分向係成例數亦不薄自崇禎貳年冬虜

警蹕躡車羸稀少薊鎮路當首衝芻運艱難每石拾里議
增至壹分伍釐今密鎮督撫監視因該鎮邊倉離鎮頗遠
慮路徑之難行憐各商之陪累遂援薊例會疏請增復經
咨議前來合應准從姑炤中協之例每石拾里增給腳價
銀壹分伍釐庶免不均之嘆於以恤商裕儲胥有賴矣其
增給錢糧於主客年例內通融支給按季報部銷算惟是
芻運腳價每石壹分原屬舊制今壹旦議增雖不得不然
但每米壹石或用腳價叁錢有奇亦煩費可惜異日邊方
安靖人煙湊集則薊密貳鎮仍須漸復

祖制以示節省可也恭候

命下臣部移文該鎮各衙門一體遵奉施行

崇禎陸年正月拾玖日

貳拾貳日奉

聖旨是

戶部福建司署司事員外郎臣孫陞謹

奏爲遵

旨回奏事崇禎伍年拾貳月貳拾叁日奉本部送戶科鈔出甲字庫掌庫事御馬監太監李陞等題爲存恤事崇禎伍年拾貳月貳拾壹日奉

聖旨知道了孤貧例給冬布係朝廷存恤德意自應蚤給俾沾實惠該部奉旨已久如何至今始行劄庫著該司官回將話來欽此欽遵鈔出到部送司該臣將臣莅任具題奉旨鈔發送司劄發日期并領劄投庫人役稽遲情繇一一據實

回

奏崇禎陸年正月初伍日奉

聖旨存恤遲緩如何反以孤貧不卽赴庫爲辭且領劄投送等事應否聽其轉托延挨該管官漫無察理孫陞併順天府官俱明白回奏該衙門知道欽此臣聞

命自天愈驚愈感一介小臣荷蒙

皇上堯仁舜德再寬斧鉞之誅卽損摩頂踵不能報稱萬一也
前疏臣甫任事卽呈堂具題

聖明已洞鑒矣今將從來根因併以後事宜詳陳之察得甲頭
領劄投送之例則有年矣且甲頭瞽目而轉托代領之人
亦有年矣至察延挨之故據馬實供吐兩縣孤貧有貳千
餘名口原不盡居養濟院中則有零星散處四方者不能
一時傳齊又必俟掛號完日然後同衆赴庫投領也此就
馬實自供詞狀如此臣據實明白回

奏不敢一字涉虛抑臣見得甲頭多係年老瞽目之人奔走
道路不便合無自今以後一面差役送劄甲字庫不必甲
頭領投轉托也一面差役送劄順天府移文大興宛平貳
縣預請庫發日期榜示衆知不必甲頭相傳耽延也庶孤
貧蚤沾

皇恩而甲頭亦獲老者安之之澤矣此臣區區愚衷可否伏候
聖裁再懇

天恩垂憐俯賜矜宥

崇禎陸年正月初玖日

貳拾貳日奉

聖旨庫劄漫委胥役一任延挨需勒孫陞已屬溺職及奉詰回
話又不認罪反捏稱舊例兼以口供及條議支詞掩飾好生
詭玩本當重處姑著降二級炤舊管事該部知道

監視宣鎮糧餉兵馬邊牆撫賞等事太監臣王坤謹

題爲清察班價壓欠數多乞

勅嚴催以濟邊工興作併入

考成重戒豫臣母悞邊計事臣察宣鎮之有河南等衛所班價也實爲本鎮修葺邊牆墩臺之用每年額解司庫銀玖千玖百壹拾叁兩捌錢其來遠矣頃因稽核司庫錢糧每見諸司取用班價不貲遂檄都司官吏逐察班價銀兩去後今據該司呈稱察自萬曆拾捌年正月起至泰昌元年拾貳月終止共該額解銀貳拾柒萬柒千伍百捌拾陸兩肆錢內除已完銀壹拾玖萬伍千叁拾捌兩叁錢伍分零尚該未完銀捌萬貳千伍百肆拾捌兩肆分零已於崇禎肆年柒月內蒙前任宣府巡撫沈榮案驗內云本年陸月內蒙兵部尚書熊明遇題

准泰昌元年至萬曆拾捌年舊欠班價遵

旨蠲免訖又除崇禎叁年分班價通完外今將察過河南等衛

所未完班價銀兩數目計開天啓元年分未完銀肆千玖
百陸拾貳兩玖錢伍分天啓貳年分未完銀叁千叁拾壹
兩玖錢柒分玖釐天啓叁年分未完銀叁千捌百伍拾兩
壹分捌釐伍毫天啓肆年分未完銀伍千壹百伍拾捌兩
玖錢天啓伍年分未完銀捌百貳拾伍兩壹錢捌分捌釐
天啓陸年分未完銀柒百肆拾貳兩貳錢肆分伍釐天啓
柒年分未完銀貳千壹百壹拾肆兩玖錢叁分柒釐崇禎
元年分未完銀捌千伍百伍拾柒兩柒錢崇禎貳年分未
完銀伍千玖百伍拾玖兩壹分叁釐崇禎肆年分未完銀
壹千叁百叁拾捌兩捌錢崇禎伍年分未完銀捌千肆百
貳拾柒兩壹錢以上共壹拾壹年共拖欠未完銀肆萬肆
千玖百陸拾捌兩捌錢叁分伍毫開報到臣據此看得班
軍納價乃踐更之役也計頭出納乃力役之征也使豫卒

安閑於丘井而宣入勞苦於巖邊計日修防終歲勤動乃計今拾有貳年共欠拾之肆伍拖延過半赴納不全豈以繼續之軍丁將同災荒之地糧可得蠲免乎臣莫解其端倪矣夫先年班軍裹糧遠涉每歲陪費且不貲旣免其人薄徵其銀誠極樂之願爭輸恐後者焉有逋欠之理蓋因痛癢無關秦越相視縱宣臣疾聲大呼而豫臣衷如充耳矧班價銀兩擊宣鎮安危目今東西交訐之日萬一邊備稍有疎虞豈獨無罪耶旣經該司開報欠數前來除移會撫按卽咨河南撫按嚴行各該衛所炤依前項未完年分班價數目銀兩逐一解補以充新議修邊之用庶邊腹之勞佚得均而衝疆之畚鍤無曠矣臣謹會同撫臣焦源清按臣胡志藩合詞具

題伏乞

嚴勅各該撫按作速催解補足前數仍祈

令入考成以戒藐玩

崇禎陸年正月拾陸日

貳拾貳日奉

聖旨這班價係邊工急需如何歷年逋欠明有侵隱情弊著河南該撫按嚴行察追勒限補解如再玩延將衛所該管各官叅來重治該部知道

監視宣鎮糧餉兵馬邊牆撫賞等事太監臣王坤謹

題爲恭報修過牆臺造發火器并出邊燒荒順採柴草各効勞内外文武官員伏乞

聖明俯加紀錄以昭激勸以勵邊臣事臣惟隨事圖功固臣子効忠之職分也而信賞必罰實

聖主勵世之權衡也臣以匪才濫竽監視日月逝矣片善無聞自甘待罪以明職業惟是壹歲之内不揣越俎叅効不職文武俱蒙

皇上察確顯罰之矣若其著力邊工精心造器及燒荒効勞官員不爲具

題紀錄則是有罰無賞何以激勸其將來耶臣今驗准守巡懷隆兵備道范鑛劉象瑤劉嘉遇各手本內稱修過牆臺造發火器數目及鎮守總兵官董繼舒手本開稱出口燒荒採過柴草數目効勞文武内外官員職名各等因備移

到臣准此看得宣鎮邊牆墩臺圯塌原多臣前題奉

明旨議修高堅寬闊容人列器欽遵行道尚在酌議方敢舉行
惟修過邊工併巡道劉象瑤打造過火器及督臣遺臣西
洋大砲肆拾位鎮城造見貯西洋等砲臣會撫鎮道分發
各城堡足資防禦者臣謹委中軍把牌武俊等分投察過
外至於燒荒一節本鎮自敘款以來未之舉也今瞰插酋
不測奴報頻仍臣與按鎮道會同剋期出口以其叢林豐
草付之一炬則數百里之間我可乘高遠瞭彼難倚跡潛
形而且順採柴草進口數多儘堪備用此則內外將士用
命奮庸其功亦不可泯也用是冒昧上

聞伏乞

皇上俯將在事効勞文武內外官員并

勅部監紀錄庶賞罰必信而人心激勵邊政益修矣臣謹會同

撫臣焦源清按臣胡志藩合詞具

題

計開

一修過城垣邊牆墩臺

分守道范鑛所隸

上西路叅將王濬督併守操等官黃忠等修完
土石邊牆共長柒百肆拾餘丈大邊墩臺貳
拾座腹裏接火墩臺捌座

下西路叅將查國寧督併守操等官徐自紳等
修完土石邊牆共長伍百伍拾壹丈伍尺

分巡道劉象瑤所隸

上北路叅將劉永壽督併守操等官陳上表等
修完甃土石砌城垣邊牆共長叁百捌拾玖
丈甃土墩臺叁拾伍座墩房貳間女牆壹丈
肆尺大藥局房貳間挑挖過城壕叁百貳拾

肆丈

下北路叅將管鳴珂督併守操等官沈俊猷等
修完石砌中牆叁拾伍丈貳尺石砌河壩伍

丈壹尺

中路叅將周紹先督併守操等官李承勳等修
完石砌邊牆壹百伍拾肆丈

懷隆道劉嘉遇所隸

上東路叅將張國威督併守備張登科等修完
執土石砌城垣邊牆共長叁百壹拾丈貳尺
女牆陸拾壹丈墩臺陸座墩房壹拾捌間境
門壹座

下東路叅將馬明英督併守操等官昌從文等
修完腹裏接火墩臺捌座

南山叅將姚化民督併守操等官楊中元等修

完甃土石砌邊牆長貳百柒拾丈伍尺腰女
牆長玖拾玖丈玖尺境門壹座營房教場神
機庫房共壹拾伍間

一造完火器

分巡道劉象瑤督造完大砲貳百肆拾位三眼槍
壹千陸百杆子母槍壹百杆子砲伍百玖拾
肆箇佛朗機壹拾柒位子砲壹百伍拾叁箇
鳥槍肆拾壹杆盔連腦包壹千頂副甲連遮
襠遮窩護項捌百肆拾領副臂手壹百副腰
刀壹百伍拾口甲釘壹百叁拾萬箇大弓伍
百伍拾張大箭壹萬捌千枝大小鉛子壹萬
斤小鐵子壹萬斤

保安州知州胡士棟捐俸自造滅虜砲捌位佛
朗機拾架鉛鐵子共叁百斤

一發過西洋大砲滅虜大砲并佛朗機火藥硝黃等

件

分守道范鑛所隸

上西路叅將王濬所管沿邊各城堡先行分發
過西洋砲貳拾捌位佛朗機貳架續發滅虜
大砲壹拾捌位火藥貳千斤硝貳萬玖千伍
百斤黃伍千斤又添買鉛子叁萬捌千陸百
貳拾箇鐵子壹拾伍萬玖千肆百柒拾箇

下西路叅將查國寧所管沿邊各城堡先行分
發過西洋砲壹拾伍位佛朗機壹架硝貳萬
柒千斤黃伍千斤又添買鉛子伍萬箇

南路叅將馬化龍所管係腹裏城堡量發過西
洋砲貳位硝壹萬斤黃貳千斤

分巡道劉象瑤所隸

上北路叅將劉永壽所管沿邊各城堡先行分發過大砲肆拾捌位西洋砲貳拾柒位佛朗機貳架硝壹萬玖千叁百斤黃貳千貳百斤又添買鉛子肆萬伍千肆百叁拾箇鐵子壹拾叁萬柒千陸百柒拾箇

下北路叅將管鳴珂所管沿邊及腹裏各城堡先行分發過大砲貳拾貳位西洋砲壹拾貳位佛朗機壹架硝壹萬伍百斤黃壹千捌百斤又添買鉛子貳萬捌千叁百箇鐵子柒萬陸千捌百陸拾箇

中路叅將周紹先所管沿邊各城堡先行分發大滅虜砲叁拾位西洋砲壹拾捌位佛朗機壹架硝壹萬捌千伍百斤黃貳千壹百斤又添買鉛子叁萬捌千叁百貳拾箇鐵子壹拾

肆萬柒千貳百柒拾箇

懷隆道劉嘉遇所隸

上東路叅將張國威所管沿邊及腹裏各城堡
先行分發過西洋砲壹拾肆位佛朗機壹架
硝壹萬伍千斤黃叁千斤又添買鉛子捌萬
叁百箇鐵子壹拾叁萬伍千貳百箇

下東路叅將馬明英所管腹裏各城堡先行分
發過西洋砲壹拾壹位佛朗機陸架硝玖千
伍百斤黃壹千玖百斤又添買鉛子壹拾萬
陸千伍百箇鐵子貳拾肆萬伍千肆百箇

南山叅將姚化民所管各城堡先行分發過西
洋砲壹拾位硝玖千斤黃壹千捌百斤又添
買鉛子肆萬肆千箇鐵子伍萬叁千柒百箇

一出邊燒荒

除會同按臣胡志藩餉臣張梧卽委硬弓蔣朝焦
遇選同在城同知張守約推官張魁宿芥之
偉都司岳可劉崇禮續日強總兵下都司張
承恩旗鼓千把等官陳洪範貳拾肆員固守
鎮城巡察倉場庫局以防不虞外

鎮守總兵官董繼舒親提官軍壹千伍百員名繇
馬營北柵口出邊貳百餘里督率將士直北
遠焚叁晝夜從鎮邊堡進邊

分守道范鑛所隸

上西路叅將王濬統率守備黃忠等坐營千把
楊道亨等帶領本路各堡兵馬壹千陸百員
名與同協守副總兵張懋功統領千把馬登
雲等帶領兵馬伍百名又守道范鑛率中軍
周維墉帶領健丁貳百名內中軍武俊硬弓

梁國用邊永泰率材官高汝溫等貳拾員名
監督繇新河口出邊焚燒叁晝夜會合下西
路官兵從洗馬林邊進口

下西路叅將查國寧統率守操徐自紳等千把
岳宗恒等帶領本路各堡兵馬壹千貳百伍
拾員名繇西陽河堡出邊焚燒叁晝夜至大
小青山會合上西路官兵從洗馬林邊進口
分巡道劉象瑤所隸

中路叅將周紹先統率守操吳始蘊等坐營千
總旗鼓武魁等帶領本路各堡兵馬捌百伍
拾員名同舊遊兵營遊擊石應雷都司守把
千總黃舉等兵馬叁百名硬弓趙欽監督繇
大白陽邊出口焚燒至青邊口進邊

正兵營遊擊郭秉忠統率千把邵承寵等兵馬

參百名同中路龍門城守備把總李承勳等
兵馬伍百名把牌王國忠硬弓劉國喜監督
繇龍門邊出口焚燒參晝夜至赤城邊野鷄
山門進邊

上北路叅將劉永壽與同閑任叅將杜維棟統
率守防陳上表等坐營千把郭邦輔等帶領
本路各堡兵馬壹千貳百員名又巡道劉象
瑤率中軍董正官帶領戰兵貳百名分防把
牌王大純監督繇獨石北柵口出邊焚燒參
晝夜從青泉堡邊進口

東協新兵營遊擊徐衛國同鎮守差內哨千總
郝効忠紅旗千把盧應選等督同坐營守把
秦大賓等帶領本營兵馬伍百名并本城鎮
寧馬營松樹等堡守防于廷輔等帶領兵馬

壹千員名繇馬營松君鎮寧等邊出口焚燒
叁晝夜從君子堡邊進口

下北路叅將管鳴珂統率守防許淳誠等坐營
杜光胤火器守備董正誼等帶領本路各堡
兵馬壹千名又同下東路叅將馬明英坐營
千把王宗禹等帶領兵馬伍百名并鎮守差
委千總馬璽同把牌邵宗順監督繇龍門所
邊出口焚燒叁晝夜從滴水崖邊進口

懷隆道劉嘉遇所隸

東路叅將張國威所管除永安堡四海冶黑漢
嶺周四溝劉斌堡等處地近

陵寢不便舉火炤舊樵採外惟統率守備李煥坐營千把張胤等
帶領兵馬捌百名與協同南山叅將姚化民
坐營把總楊科等帶領兵馬伍百名懷隆道

劉嘉遇率中軍王家裕帶領戰兵貳百名把牌劉國用監督繇靖胡堡東河口出邊焚燒叅晝夜從黃土嶺邊進口

一順採柴木草束

各路俱有順採堆積邊堡爲數甚多惟候各路報到合候

勅書至日造冊

奏繳

崇禎陸年正月拾陸日

貳拾貳日奉

聖旨該部覈議具奏

總督東廠官旗辦事司禮監太監臣王文政謹

題爲緝獲事該旗尉劉芳名史鳴鳳謝輔訪獲得侵剋

欽恤官布賣錢肥已背負

皇恩違法瞽目甲頭捌名各到廠內審得孔義供係順天府大興縣人招稱是義自幼失明與今在官瞽目夏祿董欽韓見劉科馬實蕭朝石剛各不合倚恃瞽目刁捏詞狀強充兩縣養濟院甲頭希圖虛冒錢糧舊例大興宛平二縣冊上有名瞽老殘疾男婦貧人貳千餘名口每年每名內庫給布壹疋是義等總領分給只合按名給散均需

皇恩各不合虛開花名冒領布疋賣錢肥已於崇禎伍年拾貳月內大興宛平二縣該給布疋是義與今在官甲頭夏祿董欽韓見劉科馬實蕭朝石剛并未到官甲頭張忠石應奎曹忠楊春羅奉王見張實梅自禮王全張祿李廷王紀焦成董亮袁定馮九順王越李海孟春王進忠劉見李朝

費忠張雄盧朋於本月內同大興宛平二縣差役憑該縣
印冊在於甲字庫關領布貳千零拾疋內大興縣冊上有
名瞽老殘疾男婦貧人玖百柒拾捌名口該領布玖百柒
拾捌疋是義該管捌拾壹名口除給散過布叁拾伍疋侵
剋布肆拾陸疋夏祿該管陸拾柒名口除給散過布貳拾
伍疋侵剋布肆拾貳疋董欽該管伍拾陸名口除給散過
布拾伍疋侵剋布肆拾壹疋韓見該管捌拾伍名口除給
散過布貳拾疋侵剋布陸拾伍疋劉科該管捌拾壹名口
除給散過布貳拾疋侵剋布陸拾壹疋宛平縣冊上有名
瞽老殘疾男婦貧人壹千叁拾貳名口該領布壹千零叁
拾貳疋馬實該管伍拾柒名口除給散過布貳拾壹疋侵
剋布叁拾陸疋蕭朝該管玖拾陸名口除給散過布貳拾
伍疋侵剋布柒拾壹疋石剛該管伍拾壹名口除給散過
布拾玖疋侵剋布叁拾貳疋其餘布疋係未到官甲頭張

忠王全等領去亦各侵剋不等是義等變賣官布間致被
 緝知蒙將義等拏獲到廠審供前情及審夏祿等各供情
 相同隨於孔義名下追出原侵剋布拾貳疋賣布銅錢貳
 百肆拾文夏祿名下追出原侵剋布拾壹疋賣布銅錢肆
 百捌拾文董欽名下追出原侵剋布貳拾伍疋賣布銅錢
 肆百文韓見名下追出原侵剋布拾柒疋賣布銅錢貳百
 肆拾文劉科名下追出原侵剋布拾叁疋賣布銅錢伍百
 陸拾文馬實名下追出原侵剋布玖疋賣布銅錢壹百陸
 拾文石剛名下追出原侵剋布拾疋蕭朝名下追出賣布
 銅錢壹千陸百捌拾文及追其餘布疋各犯執稱變賣使
 用花費無存惟恐不的再三研審執供無異據此合將違
 法瞽目犯人孔義夏祿董欽韓見劉科馬實石剛蕭朝連
 追出見在官布玖拾柒疋銅錢叁千柒百陸拾文伏乞

勅下刑部究擬併

勅該管衙門嚴革宿竇澄清將來庶幾悞得寔實澤而
欽恤之恩不致虛糜矣

崇禎陸年正月貳拾日

貳拾貳日奉

聖旨孔義等著送刑部究擬併張忠等及宛大差役通行提質
追擬具奏朝廷存恤德意徒供積猾虛冒該縣官所職何事
著吏部察明議處仍著該府通將縣冊覘報詭名徹底清查
務使窮民得沾實惠該衙門知道

順天府府尹臣莊欽鄰等謹

奏爲遵

旨回奏事本年正月初陸日據經歷司案呈准戶部福建司員外郎孫陞題覆孤貧關支冬布遲緩緣繇奉

聖旨存恤遲緩如何反以孤貧不卽赴庫爲辭且領割投送等事應否聽其轉託延挨該管官慢無察理孫陞併順天府官俱明白回奏該衙門知道欽此欽遵鈔出到部送司移府臣

聞

命驚惶仰窺

皇上如傷之視頃刻不寧隨行宛大貳縣察審馬實領割因何轉託投送何故延挨隨據貳縣申稱審據宛平縣孤貧王月李海等口稱馬實蒙戶部叫去回話半鄉未到職等恐稽回奏卽審王月等供稱凡孤貧人役非瞽目卽跛足多係老年殘疾癡聾咽啞之人行動艱難做事緩慢沿習已久因戶

部把門人役張春與馬實等素相認識凡投領公文倚靠已久此轉託張春之根因也至拾貳月初壹日張春將部劄送與馬實實接公文候逢叁陸玖日赴十庫科院掛號方准投庫因馬實瞽老有悞掛號兩期是以延至拾陸日方行投庫此延挨半月之始末也等因到臣該臣看得孤貧給散冬布雖係舊例實

皇上沛發之

恩膏也臣等待罪京兆爲

皇上牧養小民如許瑩獨上厓

聖衷臣敢不仰承

德意以彰

浩蕩之仁第先期呈請臣府職也奉劄而行臣府體也故先據宛大貳縣申請具呈戶部竝不敢後時刻該部具題奉有明旨於伍年拾壹月貳拾玖日行劄拾貳月初肆日到府臣等

隨卽行縣奉宣

恩澤貳千餘口無告之窮民咸懽欣歌舞荷
皇上生全之

恩如挾纊矣至於轉託領劄投送延挨據縣審王月等口供亦
屬真情但給劄責在部司題支事屬該庫各有司存臣等
不能越俎其領劄送劄之期臣實無從與聞也謹遵明白
回奏之

旨據實上

陳

崇禎陸年正月初玖日

貳拾貳日奉

聖旨存恤窮民該府不能飭屬實行致積猾包侵虛冊捏報據
東廠緝奏甚明乃奉旨詰問又徇庇支飾反以無從與聞爲

辭職掌安在莊欽鄰等姑且不究張春著刑部一併提去究
擬該衙門知道

吏科給事中臣曹履泰謹

題爲罪臣貪位無恥法無可寬小吏躁進逾涯漸不可長謹
據實糾叅懇祈

睿斷以信

功令以清仕路事臣竊炤

朝廷名位不容竊據而名位之最難假借者則外而秉鉞爲地
方安危所關內而司銓爲人才進退之鵠是以

皇上軫念封疆於失事諸臣凜凜曾不少貸至於銓司片席尤
不輕以予人進退賞罰惟法是視至公也亦至慎也孰意
有卸罪戀官如南贛巡撫陸問禮躡等倖進如吏部考功
司主事李希揆其人者公然敢於扞網自甘爲

聖世之罪人乎夫贛撫之設控制四藩爲鎖鑰重寄乃問禮身
領其事昨年當粵寇流突之時竟爾覓驚風鶴坐視鴟張
遂至屠鎮破城僵尸流血臣同官汪始亨臚列情狀罪案

昭然

皇上不卽加之斧鉞而責以戴罪圖功自贖問禮宜何如感恩
思報也者而不謂其惟怯如故朦飾亦如故也賊之來也
聽其殺掠而自以爲督兵勦捕賊之去也尾其後塵而自
以爲奮袂入閩賊之歸也饜飽思還而自以爲勦散兼施
一時喙息但知遮揜於目前不顧養癰於異日其視余大
成等失事諸臣之罪豈真薄乎云爾哉頃者伏讀

明旨尚容其降級管事夫法行而人畏奪壹人而天下知懼惟
恃有畫一之典在耳今若釋問禮不究則是失事之誅獨
嚴於諸臣而

曠蕩之恩偏渥於問禮究使負罪者起倖免之思異吞舟可以
漏網任事者無策勵之念謂嫫姆不妨錦衣苟且僨事到
處效倣是關於問禮壹人之處分其事小而關於疆吏之
勸懲其事大也臣所謂罪臣貪位法無可寬者此也若夫

外吏如知推等官參年考成殿最於是乎在其爲上上耶則俸滿候選其爲中中耶則挨次陞遷其爲下下耶則卑不及格黜逐隨之矣若未經考成則雖有捷足安敢爭先況夫銓司壹官獎恬抑競將持此以相天下士詎可身爲競首資天下士口實哉臣察李希揆者初授四川銅梁縣知縣纔玖箇月丁艱回籍後復除河南孟縣知縣又調河內縣知縣止兩年參箇月自到任以迄推陞實俸未及參年考成正自有待功罪未定何庸足酬乃銓司之轉出於格外夫誰作階梯而徼此非分之殊榮也乎及察推陞壹疏所敘希揆兩地履歷止載某年月日除授不載某年月日到任是將未綰綬之日爲實歷俸之日欺朦賄弊只圖倖得非希揆極有神通安能開此捷徑哉夫壹人之躁競無謂不足懲也臣恐壹人先登衆皆注睫將使爲外吏者瓜期未及免窟多營中人馳驚於功名遙作清華之夢不

肖專工於奔競全無職業之圖舍剌繡而倚門不力耕而望獲壞天下之吏治而啓仕路之爭端皆希揆作之俑也臣所謂小吏躁進漸不可長者此也臣在吏言吏例得糾
參伏乞

皇上勅下該部將貳臣嚴加看議殘破封疆者應坐何律朦朧速化者宜寘何條則

祖宗之功令信而仕路之鑽營塞其於

皇上銳意綜覈肅清吏弊豈小補哉

崇禎陸年正月貳拾日

貳拾貳日奉

聖旨陸問禮已有旨了還著策勵自贖李希揆俸未滿考朦轉銓司是何情弊著嚴察據實奏奪不得徇飾該部知道

禮部尚書臣黃汝良等謹

題爲謹循職掌釐正時弊并陳文體日靡世道可虞仰乞
聖明俯垂申飭以儆積玩以挽頽風事儀制清吏司案呈崇禎
伍年拾貳月貳拾捌日奉本部送禮科鈔出南京禮部尚
書李孫宸奏稱嘗讀魯論垂訓日能以禮讓爲國夫何有
故夫風俗之淳澆世道之所以爲治亂也然其自淳而澆
澆可還淳每視禮教之廢舉以爲轉移至若文章一途似
無喫緊乃與世運之盛衰升降脈脈關通子輿氏知言所
謂生心害政千古得失之林罔或爽焉米捌年間臣登仕
畱都所見風俗月異而歲不同家無擔石競飾豪富爲容名
廁膠庠亦與市儈同習中有里巷之雄不務恒業而惟結
把鷗局以營生又如衣中之蠹不語詩書而好挾上凌下
以爲武他不具論卽以關臣部職掌者言之

聖祖欽賜各寺莊田近伍百頃蘆洲又半之

欽錄勅書犁然具在用課朝夕焚祝爲

陵寢香火也乃百拾年來豪佃占爲己業膏潤起家化爲銅臭或藉寅濫衣中寺僧畏莫敢問前經司官葛寅亮清復半租轉盼弁髦依然不納今司官王則古沈正宗沈匡濟相繼清察始復葛額臣勒爲規則乘此租可贍僧因委司官多方設處修復各寺禪堂庶幾

朝廷香火少還其舊顧若輩狼貪暫伏鷹眼固未化也又如先年齊庶知瑾輩播惡悍網無非梟棍謝生洲卜彭年輩爲之投充撥置如虎傅翼釀成大愆致干

奏譴今在齊庶有庶總庶長家法可行臣部得以責成其約束顧若輩梟棍鼓煽誘惑實繁有徒旋懲旋起未易翦滅儻復致釀惡宗庶未免所傷實多此無論宗法所不能及卽在臣部未易令行而禁止也又如教坊司四院雖伶人卑賤然祇恭

享祭大祀等役載在職掌額設進

貢造辦錢糧亦安可使之魚肉窘蹙逃亡而棄業乎乃支應差役已自煩苦復遭刁棍招搖夥黨朋扳巧砌逼勒罄掠以致力盡皮穿日逐散亡先年樂籍貳千餘家今存止百餘戶臣部堂司因酌爲應革應減之數刻成書冊移文各衙門大家清豁嘉興甦息樂籍始稍安堵顧若輩梟棍嚇詐爲生首視教坊爲奇貨卽

祖制曾有紅牌日久且玩爲套語儻條禁但出部示未易永絕其屬饕也巳上參款凡臣部法可必行行可必久安敢瑣屑掇陳仰瀆

天聽惟是欲永杜其變更不可不各勒之板榜而非題奉欽依則榜不爲重其視臣部堂司不過郵亭之客而癡庶與弱緇孱樂直其掌中之雞肋上之肉耳至於近日文體則尤有不可勝其駭異者

國家以制義取士原尊傳註以翼經書制義體式原尚平正而貴典雅先年釐正文體凡考卷用佛書壹句以上降黜有差首場字過伍百者貼出不錄文理怪澀久通者亦先行貼出一時頗知顧畏乃今士喜剽竊之易售遂厭體認之爲迂不能爲平正則託爲新奇實不能新奇則跳之險詭以俚淺之意而出以譴深以易盡之詞而故爲浮曼以不可讀不可解爲玄奧以無起束無對偶爲新裁試掩命題便不知所作何語夫繪畫者不難神僊而難狗馬何者彼易假此難真也角射者不設正鵠則誰不可爲養繇基哉今膚淺主司旣爲詭譎所欺不辨賈鼎卽稍具鑒識者亦或以憐才之心而誤收之又或以投時之好而謬錄之此日詭遇獲禽之輩亦轉盼卽濫竽程士之人謬種相傳恬不爲怪亦安得不日趨日下而淪胥莫返乎臣頃待罪北禮見庚午壹科舉子之黜革罰科者若而人考官之罰

俸降秩者若而人深知

聖明欲振積弛不得不從

重典然於

賓興

盛典亦覺少光所傷

國體原不爲小固宜聾聵立醒無不翻然改變矣奈何錮疾
莫瘳適日轉甚傳來考卷有恢譎難通寫用釋典每篇字
溢千餘者今已逼近鄉闈與其懲創於賢書冒濫之後而
有傷

盛典孰若預飭於歲科考較之日而責成學臣則惟有察勘解
卷以爲殿最之一法第解卷必須原卷頗聞有收詭異以
投時趣而換解卷以欺部閱者宜通加申飭凡學臣換卷
解部卽以欺論不職按臣聞見必真舉劾入

告不得隱徇而凡試卷通先期府縣用印壹顆庶欲換解必另

發印或少有顧忌而不敢乎閱卷責在禮部然臣見禮卿儀郎職事繁劇勢難遍閱竊以爲當

聖明興起文運之日宜特設學政司官貳員專司各省考卷及兩闈硃卷磨勘摘叅之任量省分卷數多少分隸閱勘左右侍郎比正卿事簡各董壹員而細核之閱過各加筆跡送科覆加察駁乃將應叅若干卷議黜議降甄別上

聞以被叅之多寡爲學臣之殿最陞轉卽以摘叅之嚴縱定司官之才能風力責成嚴切誰復敢肩越其職掌衡文者束於禁旣不敢詭收異則作文者窮於遇自不得不返雅醇亦安見文體不可歸正而世運不可挽回也臣行能謏劣仰荷

皇上不棄其不肖裨之典禮

畱都畱都職事清簡臣若悠悠忽忽可以臥理竊祿顧念國家豐邑重地五方風氣每以南國爲視效宇內人文亦以

南國爲嚆矢不敢不職思其居少圖維挽而又不忍僅閱
我躬罔恤其後不覺媿媿字稍踰額冒昧上

聞仰乞

聖明垂念根本

嚴旨申飭

勅下該部覆議施行等因崇禎伍年拾貳月貳拾伍日奉

聖旨近來文體大壞皆繇無識學臣妄收詭譎以致士子轉相
摹倣雅式日乖所關世道人心不小這所奏專責部司科臣
磨勘試卷摘叅處治等事甚于學政有裨著詳議妥確速奏
其寺田等三款另本覆行禮部知道欽此欽遵鈔出到部送
司案呈到部內除寺田等叅款另本覆行外看得文體之
壞至今日而愈趨愈下非有挽回將莫底止今年又當
賓興臣等宜有申飭爲諸士規茲南禮臣亦慮及此特爲具

奏蒙

皇上采納俾臣部詳議臣等以爲文體之所繇正職在衡文則
慎簡學臣其當議也學臣須有品望有骨力而首重在衡
鑒衡鑒精庶得士在牝牡驪黃之外取文在規矩準繩之
中住時銓部每季發訪某堪督學九卿科道各舉所知今
不可踵而行乎果爲衆所推服預貯夾袋一遇缺出隨登
啓事註某係某舉所舉稱職則舉者註以得人否則舉者
亦同其罰庶在己不敢競營而在人不敢濫薦矣其繩學
臣則有磨勘試卷之法臣部原設有司官壹員專主學政
磨勘各省考卷及兩闈硃卷今恐壹人之目力有限合就
司中教習主事或別司主事有鑒別不爽情面不顧者容
臣等分命簡閱仍於卷內明註係某磨勘苟磨勘不到按
名而問之無所逃責矣且再經左右兩臣之細核與貳參
科臣之察駁法莫備於此矣似不必再設壹員也至於解
卷分別省分考過幾府縣卽陸續先解近者以季解稍遠

者以兩季解極遠者週歲類解不如期者聽臣部叅處其所解之卷必須原卷有換卷者卽以欺論按臣執簡隨之仍聽臣部叅處其卷中有怪誕不經不尊經傳而用佛書等語不尊體式而濫伍百餘字者士子徑行黜革學臣降罰有差至有典雅馴正可爲式者另選刻頒行學臣紀錄以勸可也凡此皆就南禮臣疏中所已悉者更加詳確以取

聖裁其未盡事宜容臣部另行條奏總期釐正文體挽回士風
母負

聖天子作人雅化而已

崇禎陸年正月貳拾日

貳拾貳日奉

聖旨奏內各款俱屢經申飭乃士風日偷文體日壞總因積習
錮沿視同故事今後試卷有文字不經冗長踰限及換卷解

部等弊除本生黜革外學臣叅處學臣不職舉主一體竝論
部科磨勘飢徇各坐所繇務在力行用期實效其餘未盡事
宜著詳議速奏以便頒行

福建道試御史臣黃金貴謹

題爲言路似通而實塞政府似重而實輕謹剖似是之非以致責成之實事臣聞言路之通塞國家之利害所繇關也自古嘉謨攸伏之朝言不患不通謂一通之而否隔無不通也惟上有懸輶設鐸之名而下多湮閼結轡之氣斯爲憂方大耳今日之言路何如哉

皇上明四目達四聰芻蕘可獻工瞽可箴街談巷語可集可謂通乎盜賊水旱之奏牘不啻鄭俠壹圖空虛單弱之情形已備魏徵拾漸且祝解網者祈使過者顙釋繫者徧滿公車特塵

聽覽可不謂通乎甚至無裨時事之條陳亦歸部覆兩可互持之議論仍費調停若不欲一事一言遺於獻納也者又可謂通乎臣以爲此通之似也而非其實也夫言路實實通者諫則必行言則必聽或偶觸忌諱則怒過而徐思之

或本激人言則言已而猶用之湯網時恢禹輦頻下獲一言期收一言之美利而今果盡然乎卽以舉劾一事言之舉壹人而未必用或用違其地而株累隨加劾壹人而未必去卽去已後時而觀望無已

輦下所傳爲絕響者惟一關於內員之口能使落職道臣頓還故物亦能使封疆勞吏立置投閑舌一掉而卽靈而栢府梧垣無敢望此丰采也詩曰憂心悄悄慍於羣小其今日言路之謂乎臣故曰言路似通而實塞也臣聞政府之重輕天下之安危所自出也自古乾綱獨攬之朝相不患不重謂一重之而事業無不重也惟上有都俞吁咈之遭而下鮮平章燮理之效斯爲患方深耳今日之政府何如哉

皇上闢堯明濬舜哲考慎其相

特簡

帝心不盡繇

廷議若金甌夢卜之外別有神符可不謂重乎自輔臣入閣
以來口代

天言手代

天批位望既崇威靈亦赫

雨露無所不涵濡而

綸扉獨渥

雷霆無所不震疊而政地獨寬可不謂重乎甚至人言屢及萬

不可挽之特而

褒諭頻加勉畱獨摯今日杜門明日入直若元首股肱之不可

暫離又可不謂重乎臣以爲此重之似也而非其實也夫

政府實實重者四方是維

天子是毗弼違必於其漸不徒矜揭救之爲功將美必於其萌
豈盡習逢迎以爲悅苟有裨於平治其何愛於髮膚多壹
人期多壹人之鴻業而今果盡然乎卽以票擬一事言之

禍福利害之見橫於中卽軍

國機宜漫以模稜爲卸脫方隅香火之情據於外卽睚眦註
誤必以透露爲機鋒邇來所艷爲美談者惟一當內員之
入

告微勞可錄獎與不靳其鋪張顯過可繩宛轉以行其袒護鼻
向人而斯息而鼎鉉

綸扉殊未見有豎立也詩曰有扁斯石履之卑兮其今日政
府之謂乎臣故曰政府似重而實輕也伏願我

皇上自爲耳目計於言路實實予之以通狂戇兼容愚誤曲宥
寧立見之施行無虛收之

採納卽不然亦勿以宵人分議論之權則言路清而羣忠競奮
矣

皇上自爲根本計於政府實實予之以重責以擔當程以啓沃
寧敬所可憚無樂所易親卽不然亦應以廉恥決去畱之

誼則政本端而治平立奏矣夫蓋臣瀝血以億謨惟欲厚
責其實

明主用人而致治不第薄收其名名實之辨不可不審也伏惟
聖明採擇施行

崇禎陸年正月拾玖日

貳拾貳日奉

聖旨言官以言爲職果敷陳足濟時艱糾察有資釐剔朝廷方
虛懷采聽若用舍諸臣自有本末何謂似通實塞至閣臣票
擬經朕鑒裁進退當以君命爲重黃金貴何得逞臆妄議該
部知道

中軍都督府帶俸陽武侯臣薛濂謹

奏爲遵

旨再奏事該臣於本月拾貳日遵

旨回奏壹疏復奉

聖旨前張登供明稱楊樂山先投鄭之俊釋放又投薛濂差人
拏搶豈無的據何得奉旨回奏但以強詞抵飾還著從實明
白奏來欽此莊誦

綸音跼天躋地身無所容臣前疏不敢深辯正恐涉於單詞不
見諒於

聖明是以一唯張登物色臣家奴執送法司治罪水落石出臣
之被誣虛實自見不意

聖明不賜洞察

嚴旨切責著臣從實回

奏事若有實何難從實奏

聞乞憐於

皇上乎卽如謝之元叅臣庇山賊受役獻若非楊御史審出非賊非獻乃吳應乾意中事臣終抱不自之冤矣今日張登澄口卽謝之元之掇奏也

皇上嚴旨至再著臣回

奏無非欲申法以懲戒耳臣卽冒昧妄陳將無作有將有作無恐屬虛誑臣則不敢且單詞亦難治罪何若令張登招供臣家奴何人闕提到部鞫其搶者何物兩造具備豈不愈於臣之單詞哉但以么麼之事兩塵

嚴旨乃臣不能律身仰負

浩蕩之罪伏乞

聖慈俯憐勳舊施法外之仁少寬

斧鉞之誅是臣覬覦於萬一也

崇禎陸年正月拾捌日

貳拾貳日奉

聖旨張登所供展轉投勢明屬有因薛濂再奏何故堅稱誣捏
著法司一面體訪仍將楊樂山張登等究明拏搶犯人嚴提
確招具奏不許徇縱

監視薊鎮東協署理關寧糧餉兵馬邊牆撫賞事務太監臣張國元謹
題爲派修羅城事崇禎陸年正月拾壹日准巡撫山永右僉
都御史楊嗣昌手本前事會開崇禎伍年拾貳月初柒日
准監視張太監手本准兵部手本該本部議覆前事奉
聖旨外城依議增拓以資捍禦其物料工作事宜仍著撫監酌
妥具奏欽此欽遵等因准此正月初叁日又准手本爲恭
報閱過山海形勢等事內開班夫既准會部請發訖其工料數
目相應催議妥確以憑會奏興工等因准此俱經備行該
道酌計去後案察拾貳月拾肆日據山海路叅將崔秉德
呈稱准關內道手本准監視手本前事會行到路隨行羅
城守備甯繼祖公同坐營呂應元將包修羅城丈尺應用
甄灰物料逐一估計得一羅城東面外口共長壹百貳拾
丈柒尺每丈下用鋪襯石壹層上接行鑿細石伍層共該
用細石陸百零叁丈伍尺上接青甄陸進收頂肆進每丈

用甎壹百貳拾塊計高平口貳丈伍尺共該用甎叁拾陸萬貳千貳百伍拾塊上接梁牆高伍尺伍寸每丈用甎叁百捌拾肆塊共該用甎肆萬陸千叁百陸拾捌塊用鶯不落甎玖百陸拾陸塊墁頂用方甎壹層共用方甎壹萬伍千肆百叁拾貳塊條甎貳層共用條甎陸萬壹千柒百貳拾捌塊每甎用灰叁斤共該用灰壹百肆拾玖萬陸千肆百肆拾貳斤每丈用軍夫壹拾柒名共該用軍夫貳千伍拾貳名每軍每日鹽菜銀貳分行糧米壹升伍合計工壹百日共該鹽菜銀肆千壹百零肆兩共該行糧米叁千柒拾捌石等因到路除覆估議明白外該卑職察得包修羅城必自外面就附舊城而下石條上甎砌幫出方免壯觀有裨實濟更須班軍得法熟修嘗兵佐之庶可刻竣其事緣繇隨經詳批據揭工程甚大不請班軍懼不能辦請班軍又懼分兩翼城之力也本院前議南海北山羅城米營

仍畱壹嘗辦料分隸該路及羅城守備刻日督工如不諳修砌再加該路修工軍士輟嘗年套工先完此舉何如關內道速議確併報去後今據該道呈稱羅城增包惟可拓之於外合計工料山海路言之詳矣惟是工程壹百貳拾丈米尺用夫貳千伍拾貳名非班兵不可蓋城之東面正當虜衝必得專工善手築砌方可經久而協路嘗兵止可幫助採薪辦料之役若用嘗兵壹千叁百伍拾名外再請班兵米百名急赴春和興工即可成之不日仍於南北腰城未甚相妨也等因具詳到院據此該本院復集諸將計議羅城包修固不容緩但今南北長邊閃裂圻縫岌岌將頽若不蚤爲修補前值春霖必且坍塌至盡設或有警堵禦安施此件綢繆固圉斷當在羅城之先而非今日之言也去冬彙報山海工程疏內開稱山海邊城

國初鼎建高僅貳丈有奇天啓初年始因奴警加增壹丈肆

尺經今拾載新舊土脈猶未相安凡丈肆尺以上非女牆
欹側則魚腹彭亨如遇陰雨連綿則不敢放砲火而其裏
口無孰一望斥鹵之地絕無堅土今年版築方訖明年傾
圯仍優是則闢門工作殆無了期非久於茲地者不知如
是之苦也等因

題明在卷今當估計丈尺卽日興工隨率諸將於本月初捌
日親詣南北兩城踏勘明白行據該路叅將崔秉德將勘
過南北邊城外口魚腹閃裂工程丈尺具揭報院內開南
邊城自南脊牆起壹段長壹拾伍丈伍尺高連築口壹丈
肆尺入深壹丈柒尺貳段長玖丈伍尺高連築口壹丈叁
尺入深柒捌尺不等叁段長叁拾丈高連築口壹丈貳尺
入深柒捌尺不等肆段長捌丈捌尺高連築口壹丈叁尺
入深伍陸尺不等北邊花樓迤北壹段長貳拾壹丈高連
築口壹丈伍尺伍寸入深貳丈壹尺伍寸貳段長壹拾柒

丈陸尺高連梁口壹丈壹尺八深米捌尺不等叁段長壹拾壹丈柒尺高連梁口壹丈叁尺八深米尺肆段長壹拾丈高連梁口壹丈貳尺八深伍陸尺不等緣繇據此計目今揚兵之後卽今儘有孰灰先行搬運俟其齊備將前門裂緊要寬長處所旋圻旋修待工夫稍有次第然後續辦羅城之料料果全完或借班營砌手或募州縣民匠整頓包修刻期完畢庶爲有濟若長邊未了驟議羅城辦料未完貿焉修砌則有頭無尾顧此失彼萬萬不能成也嘗兵計壹千叁百伍拾捌人分屬山海路及羅城守備實實燒執運灰採柴打石不得與精兵相溷其操練之兵壹人不可溷入此中此非各邊乾砌石牆可以衆手相幫通力合作之比其鹽菜行糧修兩邊閃裂者不必支惟計羅城壹百日通融支給卽工至百日以外亦不多支用示裁節既經估計續報前來相應會覆煩爲酌覆具

奏等因到臣該臣看得山海關起角山而南屬海鎮城雄踞於中所恃兩掖邊牆若左右翼顧單牆難守且歲久閃裂目今虜勢披猖撫臣楊嗣昌議於左右築兩小城以傳之其措置規畫纖悉畢備可以無大費而巨鎮屹然遂爲千古雄關壯氣臣樂觀歛成蓋計日俟之矣而羅城東面壹百貳拾餘丈窄而難守臣議展寬之亦勢之萬不可緩者惟物力難齊諒難並舉則不妨於翼城工就之日隨借班營砌手立刻包修而甄灰石料既估計已定則嘗兵壹千叁百伍拾人自當先時採辦以待興工毋使前工已竟後料未齊轉盼蹉跎竟成築舍若鹽菜行糧則百日之工通融支給於例當然非有浮濫也既經撫臣議定前來理合具

題臣謹會同巡撫山永右僉都御史臣楊嗣昌合詞具

崇禎陸年正月拾柒日

貳拾貳日奉

聖旨關門俟翼城工竣展修羅城既商酌停當著依議行仍先期辦料待用毋得延誤鹽菜行糧准通融支給該部知道

監視薊鎮東協署理關寧糧餉兵馬邊牆無賞事務太監臣張國元謹
題爲援例

請發班軍遵

旨修建仰祈

允發永奠巖關事崇禎陸年正月拾陸日准巡撫山永右僉都
御史楊嗣昌會棠前事會開該臣案炤崇禎肆年玖月拾
貳日准兵部咨爲遵

旨會奏建城事該本部題覆前事奉

聖旨這增建關城事情既經酌妥依議明春舉行楊嗣昌卽遵
成言以垂遠利毋得臨時多請工費妨誤邊防欽此欽遵該
臣隨於歲底移咨督臣云兩城並建工力浩繁原題班兵
柒千餘名在派定東協陸營之外今除原定陸營移咨保
定撫院催督來關分發燕建等路外其山海新議城工應
請另派數營合力鼎建庶爲有濟希將春秋兩防內酌察

工程稍緩處所再賜添發數營檄發來關速鳩

欽工此在一轉移之間而功著巖關不朽矣等因去後今於正月拾叁日准督臣傅宗龍咨稱各省班軍從來皆本部院爲政而又時值承平故得以酌量派撥自崇禎肆年兵部題定信地以後如關外柴營尚不敷用中協肆營兩班齊調僅足供董家口橋城之工昌鎮又係

陵寢重地而派定者亦只貳營至若西協肆營旣赴邊工今又議修築舊城深苦不足別無可應似應援例

請京班軍爲妥等因會覆到臣准此該臣看得山海一關限隔

華夏拱衛

陵京

祖宗建立意深慮遠臣見逆奴窺伺所在生心斗大一城有如孤注不憚披肝瀝血累牘連章言所不敢深言任所不能獨任幸蒙

聖鑒勅部覆行臣望班軍柒千壹歲而竣此役則金湯鞏固萬
萬年咽喉控扼肩背無虞此臣一點愚忠勉報

天恩萬一者也今准督臣咨示班營各有信地難以增添臣屬
東協肆路僅僅陸營內除真定民營該撫臣丁魁楚議留
操練臣愚未敢強爭外止得伍營而已石門壹路原派真
定車營燕河壹路原派定州營建昌壹路原派保定車營
邊衝信遠應修壞爛無窮寧敢那動計山海壹路止得河
間營兵壹千有零保定左營陸百有零尚餘海口未完之
工派新找舊大約分兩新城僅捌百人而已此捌百人敢
望修柒千人之工哉如此班軍有限年復壹年竟無版築
之期是終置山海於孤注而貽

陵京肩背種種之虞也問誰當關悠悠坐視臣死不足塞責矣察
得薊門叁協往例邊工緊急頻

請改撥京班臣敢比例上

請懇乞

聖明俯念首衝重地

允發京班陸千名與河間保左兩營相兼修築刻期告竣總此
 柴千人數行糧鹽菜不敢浪增非有溢於原議之外也其
 新兵貳嘗臣議采柴辦料者在石燕建叁路一切停止入
 操惟山海柴營量畱壹嘗共計壹千叁百伍拾名數以捌
 百屬山海路將伍百伍拾屬羅城守備經管采柴打石燒
 孰運灰先修南北兩邊閃裂外口壹百貳拾餘丈完日接
 續監視新

題幫砌羅城之役所以不能助兩城之工必

請京班陸千方克有濟三春去一展轉調發尚恐稽遲惟乞

聖明垂鑒速賜

允俞等因會棠到臣臣謹會同督臣傅宗龍巡撫臣楊嗣昌合

詞上

請伏乞

勅下兵部酌議速覆施行

崇禎陸年正月拾柒日

貳拾貳日奉

聖旨兵部酌議速覆

吏部尚書臣李長庚等謹

題爲遵

旨回奏事文選清吏司案呈崇禎伍年拾貳月貳拾肆日奉本部送吏科鈔出巡按山西監察御史羅元賓題爲條陳鹺政切要事宜仰祈

聖明採擇事內稱蒲州知州畢達叁年撈鹽止完肆分欠鹽貳萬叁千柒拾壹引貳拾斤經前鹽臣王與胤題叅部覆奉旨罰俸陸箇月戴罪補撈今肆年雖完及捌分僅應免議則其所罰之俸所欠之鹽如故也今報陞揚州府同知欲辭臣去矣將聽其去不問乎恐人皆效尤則叅罰之典祇爲空文人心將何儆

國課將何賴是亦不可以已乎等因具題崇禎伍年拾貳月貳拾叁日奉

聖旨該部覈議具覆內畢達既係罰俸戴罪何緣遽陞著吏部

奏明欽此欽遵鈔出到部送司察得戶部察叅事例凡有司
經徵京邊錢糧未完降職降俸住俸者俱停陞考而罰俸
者止將所罰俸銀扣解濟邊此向來之舊例也蒲州知州
畢達向因宗祿未完降職停陞繼因撈鹽不足戶咨罰俸
陸箇月至崇禎伍年捌月降職之叅已經戶部題咨開復
該本司署印員外郎金煉色於拾月內補捌月分推陞遂
據叅降開復之咨轉陞揚州府同知而罰俸一節想拘往
例未及致詳也茲鹽臣以未完之鹽仍復如故則本官之
責任尚未可卸似難准其陞轉合無將畢達仍畱本州補
撈遺下揚州府同知員缺另行銓補新補蒲州知州高向
輝就近改補山西平陽府隰州知州庶鹽有著落而各地
方不致缺人廢事也等因案呈到部看得山西蒲州知州
畢達推陞揚州府同知一節既經該司察呈前來相應據
實回奏合無將畢達仍畱蒲州補撈俟鹽斤報完之日另

議陞轉其新補蒲州知州高向輝改補山西平陽府隰州知州恭候

命下仍給憑行令到任管事遺下員缺另行銓補

崇禎陸年正月貳拾日

貳拾貳日奉

聖旨畢達既經鹽臣題叅奉旨戴罪補撈何得朦朧推陞顯有營徇別情豈得以罰俸舊例爲辭併金煉色俱著察明議處高向輝依議

工部尚書臣周士樸等謹

題爲訪獲埋藏軍器事虞衡清吏司案呈崇禎伍年拾貳月貳拾日奉本部送工科鈔出巡按直隸監察御史衛景瑗題前事內稱德左等衛隸在山東潼蒲等衛所隸在陝西寧山壹衛隸在山西諸弁世職生長彼中其俸糧之支給在各省也屯銀之徵收在各省也卽軍器之工價料銀以至節年之督造起解亦無不在各省也至與北直衙門稍有關涉者止因考選軍政例繇北直兩院會題故道府得奉文轉行是以有相轄之名耳非若真神貳衛轄於真定卽坐落真定也似當再請

聖裁下部酌議將德左寧潼蒲等衛所各於本省就近衙門肅其督責併行山東陝西山西各撫按轉行本省道府備察歷年軍器其工料等價彼中作何支領是否原徵價值與新式所費相懸從頭徹底逐一清釐而嚴督之庶幾積玩

可除責成有賴矣不然縱令北直各官日代隔省衛弁受罰而痛癢毫不相關何濟公家等因具題崇禎伍年拾貳月拾玖日奉

聖旨該部知道欽此欽遵鈔出到部送司奉此察得德左等衛軍器因其推諉稽遲業經呈堂咨行山東撫按協催去訖今寧山潼蒲等衛所隸在山陝應從衛御史所議行令該省撫按專責造解相應具題案呈到部該臣等看得衛弁造解軍器原隨省分徵糧科派此係

祖宗舊制今察屯銀之徵收德左等衛在山東潼關衛在陝西蒲州寧山等衛所在山西自當徑行該省撫按轉行司道府屬備察派辦錢糧嚴催造解以補缺額今各該衛弁因在北直鄰壤有考選軍政之會題借口統轄反滋躲閃至使軍器曠廢者多按臣衛景瑗熟察輿圖之正供備察額賦之所出議將德左等衛所專行本省嚴督造解殊得責成

之要伏乞

勅下臣部轉行山東山西陝西撫按衙門一體遵奉施行

崇禎陸年正月拾玖日

貳拾貳日奉

聖旨是

工部尚書臣周士樸等謹

題爲庫貯適當匱極金錢錙銖宜惜請乞

聖明勅存成料以備工需以昭博節事營繕清吏司案呈案察
崇禎伍年拾貳月內奉本部送據監督盔甲廠主事孫肇

興呈稱奉劄成造

朝鼓已完所有進鼓天橋事隸營繕司搭造伏乞批行該司
預備等因到部送司奉此隨經劄委主事胡永清督造去
後續該欽天監選擇搭造天橋在於崇禎陸年正月貳拾
陸日卯時進鼓吉期在於崇禎陸年貳月初叁日卯時俱
奉

欽依在案今據胡主事料估搭造天橋合用物料開除平頭
木壹百貳拾根杉條木壹千壹百伍拾根於山臺兩廠借
用工完炤數還廠并楸棍叁千伍百根於

神木廠取用夫匠量工雇覓難以預計外至於鋪戶買辦松

木席麻水膠蘆葦紅土螞蝗勾搭等項炤估算該銀肆百肆拾肆兩壹錢若炤住例夫匠約料相配共該工料銀捌百餘兩業經呈堂批准先給領狀陸百兩責令胡主事嚴督速造以期克襄

典禮夫平頭杉條楸棍等木原係廠貯所有業已准令給發惟需車運腳價而松木席麻等項既非現有之物勢不得不爲買辦但工屬搭造事完物存可備別工取用以省一番買辦合無請

旨申飭遵行等因案呈到部該臣等看得水衡之匱工作之繁邇來已稱竝極然

典禮攸關固有不吝不費之金錢而博節可施誠有不可不惜之物力卽據進鼓天橋一事除夫匠工價與廠存木植之外其應見辦物料輒計肆百餘金在今日成造成屬必需之數在將來拆卸寧無應存之物故收料旣宜確覈還

廠亦應簡點倘任人拆取全無稽察俾有用之物一旦歸之烏有豈不大可惜哉臣等不得不仰請

天語申飭責成監督件件炤出於以重事權而杜濫觴未必無裨益也既經該司案呈前來理合題

請恭候

命下臣部容臣等遵奉施行

崇禎陸年正月貳拾日

貳拾貳日奉

聖旨搭造材木自應責成監督稽覈收還何待請旨申飭今後一應用存料物有遺失盜竊的經管司官察明叅處

福建道試御史臣米助國謹

題爲敬陳安民實政以奏治平事臣筮仕江右首繁一吏拮

据陸年荷蒙

皇上拔置臺班仰戴高厚之

恩亦惟糾彈是職伏覩

皇上敬

天法

祖勤民直可媿堯舜而駕漢唐獨斥逐之言臣有宜

賜環以示恩者

詔獄之辜臣有宜解網以宏仁者降罰之諸臣有宜復級以疏

滯者章滿公車未蒙

俞允臣雖新進小臣亦當盟心入

告竊意

皇上淵衷無非因邇來狂激成風疎慢弱職必久持嚴重之威

而後中外臣工振厲濯磨爾時沛發

浩蕩之仁應釋者釋應復者復令天下懽呼感泣而後已未晚也
聖慮深微固非臣子所能仰窺萬一何敢以爲建白先資惟今
天下民生催科歛髓寇盜盈郊非急議救時要務海內元
氣

國家邦本將矣賴焉謹條議三事爲

皇上陳之一曰徵輸之法宜清也編戶之制壹里拾甲皆謂里
長各甲之下小戶隸焉歲僉里長壹人催徵闔里錢糧名
曰排年此定例也然民戶未有不納之糧差州縣恒多積
逋之解運其故惟何弊卽在於里催之總收也何也僉點
里排非不按糧責役往往非身家自愛者力求脫却則頑
猾有年者巧於兜營迨至頑猾一充此役額外之收不止
什一囊中之入何僅貳叁彼旣侵肥之甚必然輸納不前
勢不得不用拘捕刑繫自是追呼徧野已去幾何之浪費

敲扑盈庭半屬買倩之次身保歇吏胥就中巧索又毋論已誰匪惟正其侵若彼其費復爾既不在民亦不在官可爲太息更而張之莫若急革壹人總收之弊爲花戶自免之法其法令州縣正官於每歲開徵數月之前清察各里花戶丁糧確數每里壹冊冊內每戶壹款款內先定某戶條餉額該納銀若干比及開徵卽以冊付直收典吏名曰櫃冊又將糧道易知縣票丁糧派則戶給壹單填註本戶丁糧若干本年該納條銀若干餉銀若干務與冊符名曰清單諭令納銀持單赴兌無單者不收其所納銀數櫃吏眼同登填單冊如此則官有冊而某完某欠展卷瞭然民有單而實欠實完誰能再遁有仍包攬之舊者法無貸有玩催呼之緩者法亦無貸如此則姦民難容詭抗良民喜於樂輸雖有毫忽之人可必在官卽有毫忽之欠可尚在民民無侵費之害官無追比之擾其事雖繁法實最簡催

科得法卽爲撫字無有善於此者然此法行而零星免納耗羨滋彰所當再加釐飭者納戶必令自封自免直收之吏伍日更番止職填冊填單並不許容秤免上下之手無權何從過多於

皇上三令五申大耗之禁亦將不戒自除矣一日鄉兵之制宜講也試觀今日之域中非蹂躪於外變之寇兵則震蕩於內起之盜賊壹邑之內得壹鄉不可震蹂則壹邑爲安土壹郡之中得壹邑不可震蹂則壹郡爲寧宇合諸省

兩畿皆然則

皇輿爲壹大衽席矣從來安民禦盜惟保甲壹法然以語於今日無異塗羹何也勢豪富戶大力可以拔山其不頽首從事守望明矣貧弱細民左足捷於飛羽其不甘心爲人捍圍抑又明矣互相援察總成諛耳之談嚴行連坐徒滋毒民之令蓋其姓名不占於籍公檮不及其身徒恃區區文

法責以奮臂禦盜竭蹶捕亡有是理乎法宜於壹鄉之內以拾家爲率遴選壹人膽力極豪家產略備者爲兵就中擇其義勇敢服人心者以壹爲之長登冊報官器技則以火攻爲上勁弩次之槍矛又次之弓箭鑱箠之類舉皆不用第藥械無資肄演棄業有望而却走矢紳衿與殷實之家以所藏之厚薄分出貲之多寡繕器之外人給壹金貳金以當楔楸亦登冊報官州縣正官不時按閱稽察無事之時督聚訓練一遇有警合力齊驅不用命者嚴後至之誅能擒賊者懋旌功之賞若是則彼知名已載冊督之無可逃之責潤實微沾事至無可昧之心鄉兵始有實用弭盜始爲實著但今多事之時耳目易驚題之曰兵愚民疑慮調遣未有不潰駭者須深切曉諭壹鄉之兵捍圍壹鄉或彼鄉有警此鄉應援卽有秦晉潢池之變亦不令出邑境不時察閱亦必正官單騎獨往無驕從騷擾委官需索

之弊有兵之名無兵之苦直令其明白曉暢懽忻鼓舞壹鄉如此則壹鄉有虎豹在山之勢鄉鄉如此則到處有草木皆兵之象鼠竊狗偷無地可容羣聚不逞環顧落膽矣卽保甲成法自不可廢若必拘拘格套不急整頓恐呼之不應渙焉不屬弛之則一無可恃急之則祇增其擾臣未覩其可也一曰詞訟之囂宜息也臣觀海內民困極矣困於水旱困於徵輸約居陸米而困於構爭未必不居壹貳夫民之訟也非萬分鬱抑而鳴則一往暴氣所騁旣訟之後差役不啻豺狼吏胥以爲魚肉蕩析家產鬻賣妻孥纏綿至於歲月之久懊悔無從波累了無干涉之人報復不已此猶曰訟卽其人自貽伊戚耳至於事本極微有扛幫之手謊可漫天氣已漸平添嗾弄之人忿能指髮此猶曰雖受愚於人已實與焉至於赤身白棍視衙門爲戲局倚包攬作生涯族里之間少有角鬪刼殺之誣不脛而走院

司迨至勾攝疾呼有莫知其所自來者言之酸楚臣陸年
作吏知之頗悉再四圖維刁民好囂與姦棍包訟何地蔑
有息之之法民各有長壹族則有族長壹里則有里長巡
方按臣定爲詞式通行守巡酌量州縣大小每歲應用若
千歲首赴道印發州縣族長里長人給數張收掌同宗相
構則族長主之異姓相構則里長主之發詞原告並令書
名於上必真正命盜及姦惡詐僞重大事情許令具告非
印狀不准一切戶婚田土及睚眦之忿簞豆之爭通行示
令解分和處其應准印狀原告涉虛與命盜等項抑勒過
人者俱先治掌詞以罪院司以至州縣一體遵行如此則民
間激切之情獲立申於肺石而氣出暴猛事實輕微將何
所挾而狂呼耶至於扛唆包駕之姦卽有翻雲覆雨伎倆
絕無所施誠設誠而力行之不獨使民無訟行且風恬俗
美固空刑措之治可庶幾矣夫此三事者卑之無甚高論

泛視則屬迂談然於民不聊生所在思逞之時省民壹事
優費卽壹事休恬保民壹日寧靜卽壹日太平未必非救
時一壺

皇上嘉惠元元之梁肉也臣於是而更有進焉今撫按以至州
縣皆治民之官也然真與百姓痛癢相關呼吸相應者惟
州縣貳叁守令而已守令非人卽責以三者之法非格而
不行則焚而多事矣非多用甲科不可明經乙榜豈乏賢
能大都資定則委頓自徂望輕則振勵之難若夫甲科以
其風力振剔則可膽落豺狐以其仁明拊循則真民之父
母興壹利則竟興矣除壹害則竟除矣然激揚無術磨勵
不神

皇上責成撫按遴訪循良卓異之尤民譽蒸騰者具實奏
聞歲取數人徑優以銓垣之席而無狀不肖之尤者仍置嚴典
以彰勸懲民生吏治有不於變時雍者哉伏乞

聖明採擇急

勅部議題覆施行

崇禎陸年正月拾玖日

貳拾貳日奉

聖旨本內徵收詞訟二款著該部看議具覆餘俱有旨了

[G e n e r a l I n
f o r m a t i o n]

书名 = 中国明朝档案总汇
8 2

丛书名 =

作者 = 中国第一历史档案
馆，辽宁省档案馆编

出版社 =

出版日期 = 2 0 0 1 . 0
6

形态项 = 4 6 5

页数 = 4 6 5

原书定价 = 5 8 0 0 0
. 0 0

读秀号 = 0 0 0 0 0 7 4
5 4 3 3 8

SS号 = 1 2 2 2 5 4 2
4

ISBN = 7 - 5 6 3
3 - 3 1 7 6 - X /

K 2 4 8 . 0 6 3

分类号 = 1 1 0 3 0 4 0

4 0 8 & s w = D 6 D 0

B 9 0 X 1 . 9 0 F 9 0

0 P - 9 8 5 3 7 B 3 -

0 X 1 . 6 F E 8 8 0 P

- 1 3 5 F B 5 B 5 B 0

B 8 D 7 D C B B 2 . 6

3 6 8 5 1 E - 3 0 8 3

+ 8 2

主题词 =

参考文献格式 = 中国第一

历史档案馆，辽宁省档案馆编．中国明朝档案总汇
8 2．南宁市：广西师范大学出版社，2 0 0
1．0 6．

简介 = 全国古籍整理出版规划领导小组资助出版：
《武职选簿》是记载明代京内外各卫所职官袭替补选情况的登记簿，本册收“五军都督府所属卫所．后军都督府．万全都司．开平卫”等。

封面
书名
目录
正文